

顏魯公全集

黃本驥編
蔣環校

上海仿古書店發行

大清會典

案顏魯公畫像宋中興館閣書畫錄有顏魯公像一米芾畫史有唐人畫張志和顏魯公樵青圖又恭讀南薰殿尊藏歷代名臣像有顏真卿像一今皆未見惟宋靖康元年知同州軍州事唐重刻公像於奉使帖之下方跋云重旣摹公之像於蒲繪而祠之又訪得此石本狀貌老矣今蒲州之像不傳惟此石尙在同州府學茲據同州刻本經臨本驥識

上海圖書館藏書



A541 212 0009 7381B



欽定四庫全書總目提要

顏魯公集十五卷補遺一卷年譜一卷附錄一卷唐顏真卿撰真卿事蹟具唐書本傳其集見於藝文志者有吳興集十卷又廬州集十卷臨川集十卷至北宋皆亡有吳興沈氏者據摛遺佚編爲十五卷或歛爲之序但稱沈侯而不著名字嘉祐中又有宋敏求編本亦十五卷見館閣書目江休復嘉祐雜志極稱其採錄之博至南宋時又多漫漶不完嘉慶間留元剛守永嘉得敏求殘本十二卷失其三卷乃以所見真卿文別爲補遺併撰次年譜附之自爲後序後人復卽元剛之本分爲十五卷以符沈宋二本之原數沿及明代留本亦不其傳今世所行乃萬曆中眞卿裔孫允祚所刊脫漏舛錯盡失其舊獨此本爲錫山安國所刻雖已分十五卷然猶元剛原本也眞卿大節炳著史冊而文章典博莊重亦稱其爲人集中廟享議等篇說禮尤爲精粹特收拾於散佚之餘卽元剛所編亦不免闕略今考其遺文之見於石刻者往往爲元剛所未收讀詳加搜輯得殷府君夫人顏氏碑銘一首尉遲過廟碑銘一首太尉宋文貞公神道碑側記一首贈祕書少監顏君廟碑碑側記碑額陰記各一首竹山漁句詩一首奉使蔡州詩一首皆有碑帖現存又政和公主碑殘文顏元孫墓誌殘文二篇見江氏筆錄陶公粟里詩見困學紀聞今俱探出增入補遺卷內至留元剛所錄帝袞議其文旣與廟享議複見而篇末時議者舉然云云乃新唐書陳京傳敘事之詞亦非眞卿本文又干祿字書序乃顏元孫作眞卿特書之刻石元剛遂以爲眞卿文亦爲舛誤今並從刊削焉後附年譜一卷舊亦題元剛作而譜中所列詩文諸目多集中所無疑亦元剛因舊本增輯也元剛字茂潛丞相留正之子官終起居舍人

欽定四庫全書簡明目錄

顏魯公集十五卷補遺一卷附錄一卷唐顏真卿撰原本久佚此本乃宋敏求掇拾重編得十五卷至南宋又佚其三卷留元剛爲蒐緝補完併訂正年譜附於末然真卿詩文見於石刻者尙有尉遲迴碑等八篇見於說部者尙有政和公主碑等三篇則亦未爲賅備今併續採補入俾無更散遺焉

按唐書藝文志顏真卿有廬集十卷行狀作廬陵集提要誤作廬州集又云殷府君顏氏碑銘尉遲迴廟碑銘二首增入補遺卷今檢武英殿聚珍版文忠集內無此二碑又政和公主碑顏元孫墓誌殘文二首提要云據江氏筆錄探出今檢全唐文顏集內殷夫人顏氏尉遲迴和政公主顏元孫四碑皆有全文而和政公主提要誤作政和顏元孫神道碑提要誤作墓誌提要又云附年譜一卷今檢聚珍版文忠集無此卷又案聚珍版文忠集以全唐詩校之少水亭詠風溪館聽蟬二聯句詩以全唐文校之少象魏賦請除禳服奏請除素練聽政奏駁章陟諡忠孝議對三命判按楊志堅妻求別適判劉中使帖世系譜序送高寬仁序汎愛寺重修記湖州碑陰記橫山廟記項王碑陰述永字八法頌顏勤禮元孫允南幼輿允臧杲卿和政公主殷夫人顏君等八碑陸務滋贊蒲塘辨尉遲迴碑銘顏含太宗碑共二十有六首其見於史傳說部及石刻者新唐書禮樂志有請定武成廟釋奠奏杜佑通典有元陵儀注及更定昏禮奏宋刻汝帖有一行帖留元剛忠義堂帖有朝迴帖硤州帖捧袂帖乞米帖廬八倉曹帖鞏嶸忠義堂續帖有南來草篆江外送書四帖董其昌戲鴻堂帖有謝鹿脯奉辭近聞三帖合而計之又得十有八首今得補編入集

顏魯公年譜

宋留氏元剛撰魯公年譜附集以傳敘次簡明微嫌太略今博稽史傳詳採遺文按歲重編用便尋檢仍以留譜編入外集爲尙論嚆矢云本驥識

中宗景龍三年己酉公生（據舊唐書本傳公卒於興元元年年七十七歲推其生當在景龍二年新唐書本傳作七十六歲則其生當在是年然公有移蔡一帖作於貞元元年正月十九日則公卒實非興元元年矣今從新書德宗紀作貞元元年八月丙戌卒推至是年爲七十七歲是爲生公之年）公名真卿字清臣其先琅邪臨沂人五世祖之推於後周時始家關中遂爲京兆萬年人（舊書本傳作萬人臬卿傳作長安人萬年年長安皆京縣萬年今咸寧也）顏之得姓一謂魯公伯禽支庶食采於顏因而著族是爲姬姓之裔一謂邾武公夷甫字顏字孫遂以爲氏是謂曹姓之裔公從祖師古注急就篇主前說公撰太宗（爲公十三世祖舍作）家廟（爲公父惟貞作）二碑皆主後說（後說本於圈稱陳留風俗傳葛洪要字二家以左傳襄公二十九年齊侯娶於魯曰顏懿姬之文證之則顏實姬姓非曹姓以師古之注爲確）顏氏世爲魯之卿大夫孔門達者七十二人顏氏有八曰無繇曰無繇子回居德行之首爲亞聖曰辛曰之僕（大宗碑作僕）曰噲曰何曰高（家語作產今本家語作刻大宗碑作驕今從史記）曰祖（家語作相此從史記）又有濁鄒（左傳作庚呂覽作濁聚此從史記）丁闔叔子皆不在仲尼弟子之列戰國有率蠋（蠋見戰國策春秋後語作觸大宗碑作躡家廟碑作燭金石萃編誤以率燭爲一人故云未見有所謂率燭者）秦有芝貞漢有異肆安樂（安樂見後漢書儒林傳）魏有斐威（斐附見三國志倉慈傳）威爲青徐二州刺史關內侯始自

魯居於臨沂孝悌里是爲始遷琅邪之祖（顏氏唐無宰相世系表不著於新書今據大宗家廟等碑自感以下詳其所生）感生大中大夫廣陵太守給事中葛繹貞子欽欽生汝陰太守護軍襲葛繹子默默生晉侍中右光祿大夫本州大中正西平靖侯含（晉書有傳祖欽父默附見）含隨元帝渡江居上元生侍中光祿勳西平定侯髦（附見含傳）髦生州西曹騎都尉西平侯繚繚生宣城太守御史中丞靖之靖之生巴陵太守度支校尉騰之騰之生輔國江夏王參軍炳之炳之生齊治書侍御史（治書家廟碑作持書避高宗諱改）兼中丞見遠自含至此皆居上元見遠生梁鎮西記室參軍協（梁書有傳父見遠附見）協生子長之儀北周御正御史大夫麟趾學士集州刺史新野公（周書有傳）次之推北齊給事黃門侍郎待詔文林館平原太守隋東宮學士（齊書有傳）次之善隋葉令之推爲始遷京兆之祖三子長思魯隋司經校書東宮學士唐秦王記室次愨楚（新書藝文志作敏楚）侍御史次遊秦唐廉鄆二州刺史臨沂男思魯四子長師古秘監宏文館學士琳邪子戴公（新舊書皆有傳從父遊秦附見新書公傳謂公爲師古五世從孫師古與公會祖勤禮爲親兄弟則公乃師古之從曾孫傳作五世從孫誤）次相時秦王府崇賢學士諫議大夫禮部侍郎（附見兄師古傳）次勤禮校書著作夔府長史贈號州刺史次育德太子通事舍人司經局校定勤禮七子長昭甫（初名顯甫避中宗諱改名舊書杲卿傳作祖甫史官劉昫避晉高祖父紹嫌名去昭字）高宗侍讀曹王屬贈華州刺史次敬仲吏部郎中平昌男（新舊書附見殷踐猷傳）次殆庶無恤少連務滋辟強（昭甫敬仲乃勤禮元配殷氏出殆庶等五子乃繼配柳氏出柳爲中書令爽之妹爽以高祖廢后外祖坐與褚遂良朋黨被戮勤禮以爽累貶夔州長史而殆庶等亦以爽之甥不得仕進）昭甫二子長元孫滌沂豪三州刺史贈祕書監次惟貞薛王友柱國累贈祕書少監國子祭酒太子少保元孫五子長春卿偃師丞次杲卿太常丞攝常山太守拜衛尉卿贈太子太保諡忠節（新書杲卿傳云與眞卿同五

世祖案杲卿與公同祖五世字衍次曜卿直崇文館溜川司馬次旭卿允山令次茂會健爲司馬情由七子長闕疑杭州參軍次允南殿中侍御史膳部司封郎中金鄉男次喬卿富平尉次眞長舉明經次幼輿左清道兵曹次卽魯公也次允臧荆南行軍司馬（大宗家廟二碑皆載元孫五子惟貞七子公於同父兄弟其次當在第六於從父兄弟其次當在第十一公書家廟碑自稱第七男書干祿字書及殷夫人顏君碑皆自稱第十三姪蓋元孫六子惟貞八子各歿其一爲廟碑所未及又公作兄允南神道碑云惟貞府君之第二子作兄幼輿神道碑云惟貞府君之第六子則公兄之歿者當在允南之下幼輿之上矣又公撰殷踐猷墓碣云長妹蘭陵郡太夫人眞卿之先妣也中年孀嫠遺孤十人未能自振則公之同懷尙有兄若姊妹三人不止七人也故公撰勤禮碑云曾孫之無祿早世者尙有長卿晉卿邠充國質五人雖不能別其孰爲公之親兄弟而公兄弟之早世者亦在其中矣）

四年庚戌二歲六月殤帝唐隆元年七月睿宗景雲元年睿宗第五子彭城王隆業進封薛王父惟貞爲之友（唐六典親王府置友一人從四品下）是年公弟允臧生

景雲二年辛亥三歲公父惟貞以景雲二年正月爲蕭思亮撰墓誌銘其時尚在則公之孤當在二年正月以後三年壬子四歲正月睿宗太極元年五月延和元年八月明皇先天元年

先天二年癸丑五歲二月伯父元孫除滁州刺史廣德二年公爲追書其告十一月明皇開元元年

開元六年戊午十歲舊書傳云事親以孝聞新書傳云少孤母殷氏躬加訓導（殷氏新書作商氏史臣避宋太祖父諱宏殷故改殷爲商今更正案公高祖思魯娶於殷氏家廟碑額陰記所謂高祖妣殷夫人也會祖勤禮亦娶於殷氏公撰勤禮神道碑所謂娶御正中大夫殷英童女也祖昭甫又娶於殷氏家廟碑云昭甫工篆籀草隸與內弟殷仲容齊名昭甫之妻仲容之姊也父惟貞又娶於殷氏公撰殷踐猷墓碣云長妹蘭陵

郡太夫人眞卿先妣也公母爲英童之元孫太常博士子敬之女也長兄闕疑第六兄幼輿皆娶於殷氏闕疑娶殷履直之女公撰殷夫人顏君碑云六女幼適我兄闕疑幼輿娶踐猷之女公撰幼輿神道碑云夫人陳郡殷氏也公自高祖以來凡五世六人娶於殷氏公撰家廟碑云眞卿早孤公父惟貞之卒家廟碑僅云御史大夫張知泰妻魯郡夫人亡之秋七月未詳其年伯父元孫兄允南親自教誨又撰允南神道碑云家有折脛鶴眞卿小時戲書其背君切責曰此雖不能奮飛竟不惜其羽毛奚不仁之甚眞卿終身志之不敢忘

九年辛酉十三歲公隨母外祖殷子敬於吳縣令任子敬爲吳令見公撰舅氏踐猷墓碣公有刻虎邱清遠道士詩云不到東西寺於今五十春爲大歷六年至吳郡作逆推而上五十年故知是歲隨母來此七月踐猷卒於京師廣德二年公撰墓碣云長妹蘭陵郡太君眞卿先妣也中年孀廢遺孤十人未能自振君悉心訓獎皆究恩意故能長而有立

十六年戊辰二十歲舊書傳云少勤學業有詞藻尤工書新書傳云旣長遂博學工詞章

二十年壬申二十四歲七月伯父孫卒其子春卿翼城縣丞之任

二十一年癸酉二十五歲讀書於長安福山寺

二十二年甲戌二十六歲公以對三命判與馬兢同擢拔萃科舉進士第試梓材賦庫詩登甲科是年掌貢士選者爲考功員外郎孫逖舊書逖傳云所選多俊才杜鴻漸至宰輔顏眞卿爲尚書公序逖文集云公雅有清鑒典考功時精覈進士所獎擢者二十七人數年間宏詞判入甲第者十有六人授校書郎者九人其餘咸著名當世公娶京兆韋氏房州刺史景駿之孫太子中舍迪之女也

二十四年丙子二十八歲吏部擢判入高等授朝散郎（唐會要朝散郎從七品）祕書省著作局校書郎

二十五年丁丑年二十九歲正月至相州撰周太師尉遲迥銘（碑爲閻伯瓊撰敘蔡有鄰書在河南彰德府）七月至東都同祖姑錢塘丞殷履直妻卒公童孺時殷夫人嘗教以王孫五都等賦飛龍造化等篇後刺湖州時爲撰書墓碣

二十六年戊寅三十歲是年母殷夫人卒權厝於東都

二十九年辛巳三十三歲在東都從父兄偃師丞春卿卒新書春卿傳云臨終捉眞卿臂曰爾當大吾族顧我不得見以諸子誘汝後眞卿主其婚嫁

天寶元年壬午三十四歲是年歸京兆秋扶風郡太守崔琇舉公博學文詞秀逸科元宗御勤政樓策試上第十月授醴泉尉公過瑤臺寺懷園寂上人詩序云眞卿以天寶元年尉醴泉公與陳郡殷寅（公舅踐猷之子）河東柳芳南陸據蘭陵蕭穎士趙郡李華汝南邵軫鄧州趙曄同志友善故天寶中語曰殷顏柳陸蕭李邵趙以其重行誼敦交道也

二年癸未三十五歲罷醴泉尉事詣洛陽訪吳郡張旭於裴儼宅請授草書筆法新書旭傳云善草書傳其法者惟崔邈顏眞卿而已公自書帖云自南朝來上祖多以草隸篆籀爲當代所稱及至小子斯道大喪但會見張旭長史頗示少糟粕恨無分遂不能佳耳又作懷素草書歌序云吳郡張旭長史雖姿性顛逸超絕古今而楷法精詳特爲眞正卿早歲嘗接遊居屢蒙激勸告以筆法資質劣弱又嬰物務不能懇習迄用無成追思一言何可復得

五載丙戌三十八歲前在醴泉以清白聞爲關內道黜陟使王鉷所荐授通直郎（唐會要通直郎從七品）陟長安尋罷尉事再至洛陽寓裴儼宅月餘作張長史十二意筆法記仍歸長安

六載丁亥三十九歲四命爲監察御史充河東朔方軍試覆屯交兵使以陳郡殷克齊爲判官（克齊踐猷長子

攝之第三子）十月歸自河東立父惟貞墓碑（陸據撰文蔡有鄰八分書）

七載戊子四十歲八月充河西隴右軍試覆屯交兵使河南岑參作胡笳歌送之五原有寃獄久不決公至立辨之天方旱獄決乃雨郡人呼之爲御史雨時范陽魯炁爲隴右節度哥舒翰別奏公至隴右翰宴之公謂翰曰中丞自卽將授將軍便登節制後生可畏爲無人乎時炁立在階下翰指炁曰此人後當爲節度使矣是載公長子頗生

八載己丑四十一歲自河隴歸再充河東朔方軍試覆屯交兵使河東人鄭延祚母卒二十三年殯僧舍垣地眞卿劾奏之兄弟三十年不齒天下聳動八月自河朔歸遷殿中侍御史宋璟第四子渾爲中丞御史吉温以私怨搆渾謫賀州公曰奈何以一時忿欲危宋璟後乎尋爲宰相楊國忠所忌諷中丞蔣列奏爲東都畿（以唐洛陽爲東都）採訪使判官

九載庚寅四十二歲七月兄幼輿卒於長安八月再轉殿中侍御史公撰兄允南神道碑云元宗嘗撰華嶽碑並書天寶九載令御史大夫王鉞作百本以賜朝臣家獲二本者四族而君以兩省官（允南時爲左補闕）弟眞卿以殿中侍御史居其一焉每正至朝賀宰相以下登殿者不過三十人而君與眞卿法服於含元殿舞蹈而衣袂接焉（大宗家廟二碑皆載此事云舞蹈而衣袂相接者三）朝覲宴集必同行列故兄賦詩云誰言百人會兄弟也露陪

十載辛卯四十三歲公弟允臧以制舉縣令對策及第授延昌令

十一載壬辰年四十四歲遷武部員外郎（是年正月改兵部爲武部）判南曹書南陽岑勛撰多寶塔感應碑公書之傳於今者以此碑爲始自書銜云判尚書武部員外郎金石萃編云是時公爲東都探訪判官此碑（嘗云判探訪何以云判尚書不知公爲國忠所忌出爲探訪判官此外官也由侍御史再轉而爲武部員外

郎則入爲朝官矣安得復判採訪其曰判尙書者員外郎掌武官選舉總判武部尙書所掌事耳舊書武部員外郎上有轉侍御史四字新書以再轉二字易之故萃編冒上採訪判官讀之因而致誤書駕部郎中程浩撰夫人廟堂碑（今存殘本七十一字爲華州王氏所藏其全文見元至正元年太平路總管賈度重摹本多寶塔碑及是碑皆建於四月二十二日戊戌是載四月爲丁丑朔故二十二日爲戊戌二碑皆誤書作乙丑）書自撰工部尙書郭虛己碑河南府參軍郭揆碑

十二載癸巳四十五歲六月詔補尙書十數人爲郡守宰相楊國忠怒公不附己謾稱精擇以公出守平原郡元宗宴公等於蓬萊前殿賦詩贈帛以寵其行河南岑參作詩送之時河東節度安祿山逆節頗著公至平原以霖雨爲託修城浚池陰料丁壯儲廩實乃陽會文士泛舟外池飲酒賦詩或讒於祿山祿山亦密偵之以書生不足虞也公自典校時卽考五世祖之推與陸法言所定切韻引說文蒼雅諸書窮其訓解次以經史子集中兩字以上成句者廣而編之以其鏡照原本無所不見名曰韻海鏡源至是與郡人渤海封紹高質族弟渾等修之成二百卷屬祿山作亂止其四分之一九月魯山令元德秀卒公書其墓碑後人爭摸寫之與李華撰文李陽冰篆額及德秀人品爲四絕（趙氏金石錄謂是碑爲建中四年秋書其時公已爲李希烈所困安得爲德秀書碑據李華撰德秀碑云德秀卒於天寶十二載九月則魯公書碑當在是載之後）

十三載甲午四十六歲在平原二月書晉夏侯湛撰漢太中大夫東方朔像贊并書自撰碑陰記（碑在今陵縣署）

十四載乙未四十七歲在平原（公之爲平原在天寶十二載留譜於十四載下又云轉兵部員外郎公旣以武部員外郎出爲平原不得於此再轉兵部且兵部卽武部也留譜誤）十一月安祿山舉范陽兵反河朔盡陷獨平原城守具備乃使司兵參軍李平馳奏之元宗初聞祿山之變曰河北二十四郡豈無一忠臣乎得

平至大喜顧左右曰朕不識顏眞卿形狀何如所爲乃若此祿山初尙移牒至公令以博平軍屯七千人防河津以博平太守張獻直爲副公乃募勇士旬日得萬人遣錄士參軍李擇交統之簡閱以刁萬歲和琳徐皓馬相如高抗朗等爲將河間司法李旻殺祿山所署長史王懷忠濟南太守李隨殺祿山所署博平太守馬冀饒陽太守盧全誠景城司馬李暉鄴郡太守王燾各以衆歸有詔北海太守賀蘭進明率精銳五千濟河爲助十二月十二日祿山陷洛陽殺東郡留守李愷中丞盧奕判官蔣清以三首遣段子光來徇河北公恐搖人心乃詐謂諸將曰我識此三人首皆非也遂腰斬子光密藏三首異日乃取三首冠飾草續支體棺殮祭殯爲位痛哭人心益附祿山遣其將李欽湊高逸何千年守土門公遣甥盧遜至常山告郡守從父兄杲卿相與起義兵犄角斷賊歸路以紓西寇之勢杲卿乃與長史袁履謙謀殺欽湊擒逸千年送京師土門旣開清池尉賈載鹽山尉穆寧共斬僞署景城守劉道元傳首平原公召載寧及清河尉張澹詣平原計事十七郡同日歸順共推公爲帥得兵二十餘萬橫絕燕趙軍威大振其附祿山者惟范陽盧龍密雲漁陽汲鄴六郡而已祿山方自率衆而西至陝號聞河北有變而還

十五載丙申四十八歲正月八日賊將史思明陷常山杲卿死之於是鄴廣平鉅鹿趙郡上谷博陵文安魏都信都復爲賊守公乃以李暉自副而用李銑賈載沈震爲判官乙巳以充本郡防禦使守城功詔加戶部侍郎依前平原太守三月加河北招討採訪使清河客李粵年二十餘與郡人來乞師謂公曰聞公義烈首唱大順河朔諸郡恃公爲長城今清河實公之西鄰也僕幸寓家得其虛實知可爲長者用今計其蓄積足以三平原之富士卒可以二平原之強公因而撫之腹心輔車之郡其他小城運之如臂使指耳唯公所意誰敢不從公曰吾兵新集未練何暇及鄰然子之請兵欲何爲乎粵曰清河非力不足而借公之師也亦以觀大賢之名義耳今仰瞻高意未有決辭定色僕何敢遽言所爲公奇之欲與之兵衆以粵爲年少輕慮必無所

成公不得已辭之。粵就館復爲書說公曰：清河去逆效順，奉粟帛器械以資軍公，乃不納而疑之。僕回轅之後，清河不能孤立，必有所繫託。將爲公西面之強敵，公能無悔乎？公大驚，遽詣其館，以兵六千人借之。《舊唐書》作一千從新書。粵將去，公謂之曰：兵已行矣，可以言子之所爲。吾子何以教我？粵曰：今聞朝廷使程千里統衆十萬，自太行東下，將出嚙口爲賊所扼，兵不得前。今若先伐魏都，斬其守將，袁知泰、太守司馬垂使爲西南主，分兵開嚙口之路，出千里之兵，因討汲鄴，以北至於幽陵，平原、清河合同，志十萬之衆，徇洛陽，分兵而制其衝計。王師不下二十萬，河南、義兵西向者亦不下十萬，公但當表朝廷，堅壁無與挑戰，不數十日，賊必潰而相圖矣。公然之，乃移檄清河等郡，遣其大將李擇交、副將平原縣令范東、馥裨將和琳、徐浩等進兵，與清河四千人合勢，而博平以千人來，三郡之師屯於博平。去堂邑縣西南十里，賊帥袁知泰遣其將白嗣深、乙舒蒙等以二萬人來拒戰。六月癸未，朔賊大敗，斬首萬餘級。軍聲大振，知泰走汲郡。史思明圍饒陽，遣游奕兵絕平原，救軍公懼不敵，以書招賀蘭進明將步騎五千渡河，公陳兵逆之，相揖哭於馬上，哀動行伍。進明屯平原城南，公每事咨之。由是軍權稍移於進明，公不以爲嫌。復以堂邑之功，讓之。進明奏其狀，取捨任意，敕加進明河北招討使，擇交等徵進資。清河博平有功者，皆不錄。進明攻信都，久之不克。參軍第五琦勸進明厚以金帛募勇士，乃克之。會平盧將劉正臣以漁陽歸，公欲堅其意，遣賈載越海遺軍資十餘萬，以子頗爲質。頗甫十歲，軍中固請留之，不從。時范陽節度使李光弼合汾陽王郭子儀之兵，敗思明於嘉山平原之圍，遂解。

十五載丙申四十八歲正月，加戶部侍郎兼平原郡太守。三月，兼河北招討採訪使。七月，肅宗卽位，靈武改元。至德有賀卽位表，初公聞李光弼下井陘，卽斂兵還平原。及聞郭李西入，始復區處河北軍事。數遣使張雲子、主簿李銑等以蠟丸裏書由閑道上表陳事。授工部尚書兼御史大夫。又加銀青光祿大夫，仍以河北招討

探訪處置使守平原時肅宗所致赦書亦以蠟丸達公公頒下諸郡又遣人頒於河南江淮由是諸道始知上卽位於靈武徇國之心益堅劉正臣等尅期南來行已有日祿山乘虛遣史思明尹子奇急攻河北諸郡公使和琳以一萬二千人馬百匹救河間琳爲子奇所擒河間饒陽景城樂安遂相次陷沒獨平原博平清河三郡城守十月祿山又遣騎將康沒野波攻平原公覺之兵馬旣盡人心危盪不可復振公乃棄郡渡河沒野波緩策不追及聞渡河乃佯爲追躡是以得脫於難歷江淮荆襄與各道探訪使計會兵馬竟不可得而平原等郡遂盡陷於賊是載公次襄城時節度使魯炅保南陽爲賊所圍城中食盡中使曹日昇來宣慰路絕不得入請單騎入致命襄陽太守魏仲犀不可公曰曹使旣果決不顧萬死之地何得沮之縱爲賊所獲是亡一使者苟得入城則萬人之心固矣公何愛焉仲犀乃以騎助之賊不敢逼日昇旣入城衆皆踴躍

至德二載丁酉四十九歲二月帝至鳳翔召公赴行在四月公朝鳳翔行至武當郡奉詔除憲部尙書（憲部卽刑部改名）有讓表六月加御史大夫有謝表（留譜云新書行狀月日不同今從家譜）八月弟允臧以監察御史遷殿中侍御史公上表謝時仲兄允南遷司膳郎中奉詔給驛召至鳳翔與公相見當代榮之中書舍人崔漪帶酒容入朝公劾之貶右庶子又劾諫議大夫李何忌在臥不肅且彈其不孝宰相房瑄黨何忌遽託以酒醉入朝貶爲西平郡司馬十月元帥廣平王（卽代宗）領朔方蕃漢兵號二十萬來收長安出辭之日百僚致謁於朝堂百僚拜王答拜辭亦如之王當闕不乘馬步出木馬門而後乘管崇嗣爲王都虞侯先王上馬公進狀彈之肅宗曰朕兒子每出諄諄教誡之故不敢失禮崇嗣老將有足疾姑優容之卿勿復言乃以奏狀還公肅宗將還西京遣左司郎中李巽先行陳告宗廟之禮有司署祝文稱嗣皇帝公謂禮儀使崔器曰上皇在蜀可乎器遽奏改之中旨宣勞以爲名儒深達禮體時太廟爲賊所毀公奏曰春秋時新宮災魯成公三日哭今太廟旣爲賊毀請築壇於野皇帝東向哭然後遣使竟不能從（肅宗紀十月

丁卯上入長安九廟爲賊所焚上素服哭於廟三日據此則公之奏固已酌而從之矣舊書本傳與紀異）公扈從還京時允南遷司封郎中允臧爲殿中公爲尙書兄弟三人同時臺省公於軍國之事知無不言爲宰相所忌（是月宰相爲崔圓李麟苗晉卿二人）十二月出爲同州刺史有謝表（是載十二月始復郡太守爲州刺史十一月尙無同州刺史之稱故新書本傳改爲馮翊太守案公集謝表亦稱同州刺史與舊書合則公之到同州任當是十二月事）道過郃陽有烈士左伯桃墓詩（詩佚）

三載戊戌五十歲二月肅宗改元乾元三月轉蒲州刺史充本州防禦使有謝上表封丹陽縣開國侯（舊書本傳無丹陽之封新書作丹陽縣子行狀作丹陽縣開國子）案公書祭姪季明文及放生池表皆署丹陽縣開國侯攷職官志上州刺史爵開國侯蒲上州也不應封子陽作楊侯作子皆史誤也）四月贈祖昭南華州刺史公嘗手書其告有謝贈祖官表五月贈杲卿太子太保杲卿被害時張通幽譖於楊國忠故不加贈至是公表其枉諡曰忠節公與兄國子司業允南表謝九月書自撰祭姪季明文有草稿存十月戊申赴蒲州辛亥過華陰題名金天王廟（金天王華嶽神也開元元年十月封題名刻在周天和碑側）公遣從子泉明至河北訪求血屬初李光弼郭子儀收復常山出杲卿袁履謙及將吏等妻女數百人於獄轉徙賊中窮窘無告泉明悉以歸蒲州公贍給久之資送歸里泉明又以公命購其父杲卿尸於河北弟季明尸於洛陽杲卿失一足季明得其首公以杲卿尸與張湊所歸髮葬於長安而以季明附焉公爲御史唐明誣劾貶饒州刺史道過東京作祭伯父豪州刺史元孫文（元孫墓在東京鷓店東北高村原）

乾元二年己亥五十一歲公在饒州民苦盜公計擒首惡磔諸市四境肅然有顏司徒碑銘六月拜昇州刺史（江寧郡以元年改置昇州）充浙江西道節度使兼江寧軍使有謝表擢權臯爲行軍司馬（臯德權之子）是年有與蔣明遠帖李侍御寫真贊有天下放生池碑銘

三年庚子五十二歲時揚州長史劉展將反公豫飭戰備都統李峘以爲生事非短之（明年十一月展果舉兵反峘與展戰於淮上敗績）二月以杭州刺史侯令儀代爲昇州刺史召公入朝爲刑部侍郎（舊書本傳作刑部尚書今從新書）閏四月肅宗改元上元公作朝議大夫徐秀神道碑七月作乞御書天下放生池碑額表八月宰相李輔國矯詔遷元宗居西宮公乃首率百僚上表請問起居輔國惡之又爲御史中丞敬羽所誣貶蓬州長史公由嘉陵路出閬州新政縣作鮮于氏離堆記（在今四川南部縣）

上元二年辛丑五十三歲是年九月去年號稱元年以十一月爲首歲公在蓬州救災恤患民頌其德

元年壬寅五十四歲是年復以建巳爲四月改元寶應閏四月代宗卽位五月拜公利州刺史屬羌賊圍州城不得入詔赴上都七月以仲兄國子司業允南官贈父惟貞祕書少監母殷氏蘭陵郡太夫人二告皆公自書有謝表（案肅宗以是年四月丁卯崩少監告身下於七月二十七日謝表批答當是代宗家廟碑作肅宗蓋奉制在四月以前至七月始下告耳）十一月允南卒公爲撰神道碑十二月戶部侍郎劉晏以公文學正直舉以自代詔從之以晏爲國子祭酒以公爲戶部侍郎有謝表

寶應二年癸卯五十五歲三月改吏部侍郎（舊書本傳作戶部新書作吏部據放生池碑陰記蓋由戶部轉吏部也）加銀青光祿大夫有謝表七月代宗改元廣德八月荆南節度使李峴入爲宗正卿拜公江陵尹兼御史大夫充荆南節度觀察處置使有謝表舉壽安尉殷寅爲推官未行以衛伯玉代之除公尚書右丞（舊書本傳作左丞從新書）十月吐蕃犯京畿公扈從至陝州十二月車駕將還京師公請先謁五陵九廟而後還宮宰相元載曰所見雖美其如不合事宜何公怒前曰用捨在相公耳言者何罪朝廷之事豈堪相公再破壞邪載深銜之有工部尚書臧懷恪神道碑

二年甲辰五十六歲元年八月河北副元帥僕固懷恩拒命於汾州公請奉詔召之是年正月癸未改檢校刑部

尙書兼御史大夫充朔方行營汾晉等六州宣慰使未行公曰臣往請行者時也今方受命事無益矣上問其故對曰懷恩阻兵是其反側明矣頃陛下避狄於陝臣方責以春秋之義云寡君蒙塵於郊敢不恭問官守當是時也懷恩來朝以助討賊則其辭順今陛下攘去犬戎卽宮京邑懷恩進不勤王退不釋衆其辭曲必不來矣且明懷恩反者獨河東節度辛雲京澤潞節度李抱玉及中官駱奉先魚朝恩四人耳自外朝臣咸言其枉然懷恩將士皆郭子儀部曲信結其心陛下何不以子儀代之喻以禍福必相率而歸耳上從之留公知省事二月有與李太保帖三月伯父元孫贈祕書監公表謝是月晉封魯郡開國公食邑三千戶八月作和政公主神道碑（公主肅宗女降河東柳潭）十一月朝士以汾陽王郭子儀及其子先鋒晞破土蕃歸因爲興道之會尙書左僕射郭英又詔事軍容使魚朝恩擠八座尙書坐其下公移書糾之有草稿存是月作伯父元孫神道碑作贈太保李光弼神道碑（碑爲張少悌書在陝西富平縣）書自撰贈太保郭敬之家廟碑（敬之子儀之父在陝西布政司）又有與李太保帖是冬兄幼輿卒於江陵

永泰元年乙巳五十七歲八月作刑部侍郎孫逖文集序作左金吾衛大將軍康阿義屈達千神道碑十月有與李太保帖

二年丙午五十八歲公在刑部時元載引用私黨懼朝士論奏其短乃請百官凡欲論事皆先白長官長官白宰相然後上聞公上疏切諫中人爭寫內本布於外二月攝祭太廟以祭器不修言於朝元載坐以誹謗貶硤州別駕書硤州帖又有廟享議朝會有故去樂議三月移貶吉州司馬道出潯陽書舊作左伯桃墓詩於蒲塘客舍有蒲塘辨六月書東林西林二寺題名十一月代宗改元大歷

大歷二年丁未五十九歲在吉州著廬陵集十卷正月書自撰京兆尹鮮于向神道碑十月書祖關二大字於靖居寺有靖居寺題名書守政帖

三年戊申六十歲在吉州三月作井山華姑仙壇碑作南嶽魏夫人仙壇碑四月除撫州刺史爲神霄觀道士譚仙巖書馬伏波語十一月弟允臧卒於江陵（時允臧以江少尹受代徵入未行而卒）

四年己酉六十一歲在撫州與州人左輔元姜如璧等取舊著韻海鏡源二百卷增廣之成五百卷四月作兄幼輿弟允臧神道碑歸祔幼輿允臧於上都時同生十人零落皆盡惟公獨存作寶應寺翻經室記華蓋山王郭二眞君壇記

五年庚戌六十二歲在撫州治陂灌田民賴其利公歿後州人建祠祀之宋會輦爲之記正月一日書逍遙樓三大字（碑在廣西臨江縣）三月作贈梁州刺史徐秀碑（碑爲韓擇木八分書李陽冰篆額）四月作舅氏曹州司法殷踐猷墓碣又書自撰踐猷子大斌令攝碑十二月作廣平相國宋璟神道碑（碑在直隸沙河縣）

六年辛亥六十三歲三月作寶應寺律藏院戒壇記閏三月罷撫州事命左輔元編次臨川集十卷四月書自撰麻姑山仙壇記又書小字麻姑壇記書前道州刺史元結撰大唐中興頌（在湖南祁陽縣悟溪磨崖刻）八月至上元縣撰慈恩寺常住莊地碑（碑爲韓擇木八分書代宗篆額）十一月拜十三世祖晉西平靖侯含墓書自撰大宗碑（自含以後七世皆葬上元幕府山）作題虎邱清遠道士詩後詩（宋留元剛忠義堂帖有公書虎邱清遠道士詩及公自題詩款云大歷五年十二月十日刑部尚書顏眞卿書案公爲刑部尚書不在此時大歷五年公在撫州不應題詩虎邱此詩當是六年公至上元時作題款及書皆僞託也）

七年壬子六十四歲五月至宋州書自撰汴宋節度使田神功八關齋會記（碑在河南歸德府）九月歸至東京起家除湖州刺史十一月自東京遷母蘭陵郡君柩歸葬上都祖塋有與夫人帖

八年癸丑六十五歲正月至湖州刺史任七月追建放生池碑銘公務之隙招集文士前殿中侍御史廣漢李壽

處士吳陸羽國子助教州人稽沖評事范陽湯清河（文集誤作評事湯某清河丞據竹山聯句石刻訂正

）太祝河東柳察長城丞潘述前梁縣尉河東裴脩常熟主簿蘭陵蕭存嘉興河南陸士修及後進楊遂初

崔宏揚德元胡仲南陽湯涉京兆韋介左興宗族人蔡（文集誤作蔡）策金陵沙門法海等取舊芳韻海

鏡源五百卷刪煩補闕爲三百六十卷於州學及放生池日相討論建韻海樓於郡治至冬徙於州西南村

山之妙峯寺寺爲梁武帝所置公建亭其中以癸丑十月癸卯朔二十一日癸亥成陸羽爲名之曰三癸亭

產丹青紫三桂桂下有支徑時殿中侍御史袁高爲浙西觀察判官巡部至州適會於此因呼爲御史徑公

有題杼山癸亭得暮字詩云歛搆三癸亭實爲陸生故又有謝陸處士杼山折青桂花見寄詩爲此亭作也

寺僧皎然字清晝謝靈運十世孫工詩辭公修韻海預其論著公有贈皎然詩云繕亭歷三癸趾趾鄰什寺

又云衛法大臣過佐游羣英萃謂袁侍御陸處士及同游諸子也先是正字殷佐明魏縣尉劉茂括州錄事

參軍范陽盧鏐江寧丞京兆韋寧壽州倉曹朱弁及周愿沈殷李莆族人渾暄等亦嘗同修韻海未畢各以

事去而起居郎裴郁祕書郎蔣志評事呂渭魏理沈益劉全白沈仲昌攝御史陸向沈祖山周闓司議邱悌

臨川令沈咸右衛兵曹張著兄慕弟薦薦校書郎權器興平丞韋桓尼及後進房夔崔密崔萬寶叔蒙裴繼

兄子超永穆丞峴公子頽顧等（妙喜寺記云愚子頽顧案大宗家廟二碑皆無頽顧之名當卽公子頽顧

原名也）往來山寺商推古今爲一時文從之盛有聯句詩一卷其與聯句之會者尙有起居舍人楊憑憑

弟協律郎凝拾遺耿漳侍御皇甫會推官康造同官主簿陸涓李觀詹事司直房益長城尉裴循柳淡吳筠

強蒙范縉王純王修甫史仲宣裴幼清釋塵外族子粲從子須顛頊等皆杼山游侶也（全唐詩聯句有李

益乃沈益房益之譌李益與李賀齊名在魯公之後）又嘗遊峴山觀左相李適之石罇斂飲爲樂十二月

有吳興沈氏述祖德記

九年甲寅六十六歲在湖州正月書伯父元孫干祿字書於刺史宅之東廳院韻海鏡源成作杼山妙峯寺碑三月作竹山聯句詩五月書自撰茅山道士李含光碑（碑在江蘇句容縣茅山玉晨觀）八月書舊撰天下放生池乞額表并撰碑陰記（碑刻忠義堂帖）作浪跡先生張志和碑

十年乙卯六十七歲在湖州八月魏博節度田承嗣將盧子期就擒於磁州十一月承嗣瀛州刺史吳希光以城降書近聞帖是年九月書自撰商州刺史歐陽瑾碑有元次山墓表時公子頗自河北歸頗以天寶十五載爲質於平盧將劉正臣時年十餘歲至是始歸僧皎然有奉賀顏使君二十八郎隔絕自河北遠歸詩二十八郎謂頗也其詩云相失值氛烟纔應掌上年久離驚貌長多難喜身全然公撰大宗家廟元孫杲卿等碑皆謂頗死逆胡之難大宗碑又謂頗工隸書太子洗馬家廟碑亦云頗工小楷洗馬而公撰高祖勤禮碑則云頗善隸書太子洗馬鄭王府司馬不幸短命蓋三碑俱撰於頗未歸之前當常山被陷時傳聞頗已遇害故朝廷有五品官之贈所謂太子洗馬鄭府司馬卽贈官也越十有七八年而頗始自河北歸其時年已三十內外矣至建中元年公刻家廟碑後記但言男顓男碩而不及頗蓋頗歸在大歷八年以後故公撰妙喜寺碑但云愚子顓顧（卽顓碩原名）而不及頗其卒當在建中元年以前故家廟碑仍載頗之贈官而後記則不列其名也

十一年丙辰六十八歲在湖州著吳興集十卷四月作博陵崔沔陋室銘記書自撰銀青光祿大夫康希銑神道碑初嘗溪東南有白蘋洲梁太守柳惲江南曲汀洲採白蘋日暮江南春後人因以名洲至是公始剪榛導流作七角亭及茅亭

十二年丁巳六十九歲公爲元載所忌斥外十有一年三月載伏誅四月作梁吳興太守柳惲西亭記五月作項

王碑陰述書自撰湖州射堂記書中書侍郎楊綰撰李抱玉碑是月公以綰薦召入朝八月擢刑部尚書公自書其告十一月以所著韻海鏡源三百六十卷獻於朝是月作友壻京兆尹杜濟墓誌并爲濟撰書神道碑書自撰殷履直妻姑顏君碑（碑在河南洛陽縣）

十三年戊午七十歲正月三上章乞致仕不許二月奉使謁昭陵有過瑤臺寺懷僧圓寂詩三月贈吏部尚書書自撰廣平相宋璟碑陰記（刻在沙河碑側）

十四年己未七十一歲五月代宗崩德宗嗣位公以本官充禮儀使有請除禫服奏請除素練聽政奏公以高祖以下七聖諡號文字繁多乃上議取初諡爲定兵部侍郎袁倓議云陵廟玉冊已刻不可輕改然實妄奏不知玉冊皆刻初諡而已七月書程浩撰馬璘新廟碑十月代宗神主將升祔太廟公以元皇帝代數已遠準禮合祧請遷於西夾室從之有議元皇帝祧遷狀

建中元年庚申七十二歲三月奏東都太廟闕木主請造詔下議之初武后於東都立高祖太宗高宗三廟至德亂後木主多亡缺於是議者有三一曰必存其廟徧立羣主時饗之二曰建廟存主而不祭若皇輿時巡則就饗焉三曰存其廟瘞其主駕或東幸則飾齋車奉京師羣廟之主以往不決而罷（舊書德宗紀及禮志但稱禮儀使奏未著公名時公領使職禮志又載會昌六年鄭亞等奏云兼與建中元年禮儀使顏真卿所奏事同卽此奏也）七月書自撰父惟貞家廟碑（碑在陝西西安府學）撰顏氏家譜一卷（新書藝文志載此譜未著撰人名公集有世系譜序撰於是年七月卽此譜也）八月罷吏部事時楊炎爲相惡之改太子少師（舊書作少傅從新書）充禮儀使如故外示崇寵實去其權也告有太后崇徽外家聯屬顧先勳舊方睦親姻等語考德宗母睿真太后爲吳興沈氏舊書后妃傳云妃父易直第二子祕書少監震公撰吳興沈氏述祖德記云南齊徵士沈麟士過江二十葉孫御史中丞震卽其人也記又云以真卿江南婚姻

之舊中外伯仲之穆則公與沈氏爲世戚故是告云太后崇徽外家聯屬然公之高祖母爲殷氏曾祖母爲殷柳二氏祖母及母皆殷氏伯父元孫妻元氏從兄杲卿妻崔氏同母兄闕疑幼與妻皆殷氏次兄允南妻陳氏公及弟允臧妻皆韋氏同祖姑二一適御史大夫張知泰一適錢塘丞殷履直從祖姑適劉氏其子同昇爲江南經略伯父元孫女適盧氏其子遜死杲卿之難公女適雋丞韋政其可考者皆非沈氏近姻惟公撰會祖勤禮碑云君外曾孫沈盈盧遜並爲逆賊所害沈盈不知何子之外孫顏沈之姻僅見於此所稱外家聯屬者當係晉西平靖侯含隨元帝過江徙居上元者凡七世時顏沈二家會締姻好故記云江南婚姻之舊而告遂及之蓋太后以宮女得幸生德宗於宮避史思明之亂逃散及德宗卽位訪求未得因母族單微故託顏氏舊姻以自重又爲起居舍人朱巨川兩書其告十月壬子以卽位恩封公子右率倉曹頴爲沂水男祕書正字頴爲新泰男自李義府許敬宗以凶事非臣子所宜言遂去國恤一篇由是天子凶禮闕焉故開元禮及新舊唐書皆無其儀惟鄭樵通典載有元陵儀注蓋數萬言其行禮次第粲然大備然未著爲何人所定元陵者代宗之陵也代宗以是年十月己酉葬於元陵其時公爲禮儀使則是儀必公之手筆歷代國恤莫大於此經世文章亦莫大於此編公集者於小說殘碑多所搜採獨遺此文不加考訂而登之於集殊闕憾也今爲補編十一月公奏郡縣主見舅姑請行執笄之禮并請罷觀華燭仗停墮車下壻却扇及昏夕聲樂等儀又改擇地置帳行於堂室中禁子午卯酉年娶婦俗忌並從之

二年辛酉七十三歲九月太常博士陳京請以獻懿二祖神主裕享太廟詔公卿集議議者有三一謂獻懿親遠而遷不當裕宜藏主西室二謂二祖宜裕食與太祖竝昭穆闕東位三謂引二祖裕禘卽太祖永不二向得全其始宜以主祔德明廟公請大裕享奉獻主東向懿主居昭景主居穆於是還二主裕於廟如公議（議載舊書禮志及新書陳京傳詳略互異）屬左輔元編訂禮樂集十卷（新書藝文志云公爲禮儀使所定

留譜誤作禮儀集）十月書自撰明州刺史王公德政碑（廣川書跋有王密碑當卽其人）

三年壬戌七十四歲宰相盧杞專權忌公八月改太子太師罷禮儀使杞論公曰方面之任何處爲便公候杞於中書曰眞卿以褊性爲小人所憎竄逐非一今已羸老幸相公庇之相公先中丞（先中丞謂杞父奕也天寶初拜御史中丞安祿山陷東都被殺傳首至平原公禮葬之事見前）傳首至平原面上血痕眞卿不敢衣拭以舌舐之相公忍不相容乎杞矍然下拜而含怒心

四年癸亥七十五歲正月庚寅淮西都統李希烈反陷汝州甲午盧杞奏曰顏眞卿四方所信使往諭之可不勞師旅上從之朝廷失色宣武軍節度使李勉聞之以爲失一元老貽朝廷羞乃密表請留又遣逆於路不及至河南河南尹鄭叔則以希烈反狀明勸不行公答曰君命可避乎初見希烈於許州欲宣詔旨希烈養子千餘人露刃爭前迫公將食其肉諸將叢繞慢罵舉刀以擬之公不動希烈遽以身蔽之而麾其衆衆退乃揖公就館舍因逼爲章表令雪己願罷兵公遣兄子峴與從吏凡數輩繼來京師皆爲杞所格不報每與諸子書嚴奉家廟恤諸孤而已希烈欲遣公還會李元平在座公責之元平慚以密啓白希烈遂留不遣時幽州節度朱滔深趙節度王武俊魏博節度田悅淄青節度李納各遣使詣希烈勸進希烈召示之曰四王見推不謀而同豈吾獨爲朝廷所忌無所自容邪公曰此乃四凶何謂四王相公不自保功業爲唐忠臣乃與亂臣賊子相從求與之同覆滅邪希烈不悅他日大宴逆黨召公使坐觀倡優斥黷朝政爲戲公怒曰相公人臣也柰何使此曹如是乎拂衣而起希烈慚亦呵止時滔及王武俊田悅李納使在坐目公謂希烈曰聞太師名德久矣相公欲建大號而太師至非天命正位欲求宰相孰先太師乎公正色叱之曰是何宰相邪君等聞顏杲卿無是吾兄也祿山反首舉義兵及被害詬罵不絕於口吾今年向八十官至太師守吾兄之節死而後已豈受汝輩誘脅邪諸賊不敢復言希烈乃拘公令甲士十人守掘方丈坎於庭云欲阮之公恬

然見希烈曰死生已定何必多端亟以一劍相與豈不快公心事邪希烈乃謝之

興元元年甲子七十六歲作奉命帖題驛舍壁三月荆南張伯儀與賊戰於安州敗績希烈令齋伯儀旌節首級誇示公公慟哭投地希烈令其將周會王玠姚憺等襲汝州節度使哥舒曜會等謀迴軍襲取希烈奉公爲節度事洩希烈殺會等遂送公於龍興寺公度必死乃作遺表自爲墓誌祭文常指寢室西壁下云吾殯所也十一月宋毫節度使劉洽與邠隴節度使曲環大破希烈之衆於陳州希烈乃遣其將辛景臻安華至公所積柴庭中沃之以油且傳逆詞曰不能屈節自當燒公乃投身赴火景臻等遽止之十二月希烈陷汴州自稱大楚皇帝僭僞號曰武成使人問卽位儀於公公曰老夫耄矣會掌國禮所記者諸侯朝覲禮耳希烈不敢逼

貞元元年乙丑七十七歲王師復振劉洽等乘勝進攻汴州希烈慮蔡州有變將挾公自隨正月五日先遣公自汝至蔡十九日書移蔡帖時德宗復宮闕希烈弟希倩在朱泚黨中伏誅希烈聞之怒乃使閹奴與景臻等殺公先曰有敕使拜曰宜賜真卿死公曰老臣無狀罪當死然不知者何日從長安來曰從大梁來公罵曰乃逆賊耳何敕邪遂縊殺之時八月十三日乙丑也至二十四日丙戌始聞於朝（新舊書本傳皆作興元元年八月十三日爲希烈所害通鑑綱目從之而舊書德宗紀又作貞元元年正月癸丑聞公之變案是年正月爲丁酉朔癸丑乃十七日公有移蔡一帖作於貞元元年正月十九日則非癸丑聞計可知今從書德宗紀作貞元元年八月丙戌八月爲癸亥朔丙戌乃二十四日也）明年希烈爲其牙將陳仙奇酖死淮西平朝廷命仙奇爲淮西節度十一月以公之喪歸京師德宗輟朝五日詔錄其功贈司徒諡曰文忠仍賜布帛五百端男顏頤等喪制終所司超授官秩六年十一月南郊赦書節文授公一子五品正員官故顏得錄用及盧杞旣廢德宗嘗謂李泌曰人皆言杞姦而朕不覺泌曰陛下能覺安致建中之禍李揆和藹（事在

建中四年七月。顏真卿使希烈。其害舊德多矣。文宗時以公會孫宏式爲同州參軍。穆宗時授顏峴贊善大夫。宣宗時授顏溫鳳翔文學。昭宗時授顏堯禮部郎。皆公後裔也。

顏魯公世系表

顏氏在唐無宰相故世系表不列於新書畢尚書沅著關中金石記取史傳所載編世系表附顏氏家廟碑後於顏氏子姓尚多闕遺今據魯公所撰家廟大宗勤禮元孫杲卿允南幼與允臧等碑重加攷定詳列於左本驥識

<p>勝之字宏 道巴陵 太守度尉 支校尉</p>	<p>戚字叔臺 魏青徐 二州刺史 關內侯 始自魯國 居琅邪</p>	
<p>炳之字叔 豹輔國 軍夏王 參軍</p>	<p>欽字公若 廣陵太守 給事中 葛繹 貞子</p>	
<p>見遠字見 遠齊 侍書 御史 兼中</p>	<p>默字靜伯 汝陰太守 襲葛繹子</p>	
<p>協字子和梁 鎮西記室 參軍</p>	<p>畿 含字宏都晉 侍中右光祿大夫西 平靖侯始 自琅邪居 丹陽</p>	
<p>之儀周御正御 史中大夫 麟趾學士 隋集州刺史 新野公</p>	<p>謙安成 太守</p>	<p>髦字君道東晉 侍中光祿勳 西平定侯</p>
		<p>緄字文和騎都尉襲西平侯</p>
		<p>靖之字茂宗宣 城太守御 史中丞</p>

丞

勤禮七子表為魯公而作勤禮以前止載兄弟不及兄弟之子孫自動禮分支子孫可攷者備載

之推字介北齊

思魯字孔歸隋

師古字籀崇文館

給事黃門

司經校書

學士

侍郎待詔

東宮學士

文林館平

唐秦王記

原太守始

室

自丹陽居

相時崇文館學士

京兆

勤禮字敬宏文崇賢學士贈號州刺史

育德

愍楚直內史省

游秦典校秘閣

之善隋葉令

昭甫本名顯甫字周

元孫字聿修濠沂

春卿偃師丞

紘方義主簿

泉明彭州司馬

泉明彭州司馬

泉明彭州司馬

誕義王諮議贈贊善

卿晉
曹二
王侍
讀贈
華州
刺史

三州
刺史
贈秘
書監

兼御史中丞攝
常山太守贈太
子太保諡忠節
新唐書本傳
云與真卿同五
世祖案杲卿與
魯公同祖五世
字衍

曜卿
涪川
司馬

旭卿
允山
令

茂會
健為
司馬

威明
邛州
司馬

季明
贈左
贊善

證
右內
倉曹

訊
兵曹
參軍

證訊皆杲卿之孫

自濬以下皆杲卿兄弟之子

濬
贈尚食
奉御

沛
奉御

準
溧水
令

華
正

翹
正

翹
華原
主簿

翊

翊贈左贊善

家廟元孫二碑作翊是太宗果卿二碑作翊非名從言旁者果卿孫輩也翊是果卿兄弟之子

珮

觀襄陽尉

觀宏文進士

觀鹽亭尉

觀丞

照明使者

襲明

微明

德明

將明尉

峴穆宗時為推鹽巡官追錄汝州功授右贊善

惟貞字叔堅

闕疑 杭州參軍

克明 崇文

彭王 詔叅軍

杲卿之從孫

薛王友

允南字去惑國子司業金鄉男

京兆兵曹襲金鄉男

少監國

子祭酒

頻校書郎

太子太保

喬卿 富平尉

幼 字令軌左清道兵曹

頂揚府法曹承縣男

顓鳳翔參軍

顓朝邑尉

顓

太師魯國文忠公 眞卿 新唐書本

贈五品京官

頗魯公長子天寶十五載年十餘歲爲質於平盧將劉正臣河北陷聞頗死故有贈官大歷十

傳云真卿師古五世從孫案師古與公會祖勤禮為親兄弟則公乃師古之從會孫也非五世從孫

頽初名頽左率倉曹沂水男授五品正員官

頽初名頽祕書正字新泰男

年公刺湖州頽忽歸僧皎然詩目所謂奉賀顏使君真卿二十八郎隔絕自河北遠歸也建中元年公撰家廟碑其時頽已物故故仍書贈官金石錄有韋稔撰幽州復舜廟頽貞元十二年率倉閩八月立正書篆額皆曹沂頽所作也王暉秋澗集云頽書畫端莊殊有父風

從覽

從覽宏式皆魯公會孫

宏式文宗時授同州參軍

溫宣宗時授鳳翔文學

溫莒皆授魯公後裔世次未詳

藁昭宗時授禮部郎中

允臧字季寧江陵類欽州參軍曲

少尹

阜男

頽富陽尉

墨池編有鄧州文宣王廟碑頽所書也

禹常州參軍

金石錄有令狐楚撰晉祠新松記禹所書也

頽

自頽以下皆魯公兄闕疑喬卿真長之子

頰校書郎

家廟碑作頰是勤禮碑作頰重見一允南子一頰之誤也

頰大理司直

頰河陽尉

頰太子洗馬

家廟勤禮二碑作頰是大宗碑作頰重見一魯公子一頰之誤也

頰常熟令金鄉男

頰常熟主簿任城男

頰浚儀尉鄒縣男

頰清源尉費縣男

項衛尉主簿

頤京兆叅軍

頤京兆叅軍

頤

頊

長卿

晉卿

邠

充國

質

大宗家廟二碑皆載元孫五子惟貞七子魯公於同父兄弟其
 次在第六於同祖兄弟其次在第十一而公書廟碑題名自稱
 第七男書元孫干祿字碑殷夫人顏君碑自稱第十三姪男與
 大宗家廟二碑不合攷公撰會祖勤禮碑敘元孫五子惟貞七
 子外又云長卿晉卿邠充國質皆無祿早世此五人者長卿晉
 卿當係公之同祖兄故公次第十三邠充國質當係同祖弟以
 無祿早世故大宗家廟二碑不列其名又據公撰殷踐猷墓碣
 云長妹蘭陵郡太夫人真卿之先妣也中年孀嫠遺孤十人未
 能自振君悉心訓獎皆究恩義故能長而有立則長卿等五人
 中當有三人係公之同父兄弟其二子幼輿碑云惟貞府君之第
 公撰允南碑云惟貞府君之第二子幼輿碑云惟貞府君之第
 六子則公兄弟之早世者當有一人在允南之下幼輿之上故
 公次第六其二人則公之弟也

與兄昭甫皆勤禮元配殷夫人出

敬仲吏部郎
男中平
昌男

殆庶

無恤

少連

殆庶等五子勤禮繼配柳夫人出柳係中書令奭之妹奭以高宗王皇后外祖坐與褚遂良諫廢
 后事被誅勤禮以妻親累貶薊州長史殆庶等以奭之外甥終身不得仕進

務滋

辟強

會宗 襄州 叅軍

考 楚州 司馬

澄 左衛 翊衛

潤 涪城 尉

自會宗以下皆敬仲等之子

自名卿以下皆會宗等之子

名卿

偁

倓

倫 名卿至倫 並為武官

逸 武康 令

鱗 長安 尉

廣 成 軍 將

自逸以下皆名卿等之子

顏魯公世系表終

渾太子通事舍人

韶濮陽尉

明華陽尉

啓溫江尉

襲華陰尉

亞邱

蔡

泚

盱

超

策

暄

蔡泚盱皆見靖居寺題名皆魯公從子未詳其系
泚山碑有顏祭即蔡之誤也

超見泚山碑亦魯公從子

渾魯公同高祖弟也是表於大宗家廟勤禮三碑所載同高祖
以上者皆不錄惟渾名屢見公書東方朔畫讚碑陰記及所撰
泚山碑故附入備攷

策暄皆見泚山碑魯公族子也未詳其系

顏魯公全集目錄

卷上.....

賦.....

象魏賦

表.....

皇帝即位賀上皇表 (附元宗批答)

讓憲部尚書表 (附肅宗批答)

謝兼御史大夫表 (附肅宗批答)

向州刺史謝上表 (附肅宗批答)

蒲州刺史謝上表 (附肅宗批答)

謝贈祖官表 (附肅宗批答)

謝浙西節度使表 (附肅宗批答)

乞御書天下放生池碑表額 (附肅宗批答)

謝戶部侍郎表 (附代宗批答)

謝吏部侍郎表 (附代宗批答)

謝荆南節度使表 (附代宗批答)

顏魯公全集

奏議集..... 一〇

請除禳服奏

請除素練聽政奏

請定武成廟釋奠奏

更定昏禮奏

疏..... 一一

論百官論事疏 (附新唐書本傳所載疏)

狀..... 一四

請復七聖諡號狀

論元皇帝祧遷狀

議..... 一七

駁吏部尚書韋瓘諡忠孝義 (附博士程浩駁議)

朝會有故去樂議

廟享議 (附陳京傳所載廟享議)

儀注..... 二一

元陵儀注

判.....三八

對三命判

按楊志堅妻求別適判

牒.....三九

訪求清河行人李華牒

書.....三九

與郭僕射書

帖.....四一

與李太保帖九首

與御史帖

與盧倉曹帖三首

與蔡明遠帖二首

劉中使帖

與夫人帖

與緒汝帖

與澄師帖

廣平帖

文殊帖

寒食帖

中夏帖

修書帖

訊後帖

一行帖

南來帖

江外帖

草篆帖

奉使蔡州帖

移蔡帖

序.....四八

孫文公集序

懷素上人草書歌序

世系譜序

送福建觀察使

仁序

送劉太冲序

送辛子序

張長史十二意筆法記

汎愛寺重修記

東方先生畫贊碑陰記

鮮于氏離堆記

撫州寶應寺翻經臺記

撫州寶應寺律藏院戒壇記

撫州南城麻姑仙壇記

宋州官吏八關齋會報德記

吳興沈氏述祖德記

乞御書題額恩敕批答碑陰記

湖州石柱記

崔孝公陋室銘記

吳興太守柳惲西亭記

宋文貞公碑側記

家廟碑後記

家廟碑額陰記

謝公碑陰記

項王碑陰述

贊.....七二

左納言史務滋像贊

李侍御寫真贊

頌.....七二

永字八法頌

辨.....七三

蒲塘辨

題名.....七三

華嶽廟題名

東林寺題名

西林寺題名

靖居寺題名

碑銘一.....七四

周太師蜀國公尉遲公廟碑銘

天下放生池碑銘

有唐故中大夫使持節壽州諸軍事壽州刺史上柱國

贈太保郭公廟碑銘

晉紫虛元君領上眞司令南嶽夫人魏夫人仙壇碑銘

撫州臨川縣井山華姑仙壇碑銘

華蓋山王郭二眞君壇碑銘

碑銘二……………八五

東莞臧氏糾宗碑銘

晉侍中右光祿大夫本州大中正西平靖侯顏公大宗

碑銘

有唐茅山元靖先生廣陵李君碑銘

湖州烏程縣杼山妙喜寺碑銘

浪迹先生元眞子張志和碑銘

唐故通議大夫行薛王友柱國贈祕書少監國子祭酒

太子少保顏君碑銘

神道碑銘一……………一〇〇

河南府忝軍贈祕書丞郭君神道碑銘

祕書省著作郎夔州都督長史上護軍顏公神道碑銘

攝常山郡太守衛尉卿兼御史中丞贈太子太保諡忠

節京兆顏公神道碑銘

正議大夫行國子司業上柱國金鄉縣開國男顏府君

神道碑銘

和政公主神道碑銘

唐故開府儀同三司太尉兼侍中河南副元帥都督河

南淮南淮西荆南山南東道五節度行營事東都留

守上柱國贈太保臨淮武穆王李公神道碑銘

神道銘名二……………二六

朝議大夫贈梁州都督上柱國徐府君神道碑銘

金紫光祿大夫守太子太傅兼宗正卿贈司空上柱國

隴西郡開國公李公神道碑銘

朝議大夫守華州刺史上柱國贈祕書監顏君神道碑

銘

特進行左金吾衛大將軍上柱國清河郡開國公贈開

府儀同三司兼夏州都督康公神道碑銘

中散大夫京兆尹漢陽郡太守贈太子少保鮮于公神

道碑銘

朝議大夫行江陵少尹兼侍尉史荆南行軍司馬上柱

國顏君神道碑銘

左衛率府兵曹丞軍賜紫金魚袋顏君神道碑銘

神道銘名三.....一三一

唐故右武衛將軍贈工部尚書上柱國上蔡縣開國侯

臧公神道碑銘

有唐開府儀同三司行尚書右丞相上柱國贈太尉廣

平文貞公宋公神道碑銘

遊擊將軍左領軍衛大將軍兼商州刺史武關防禦使

上柱國歐陽使君神道碑銘

銀青光祿大夫海濮饒房睦台六州刺史上柱國汲郡

開國公康使君神道碑銘

京兆尹御史中丞梓遂杭三州刺史劍南東川節度使

杜公神道碑銘

唐故容州都督兼御史中丞本管經略使元君表墓碑

銘

京兆尹兼中丞杭州刺史劍南東川節度使杜公墓誌

銘

神道碑銘.....一四四

杭州錢塘縣丞殷君夫人顏君碣銘

曹州司法丞軍秘書省麗正殿也學士殷君墓碣銘

祭文.....一四九

祭姪贈贊善大夫季明文

祭伯父蒙州刺史文

殘碑.....一五〇

橫山廟碑

古近體詩.....一五六

詠陶淵明

贈裴將軍

刻清遠道士詩因而繼作（附清遠道士同沈恭子游

虎邱有作 李德裕追和太師顏魯公刻清遠道士

游虎邱詩 皮日休追和虎邱清遠道士詩 陸龜

蒙次追和清遠道士詩韻又補沈恭子詩

題杼山癸亭得暮字

謝陸處士杼山折青桂花見寄之作

（缺）僧皎然

登平望橋下作

使過瑤臺寺有懷圓寂上人

五雜組擬作（阿同擬五人作 李崱 殷佐 明

袁高 陸士修 蔣志）

重擬五雜組（附同擬三人作 張薦 李崱 僧清

晝）

登峴山觀李左相石尊聯句（眞卿 劉全白 裴循

張薦 吳筠 強蒙 范縉 王純 魏理 王修

甫 顏峴 左輔元 劉茂 顏渾 楊德元 韋

介 僧清晝 崔宏 史仲宣 陸羽 權器 陸

士修 裴幼清 柳淡 僧廩外 顏顥 顏須

顏頊 李崱）

水堂送諸文士戲贈潘丞聯句（眞卿 潘述 陸羽

權器 清晝 李崱 潘述）

水亭詠風聯句（裴幼清 楊憑 楊凝 左輔元

陸士修 權器 陸羽 眞卿 清晝 耿緯 喬

陸涓）

溪館聽蟬聯句（楊憑 楊凝 權器 陸羽 眞卿

耿緯 喬 裴幼清 伯成 清晝）

送耿緯拾遺聯句（眞卿 韋 眞卿 韋）

月夜啜茶聯句（陸士修 張薦 李崱 崔萬 眞

卿 清晝 士修）

夜宴詠燈聯句（陸士修 張薦 眞卿 清晝 袁

高）

三言喜皇甫侍御過南樓玩月聯句（眞卿 陸羽

皇甫會 李崱 清晝 陸士修）

七言重聯句（眞卿 皇甫會 李崱 陸羽 清晝）

送李侍御聯句（眞卿 清晝 張薦 李崱）

玩初月重遊聯句（張薦 李崱 眞卿 清晝）

重送橫飛聯句（李崱 眞卿 清晝）

竹山聯句題潘氏書堂（眞卿 陸羽 李崱 裴修

康造 湯清河 清晝 陸士修 房夔 顏榮

顏顥 顏須 韋介 李觀 房益 柳淡 顏峴

潘述）

夜集聯句（清晝 眞卿）

大言聯句（清晝 眞卿 李崱 張薦）

小言聯句（眞卿 清晝）

樂語聯句（李崱 眞卿 清晝 張薦）

饒語聯句 (李嶠 眞卿 清晝 張薦)

滑語聯句 (眞卿 清晝 劉全白 李嶠 益)

醉語聯句 (劉全白 眞卿 清晝 陸羽)

斷句

逸詩存目 一六九

卷下 一

外集一 一

舊唐書列傳

新唐書列傳

全唐詩小傳

全唐文小傳

湖州府志名宦傳

舊唐書段顏合傳贊

新唐書段顏合傳贊

宏簡錄二顏張許合傳贊

外集二 一一

顏魯公行狀

顏魯公神道碑銘

外集三 二五

顏魯公年譜

外集四 三二

寄韋南陵冰余江上乘興訪之遇尋顏尚書笑有此贈

陪讌湖州公堂

數顏魯公送挺贊歸翠微寺

送顏平原

胡笳歌送顏眞卿使赴河隴

聞顏尚書陷賊中

奉酬顏使君眞卿見過郭中寺寺無山水之賞故予述

其意以答焉

奉酬顏使君眞卿王員外圓宿寺兼送員外使迴杼山

上臺和顏使君眞卿袁侍御高五韻賦得印字仍期

明日登開元寺樓之會

奉賀顏使君眞卿二十八郎隔絕自河北遠歸

同顏使君眞卿李侍御嶠游法華寺登鳳翅山望太湖

奉和顏使君眞卿修韻海畢會諸文士東堂重校

奉同顏使君眞卿開元寺經藏院會觀樹文殊碑

奉同顏使君眞卿袁侍御駱駝橋玩月

九日陪顏使君眞卿登水樓

奉和顏使君眞卿修韻海畢州中重宴

春日陪顏使君眞卿皇甫會西亭重會韻海諸生

春陪顏使君眞卿登峴山送張侍御嚴歸臺

同顏使君眞卿峴山送李法曹陽冰西上獻書時會有

詔徵赴京

同顏使君清明日游因送蕭主簿

陪顏使君錢宣諭蕭常侍

奉陪顏使君修韻海畢東溪泛舟錢諸文士

同顏魯公泛舟送皇甫侍御會

奉同顏使君眞卿送李侍御峯賦得荻塘路

奉應顏尚書眞卿觀元眞子置酒張樂舞破陣畫洞庭

三山歌

奉和顏魯公眞卿落元眞子胙臚舟歌

奉同顏使君眞卿清風樓賦得洞庭歌送吳鍊師歸林

屋洞

晦日陪顏使君白蘋洲集

新樂府青石激忠烈也

謁湖州顏魯公祠

題顏魯公畫像

遊湖州題顏魯公祠堂

遊麻姑山

讀中興頌碑

題顏魯公像

過平原

顏魯公祠堂

書磨崖碑後

謁湖州顏魯公祠

謁三顏祠於白石山

韻海樓

遊杼山

題韻海樓玉樓春

坐韻海樓醉蓬萊

外集五……………授顏眞卿監察御史制（天寶六載）

授顏元孫滁州刺史制（開元二年）
 贈顏昭甫華州刺史制（乾元元年）
 贈顏惟貞祕書少監制（寶應元年）
 贈蘭陵郡太君殷氏蘭陵郡太夫人制（寶應元年）
 授顏真卿刑部尚書告（大歷十二年）
 授顏真卿太子少師告（建中元年）
 贈故太師顏真卿司徒詔（貞元元年）
 授顏峴贊善大夫制（穆宗時）
 授顏宏式同州叅軍制（開成元年）
 授顏溫鳳翔文學制（宣宗時）
 授顏蕘禮部郎中制（昭宗時）
 請贖太師顏真卿歸朝疏
 請表太師顏真卿忠節疏
 爲淮西宣慰使鄭右丞祭顏太師文
 爲留守賈尚書祭顏太師文
 移顏公詩記
 弔九江驛碑材文
 碎碑記

撫州顏魯公祠堂記
 費縣顏文忠公新廟記
 魯公仙蹟記
 離堆顏魯公祠堂記
 祁陽顏元祠堂記
 吉州顏魯公祠堂記
 浯溪書院記
 外集六……………六三
 顏魯公文集序
 顏魯公文集後序
 刻顏氏告跋
 顏魯公文集序
 顏魯公文集後序
 重刻顏魯公文集序
 顏魯公文集跋
 重刻米元章魯公仙蹟跋
 外集七……………七〇
 顏魯公官階考

顏魯公著作考

顏魯公著韻海鏡源始末考

顏魯公湖州賓客考

顏魯公生卒葬地考

顏魯公祠廟考

外集八

雜紀

書評一

總論

張仁蘊德政碑（天寶元年）

郭虛己碑（天寶十一載三月）

郭揆碑（天寶十一載三月）

多寶塔感應碑（天寶十一載四月）

夫子廟堂記殘碑（天寶十一載四月）

書評二

東方朔畫贊并碑陰記（天寶十三載十二月）

咸寧孔子廟碑

逍遙樓請御書碑額表（乾元元年）

祭姪季明文（乾元元年九月）

金天王廟題名（乾元元年十月）

書評三

告伯父豪州刺史文（乾元元年十月）

與蔡明遠帖（乾元二年）

乍奉辭帖

顏勤禮碑（乾元二年）

題盧稜伽書壁

顏允南妻夫人碑

離堆記（寶應元年五月）

顏允南碑（寶應元年十一月）

書評四

與郭英乂論坐位書（廣德二年十一月）

顏元孫碑（永泰元年）

鹿脯帖

乞米帖（永泰元年）

朝廻帖

捧袂帖

破州帖

東林寺題名（永泰二年六月）

西林寺題名（永泰二年六月）

顏顥甫碑（永泰二年）

窪尊銘（永泰二年）

左伯桃墓詩

龍溪二大寺

祖關二大字

鮮于仲通碑（大歷二年正月）

鮮于氏里門記

靖居寺題名（大歷三年十月）

書馬伏波語（大歷三年四月）

顏喬卿墓碣（大歷四年四月）

顏幼輿碑（大歷四年四月）

顏允臧碑（大歷四年四月）

顏處士殘碑

謝康樂翻經臺記（大歷四年四月）

魏夫人仙壇碑（大歷四年）

華蓋山王郭二真君碑記

逍遙樓三大字（大歷五年正月）

殷踐猷墓碣（大歷五年五月）

殷攝碑

書評五……………一四六

宋璟碑及碑側記（大歷五年十二月碑側記大歷十

三年三月）

張景倩碑（大歷五年）

元子哲遺愛碑（大歷五年）

律藏院戒壇記（大歷六年六月）

麻姑仙壇記（大歷六年四月）

書評六……………一六二

大唐中興頌（大歷六年六月蜀本附）

臧懷恪碑

臧氏糾宗碑

臧氏故宅帖

顏含大宗碑（大歷六年十一月）

顏含碑（大歷七年四月）

書清遠道士詩及和作

虎邱劍池四大字

送劉太沖敘（大歷七年）

八關齋功德記（大歷七年五月）

劉中使帖

與夫人帖

書評六……………一八一

天下放生池碑并乞御書碑額表及碑陰記（大歷八

年七月碑陰記九年正月）

沈氏述祖德碑陰記（大歷八年十二月）

謝太傅塘碑陰記（大歷八年）

湖州石記

千祿字書

竹山潘氏堂聯句

書評八……………一九八

顏杲卿碑（大歷九年）

妙喜寺碑（大歷九年）

歐陽瑤碑（大歷十年十月）

元結墓表

湖州石柱記（大歷十二年）

射堂記（大歷十二年四月）

浮玉二大字

柳惲西亭記（大歷十二年四月）

湖州帖

項王碑陰述（大歷十二年）

韻海

駱駝橋三字

橫山廟碑

永興寺額

文殊碑

文殊帖

祖亭碑

李抱玉墓碑并廟碑（大歷十二年五月）

李元靖碑（大歷十二年五月）

杜濟墓碑（大歷十二年十一月）

杜濟墓誌（大歷十二年十一月）

康希銑碑（大歷十二年）

懷圓寂上人詩（大歷十二年十二月）

顏默殘碑

書評九……………二一六

殷君夫人顏氏碑

馬璘新廟碑（大歷十四年七月）

馬承光殘靖

張敬因碑

顏氏家廟碑（建中元年七月）

書評十……………二三〇

朱巨川告二（一建中元年八月一三年八月）

自書太子少師告（建中元年八月）

王密碑（建中二年十年）

元德秀碑（建中四月）

唐興寺主碑

張府居碑

守政帖

與柳冕帖

裴將軍帖

誌公像贊

開元寺僧殘碑

臨諸家法帖

華嚴經

小字華嚴經

黃庭經

摩利支天經

自江淮帖

送辛晃序

寒食帖

與澄師帖

臯陶帖

旌儒廟碑

元倓法師碑

霄漢閣石刻

天中山三字

真卿二字

訊後鄒游脩書廣平中夏五帖

別本麻姑壇記

元孫昭甫二告并魯公授刑部尙書制

御書南來草隸江外送書五帖

元宗老子像贊

奉使帖（興元元年）

移蔡帖（貞元元年正月）

忠義堂帖

顏魯公全集

寧鄉黃本驥仲良編訂
湘陰蔣環維揚參校

賦

象魏賦以象懸國章道崇政理爲韻

曰有唐之建都令蓋法天而立象濬重門於北極聳雙闕以南敞夾黃道而巖峙于青雲之直上豈一人之是憑抑萬國之攸仰洎乎青陽戒節玉紀迴天萬戶開漏以傳響百僚執贄而獻年逾人之木鐸旣徇天子之金章是懸觀乎渙發大號孚崇聖德澤如春流義若泉塞公卿翼翼而仰化黎庶欣欣而無忒自皇明而播九重由京師而降萬國美哉真盛代之聖明也爾其闕之爲用也叶古典布新章積非煙之臺臺翥佳氣之蒼蒼扣峻墉以龍峙屹中天而鳳翔伯玉過而必肅子牟懷而不忘若乃盤礴闕門巖峨穹昊覆瑤草於輦路接青槐於馳道巨玉斗而彌永半金城以處好旣悅功於子來抑有符於靈造及夫霜天肅露曙景涵風對巖廓而隱麟映玉樹以玲瓏旣岌岌以業業亦穹穹而崇崇縱黃金與紫貝孰並美而傳功童子何知謬膺邦政徒欲竭其鄙思諒難酬於嘉命且賦頌之作本乎情性雖杼軸而屢空聊高歌以爲詠亂曰巍巍雙闕令岳立雲峙政令因斯以絳有令黎元賴此以獲理敢頌美於一時庶流芳於千祀

表

皇帝卽位賀上皇表至德元載七月

臣眞卿言六月二十七日伏承賊陷潼關駕幸蜀郡李光弼郭子儀等正圍博陵郡收兵入土門王師旣還百姓震恐憂惶危懼若無所歸臣不勝悲憤之深遂遣腳力人張雲子間道上表猶恐不達又差招討判官信都郡武邑縣主簿李銑相繼間行（一本無間字）銑及雲子前後並到靈武郡奉皇帝七月十二日敕伏承陛下命皇太子踐祚改元皇帝上陛下尊號曰上皇天帝臣及官吏僧道耆壽百姓等踏舞抃躍不勝感咽（一本無此四字）其張雲子回皇帝授臣工部尚書兼御史大夫其李銑回又授臣銀青光祿大夫顧以庸微頻叨寵命道路隔絕辭讓無由進退失圖伏增惶懼竊以逆賊安祿山孤負聖恩憑陵寓縣禍盈惡稔尙稽天誅今皇帝撫軍蒼生賈勇豐鎬河洛指期可平伏願陛下垂拱頤神以覩廓清之慶臣官守有限不獲隨例闕庭無任懇款悲戀之至

上皇批答（常交行）

兇逆亂常侵侮中夏潼關失守京國不甯朕因涉岐梁至於巴蜀遂命皇帝肇登寶歷爰靖妖氛今官軍益振回紇効款卽擬南行共爲翦滅卿忠惟奉國孝則保家懷不二之心秉難奪之操皇帝累申寵命兼以崇班宜有懋於深功（一作宮）且用光於重守

讓憲部尚書表至德二載四月

臣眞卿言臣聞無功受賞爲善不勸有罪不罰爲惡罔辨陛下克復之期匪朝伊夕至如賞罰二柄事在必行苟或不明於何取則臣以愚懦叨守平原屬逆賊安祿山背叛聖恩擾犯河洛臣堂兄杲卿以常山太守首開土門臣與河北諸郡因之固守人臣本分夫有何功上皇授臣戶部侍郎兼知招討採訪等使已失人望緣賊未滅遂不敢辭又令李光弼郭子儀賀蘭進明等與臣計會同討凶逆三數月間河北向定屬潼關失守大駕西巡

光弼等卻入土門諸郡危逼陛下御極又錄臣無功寵以非次常伯亞相一時猥集臣兄允南弟允臧等連榮臺省一男三姪皆授好官在臣一門叨幸斯極殞身碎首無以上報臣常使判官鉅鹿郡南和縣丞賈載姪男永王府典軍廣成及行官鄧昌珍楊神功裴法成等十餘人將綵物絹帛相繼渡海與劉正臣計會共和兩蕃（一本兩作三）正臣等尅期南來行已有日屬逆賊史思明尹子奇等乘其未至悉力急攻諸郡無援相次陷沒皆由臣孱懦無謀致此顛沛誠合殉命危難死守孤城以爲歸罪闕庭愈於受擒賊手所以僣免偷生過河緣劉正臣使楊神功將牒與臣索兵馬及盤瓶錦帳令應接奚契丹等不與其勾當伏恐陛下貽憂又恩敕先超授吳郡司士鄭毓樂安郡太守令於江淮南兩道度僧道取錢與臣召募士馬令應接河北臣由此未獲卽赴行在遂至廣陵丹陽等郡各與採訪使計會竟不得兵馬卽累奉聖旨許臣入奏行至武當郡又奉恩命除臣憲部尙書兼令使者送告身與臣捧戴殊私不任惶懼陛下縱含宏善貸不忍明刑在臣覲冒至深胡顏自處臣忝爲大臣繫國休戚損臣益國臣受其益損國益臣臣受其損若受任失守還期屢遷示國無刑於臣大損非敢外飾實披至誠又臣名節雖微任位頗重爲政之體必在律人恩先逮下罰當從上今罪一人則萬人懼若怙於寵四海何瞻伏願陛下重貶臣一官以示天憲使天下知有必行之法則知有必賞之令寵榮過於尙書遠矣無任懇悃之至

肅宗批答

卿才推翰苑望重朝廷昆弟成名俱效忠節頃蠶蠹縱毒郡邑多虞卿能審事宜捍禦兇盜雖平原不守而功效殊高躬自歸朝深副朕望允膺曳履之命無至免冠之請

謝兼御史大夫表至德二載六月

臣冒卿言伏奉今日制書以臣兼御史大夫本官如故恩榮屢及成命曲臨泰載殊私慙惶靡據（中謝）臣

屢徵有素抗直無聞比守平原困於凶賊不能死節負義歸朝斧鉞之誅甘心待命崇高之位不次頻叨孟夏之中始操刑柄數旬之內兼總憲司撫已缺如負乘斯甚將何以明刑天下振舉朝綱臣聞秦漢之時凡有制詔皆下丞相御史府人到於今稱爲副相東方朔舉自古聖賢以次百官乃以孔某爲御史大夫則知其官何可妄授况列曹尚書古之常伯如天之有斗豈易其人昨以表辭非敢矯舉恐煩天聽僂俛就班候隙請問方擬率讓不圖榮寵又集微軀聖恩頻繁固令卽上陳請莫遂惶懼益深又臣竊見近日朝列之內或有身兼數官苟貪利權多致顛覆害政非一妨賢實多臣嘗忿之其忍自冒無任懇迫屏營之至謹詣閣門陳謝以聞倘天聰聽卑猶冀少迴恩命停臣一職別授忠賢則雖死猶生期於畢力臣某云云

肅宗批答

卿德重才博久而益彰深竭忠貞克著名節乃今再造區夏藉卿以振朝綱曳履之榮允膺其象弄印之寵無以易卿旣簡朕心不至謙讓所謝知

同州刺史謝上表至德二載十二月

臣眞卿言伏奉某月日恩制除臣同州刺史以某日至郡上訖受命祇懼伏增戰越(中謝)臣自失守平原萬里歸命甘心斧鉞用儆敗亡陛下錄纖芥之誠捨邱山之罪超司秋典再長憲臺宗伯亞相一時猥集在臣叨幸何以克堪誓當粉骨碎身少酬萬一而力微任重福過災生涓塵莫效咎愆仍積上負聖明之恩下慚魯衛之士聚水加劍未塞深尤禦魅投荒乃爲殊造陛下識其眉目矜其要領待罪猶忝於左馮黜官不離於本秩感念恩德淪於心髓木石知變况在微臣伏惟陛下察其慙愚收其後效臣雖萬死實荷所天竊以此郡破亡再陷凶逆生靈塗炭邑室空虛殺傷者雖或蓋藏逃亡者尙未歸復謹當勵精悉力宣諭皇明旬月之間望有所校伏惟

陛下減省聖慮不以此郡爲憂則臣之愚忠生死萬足其戶口實數并利害切急者伏望容臣括實繪狀奏聞無任感戀之至

肅宗批答

卿夙負名器列在朝廷委弄印之傳兼曳履之寵而乃事乖執法情未減私朕念以舊勳遂從寬宥今左輔之郡凋敝之餘宜加撫存以申來效所謝知

案舊書本傳云出爲同州刺史新書本傳云出爲馮翊太守至德二載十二月始復郡太守爲州刺史公以是載十月自鳳翔扈從還京爲宰相所忌出貶同州其到任謝上當是十二月事應以舊傳爲是是表標題及除臣云云集本皆作馮翊太守今從全唐文改正

蒲州刺史謝上表 乾元元年三月

臣眞卿言臣今月十一日伏奉五日恩制除臣使持節蒲州諸軍事蒲州刺史充本州防禦使臣緣同州先無佐官蒲州書魚未到遲迴累日不敢赴上中使張抱誠至奉宣恩命令臣與將軍趙瑣計會遊弈兵馬昨以十八日至州上訖祇承寵命伏增感傷（中謝）臣竊以此州之地堯舜所都表裏山河古稱天險餘凶未殄防禦是先况扼秦晉之喉撫幽并之背旣號股肱之郡實資心膂之賢伏惟光天文武大聖孝感皇帝陛下道冠生人恩涵墜履方建非常之業不遺易忘之臣特委大邦俾之集事戴荷殊獎無忘寢食但臣愚鶩有素智勇缺然將以鎖馭艱虞導揚德澤拜命之日以榮爲憂唯君知臣教其不及勤恤人隱動必以聞陛下不以爲煩則臣死而獲考矣無任感戴屏營之至

肅宗批答

卿簪紱之端名節素重出鎮藩翰克効忠勤況自同及蒲襟帶相接宣風布化實佇於卿特委股肱尤當勉勵防虞恤隱必應事宜所謝知

謝贈祖宮表乾元元年四月一本標題脫祖字

臣竄卿言伏奉二月十七日恩制臣亡祖故曹王屬曹王晉王侍讀先臣昭甫特蒙聖恩超贈使持節華州諸軍事華州刺史天慈錫類泉壤榮捧戴殊私闔門感慶(中謝)竊以臣亡祖伏膺文儒克篤前烈能讀三墳五典八索九邱特爲伯父故祕書監先臣師古之所賞愛師古每有註釋未嘗不參預焉又與學士令狐德棻等同侍天皇得備顧問有時無命天闕盛年臣亡父故薛王友先臣惟貞亡伯故濠州刺史先臣元孫等並襁褓苴麻孩提未識養於舅氏殷仲容以至成立臣堂兄故衛尉卿兼御史中丞杲卿卽元孫之子及臣兄弟等幸承貽厥之訓遭遇明聖之朝各以微誠皆蒙殊獎杲卿雖死爲不朽矣臣亦何人屢叨榮祿夙夜祇懼慚戴已深不謂霑澤曲霑輿贈俯及特蒙加等之禮實爲非常之恩感戴屏營萬死非報無任戰荷之至謹因中使內謁者監張抱誠冒死陳謝以聞(一本謝作言)

肅宗批答

卿之乃祖嘗爲碩儒旣高倚相之能遂有臧孫之後不墜其業在卿之門式覃追遠之恩俾蒙貽厥之慶加贈方岳以表哀榮所謝知

謝浙西節度使表乾元二年六月

臣竄卿言伏奉六月九日恩制以臣爲昇州刺史充浙西節度使兼江甯軍使聖德含宏不遺簪履捨其罪

辰假以麾幢感戴恩榮死生知報臣某（中謝）臣以爲全吳舊國分閩重權煇東海以自資塹西河而作固九州天險之地六代帝王之都是以魏文興嗟甘從南北之限符堅恃衆（一本恃衆作怙侈）爰喪百萬之師豈不以形勝是先腹心斯切親賢重寄鎮遏攸難矧在庸微甯堪及此是以拜命之日以榮爲憂制書以今月四日至饒州臣以今日發赴本道取都統節度觀察使李峘處分訖即赴昇州卽當繕修甲兵撫循將士觀察要害以備不虞假陛下英武之威遵陛下平明之理一心戮力上答天慈伏惟陛下察臣愚忠則死且不朽無任感戴屏營之至

肅宗批答

卿學行有聞謀猷克壯屢經寒歲不改松筠且江甯古之帝都實爲巨防自非宿德其可濫居委卿忠誠俾嘗連帥宜宏籌略爲朕緝綏所謝知

乞御書天下放生池碑額表乾元元年七月

臣眞卿言臣聞帝王之德莫大於生成臣子之心敢忘於讚述臣去年冬任昇州刺史日屬左驍衛左郎將史元琮中使張庭玉等奉宣恩命於天下州縣臨江帶郭處各置放生池始於洋州興道迄於昇州江甯秦淮太平橋凡八十一所恩沾動植澤及昆蟲發自皇心徧於天下歷選列辟未之前聞海隅蒼生孰不欣喜臣時不揆愚昧輒述天下放生池碑銘一章又以俸錢於當州採石兼力拙自書蓋欲使天下元元知陛下有好生之德因令微臣獲廣昔賢善頌之義遂絹寫一本附史元琮奉進兼乞御書題額以光揚不朽緣前書點畫稍細恐不堪經久臣今謹據石擘窠大書一本隨表奉進庶以竭臣下悽悽之誠特乞聖恩俯遂前請則天下幸甚豈惟愚臣昔秦始皇暴虐之君李斯邪詔之臣猶刻金石垂於後代魏帝外禪之主鍾繇偏方之佐亦於繁昌立表頌德况

陛下以巍巍功業而無紀述則臣竊恥之謹昧死以聞伏增戰越臣眞卿誠惶誠恐頓首謹言

肅宗批答

朕以中季及物亭育爲心凡在覆載之中必登仁壽之域四靈是畜一氣同和江漢爲池魚鼈咸若卿慎徽盛典潤色大猷能以懿文用刊樂石體含飛動韻合鏗鏘成不朽之立言紀好生之上德唱而必和自古有之情發於中予嘉乃意所請者依

謝戶部侍郎表寶應元年五月

臣眞卿言伏奉某月日恩命以臣爲戶部侍郎榮寵自天感戴交集(中謝)臣聞地官之任邦教是資侍郎之職非賢不授况臣資性愚蒙行能無取賴以疎拙獲罪朝廷五年之間三貶官次先朝皇極猶佐藩條官階勳封盡蒙黜削待罪三年分從遐棄屬陛下以聰明睿哲嗣聖登庸恩宥廣覃授臣利州刺史詔書始下纒涉旬朔不遺易忘之臣忽奉待詔之命生死骨肉受賜已深對見之辰又蒙假以章服小臣懷惠寤寐無甯聖澤頻繁叨戴斯授循涯省分盈量則多粉骨糜軀罔知攸答無任感戴惶懼之至

代宗批答

卿門傳儒行代挹公才忠義在躬幹蠱從政頃升八座式昭水鏡之規往鎮兩河能鳴風雨之晦比雖因事見貶今則念舊錄功然以地官務殷惟才是屬周行所舉殊愜朕懷所謝知

謝吏部侍郎表寶應二年三月

臣眞卿言伏奉某月日恩制以臣爲吏部侍郎又奉某月日恩制加臣銀青光祿大夫浹辰之間殊澤滂至

恭承寵命戴荷交馳（中謝）竊以國之所急必在官人銓綜之司非賢弗授伏揆虜薄祗懼實深常恐上塵則哲之明下負竊位之責未酬萬一再沐恩私寵命忽臨舊階旋復叨榮旣感宥過何深佩玉腰金實懼在梁之刺志軀拜賜惟懷粉骨之誠施重力微罔知攸措無任荷戴屏營之至

代宗批答

卿鬱然詞宗雅有朝望高標勁節歷霜霰而不渝握鏡懸衡鑒人倫而式敍是用特加命數光乃純臣復銀青舊階鳴水蒼之雜佩佇聞密啓以定九流舉其朝綱僉曰惟允所謝知

謝荆南節度使表廣德元年八月

臣真卿言伏奉二十七日恩制除臣江陵尹兼御史大夫充荆南節度觀察處置使寵命自天戰荷無地（中謝）竊以荆南巨鎮江漢上游右控巴蜀左聯吳越南通五嶺北走上都寇賊雖平襟帶尤切雖叔子仁德元凱智囊居之猶或病諸過此豈宜濫據祇承睿顧伏深慙惕無任感戴屏營之至

代宗批答

卿明邁偉才忠貞壯節夙推公器累踐周行專城高魏尚之勛會府著山濤之績而七澤交帶三江要衝式資統尹之方雅屬旌旄之寄人存政舉其在茲乎所謝知

奏議集

請除禫服奏大歷十四年六月

哀號在疚開闢所無誠懇尙違庶僚增懼伏見百辟並已釋除事既合權禮無獨異不可以吉凶兼制臣子殊儀伏乞奉顧命之文節因心之孝順時卽吉屈已臨朝則萬姓心安四方事集臣典司儀注不敢輕移冒犯宸嚴無任懇迫

請除素練聽政奏大歷十四年六月

孝德動天事踰前古德音俯降感咽載深臣伏守遺詔禮從易月祥禫變除儀注皆備若陛下未忍卽吉更服練巾則遺詔不得奉行羣僚無以覲見伏乞俯順人望仰遵先旨實大孝不虧萬方幸甚臣職在典禮愚守如前無任懇迫之至

請定武成廟釋奠奏建中二年

治武成廟請如月令春秋釋奠其追封以王宜用諸侯之數樂奏軒縣

案是秦建中二年前見新唐書禮樂志開元十九年始置齊太公廟以漢張良配上元元年追封太公爲武成王以歷代名將十人爲十哲秦白起漢韓信蜀諸葛亮唐李靖李勣列於左漢張良齊穰苴吳孫武魏吳起燕樂毅列如右如文宣廟儀至是詔史館定可配享者列古今名將凡六十四人圖形焉越范蠡齊孫臏趙廉頗

秦王翦漢曹參周勃李廣霍去病後漢鄧禹賈復寇恂馬援皇甫嵩魏張遼蜀關羽吳周瑜陸遜晉羊祜王濬東晉謝元燕慕容恪宋檀道濟梁王僧辯北齊慕容紹宗周宇文憲隋韓擒虎史萬歲唐尉遲敬德蘇定方張仁亶王峻王孝傑從祀東廡齊管仲田單趙奢李牧漢彭越周亞夫衛青趙充國後漢吳漢馮異耿弇段熲魏鄧艾蜀張飛吳呂蒙陸抗晉杜預陶侃前秦王猛後魏長孫嵩宋王鎮惡陳吳明徹北齊斛律光周于謹韋孝寬隋楊素賀若弼唐河間王孝恭裴行儉郭元振張齊邱郭子儀從祀西廡至貞元二年刑部尚書關播始奏定武成廟仍以張良配其十哲等名及諸將祀皆罷

更定婚禮奏建中元年十一月

奏郡縣主見舅姑請於禮會院過事明日早舅姑坐堂上行執筭之禮其觀華燭仗以婚禮主敬竊恐非宜並請停障車下壻却扇等行禮之夕可以感恩至於聲樂竊謂非禮並請禁斷相見儀制近代設以氈帳擇地而置此亦非禮合於堂室中置帳請準禮施行俗忌今時以子午卯酉年謂之當梁年其年娶婦舅姑不相見蓋禮無所據亦謂禁斷

案是奏建中元年十一月上見杜氏通典唐初公主下降舅姑皆降禮答拜惟貞觀中王珪子尚南平公主奏行盥饋之禮物議善之顯慶二年申禁舅姑拜公主令所司隨事糾聞究未能定通鑑綱目載建中元年十一月始定公主見舅姑禮則自公奏發之也景隆二年安樂公主出降假皇后仗出禁中帝及后御安福樓觀之此觀華燭仗之始也開元十六年唐昌公主出降有司進儀注於紫宸殿行五禮從施敬本等言移於光順門外設次行禮此擇地置帳之始也唐俗婦與既發邀具酒食以爲戲樂上及王公廣奏音樂遮擁道路留滯淹時邀致財物動踰萬計所費過於聘財此又障車之俗也公奏並及數事上皆從之

疏

論百官論事疏永泰二年

御史中丞李進等傳宰相語稱奉進止緣諸司官奏事頗多朕不憚省覽但所奏多挾私讒毀自今論事者諸司官皆須先白長官長官白宰相宰相定可否然後奏聞者臣自聞此語已來朝野囂然人心亦多衰退何則諸司長官皆達官也言皆專達於天子也郎官御史陛下腹心耳目之臣也故其出使天下事無巨細得失皆令訪察旬日奏聞所以明四目達四聰也今陛下欲自屏耳目使不聰明則天下何述焉詩云營營青蠅止于棘讒言罔極交亂四國以其能變白爲黑變黑爲白也詩人深惡之故曰取彼讒人投畀豺虎豺虎不食投畀有北則夏之伯明楚之無極漢之江充皆讒人也孰不惡之陛下惡之深得君人之體矣陛下何不深迴聽察其言虛誣者則讒人也因誅殛之其言不虛者（冊府元龜者上多誣字）則正人也因獎勵之陛下舍此不爲使衆人皆謂陛下不能明察而倦於聽覽以此爲辭拒其諫諍臣竊爲陛下痛惜之臣聞太宗勤於聽覽庶政以理故著司門式云其有無門籍人有急奏者皆令監門司與仗家引對不許關礙所以防壅蔽也并置立仗馬二匹須有乘驗便往所以平治天下（治高祖諱當作理）正用此道也天寶已後李林甫威權日盛羣臣不先諮宰相輒奏事者仍託以他故中傷之不敢明約百官令先白宰相又闕官袁思藝日宣詔至中書元宗動靜必告林甫先意奏請元宗驚喜若神以此權柄恩寵日甚道路以目上意不下宣下情不上達所以漸致潼關之禍皆權臣誤主不遵太宗之法故也凌夷至於今日天下之弊盡萃於聖躬豈陛下招致之乎蓋其所從來者漸矣自艱難之初百姓尙未凋弊太平之理立可便致屬李輔國當權宰相專政遞相姑息莫肯直言大開三司不安反側逆賊散

落將士北走黨項合集土賊至今爲患僞將更相驚恐因思明危懼扇動卻反又今相州敗散東都陷沒先帝由此憂勤至於指壽臣每思之痛切心骨今天下兵戈未戢瘡痍未平陛下豈得不日聞讜言以廣視聽而欲頓隔忠讜之路乎臣竊聞陛下在陝州時奏事者不限貴賤務廣聞見乃堯舜之事也凡百臣庶以爲太宗之理可翹足而待也臣又聞君子難進易退由此言之朝廷開不諱之路猶恐不言况懷厭怠令宰相宣進止使御史臺作條目不令直進從此人人不敢奏事則陛下聞見只在三數人耳天下之事（新書事作士）方鉗口結舌陛下後見無人奏事必謂朝廷無事可論豈知懼不敢進卽林甫國忠復起卷凡百臣庶以爲危殆之期又翹足而至也如今日之事曠古未有雖李林甫楊國忠猶不敢公然如此今陛下不早覺悟漸成孤立後縱悔之無及矣臣實知忤大臣者罪在不測不忍孤負陛下無任懇迫之至

案疏據舊唐書本傳錄魯公原文也新書本傳載此疏字句多異史臣宋祁節本也今以新書本附錄於後諸司長官者達官也皆得專達於天子卽官御史陛下腹心耳目之臣也故出使天下事無細大得失皆俾訪察還以聞此古明四目達四聰也今陛下欲自屏耳目使不聰明則天下何望焉詩曰營營青蠅止于棘讒言罔極交亂四國以其能變白爲黑變黑爲白也詩人疾之故曰取彼讒人投畀豺虎豺虎不食投畀有北昔夏之伯明楚之無極漢之江充皆讒人也陛下惡之宜矣胡不回神省察其言虛誣則讒人也宜誅殛之其言不誣則正人也宜獎勵捨此不爲使衆人謂陛下不能省察而倦聽覽以是爲辭臣竊惜之昔太宗勤勞庶政其司門式曰無門籍者有急奏令監司與仗家引對不得關礙防護蔽也置立仗馬二須乘者聽此其平治天下也天寶後李林甫得君羣臣不先咨宰相輒奏事者託以他故中傷之猶不敢明約百司先關白時聞人袁思藝日宣詔至中書天子動靜必告林甫林甫得以先意奏請帝驚喜若神故權寵日甚道路以目上意不下宣下情不上達此權臣蔽主不遵太宗之法也陵夷至于今天下之蔽皆萃陛下其所從來漸矣自艱難之初百

姓尚未凋竭太平之治猶可致而李輔國當權宰相用事遞爲姑息開三司誅反側使餘賊潰將北走黨項哀
嘯不逞更相驚恐思明危懼相挺而反東都陷沒先帝由是憂勤損壽臣每思之痛貫心骨今天下瘡痍未平
干戈日滋陛下豈得不博聞讜言以廣視聽而塞絕忠諫乎陛下在陝時奏事者不限貴賤羣臣以爲太宗之
治可跂而待且君子難進易退朝廷開不諱之路猶恐不言况懷厭怠令宰相宣進止御史臺作條目不得直
進從此人不奏事矣陛下聞見止於數人耳目天下之士方鉗口結舌陛下便謂無事可論豈知懼而不敢進
卽林甫國忠復起矣臣謂今日之事曠古未有雖林甫國忠猶不敢公爲之陛下不早覺悟漸成孤立後悔無
及矣

狀

請復七聖諡號狀大歷十四年七月

謹按禮記曰先王諡以尊名節以一惠故行出於己而名生於人使夫善者勸而惡者懼也而虞夏之質殷
周之文至矣而禹湯文武之君咸以一字爲諡言文則不稱武言武則不稱文豈聖德所不優乎蓋羣臣稱其至
者是以子不得議父臣不得議君天子崩則臣下制諡於南郊明受之於天也諸侯薨則太子赴告於天子明受
之於君也至於周室卑大樸散諡始以兩字爲重人或以虛美爲榮漢承戰國餘烈參而用之君臣易名事歸至
當少不以爲貶多不以爲褒雖美衆所歸可一言而盡矣魏晉以降蓋不足徵聖唐欽明憲章周漢爰初創業順
考古道祖諡太武（一本太作大）用漢制太宗諡曰文行周道也名正理順垂之無窮上元中政在宮壺亂名
改作始建神堯文武大聖之號蓋非高宗之所獲已衆元宗之末奸臣竊柄析言而亂舊法輕議以改鴻名遂廣

累聖之諡有加至十一字者皇帝則悉有大聖之號皇后則皆有順聖之名使言之者惑於今行之者異於古非舊制也其後劍門下罪已之詔敍高祖以下累聖悉用舊諡則元宗悔既往之失亦已明矣寶應中二聖山陵有司議諡（一本議作請）事不師古變而行權去古質而尚浮華捨舊名而廣新諡謂一名不足以節惠乃十倍於古焉而累聖諡名顧悉以字多者爲定是廢高祖太宗之令豈曰愛君今制諡非古人皆知之有司因循其事而無敢言者假使當今守之而不改後人議之以爲非然所失豈不大哉何者臣子之於君父莫不欲廣其美稱先王制禮不敢過也故至敬無文至文尚質質之數極於一堯舜之美足以彰矣文之數極於二孝文孝景之德亦已明矣質則近古文則近今此高祖太宗所以更用其法後王所宜守之法也非天下之至聖其孰能定之此天皇所以興聖主而正鴻名太宗所以待孝孫而修廢典微臣所以守經義而崇聖朝陛下宜奉天心繼先太宗之志使子孫蒙其法而萬代守之此天下之能事也臣愚以爲高祖以下累聖諡號悉宜取初諡爲定謹按舊制宜上高祖爲武皇帝太宗爲文皇帝高宗爲天皇大帝中宗爲孝和皇帝睿宗爲聖真皇帝其二聖諡名字數太廣有逾古制臣愚請擇其美稱而正之謹按諡法秉德不回曰孝照臨四方曰明宜上元宗爲孝明皇帝又按諡法聖善周聞曰宣宜上肅宗爲孝宣皇帝仍準漢魏及國朝故事於尚書省議定奏御夫文敝則救之以質至敬也名惑而反之於正至明也祖作之而孫述之至孝也三者備矣然後能立天下之大本正天下之大名建天下之大業能事畢矣伏惟皇帝陛下詳擇

大歷十四年七月吏部尚書顏真卿上言上元中政在宮壺始增祖宗之諡元宗本姦臣竊命有加至十一字者按周之文武言文不稱武言武不稱文豈聖德有所不優乎蓋稱其至者也請自中宗以上皆從初諡睿宗曰聖真皇帝元宗曰孝明皇帝肅宗曰孝宣皇帝以省文尚質正名敦本上命百官集議儒學之士皆從真卿議獨兵部侍郎袁傖官以兵進奏言陵廟玉冊木主皆已刊勒不可輕改事遂寢不知陵中玉冊所刻乃初諡

也（通鑑）

論元皇帝祧遷狀大歷十四年十月

王制天子七廟三昭三穆與太祖之廟而七又禮器云有以多爲貴者天子七廟又伊尹曰七世之廟可以觀德此經典之明證也七廟之外則曰去祧爲壇去壇爲墀故歷代儒者制迭毀之禮皆親盡宜毀伏以太宗文皇帝七代之祖高祖神堯皇帝國朝首祚萬葉所承太祖景皇帝受命於天始封於唐元本皆在不毀之典代祖元皇帝地非開統親在七廟之外代宗皇帝升祔有日元皇帝神主禮合祧遷或議者以祖宗之名難於迭毀昔漢朝近古不敢以私滅公故前漢十二帝爲祖宗者四而已至後漢漸違經意子孫以推美爲先自光武已下皆有廟號則祖宗之名莫不建也安帝信讒（一本信作以）害大臣廢太子及崩無上宗之奏後自建武以來無毀者因以陵號稱宗至桓帝失德尙有宗號故初中左中郎蔡邕以和帝以下功德無殊而有過差不應爲宗及餘非宗者追尊三代皆奏毀之是知祖有功宗有德存至公之義非其人不居蓋三代立禮之本也自東漢以來則此道衰矣魏明帝自稱烈祖論者以爲逆自稱祖宗故近代此名悉爲廟號未有子孫踐祚而不祖宗先王者以此明之則不得獨據兩字而爲不合祧遷之證假令傳祚百代豈可上崇百代以爲孝乎請依三昭三穆之義永爲通典寶應二年升祔元宗肅宗則獻祖懿祖已從迭毀伏以代宗睿文孝皇帝卒哭而祔則合上遷一室元皇帝代數已遠其神主準禮當祧至禘祫之時然後饗祀

大歷十四年十月代宗神主將祔禮儀使顏真卿以元皇帝代數已遠準禮合祧請遷於西夾室於是祧元皇帝於西夾室祔代宗神主焉（舊唐書禮志）

代宗崩禮儀使顏真卿議太祖高祖太宗皆不毀而代祖元皇帝當遷於是遷元皇帝而祔代宗（新唐書禮

議

駁吏部尚書韋陟諡忠孝議上元元年八月

出處事殊忠孝不並已爲孝子不得爲忠臣已爲忠臣不得爲孝子故求忠於孝豈先親而後君移孝於忠則出身而事主所以叱馭而進不憚危險故王尊爲忠臣思全而歸恐有毀傷故王陽爲孝子則知畫之與夜本不相隨春之與秋豈宜同日且以爲尚書志業高遠羽儀前朝百行之中能事甚衆議行稱諡固多美名何必忠孝兩施然後表德歷考前史恐無此事敢率愚見請更商量

博士程皓駁議

天地之性人爲貴人之行莫先於孝孝於君則忠於國愛於父則敬於君脫愛敬齊焉則忠孝一矣立君臣定上下不可以廢忠事父母承祭祀不可以虧孝忠孝之道人倫大經孔子曰以孝事君則忠又曰夫孝始於事親中於事君終於立身此聖人之教也至於忠孝不並有爲而言將由親在於家君危於國奉親則孰當問主赴君則無能養親恩義相迫事或難兼故徐庶指心翻然辭蜀陵母刎頸卒令歸漢各求所志蓋取諸隨若奉慈親當聖代出事主人事親忠孝兩全誰曰不可豈以不仕爲孝舍親爲忠哉况忠孝侯之傳鵠印唐堯之代卽有此官伏念美名請依前諡

舊唐書韋安石傳

上元元年八月吏部尚書韋陟卒太常博士程皓議諡忠孝刑部尚書顏真卿以爲忠則以身許國見危致命

孝則晨昏色養取樂庭闈不合二行殊高以成忠孝右僕射郭英又不達其體請從太常之狀而奏

朝會有故去樂議永泰二年

周禮大司樂職云諸侯薨令去樂大臣死令弛懸鄭註云去謂藏之弛謂釋下也是知哀輕者則釋哀重者則藏又按庾蔚之禮論云晉元后秋崩武帝咸寧元年享萬國不設樂永嘉元年冬惠帝三年喪制未終司徒左長史江統議二年正會不宜作樂又章皇后哀限未終后主已入廟博士徐乾議曰周景王有后嫡子之喪既葬除服叔向猶議其宴今不宜懸宋書禮志云晉武帝已來國有大喪廢樂三年又按江都集禮說晉博士孔恢朝廷過密懸而不作恢以爲宜都去懸設樂爲作不作則不宜懸孟獻子禫懸而不樂自是應作耳故夫子曰獻子加於人一等矣非謂不應作而猶懸也國喪尙近謂金石不可陳於庭又徐廣晉史曰聞樂不怡故申情於過密諒闈奪服慮政事之荒廢是故秉權通以變常量輕重以降差臣以周禮去樂之文宋志終喪之證徐廣之論寧感孔恢之說禫懸禮旣可憑事又故實伏請三年未畢都不設懸如有齊衰喪及遇大臣薨歿則量輕重懸而不作

案此議留元剛纂公年譜載於永泰二年考公以大歷十四年五月代宗崩德宗卽位充禮儀使至建中三年八月罷使事此議題曰朝會有故去樂有故者謂代宗三年喪制未終也亦應作於建中二年喪制將終之時公爲禮儀使時撰禮樂集十卷此議及請除禫服請除素練聽政二奏請復七聖諡號論元皇帝祧遷二狀廟享議皆禮樂集中僅存之文也

廟享議建中二年九月

議者或云獻祖懿祖親遠廟遷不當裕享宜永悶於西夾室又議者云二祖宜同裕享與太祖並列昭穆而空太祖東向之位又議者云二祖若同裕享卽太祖之位永不得正宜奉遷二祖神主祔藏於德明皇帝廟臣伏以三議俱未爲允且禮經殘缺旣無明據儒者能比方義類斟酌取中則可舉而行之蓋協於正也伏惟太祖景皇帝以受命始封之君處百代不遷之廟配天崇享是極尊嚴且至禘祫之時暫居昭穆之位屈已伸孝敬奉祖宗緣齒族之禮廣尊先之道此實太祖明神烝烝之本意亦所以化被天下率循孝悌也請依晉蔡謨等議至五年（舊唐書禮志無五年二字）十月祫享之日奉獻祖神主居東向之位懿祖太祖衆諸祖宗遵左昭右穆之列此有以彰國家重本尙順之明義足爲萬代不易之令典也又議者請奉遷二祖神主於德明皇帝廟行祫祭之禮夫祫合也故公羊傳曰大事者何祫也若祫祭不陳於太廟而享於德明廟是乃分食也豈謂合食乎名實相乖深失禮意固不可行也

建中二年九月太常博士陳京上疏言祫祭太廟并合享遷廟獻祖懿祖二神主敕下尙書省百僚集議禮儀使太子太師顏真卿議曰云云 八年正月太子左庶子李嶸等議曰建中二年十月將祫享禮儀使顏真卿狀奏合出獻懿二祖神主行事其部位次第及東面尊位請準東晉蔡謨等議爲定遂以獻祖當東向以懿祖於昭位南向以太祖於穆位北向以次左昭右穆陳列行事且蔡謨當時雖有其議事竟未行而我唐廟祧豈可爲準 考功員外郎陳京議曰京前爲太常博士已於建中二年九月四日奏議祫饗獻懿二祖所安之位請下百僚博採所疑其時禮儀使顏真卿因是上狀與京議異京議未行（舊唐書禮志）

建中初代宗喪畢當大祫京以太常博士上言唐家宜別爲獻懿二祖立廟禘祫則祭太祖遂正東向位德明興聖二帝向已有廟則藏祔二祖爲宜詔百官普議禮儀使太子少師顏真卿曰今議者以三一謂獻懿親遠而遷不當祫宜藏主西室二謂二祖宜祫食與太祖並昭穆缺東向位三謂引二祖祫禘卽太祖永不得全其

始宜以二主祔德明廟雖然於人神未厭也景帝既受命始封矣百代不遷矣而又配天尊無與上至禘祫時
暫屈昭穆以申孝尊先實明神之意所以教天下之孝也况晉蔡謨等有成議不爲無據請大祫享奉獻主東
向懿主居昭景主居穆重本尚順爲萬代法夫祫合也有如別享德明是分食非合食也時議者舉然於是還
獻懿主祫於廟如真卿議（新唐書陳京傳）

案舊唐書禮志所載魯公廟享議與新唐書陳京傳所載魯公禘祫議本一文也新書經史臣宋祁手刪潤而
成故字句多異留元剛編公集誤錄爲二今以京傳所載祔錄於後又公議禘祫是建中二年九月以太子少
師充禮儀使時事元剛纂公年譜誤載於永泰二年二月貶峽州別駕之後並正之

儀注

元陵儀注大歷十四年五月

將復於太極殿內高品五人皆常服以大行皇帝袞冕服左荷之升自前東霽當屋履危北面西上三呼而止以衣投於前承之以篋自阼階入以覆大行皇帝之上復者徹殿西北扉降自後西霽其復衣不以篋斂浴則去之既復乃設御牀於殿內楹間去脚舒單篋置枕遷大行皇帝於牀南首以衣覆體去死衣楔齒用角柶綴足以燕几校在南其殿內東西哭位嗣皇帝以下舒草薦焉奠用酒脯醢器用吉器如常儀其告喪之禮使至所在集州縣官及僧道將吏百姓等於州府門外並素服各以其方向京師重行序立百姓在左僧道在右男子居前婦人居後立訖使者立於官長之左告云上天降禍大行皇帝今月某日奄棄萬國刺史以下撫膺哭踊盡哀止哭使者又告云大行皇帝有遺詔遂宣訖刺史以下又哭十五舉聲使者又告皇帝伏準遺詔以今月某日卽位刺史以下再拜稱萬歲者三百姓及州縣佐史朝夕巷哭各十五舉聲三日釋服節度觀察團練使刺史並斬衰經杖諸文武官吏服斬衰無經杖大小祥釋服並準遺詔其有勅書使者宣告如常禮將沐浴內有司爲篋於殿西廊下累塊爲窰東面以俟煮沐浴新盆盤瓶鬲皆濯之陳於西階下掘堦於西階之西陳明衣裳於其側帛巾一方尺八寸沐巾二浴巾四皆用帛練櫛及浴衣各實於篋將沐浴內掌事者奉空潘及湯各盛以甕并沐盤升自西階授沐者以入嗣皇帝妃公主等悉出帷外嗣皇帝以下在殿東楹間北面西上內命婦以下在殿西間北面東上俱立哭既沐而櫛將浴內執事者六人抗衾御者四人浴拭以巾拒用浴衣設牀於大行東衽下莞席上篋浴者舉大行易牀設枕理其鬚髮斷爪盛於小囊大斂卽內於棺中也著明衣裳以方巾覆面以大斂之衾覆

之內外入就位哭內有司奉盥水升堂嗣皇帝出盥手於帷外洗玉若貝實筭執以入西面坐發巾徹枕奠玉貝於中之右大臣一人親納梁飯次含玉既含訖嗣皇帝復位執服者陳襲衣十二稱實以箱篚承以席去巾加面衣訖設充耳著握手及手衣納舄乃襲既襲覆以大斂之衾乃開帷內外俱入復位哭將小斂內外各隨職備辦尚食先具太牢之饌厥明而小斂於斂前三刻侍中版奏請中嚴御府令設小斂牀於大行西南首枕席備焉加以幄帷周以素帷主衣先率所司陳小斂之衣十九稱及絞衾於殿中間之東席上南領西上小斂前二刻開宮殿諸門諸衛各勒所部仗衛如常式設百官位次及二王後三恪等位又設內外命婦等拜哭位小斂前一刻侍中奏外辦禮儀使引嗣皇帝及皇子等扶引各卽位從臨者哭內謁者引諸王等進就位百官亦入就位執禮者稱哭在位者皆哭侍御小臣升殿先布衣於絞上乃遷於衣上舉衾而斂以次加衣十九稱畢乃給絞而衾焉近侍扶嗣皇帝哭進跪馮大行與哭踊無數扶引還次尚食奉饌入列於殿東太常博士引司徒省饌省訖奉饌升設於大行東齋卽取爵於篚受酒爵跪奠與嗣皇帝以下哭踊如初諸行事者應退者降退奉禮卽稱止謁者引諸王還內省禮使奏嗣皇帝哭止近侍扶引退便次內外侍臨者代哭不絕聲百官退位如常式其日大斂前三刻侍中版奏請中嚴內外皆哭御府先設大斂牀於大行皇帝西南首枕席幃帳如初所司先陳大斂之衣百二十稱及絞衾并六玉於殿兩楹之東席上南領西上衣必朝祭及五時正服前二刻開宮殿諸門諸衛各勒所部陳設如常儀設皇帝位於殿東間西向前一刻引諸王以下就位皇弟於皇帝位東稍北西向南上皇子於皇弟之東亦南上皇叔在皇帝位北稍西南向西上皇叔祖次皇叔之東皇從父兄弟在皇子北稍東南上諸公主大長公主長公主以下並於西間北牖下西上通事舍人引百僚並入依班序立侍中版奏外辦內高品扶皇帝就位立定典儀曰再拜禮儀使奏請再拜皇帝哭踊再拜在位者皆哭踊再拜十五舉聲禮儀使奏請止哭內外皆止哭內高品扶皇帝就次諸王公主以下百寮各就次中官內官掌事者皆盥訖升斂如小斂次加衣畢乃以

組連珪璧琮琥璜六玉而加焉所以梓宮龍輶紼等入陳於殿西階下至時司空引梓官升自西階置於大行皇帝西南首加七星版於梓宮內其合施於版下者並先置之乃加席褥於版上以黃帛裏施仰薨晝日月星辰龍龜之屬施於蓋陳衣及六玉斂訖中官掌事者奉大行皇帝卽梓宮內所由先以白素版書應入梓宮內一物以上稱名進入梓宮然後加蓋事畢覆以夷衾皇帝至位哭內外皆就位哭太祝酌酒進授皇帝執爵進奠於饌前少退禮儀使奏請止哭內外皆止哭太祝跪讀祝文曰維某年月日哀子嗣皇帝臣某敢昭告於考大行皇帝日月過速奄及大斂攀號擗踊五內屠裂謹以一元大武柔毛剛鬣明粢薌合蕝蕝嘉蔬嘉薦醴齊尙饗（其後祝友大約準此）讀訖皇帝再拜哭踊在位者皆再拜哭踊十五舉聲禮儀使奏止哭左右高品扶皇帝還次諸王公主以下各還次百寮序出大斂訖所司設太常畫日月星有二旂杠九仞旂姿地大斂之後分置殿庭之兩階而刻銘旌以絳廣充幅長二丈九尺題曰某尊號皇帝之柩立於殿下設重於殿庭近西南其制先刊鑿木長丈二尺橫者半之取沐之米爲粥盛以八鬲冪以疏布懸於重內橫木上以葦席北向屈兩端交於上綴以竹篾旣大斂內所由執龍輶左右綽引梓宮就西間將監引所由并柏擊等升自西階所由設熬黍稷盛以八筐加魚腊等於龍輶側南北各一筐東西各三筐設訖於西面壘之先以繡黼覆梓宮又張帟三重更以柏木方尺長六尺題湊爲四阿屋以白泥四面塗之攢事訖所司設靈幄於攢宮東東向施几案服御如常儀侍臣捧袞裳冠經杖盛以箱就次進皇帝服訖諸王公主以下及百寮亦各服其服光祿卿率齋郎捧饌入禮儀使引升陳設訖禮儀使就位奉引皇帝至位哭內外皆就位哭旣定陵地擇地使就其所卜筮之將卜使者吉服掌事者先設使以下次於陵地東南使者至陵地待於次太常卿泣卜服祭服祝及卜師筮師凡行事者皆吉服掌事者布筮席於元宮位南北向西上贊者引泣卜者及太祝立於筮席西南東南向南上下師立於太祝南東面北上贊者引使者詣卜筮席南十五步許當元宮位北向立贊者立於使者之左少南俱北向立定贊者少進東面稱事具退復

位泣卜者進立於使者東北西面卜師抱龜筮師開籟出策兼執之執籟以擊策進立於泣卜者前東面南上泣卜者命曰維某年月朔日子哀子嗣皇帝某謹遣某官某乙奉爲考大行皇帝度茲陵兆無有後艱卜師筮師俱曰諾遂述命於右旋就席北坐命龜曰假爾泰龜有常命筮曰假爾泰筮有常遂卜筮訖興各以龜筮東面占曰從還本位贊者進使者之左東面稱禮畢贊者遂引使者退立於東南隅西面若不從又擇地卜筮如初儀啓前十日皇帝不坐以過山陵前啓一日門下省奏某日某時啓太極殿攢宮啓日之晨奉禮郎設御位於太極殿之東間當帷門西向諸王位在後以南爲上典儀設鄴公公皇親諸親文武九品以上及前資常參官都督刺史版位於太極殿中庭又設蕃客前長位於承天門外之西僧道位於承天門外之東並以北爲上左右金吾與諸軍計會量抽隊仗隨便設禁其日質明皇帝服初衰經杖入就位晨哭諸王具衰經去杖就位哭鄴公公皇親諸親等及文武九品以上各服初喪服去杖入就位哭大長公主長公主郡主郡縣主等亦衰服入就內位哭中官皆布巾喪馭侍衛晨哭並再拜退位通事舍人引蕃客酋長及僧道分立於承天門外之位啓前二刻內所由設奠席及香燭於帷門之外奉禮郎設盥洗於東階下西南北面盥水在洗東篋在洗西南肆設太尉版位於東南西向設司空位於太尉位之南少退禮生一人執拂梓宮之中陪其後設禮儀使位於太尉之北少退禮官等陪後設監察使位於禮儀使之下光祿卿具太牢之饌俟於東階下又於饌上設罇坩位於奠席東南北向加酌罇禮儀使立於罇坩東御史立於罇坩西太祝奉禮郎立於罇坩南爲位禮官在禮儀使後啓前一刻侍中版奏外辦禮官贊執事官入就階下位禮儀使等橫行以西爲上再拜訖升就位禮官省饌訖贊光祿卿引饌升自東階列帷門外席上近侍引皇帝具衰經入就位哭踊禮儀使前進跪奏請再拜皇帝再拜諸王妃主等並各就位晨哭禮生引太尉通事舍人分引羣官各入就位禮官贊太尉再拜又一人贊羣官再拜哭十五舉聲禮官各贊止哭禮生引太尉詣盥洗盥手洗爵升自東階詣罇坩所太祝舉罇酌醴齊以授太尉禮儀使跪奏請皇帝止哭

奉皇帝之杖前進中官承傳止哭殿內皆止哭太尉以醴齊於皇帝之左跪進醴齊皇帝受醴齊跪奠於饌前俛伏興少退立太祝持版進北面跪讀祝文訖奠版俛伏興退復位皇帝再拜哭踊殿內及庭中文武九品以上皇親諸親等皆哭十五舉聲止禮儀使跪奏獻畢請皇帝退復位禮官引太尉及禮儀使降復階下位所由徹饌執事官序降訖皇帝退就次禮生引司空執巾升自東階於橫宮南北向立司空跪啓曰謹以吉辰啓橫塗告訖太尉哭羣官皆哭通事舍人分引羣官序出掌事者升徹橫塗徹訖司空以巾拂拭梓宮覆以夷衾綉幕內所由周迴設帷及施常食之奠如常儀訖禮儀使升就舊位禮官陪後皇帝衰經就位哭通事舍人分引羣官入就位皇帝稽顙禮儀使請再拜皇帝哭盡哀禮儀使跪奏請止哭降出羣官再拜哭十五舉聲訖又序出太極門外北向重行立班奉慰如常儀退前二日所司設文武羣官次於太極門外東西廊下又設帳殿於庭帳內設吉幄幄內設神座南向又設龍輦素幄於殿庭吉幄之右前一日午正後一刻除殿上葦障及階下凶庭并版城少府所由移旒附於重北未正後一刻典禮設羣官夜哭版位如晨夕哭儀又設挽歌席位於嘉德門內設挽郎挽士席位於嘉德門外並左右序設北向相對設鼓吹嚴警位於承天門外晝漏未盡三刻有司設庭燎終夜通事舍人分引羣官就版位立定禮官贊哭哭畢退就次挽歌作盡二點止嚴警次發盡五點止二更羣官哭及挽歌鼓吹嚴警如上儀其三更四更五更並準此其一日前二刻奉禮郎設御座所由設奠席奉禮設盥洗及禮儀使太尉版位於東階下光祿卿具太牢饌並如啓奠之儀前一刻侍中進奏外辦禮官省饌光祿卿引饌禮生引太尉禮儀使等橫陳再拜訖升殿通事舍人分引羣官入就位亦如啓奠之儀禮儀使跪奏請皇帝止哭奉奠皇帝去杖前進中官承傳止哭殿內止哭太尉以醴齊於皇帝之左跪進皇帝受醴齊跪奠於饌前俛伏興少退立太祝持祝版進北面跪讀祝文訖奠版俛伏興退復位皇帝再拜哭踊殿內及庭中文武官九品以上皇帝諸親等皆哭十五舉聲止禮儀使跪奏獻畢請皇帝退復位禮官引太尉降復階下位所由徹饌執事官序降內所由徹殿上帷

帳唯南北施素帷於舊帳坐所以爲障蔽前設常食少府監進轎車於西階下禮儀使跪奏皇帝奉龍轎奏訖降出近侍扶皇帝就龍轎前哭踊盡哀乃復位執事者以蠹旒及重先導禮官一人朝服贊尙輦奉御帥腰輿繼扇至神座前侍奉如常儀內侍捧几置輿上繼扇侍奉至殿庭帳殿下神座前跪置座上內謁者帥中官設香案於座前繼扇侍奉如儀禮官一人引符寶郎一人主寶二人以赤黃褥案進取諡寶又禮生二人亦以赤黃褥案進取諡冊（附元陵諡冊文文曰維某年月日哀子嗣皇帝臣諱伏以聖德之大上與天合人道近瞻鮮克究知敢盡其所見泣以敍財成之業伏惟大行皇帝紹休七聖臨照八極以至道御羣有以至化懷遠方登假於上敷聞在下肇加元服頃昇儲闈生知之敏動與神契承順元宗也齊粟之容著奉養肅宗也愛敬之禮深履蒸蒸躬翼翼不絕馳道日朝寢門此則首冠百王大舜周文之孝也其於崇儒尙齒尊道貴德躬理盡性之學經天緯地之文包荒含垢之量迪哲允恭之善斯又睿聖不測同符乎三五無得而稱也當祿山叛亂陷覆二京以天人之重授元戎之律師之所及狂寇殲夷復宗社之阽危拯生靈於焚燎則乾維重構宸極以安及史盜間釁三河屢梗在撫軍之際思明殞命乘踐祚之初朝義授首則梁陳底定朔易從風其或屈彊於大梁背誕於南越莫不朝爲梟獍夕爲鯢鯨此高光之功神武之略也自是肅勿羣后實延萬靈滂瀦鬱沒之刑寢焚瘞懸沈之禮備衣冠有淪於脇從者釋而靡問靈祇有闕於禋祀者秩而致享聖譎說求謙言扇以祥風浸以膏澤九譯奉貢四夷將賓丕冒日出罔不率俾猶復嚴恭寅畏顧省闕遺兢兢業業日昃不暇故得元功廣運協氣旁流靈契畢發元符洊至則瑞璧出於泗清瀾變於河其餘見祉鱗羽呈祥草木者不可殫記方議羣弓偃伯臻於太和告禪於石闕鏤功於金版據承憑几之命奄邁綴衣之酷號天扣地罔所依歸今龍轎就啓蜃輅將駕採鴻儒碩生之義考公卿百辟之請僉以威德大業匪號諡莫宣是用虔奉古訓發揚茂實謹遣攝太尉某奉冊上尊諡曰睿文武皇帝廟曰代宗伏惟明靈降格膺茲典禮誕錫鈍嘏貽燕後昆嗚呼哀哉）禮官授之並隨禮官先詣冊車安置其

舊寶冊準次取置於車侍中當龍轎南跪奏請龍轎降殿太常卿帥執翬者升以翬障梓宮中官高品等待奉其側司徒帥挽士升奉引龍轎降殿禮儀使引近臣及宗子三等以上親進梓官少府將作所由并挽士奉梓宮登於龍車上遂詣帳殿下素幄皇帝哭從諸王等陪從公主內官等周以行帷皆哭踊而從羣官立哭於庭中位以俟祖奠祖前一刻奉禮郎設御位於龍轎幄之東南西向所由設奠席於龍轎前奉禮郎設罇坵於帳幄東南又設太尉位於罇坵東南西向禮儀使在其下監察御史次之又設盪洗筐於太尉位西南北向光祿卿帥齋郎捧饌俟於橫街之次北面上禮官進省饌訖禮生贊光祿卿捧俎進跪奠於席上諸齋郎捧饌隨列於席上禮生引禮儀使及太尉就位禮官贊哭又一人贊羣官哭又各贊止哭禮儀使導皇帝立於龍轎之東南西向禮生引太尉詣盪洗盥手洗爵執詣罇坵所太祝舉冪酌醴齊以授太尉禮儀使跪奏請皇帝止哭奉奠皇帝去杖前進中官承傳止哭諸王妃主等皆止哭太尉以醴齊於皇帝之左跪進皇帝受醴齊跪奠於饌前俛伏興少退立太祝持祝版進北面跪讀文訖奠版俛伏興退復位皇帝哭踊再拜諸王妃主及羣官在位者皆哭再拜皇帝哭十五舉音訖禮儀使跪奏請復位俛伏興皇帝退復龍轎後位禮官各贊羣官止哭通事舍人分引出就承天門外位以俟光祿卿帥齋郎徹饌以出禮官一人朝服贊尙輦奉御帥所由以腰輿繖扇詣神座前各以序立內謁者中官舁香出內侍捧几置輿上內所由舉繖扇侍奉以出中官帥其屬舁衣箱以從遂詣玉輅禮官於輅後立贊登車內所由進輿當輅後繖扇分蔽左右內謁者帥香案進於輅前內侍奉几登輅其腰輿亦進居輅前中官以衣箱授尙衣奉御置玉輅及副車內侍並乘馬從輅於是侍中進龍轎南跪奏稱請龍轎進發俛伏興退司徒帥挽士奉引次出執事者以太常先建之於車轟次之公主內官以下應合乘車者並先升車以俟扈從前三日所司設皇帝奉辭次於承天門外之左西向其日金吾仗衛如常儀鹵簿使先進玉輅於承天門外東偏稍南輿輦鼓吹吉駕鹵簿並序列於玉輅前又進輶轎車當承天門中稍南凶儀明器序列於輶轎車前奠前一刻奉禮

郎布文武羣官位於承天門外異位重行如太極庭中儀光祿卿具遣奠之饌以俟執事官位並先俟於門外之東龍轡至承天門外禮官贊止哭侍中進龍轡前跪奏稱請升輓轎車俛伏興司徒帥昇梓宮官及所由奉梓宮升輓轎車所司設奠席於輓轎車東西向奉禮郎設罇坫於席東南設盥洗又於其南設太尉版位於東西向禮官進省饌訖禮生贊光祿卿捧俎進跪奠於席上諸齋郎捧俎隨列於席上禮生引太尉就位禮官贊哭在位者皆哭又贊止哭在位者皆止哭禮生引太尉詣盥洗盥手洗爵詣罇坫所太祝舉彘酌醴齊禮儀使就次奏請皇帝出就次皇帝出次立於奠東西向太祝以醴齊授太尉訖禮儀使奏請皇帝去杖前進中官承傳止哭諸王妃主等皆止哭太尉以醴齊於皇帝之左跪進皇帝受醴齊跪奠於饌前俛伏興少退立太祝持版進西北向跪讀祝文訖奠版俛伏興退復位皇帝哭踊禮儀使贊皇帝再拜諸王妃主及在位羣官等皆哭禮儀使跪奏請皇帝少退近侍扶皇帝少退於位少府監設讀哀冊褥於奠東禮官引冊案進舉冊官舉冊進至褥東西面以冊東向禮官贊太尉及羣官止哭中官承傳官王妃主皆止哭禮官引中書令進跪讀冊訖俛伏興退復位舉冊者以授祕書監轉授符寶郎皇帝哭踊禮儀使奏請皇帝再拜太尉羣官諸王妃主皆哭再拜少府徹褥光祿徹饌訖禮儀使跪奏稱輓轎車將發皇帝前哭盡哀禮儀使稱再拜奉辭俛伏興皇帝稽顙哭踊再拜輓轎車發禮儀使跪奏請皇帝還官俛伏興近侍扶皇帝入次太尉以下於次南橫行進名再拜奉辭訖各就本職如諸王有故不起山陵者俟皇帝奉辭入次後諸王進至輓轎之左以南爲上哭盡哀再拜辭妃主內官不去者於輓轎車後帷中哭再拜辭訖禮生贊侍中於輓轎車前跪請進發訖俛伏興山陵日依時刻吉凶二駕備列訖尙葢帥腰輿繖扇入詣神座前內侍捧几內謁者捧香爐各置輿上中官帥其屬舁衣箱以出神輿至玉輅後內常侍捧几置輅中輿等退就列中官以衣箱傳授尙衣奉御置於玉輅及副車中神駕動警蹕如常千牛將軍夾輅而趨至侍臣上馬所禮生贊侍臣上馬侍臣上馬訖夾侍如前禮生在供奉官內諸侍衛之官各督其屬左右翊神駕動鹵簿官

以黃麾麾之鼓吹振作警蹕如常當陵門以赤麾麾之鼓吹不作侍臣下馬步導於前駕至吉帷宮迴車南向尙
輦帥腰輿繖扇至輅後內常侍奉几置輿上繖扇侍奉至帳殿下內侍捧几置座上內謁者捧香爐置座前輿等
退就列玉輅及鹵簿侍衛之官停列於帷宮門外吉駕引禮官贊侍中進鞶鞶車靈駕前奏請靈駕發引俛伏興
退司馬執鐙挽郎執紼挽歌振作及挽以進內外哭從以赴山陵靈駕至陵門西凶帷帳殿下迴駕南向公主及
內官以下並降車障以行帷哭於凶帳殿之西東向北上羣官皇親哭者序立於帷門外東西相向北上哭十五
舉音止各退就次前三刻奉禮郎於隧道東南量遠近設皇親諸親奉辭位又於其南設應從文武官五品以下
奉辭位又於其南設六品以下奉辭位每等異位重行西面北上設奉禮郎位於其北禮生二人立於其南差退
內謁者於隧道西南稍北帷內設公主王妃及內官以下奉辭位東向北上前一時刻所司設奠席於鞶鞶車前設
盥洗篋於東南盥在洗西篋在洗東於是羣官列位序立光祿卿帥其屬以饌奠於席上禮官引太尉詣盥洗盥
手洗爵詣罇坵所太祝酌醴齊訖太尉跪奠於饌前俛伏興太祝持版進太尉之左跪讀文訖奠版俛伏興太尉
再拜在位者皆再拜發引至南神門將作監進龍輜於靈駕之後禮官贊侍中進鞶鞶靈駕前跪奏稱降靈駕
御龍輜俛伏興退昇梓宮所由乃奉遷梓宮至龍輜昇梓宮官左右捧從司空以巾拭梓宮并拂夷衾少府屬緋
於龍輜禮官贊侍中進龍輜前跪奏稱請引龍輜卽元宮俛伏興退挽郎執紼奉引龍輜左迴北首禮官贊司徒
前導白幟弩素信幡大旒及嬰皆依次而引近伏近侍夾進如禮官導通事舍人引太尉先導於龍輜之左主節
官帥持節者脫節在太尉之前差退代哭者及挽歌皆序立門外之西重行東向押官排比以俟皇親諸親羣官
等哭從公主王妃及內官等障以行帷龍輜至羨道停於帷下南首以俟時妃主內官以下於羨道西南帷內就
位東向哭通事舍人分引羣官皇親諸親各就奉辭位所由各贊哭在位者皆哭其吉鹵簿侍奉官少前序立於
門外之東西向北上哭皆三十舉音止再拜奉辭至時內官以下吉服奉遷梓宮入自羨道奉接安於御榻褥上

北首覆以御衾龍韉退出其押吉鹵簿官並服白布巾衫就哭將掩元宮并依前服吉服初梓宮降自羨道奉禮郎設太尉進寶冊贈玉幣位於羨道東南西向設禮儀使奉寶冊玉幣位於太尉南又設祕書監位於其南禮官導通事舍人引太尉以下俱吉公服各就位又導持節者服節衣引太尉之前禮部侍郎奉寶綬案諡冊哀冊案每案四人對舉（用九品以上清資官昇）立於太尉之西南少府監奉贈玉置於匣帥其屬捧立於禮部侍郎之西太府卿奉幣元三纁二置於篚帥其屬捧立少府監之西俱北面各立於寶冊玉幣之後（案元衣纁裳周制也當時所服故以爲幣服近代及今則皆不用滯儒執古儀注復存斯未達禮從宜及隨時之義也）立定禮官導通事舍人引禮部侍郎取寶綬於案進授太尉又禮生一人引祕書監取諡冊哀冊進授禮儀使（其冊如重則判官助舉）又引少府監取玉於匣并薦巾又引太府卿取幣進授禮儀使以幣承巾玉禮部侍郎以下並退龍韉既出禮儀官分贊太尉禮儀使奉寶冊玉幣并降自羨道至元宮太尉奉寶綬入跪奠於寶帳內神座之西俛伏興禮儀使以諡冊跪奠於寶綬之西又以哀冊跪奠於諡冊之西又奉玉幣跪奠於神座之東並退出復位禮生引將作監少府監入陳明器白纁弩素信幡翬等分樹倚於牆大旒置於戶內（其跌竿燒之自餘明器各以次遂便陳之使有行列）陳布訖并內官以下並出羨道就位所由贊內外哭羣官皇親諸親并吉儀侍奉官皆哭三十舉音再拜又再拜奉辭訖引退以出中官贊公主王妃並退出周以行帷至門乘東以扈從禮生導主節官帥持節者引太尉及司空山陵使將作監御史一人監纒閉元宮司空復土九緇（所司帥作工續以終事）其先除服者並改服凶儀鹵簿解嚴退散輓輓車龍韉之屬於柏城內庚地焚之其通人臣用者則不焚將啓太祝捧土匱置於座啓匱於前捧出神主置於座上東向諸侍奉官各退就位奠繖等亦退通事舍人引羣官俱退於太極殿門外就次以俟虞祭所由陳仗衛如式典儀設太尉司徒宗正卿禮儀使及諸行事官位於東階之東設太祝等位於公卿之前少南（如不親行事中書門下奏差攝）又少南設典儀位俱西向典儀帥禮生

二人先就次立禮生乃引太尉司徒以下祭服立於左延明門外之西北向西上光祿卿帥其屬捧饌立於太尉司徒之東太祝帥齋郎奉祝版立於饌東立定禮生廼引太尉司徒以下入就位通事舍人分引羣官皇親諸親皆素服各入就位侍中版奏中嚴皇帝素服就次（諸王升就位如不獲親奠卽太尉行事如常）光祿卿帥其屬捧饌入俟於東階之前太祝帥齋郎捧祝版立於其南光祿卿帥其屬并設醴餼酒罈於帷門外前楹中間之東北向西上設篚於罈西實饌一杓一皆有暴設疊洗篚於東階之東北向疊水在洗東篚在洗西南肆實爵二巾一有暴執疊洗者立於其後侍中版奏外辦近侍扶引皇帝再拜通事舍人分贊羣官在內外位者哭拜禮生引禮儀使省饌訖升就禮官升位後光祿卿帥進饌奉饌司徒捧俎光祿卿引饌及諸執事官並升自東階設於帷東門外席上訖降復位太祝捧祝版升立於罈所執罈篚之後禮儀使導皇帝於饌東西面禮儀使跪奏請皇帝止哭奉奠承傳內外皆止哭太祝以罈酌醴齊於皇帝之左跪進皇帝受醴齊跪奠於饌前俛伏與太祝持版進神座之南北面跪讀祝文訖奠版俛伏興禮儀使導皇帝復位跪奏請再拜皇帝再拜禮生引太尉亞獻終獻訖降復位如常儀通事舍人分贊內外哭再拜禮儀使又跪奏請再拜俛伏興皇帝哭再拜奉禮郎傳贊內外再拜禮儀使跪奏禮畢俛伏興近侍扶皇帝還閣羣官等俱退太祝乃跪匱神主遂閉帷門降出內侍之屬及行事者皆出祝版焚於左延明門外百寮乃於太極門外奏慰如常儀每虞日朝哭禮皆準此（如不親行事則宗正卿亞獻光祿卿終獻）祔廟前二日告遷其禮如常告之儀（宗正起科申牒所由祝文出祕書省）所由先備腰輿等并昇人（帝以三衛充后以中官充）告訖太尉先匱代祖神主奉遷於西夾室堦中纒閉如式次腰輿遷等三室神主（二主合一腰輿凡主出則帝主先出其入室則后主先入）入第二室宮闈令捧后主先置於堦室太祝奉帝主復置於堦室俱東向次遷第四室入第三室次遷第五室入第四室次遷第六室入第五室次遷第七室入第六室（室有二后昭成於前肅明於後）次遷第八室入第七室次遷第九室入第八室

皆如上儀入埽室皆鑲閉訖次所司移幄等物依次各遷入本室訖其九室應緣幄帳香案斧辰席褥等所司先造其日陳設於室中其代祖室舊帳幄等物並移於西夾室巾虛設鑲閉如式將遷代宗睿文孝皇帝所司先擇日奏定散下所由各供其職應用法駕鹵簿黃麾大仗前一日陳設及太廟四門量設方色兵仗如上儀將作監先清埽諸廟內外京兆府修路從承天門向南至太府寺南街向東入太廟三門又向南又向東至廟南門宗正具耐饗料差三公及應行事官齋戒如常饗儀（其祝文具耐享意出祕書省）又申太極殿告靈座料如前式（其祝文出祕書省）太樂令設登歌於太廟殿上並如常式尚舍於廟南門道西設神主幄座東向幄內設牀席褥黼辰香案如式內中尚先造栗木主并匱及跌（其制度並如常儀）耐前一日盛以箱覆以帕置於腰輿詣廟南門幄帳中太祝捧置於座上廼下簾帷內侍省量差中官侍衛禮儀使奏請差題神主官即以饗前一日尚舍具香湯并題神主席褥內中尚具浴神主盆并白羅巾光漆筆墨等詣於幄帳中禮儀使與題神主官等其日質明詣幄下太祝以香湯浴粟主拭以羅巾題粟主官盥洗捧粟主就褥題云代宗睿文孝武皇帝神主墨書訖以光漆重摺之遂捧授太祝受詣帳座置於匱中所侍衛如式前一日尚食與西內使計會鴻臚除太極殿上白幕並以吉幙代之殿中省除版城太僕進玉輅於承天門外當中南向及諸輦輅羽儀仗衛繖扇陳於玉輅前左右金吾引駕所由陳布如式太常奏前一日之夕嚴警於承天門外之南皇城留守奏耐饗日質明開朱雀門大內留守與內檢校使奏開太極殿門嘉德門承天門衛尉於太極殿門外廊下量設文武百官次又於太廟南門外量設百官次於道東如在太極殿庭儀先奏靈座耐之日質明宗正卿帥執饗齋郎光祿卿帥大官良醞寶罇俎籩豆并應行事官皆祭服序列於左延明門以俟至祭時應行事官詣太極殿東階下西向序立典禮於太極殿庭布文武官皇親諸親位如常儀俟祭官欲升殿行事時通事舍人引文武百寮等常服入就位禮生贊衆官皆拜在位者皆再拜尚書帥腰與香案繖扇入詣殿庭階下分東西立侍從官攝侍中中書令以下並列位於左

右序立太僕進玉輅於嘉德門外當中南向禮生引祭官等行告禮如常儀告訖宗正卿光祿卿帥齋郎長祠徹饌禮官引侍中升尚輦帥腰輿升詣帳座前其繖扇侍臣等夾於階間侍中進跪於幄前西向奏請降座升輿附廟內侍奉几置輿上太祝匱神主捧置輿上几後扶持降自西階繖扇侍臣夾引以出自太極殿門中門出在位文武百官及皇親諸親等便從神輿而出至嘉德門分左右序立神輿至玉輅後侍中跪奏請降輿升輅內侍捧几置輅中太祝奉匱升輅（其太祝便於輅中侍奉）千牛將軍夾輅而趨出承天門五十步侍中進當輅前跪奉請敕侍臣上馬侍臣等皆上馬鼓吹振作其文武百官等候玉輅出承天門各逐便路先赴太廟南門次以俟神輿函籥至廟門西三門鼓吹止分左右以俟饗訖退其儀仗等並於廟南門分左右列位俟饗禮畢退玉輅既發赴廟尚舍收拆殿上帳幄及板城等應合收者與檢校使計會處置（西宮內人衰裳其日並焚之）其日太廟附饗應緣齋官陳設饌彝酒醴坩爵省牲告潔進署祝版陳設樂器並如東饗常儀玉輅將至廟西門尚舍奉御設牽謁禱位於廟庭橫階南當中北向奉禮郎於廟南門外稍南設文武百官及皇親諸親位如太極殿庭之儀又於廟庭橫階南設文武百官及皇親諸親位亦準此（其六品以下非常參官並列位於廟南門外）通事舍人引文武百官及皇親諸親等常服就南門外位禮生引應饗官俱祭服立於廟東門外北向西上位立又禮生引禮儀使御史以下執事官等先入當中階北向立於禱位之南禮生贊再拜禮儀使御史以下皆再拜訖引自東階升各就位次引司空入就位再拜行埽除訖降復位禮官與太祝自西第一室開埽室捧神主匱置於幄中近東啓匱出神主捧置於座几後跌上次宮闈令人室捧后主匱置於幄中近西啓匱出后主置於座几後跌上自第一室至第八室皆如上儀訖並使郎室長各於本室依儀出入須知次序太祝退立於罇坩所宮闈令退就階下執事位玉輅既至廟南門迴輅南向侍臣等序列於輅前神輿入幄則侍臣列於幄門外尚輦帥腰輿進輅後侍中跪奏請降輅升輿詣幄座內侍捧几置輿上太祝捧神主匱置輿上几後遂昇詣幄座內侍捧几置座上

東向太祝捧匱置几後訖禮生於廟東門引行事官太尉以下入就廟庭位西向立其殿上御史禮官太祝樂官等各逐便自東西階下相向序立候神主升殿却復階下位侍中進於幄座前跪奏請降座升輿祔謁內侍奉几置輿上太祝捧栗木主匱置几後禮官引入通事舍人引文武百官皇親諸親自南門外分左右從入就東西班位立神輿至廟門繳扇分左右立於門外神輿至廟庭褥位侍中各退就本班（其侍中未退）太祝捧匱跪置於褥啓匱出神主置於趺上訖侍中進於褥位西北面跪奏稱以今吉辰代宗睿文孝武皇帝祔謁奏訖俛仗興退少頃侍中詣褥之西東面跪奏請升輿祔饗俛仗興退降就本班太祝進跪於褥位捧神主匱於輿（其匱蓋亦置輿上近後）腰輿既升禮官奉引神輿詣元宗室太祝跪神主匱置東壁下祔位褥上西南退立戶外少頃太祝進就褥跪捧神主置於輿奉引入第九室至帷座前內侍捧几置於座（如幄中別有几其几留於腰輿而退）太祝捧神主置於曲几後趺上（以題處向北也）其匱置於几東近後腰輿退於幄座之西近北昇腰輿所由並降自東階由廟東門出神主置座訖禮生贊再拜太尉以下及在位者皆再拜禮生引太尉盥洗執瓊升詣從西第請行事登歌奏永和之樂九成畢禮生贊再拜太尉以下及在位者皆再拜禮生引太尉盥洗執瓊升詣從西第一室酌鬱鬯登歌作太尉入室神座前裸訖奠瓊於饌席俛仗興退出戶北向再拜次引詣第二室次引詣第三室以至第九室皆如上儀訖登歌止引太尉降復位太祝奠毛血之豆禮生引司徒執俎入白正門俎初入門雍和之樂作饌升階樂止禮生徹毛血之豆降自東階以出詣太祝取蕭蒿焚於爐炭饌升設訖齋郎降自東階由廟東門以出禮生引太尉盥洗執爵奏自第一室至第八室各奏本室樂至第九室奏保天之樂行饗禮亞獻終獻並如常饗之儀訖降復位登歌作太祝各入室徹豆還罇所登歌止禮生唱賜胙又唱再拜衆官應在位者皆再拜（其三獻官不拜）永和之樂作禮生又唱再拜在位者皆再拜樂一成止禮生進太尉之左白禮畢禮生引饗官自東門出通事舍人引在位羣官南門出太祝入室各匱神主納於埽室如常儀禮官帥腰輿詣廟門

次變服素服訖（黑絁幘頭腰帶白衫麻鞋）各入就位立定近侍扶皇帝就位哭踊禮官省饌光祿卿引饌升設靈幄前太祝執爵酌醴酒禮儀使奉引皇帝稍進詣饌前禮儀使請止哭內外俱止哭太祝以酒授禮儀使禮儀使受酒跪進皇帝受酒跪奠於饌前俛伏興少退太祝持版於饌南北向讀祝文訖禮儀使奏請再拜皇帝哭踊再拜贊者承傳內外者在位者皆哭再拜十五舉聲禮儀使奏禮畢與禮官等趨出近侍扶皇帝還次通事舍人引羣官序出太極門（其奉慰如常儀）百寮奉慰訖以素服詣延英門起居（謹案禮云大祥素縞麻衣又云縞冠素紕既祥之冠今所司具淺黑絁此卽古之縵冠也案禮云禫而縵黑經白緯曰縵則宜施之於禫今於大祥服之蓋從當時宜）其日百寮早集西內入就位侍中進辦並如大祥之儀皇帝服大祥服近侍扶就位哭十五舉聲禮儀使奏請再拜皇帝再拜贊者承傳百寮在位者皆再拜禮儀使奏請就次變服皇帝就次除大祥服服素服（細布麻衫腰帶細麻鞋黑絁幘頭巾子等）百寮趨入就位立定近侍扶皇帝入哭踊內外百寮皆哭踊禮官省饌光祿卿引饌升陳設酌奠亦如大祥之儀太祝讀祝文訖禮儀使奏請再拜皇帝哭再拜贊者承傳內外百寮皆哭再拜訖禮儀使奏禮畢遂與禮官趨出近侍扶皇帝還次通事舍人引百寮序出至太極門外進名奉慰訖各服黼公服便詣延英門起居明日平明皇帝改服黼吉服（淡淺黃衫細黑絁幘頭巾子麻鞋吉腰帶伏準貞觀永徽開元故事服此服至山陵事畢則純吉服其中間朔望視朝及大禮並純吉服百寮亦純吉服自後朝謁如常儀）其百官黼公服至山陵事畢乃服常公服

案唐自李義甫許敬宗以凶事非人臣所宜言去國卹一篇而天子之喪禮闕焉故開元禮及新舊唐書禮志皆無其儀惟杜佑通典載有元陵儀注凡四千七百言於行禮次第燦然大備然未著爲何人所定元陵者代宗之陵也代宗以大歷十四年十月己酉葬於元陵其時魯公爲禮儀使則此儀爲公之手筆無疑故殷亮撰公行狀云今上諒闇之際詔公爲禮儀使先自元宗以來此禮儀注廢闕臨事徐創實資博古練達古今之旨

所以朝廷篤於訕疾者不乏於班列多是非公之爲公不介情惟搜禮經執直道而行已今上察而安之卽謂此儀注也歷朝國卹莫詳於此經世文字莫大於此宋敏求留元剛諸家編輯公文小說殘碑無不甄錄獨於此文不詳加考訂登之集中可謂搜羅星宿忘義娥矣文獻通考又載杜黃裳爲禮儀使太常丞裴瑾取黃裳所定大喪儀爲崇豐二陵集柳宗元爲之序崇乃德宗陵豐乃順宗陵皆在代宗之後宗元序中未及魯公有此儀注則宗元作序時此儀已不行於世矣千載而下獨託通典以存亦魯公之精爽有以護之也舊唐書藝文志載公爲禮儀使時著有禮樂集十卷行狀謂前後所定儀注令門生左輔元編此儀殆其一卷也又案通典元陵儀注外別有諡冊文一首今不能定爲公撰因用小註附載於取進諡冊句之下

判

對三命判

乙仕登三命舉以特牲祀以少牢人告其僭加於舉禮也

侑食以樂執恭展禮以辨等威以明貴賤乙以筮任策名清朝從大夫之後既登三命循先人之祭有事
倫已而鏗鏘具舉和平不爽茲芬承祀胡考之甯舉特且叶於禮經加牢未虧於祀典人告其僭罔知攸伏

案開元二十二年公以是判擢拔萃科其同擢者有馬燧一判載入全唐文

案楊志堅妻求別適判

楊志堅素爲儒學徧覽九經篇詠之間風騷可披愚妻覩其未遇遂有離心王歡之廩既虛豈遵黃卷朱叟
之妻必主甯見錦衣污辱鄉閭敗傷風俗若無褒貶僥倖者多矣王決二十後任改嫁楊志堅秀才贈布絹各二
十匹米二十石使署隨軍仍令遠近知悉

顧魯公爲臨川內史澆風莫競文教大行康樂以來用爲佳譽也邑有楊志堅者嗜學而居貧鄉人未之知也
山妻狀其饋藿不足索書求離志堅以詩送之曰平生志業在琴書頭上於今有二絲漁父尙知溪谷暗山妻
不信出身遲荆釵任意撩新髮鸞鏡從他別畫眉今日便同行路客相逢卽是下山時其妻持詩詣州請公牒
以求別適魯公案其妻曰云云江左數十年來莫有敢棄其夫者（范攄雲溪友議）

牒

訪求清河行人李華牒據殷亮撰行狀增

清河郡屬崔審交應賊之後更不安行人李華乃崇墉浚隍鍛甲矯翦乞師破敵和衆以安之靜言其功須有甄賞

案李華卽李粵前在清河乞師於公及堂邑戰勝見公讓功於賀蘭進明粵遂藏於民間至德改元公以軍用已竭思所以贍濟之遂牒於路以求粵粵至爲畫收鹽置場之策軍用遂贍

書

與郭僕射書廣德二年十一月

十一月日金紫光祿大夫檢校刑部尙書上柱國魯郡開國公顏真卿謹奉書於右僕射定襄郡王郭公閣下蓋太上有立德其次有立功是之謂不朽抑又聞之端揆者百察之師長諸侯王者人臣之極地今僕射挺不朽之功業當人臣之極地豈不以才爲世出功冠一時挫思明跋扈之師抗回紇無厭之請故得身晝凌烟之閣名藏太室之廷吁足畏也然美則美矣而終之始難（始當作實）故曰滿而不溢所以長守富也高而不危所以長守貴也可不做懼乎書曰爾惟弗矜天下莫與汝爭功爾惟不伐天下莫與汝爭能以齊桓公之威業片言勤王則九合諸侯一匡天下葵邱之會微有振矜而叛者九國故曰行百里者半九十里言晚節末路之難也從

古至今泉我高祖太宗已來未有行此而不理廢此而不亂者也前者菩提寺行香僕射指麾宰相與兩省臺省已下常參官並爲一行坐魚開府及僕射率諸軍將爲一行坐若一時從權亦猶未可何況積習更行之乎一昨以郭令公以父子之軍破犬羊凶逆之衆衆情忻喜恨不頂而戴之是用有興道之會僕射又不悟前失竟率意而指麾不顧班秩之高下不論文武之左右苟以取悅軍容爲心會不顧百察之側目亦何異清晝攫金之士哉甚非謂也君子愛人以禮不聞姑息僕射得不深念之乎真卿竊聞軍容之爲人清修梵行深入佛海况乎收東京有殄賊之業守陝城有戴天之功朝野之人所共貴仰豈獨有分於僕射哉加以利衰塗剽恬然於心固不以一毀加怒一敬加喜尙何半席之座咫尺之地能汨其志哉且鄉里上齒宗廟上爵朝廷上位皆有等威以明長幼故得奕倫敍而天下和平也且上自宰相御史大夫兩省五品已上供奉官自爲一行十二衛大將軍次之三師三公令僕少師保傳尙書左右丞侍郎自爲一行九卿三監對之從古以然未嘗參錯至如節度軍將各有本班卿監有卿監之班將軍有將軍之位縱是開府特進並是勳官用蔭卽有高卑會讎合依倫敍豈可裂冠毀冕反易奕倫貴者爲卑所凌尊者爲賤所逼（石本賤誤作賤）一至於此振古未聞如魚軍容階雖開府官卽監門將軍朝廷列位自有次序但以功績旣高恩澤莫二出入王命衆人下敢爲比不可令居本位須別示有尊崇只可於宰相師保座南橫安一位如御史臺衆尊知雜事御史別置一榻使百察共得瞻仰（石本誤重使字）不亦可乎聖皇時開府高力士承恩傳宣亦只如此橫座亦不聞別有禮數亦何必令他失位如李輔國倚承恩澤徑居左右僕射及三公之上令天下疑怪乎古人云益者三友損者三友願僕射與軍容爲直諒之友不願僕射爲軍容佞柔之友又一昨裴僕射誤欲令左右丞勾當尙書當時輒有訓對僕射恃貴張目見尤介衆之中不欲顯過今者興道之會還爾遂非再揭八座尙書欲令便向下座州縣軍城之禮亦恐未然朝廷公讎之宜不應若此今旣若此僕射意只應以爲尙書之與僕射若州佐之與縣令乎若以尙書同於縣令則僕射見尙書令得

如上佐事刺史乎益不然矣今既三廳齊列足明不同刺史且尙書令與僕射同是二品只校上下之階六曹尙書並正三品又非隔品致敬之類尙書之事僕射禮數未敢有失僕射之顧尙書何乃欲同卑吏又據宋書百官志八座同是第三品隋及國家治升別作二品高自標致誠則尊崇向下擠排無乃傷甚況在於公堂揭咄常伯當爲令公初到不欲紛披僂俛就命亦非理屈朝廷紀綱須共存立過爾墮壞亦恐及身明天子忽震電含怒責戮奕倫之人則僕射其將何辭以對

帖

與李太保帖九首

辭後明日至宅奉送承已當時出（闕）不獲重捧袂至今爲恨仲春漸暄不審太保尊體何如眞卿粗爾不審初到如何侍承異績以慰瞻仰因中郎張澈往謹附狀不宣謹狀二月十四日刑部尙書顏眞卿狀上李太保大夫公閣下張澈昨艱難時首末得力願在麾下有容足處庇之幸甚謹空

奏事官至蒙問增慰馳誠冬閏初寒伏惟太保尊體安適眞卿悲疚何言蕃寇推退爲憲之功忝沐深情俱增喜躍前後不逢之信遂闕修狀何時入奏未聞悲係無喻謹還狀不次謹狀閏月十有四日刑部尙書顏眞卿狀上李太保大夫公閣下謹空

眞卿粗自奉別渴仰何勝昨緣馬奔遂失馳謁想蒙情恕也眞卿十五日離家大小俱安沈沈病瘡少愈勿憂爲佳正遠披承益期自愛謹勒參候不次刑部尙書顏眞卿頓首李太保大夫公閣下

千手贊已領訖然尙少第二隔恐在書府希更根尋足疎拙抵罪聖慈含宏猶佐列藩不遠伊邇省躬荷德

恩貸實深兢慄之誠在物何喻仲春暄甚不審太保尊體何如所苦當轉勝也眞卿緣驛上無馬私乘泡轉幾死前進不得今日始至藍田即便取路不獲執別此情如何珍重珍重謹附狀不次謹狀二月十一日硤洲別駕顏眞卿狀上李太保大夫公閣下

不審所苦何如奉計已痊復眞卿緣馬病朝迴已乏未遂馳謁謹勒參候不次謹狀刑部尚書顏眞卿狀上李太保大夫公閣下

千手贊檢得未帖之謹空

拙於生事舉家食粥來已數月今又罄竭祇益憂煎輒恃深情故令投告惠及少米實濟艱勤仍恕干煩也眞卿狀

陰寒不審太保所苦何如承渴已損深慰馳仰所檢贊猶未獲望於文書內細檢也病妻服藥要少鹿肉脯有新好者望惠少許幸甚幸甚專馳謁不次謹狀二十九日刑部尚書顏眞卿狀上李太保大夫公閣下謹空
惠及鹿脯甚慰所望春寒承美（闕一字）痊損更加保愛眞卿有一二藥煩宜常服謹令馳納少間借馬奉謁不次二十日顏眞卿狀上太保大夫公閣下

與御史帖

眞卿謹別上書於御史閣下竊聞尊候平和眞卿瞻仰瞻仰前所會廟上諸公未悟唯御史論高百寮振古未有雜事可置况朝廷自有次序不足念乎眞卿

與盧倉曹帖三首

昨奉辭但增悵仰承已過逮不得重別情深惘然珍重謹此不宣眞卿白二十四日

廬八倉曹足下敍本甚是佳製耳（據留元剛忠義堂帖增）

足下今日定成行否不得一至郊郭深用悵然珍重珍重所欲拙書今勒送十餘紙望領之忽怪弱惡也不具不具眞卿 廬倉曹足下（據鞏嶸忠義堂續刻增）

與蔡明遠帖二首

蔡明遠鄱陽人眞卿昔刺饒州卽嘗趨事及來江右無改厥勤靖言此心有足嘉者一昨緣受替歸北中止金陵闔門百口幾至餓口明遠與夏鎮不遠數千里冒涉江湖連舸而來不愆晷刻竟達命於秦淮之上又隨我於邗溝之東追攀不疲以至邵伯南埭始終之際良有可稱今旣已事方旋指期斯復江路悠緬風濤浩然行李之間深宜尙慎不宣眞卿報

聞鄒游與明遠同來欲至采石計其不久亦合及吾淮泗之間脫若未到見之宜傳此意遣此不宣眞卿報
蔡明遠

劉中使帖

近聞劉中使至瀛州吳希光已降足慰海隅之心耳又聞磁州爲盧子期所圍舍利將軍擒獲之吁足慰也
與夫人帖

眞卿頓首奉承十四日遷厝承問悲慕不能自勝惟攀慕不及摧毀何堪痛當奈何痛當奈何凝寒惟動靜支適兒子等保持眞卿離官已久事須十間前至鄭州汴州已來專奉待一日只擬一驛計過大事後發猶恐遲必望知此緩急勿遲滯足下不來義無獨去之法必請矜此狼狽所望今到汴州水下不愁河凍書祭器等先下

船去眞卿十一日且發東京佇望早來早來謹不次眞卿頓首夫人閣下 十一月八日 問訊頌翮蒙郎和奴
光嚴深遠憶或至十三日得發

案帖後所問之訊杲卿之孫後爲兵曹參軍見公撰伯父元孫碑頌公親姪後爲清源尉封費縣男見公撰大
宗家廟及曾祖勤禮三碑翮杲卿之姪後爲華原主簿見公撰大宗家廟勤禮元孫四碑

與緒汝書

政可守不可不守吾去歲中言事得罪又不能逆道徇時爲千古罪人也雖貶居遠方終身不恥緒汝等當
須會吾之志不可不守也

與澄師帖

眞卿承聞大華嚴會已遂圖成取來日要詣彼隨喜如何如何幸周副老草不悉眞卿頓首和南澄師大德
侍者十日敬空

廣平帖

得示問廣平碑本了來數日故當封呈眞卿頓首

文殊帖

近作一文殊師利菩薩碑但欲發揚主上聖意蓋不近文律耳今奉呈充蓋醬之用可乎眞卿白

案此帖公在湖州作

寒食帖

天氣殊未佳汝定成行否寒食只數日間得且住爲佳耳

中夏帖

真卿頓首中夏以還暑氣日甚病懶益不喜所爲前欲書石當須稍涼作之也幸不以差緩過之京人來何消息嘉否

修書帖

賊軍未平使僕不憤見故先修書但召諸子弟與語不具真卿

訊後帖

真卿具前楮訊後所苦何如立斯極位雄廷江上佳山秀水在公庭戶想日有樂事甚得佳士相延公高才逸韻自有晉宋間人風坐此肆局不易處上方招致仁者如公之儔豈久在江左乎行聞迅召以快士議真卿頓首

一行帖據王案汝帖增

眞卿一行昨自江淮日趨百里本期奉見以慰遠別疲於道路且止數昔但深攀仰耳

南來帖據鞏嶸忠義堂續刻增

眞卿承命南來諸事草草但賊勢尙爾柰何張貞口不了國事可念可念眞卿

江外帖據忠義堂續刻增

江外唯湖州最卑下今年諸州水並湊此州入太湖田苗非常沒溺賴劉尙書與拯以此人心差安不然僅不可安耳眞卿白

案此帖公在湖州作

草篆帖據忠義堂續刻增

眞卿自南朝來上祖多以草隸篆籀爲當代所稱及至小子斯道大喪但會見張旭長史頗示少糟粕自恨無分遂不能佳耳眞卿白

奉使蔡州書

眞卿奉命來此事期未竟止緣忠勤無有旋意然中心悵悵始終不改游於波濤宜得斯報千百年間察眞卿心者見此一事知我是行亦足達於時命耳

移蔡帖

貞元元年正月五日真卿自汝移蔡天也天之昭明其可誣乎有唐之德則不朽耳十九日書

序

尚書刑部侍郎贈尚書右僕射孫遜文公集序 永泰元年八月

古之爲文者所以導達心志發揮性靈本乎詠歌終乎雅頌帝庸作而君臣動色王澤竭而風化不行政之興衰實繫於此然而文勝質則繡其盤悅而血流漂杵質勝文則野於禮樂而_木訥不華歷代相因莫能適中故詩人之賦麗以則詞人之賦麗以淫此其效也漢魏已還雅道微缺梁陳斯降宮體聿興旣馳騁於末流遂受嗤於後學是以沈隱侯之論謝康樂也乃云靈均已來此未及覩廬黃門之序陳拾遺也而云道喪五百歲而得陳君若激昂頹波雖無害於過正惟其中論不亦傷於厚誣何則雅鄭在人理亂由俗桑間濮上胡爲乎繇古之時正始皇風奚獨乎凡今之代蓋不然矣其或斌斌彪炳郁郁相宣膺期運以挺生奄寰瀛而首出者其惟僕射孫公乎公諱遜河南鞏人其先自樂安武水寓於涉而徙焉父嘉之以詞學登科官至宋州司馬公風裁徵明天才傑出學窮百氏不好非聖之書文統三變特深稽古之道故逸氣上躋而高情四達羌索隱乎混元之始表獨立於常均之外不其感歎年數歲卽好屬文十五時相國齊公崔日用試土火鑪賦公雅思適麗援翰立成齊公駭之約以忘年之契爾後遂有大名故其試言也年未弱冠而三擅甲科吏部侍郎王邱試竹簾賦降階約拜以殊禮待之相國燕公張說覽其策而心醉其序事也則伯樂川記及諸碑志皆卓立千古傳於域中其爲詩也必有逸韻佳對冠絕當時布在人口其詞言也則宰相張九齡欲摘疵瑕沈吟久之不能易一字公之除庶子也苑咸草詔曰西掖掌給朝推無對議者以爲知言凡斯夥多庸可悉數故燕國深賞公才俾與張九齡許景先韋述同遊門庭命子均均申伯仲之禮江夏李崑自陳州入計繕寫其集齋以詣公託知己之分其爲先達所重也如

此公又雅有清鑒典考功時精覈進士雖權要不能逼所獎擢者二十七人數年間宏詞判等入甲第者一十六人授校書郎者九人其餘咸著名當世已而多至顯官明年典舉亦如之故言第者必稱孫公而已夫然信可謂人文之宗師國風之哲匠者矣凡公所著詩歌賦序策問贊碑志表疏制誥不可勝紀遭二朝之亂多有散落子宿絳成等夙奉過庭之訓咸以文章知名同時臺省乃編次公文集爲二十卷列之於左庶乎好事者傳寫諷誦以垂乎無窮亦何必藏名山而納石室也真卿昔觀光乎天府實荷公之獎擢見命爲序豈究端倪時則永泰元年仲秋之月也至若世系闕閱蓋存之別傳此不復云

懷素人上草書歌序

關士懷素僧中之英氣概通疏性靈豁暢精心革聖積有歲時江嶺之間其名大著故吏部尚書韋公陟觀其筆力勛以有成今禮部侍郎張公謂賞其不羈引共遊處兼好事者同作歌以贊之動盈卷軸夫草藁之作起於漢代杜度崔瑗始以妙聞迨乎伯英尤擅其美羲獻茲降虞陸相承口訣手授以至於吳郡張旭長史雖姿性顛逸超絕古今而楷法精詳特爲真正某早歲嘗接游居屢蒙激勸告以筆法資質劣弱又嬰物務不能懇習迄用無成追思一言何可復得忽見師作縱橫不羣迅疾駭人若還舊觀向使師得親承善誘亟揖規模則入室之賓舍子奚滴嗟嘆不足聊書以冠諸篇首

顏刑部書家者流水鏡之辨許在末行（懷素自敘帖）

世系譜序建中元年七月

顏氏之先出自黃帝之孫安爲曹姓其裔邾武公名儀父字伯顏子友別封鄆爲小邾子遂以顏爲氏世爲

魯國卿大夫孔門逸者七十二人顏氏有八回居四科之首其後戰國有率躅秦有芝貞漢有異肆安樂魏有裴
威威字叔臺歷青徐二州刺史關內俟其後子孫咸著宦族有若宏都之德行巴陵記室之書翰特進黃門之文
章祕監華州之學識肇自魯國格於聖代紛綸咸美舉集於茲述遵前人不敢失墜建中元年歲次庚申秋七月
癸亥序

案唐書宋史藝文志皆有顏氏家譜一卷未著撰人名氏以是序證之家譜亦魯公自撰也

送福建觀察使高寬仁序

國家設觀察使卽古州牧部使之職代朝廷班導風化而宣布德意振舉萬事而沙汰百吏者也民俗之舒
慘兵賦之調發刑獄之寃濇政治之得失皆得以觀察而行之其任可謂重矣江西貴溪高君寬仁初舉明經歷
任中外克勤職務政績昭著陞福建觀察使夫君子之任不以位尊爲榮而以盡職爲貴福建大藩也其地東帶
滄溟南接交廣居民若是其衆也政務若是其煩也職乎州郡者果皆循且良尙不能保其無一事之不舉矧未
必皆循良乎弱之食強之取飢寒顛沛而漁奪之不厭則畷畷之民若之何能求其安也自古爲民之病者多類
此是以居高位而欲下之安其道難也故衆皆以位高爲寬仁喜予獨以盡職爲寬仁勉所以盡職者無他正己
格物而已忠君愛民而已予與寬仁交久且厚予所以望於寬仁者豈但在於政事文字之間而已哉振肅風紀
表儀一方遠致君澤民之道使聲名流芳史冊茲行是望於是乎書

案唐書方鎮表大歷六年廢福建節度使置都團練觀察處置使序當作於六年設使之後高寬仁科貫無攷
舊集不載此序全唐文未知從何書採入

送劉太沖序

劉太沖者彭城之華望者也自開府垂明於宋室澤州考績於國朝道素相承世傳儒雅尙矣夫其果行修潔斯文彪蔚鄂不照乎移華龍驥驥乎雲路則公山正禮策高足於前沖與太真嗣家聲於後有日矣昔余作郡平原拒胡羯而請與從事掌銓吏部第甲乙而超升等夷爾來蹉跎猶屑卑位雖才不偶命而德其無鄰故沖之西遊斯有望矣江月弦魄秦淮頂潮君行句溪正及春水勛哉之子道存何居魯郡公顏真卿敘

送辛子序

醇白之士曰隴西辛冕銳業班漢顯門名家十五而志學克明五十而勵精益懋拳拳不失慕回也之服膺褒褒可聽同茂先之善說昔我高叔祖鄆州使君著決疑一十二卷問答稱爲大顏曾伯祖祕書監府君集註解成一十二帙名儒斟酌煩省摛撫英華勒成三十篇名之曰漢略夫其發凡舉例冕序言之已詳惜乎困於縑緗不獲繕寫遂使精義沈鬱闇然未彰吁足歎也二月初吉金陵氣暖抵淮上之諸侯所如必合及滁川之美景未至方歡羣子賦詩以寵之

案鄆州使君顏游秦也祕書監府君顏師古也唐書藝文志有顏游秦漢書決疑十二卷

記

張長史十二意筆法記天寶五載

子罷秩禮殿特詣京洛訪金吾長史張公旭請師筆法長史於時在裴微宅憩止已一年矣衆師張公求筆法或有得者皆曰神妙僕頃在長安二年師事張公皆大笑而已卽對以草書或三紙五紙皆乘興而散不復有得其言者僕自再於洛下相見眷然不替僕因問裴微足下師張長史有何所得曰但書得絹屏素數十軸亦嘗論諸筆法唯言倍加工學臨寫法當自悟耳僕自停裴家月餘日因與裴微從長史言語散卻迴京師前請曰旣承兄丈（一本作九丈）獎諭日月滋深夙夜工勤溺於翰墨儻得聞筆法要訣終爲師學以冀至於能妙豈任感戴之誠也長史良久不言乃左右視拂然而起僕乃從行歸東竹林院小堂張公乃當堂踞牀而坐命僕居於小榻而曰筆法元微難妄傳授非志士高人詎可與言要妙也書之求能且攻眞草今以授之可須思妙乃曰夫平謂楷子知之乎僕思以對之曰嘗聞長史示令每爲一平畫皆須令縱橫有象此豈非其謂乎長史乃笑曰然而又問曰直謂縱子知之乎曰豈不謂直者從不令邪曲之謂乎曰均謂間子知之乎曰嘗蒙示以間不容光之謂乎曰密謂際子知之乎曰豈不謂築鋒下筆皆令宛成不令其疎之謂乎曰鋒謂末子知之乎曰豈不謂以末成畫使其鋒健之謂乎（一本健作健）曰力謂骨體子知之乎曰豈不謂趨筆則點畫皆有筋骨字體自然雄媚之謂乎曰轉輕謂屈折子知之乎曰豈不謂鉤筆轉角折鋒輕過亦謂轉角爲闔闔過之謂乎曰決謂牽掣子知之乎曰豈不謂牽掣爲擊銳意挫鋒使不怯滯令險峻而成以謂之決乎曰補謂不足子知之乎曰豈不謂結點畫或有失缺者則以別點畫旁救之謂乎曰損謂有餘子知之乎曰豈不謂趣長筆短常使意勢有餘點畫若不足之謂乎曰巧謂布置子知之乎曰豈不謂欲書先預想字形布置令其平穩或意外字體令其異勢是謂之巧乎曰樛謂大小子知之乎曰豈不謂大字感之令小小字展之爲大兼令茂密所以爲樛乎長史曰子言頗皆近之矣夫書道之妙煥乎其有旨焉字外之奇言所不能盡世之書者宗二王元常逸跡會不睥睨筆法之妙遂爾雷同獻之謂之古肥旭謂之今瘦古今旣殊肥瘦頗反如自省覽有異衆說芝鍾巧趣精細殆同始自機

神肥瘦古今豈易致意真跡雖少可得而推逸少至於學鍾勢巧形容及其獨運意疏字緩譬猶楚音習夏不能無楚過言不悞未爲篤論又子敬之不逮逸少猶逸少之不逮元常學子敬者畫虎也學元常者畫龍也予雖不習久得其道不問之言必慕之歎儻有巧思思盈半矣子其勉之工精勤悉自當妙矣真卿前請曰幸蒙長史傳授筆法敢問工書之妙如何得齊於古人而公曰妙在執筆令其圓轉勿使拘攣其次諸法須使其傳授之訣勿使無度所謂筆法也其次在於布之畫精細越巧使合宜其次紙筆精佳其次諸變適懷縱捨規矩五者備矣然後齊於古人矣敢問執筆之理可得聞乎長史曰予傳授筆法之老舅彥遠曰吾聞昔日說書若學有工而跡不至後聞於褚河南曰用謂當須如印泥畫沙思所以不悟後於江島遇見沙地平淨令人意悅欲書乃偶以利鋒畫其勁險之狀明利媚好乃悟用如錐畫沙使其藏鋒畫乃沈著其用鋒常欲使其過紙背此成功之極矣真草用筆悉如畫沙則其道至矣是乃其迹可久自然齊古人矣但思此理以專想工用故其點畫不得妄動于其書紳予遂銘謝再拜逡巡而退自此得攻書之術於茲五年真草自知可成矣

案宋史藝文志有顏真卿筆法一卷卽此記也

汎愛寺重修記

予不信佛法而好居佛寺喜與學佛者語人視之若酷信佛法者然而實不然也予未仕時讀書講學恆在福山邑之寺有類福山者無有無予蹟也始僦居則凡海印萬福天寧諸寺無有無予蹟者既仕於崑時授徒於東寺待客於西寺每至姑蘇恆止竹堂目予實信其法故爲張修其事以感沙氓則非知予者矣

案崑卽今蘇州府崑山縣在唐爲蘇州吳郡屬縣記云旣仕於崑又云每至姑蘇恆止竹堂攷公宦蹟未嘗仕於崑山惟十有三歲時侍母殷隨外祖子敬任會至吳郡其時年幼不應栖止竹堂僧寺其後大歷六年三月

罷撫州刺史事八月移寓江寧會繞道吳郡亦不得云每至姑蘇此記疑非魯公所作全唐文不知據何本探入存之而附辨如此

東方先生畫贊碑陰記天寶十三載十二月

東方先生畫贊者晉散騎常侍夏侯湛之所作也湛字孝若父莊爲樂陵太守因來輶省遂作斯文贊云大夫諱朔字曼倩平原厭次人魏建安中分厭次爲樂陵郡又爲郡人焉厭次今移屬樂安郡東去祠廟六百里故厭次城今在平原郡安德縣東北二十二里廟西南一里先生形像今則捏素爲之並二細君侍焉郡嘗爲德州其贊開元八年刺史韓公思復刻於石碑眞卿去歲拜此郡屬殿中侍御史平公列監察御史閻公寬李公史魚右金吾胄曹宋公饗咸以河北採訪使東平王判官巡按狎至眞卿候於境上而先生祠廟不遠道周亟與數公衆家兄淄川司馬曜卿長史前洛陽令蕭晉用前醴泉尉李伯魚徵君左驍衛兵曹張璠麟遊尉韋宅相朝城主簿韋夏有司經正字畢燿族弟渾前參軍鄭悟初同茲謁拜退而遊於中唐則韓之刻石存焉僉歎其文字纖靡駁薜生金四十年間已不可識眞卿於是勒諸他山之石蓋取其字大可久不復課其工拙故援翰而不辭焉至若先生事跡則載在太史公書漢書風俗通武帝內傳十洲記列仙神仙高士傳此不復紀焉有唐天寶十三載季冬辛卯朔建

案杜少陵集有寄韋有夏郎中五言六韻詩碑內朝城主簿卽其人也

鮮于氏離堆記寶應元年四月

閬州之東百餘里有縣曰新政新政之南數千步有山曰離堆斗入嘉陵江直上數百尺形勝縮曩敬壁峻

蕭上嶧嶸而下迴漑不與衆山相連屬是之謂離堆東面有石堂焉卽故京兆尹鮮于君之所開鑿也堂有室廣輪袤丈蕭豁洞敞虛闡江聲徹見羣衆人村川坳若指諸掌堂北磬石之上有九曲流杯池焉懸源竊首蹙噴鶴味醜渠股引迺坐環溜若有良朋以傾醇酌堂南有茅齋焉遊於斯息於斯聚賓友於斯虛而來者實而歸其齋壁間有詩焉皆君舅著作郎嚴從君甥殿中侍御史嚴銑之等美君考察之所作也其右有小石廡焉亦可蔭而跋據矣其松竹桂檀冬青雜樹皆徙他山而栽蒔焉其上方有男宮觀焉署之曰景福君弟京兆尹叔明至德二年十月嘗任尙書司勳員外郎之所奉置也君諱向字仲通以字行漁陽人卓爾堅枝毅然抗直易有之曰篤實輝光書不云乎沈潛剛克君自高曾以降世以財雄招徠賢豪施舍不倦至君繼結其流益光弱冠以任俠自喜尙未知名乃慷慨發憤於焉卜築養蒙學文忘寢與食不四三載展也大成著作奇之勛以賓薦無何以進士高第驟登臺省天寶九載以益州大都督府長史兼御史中丞持節充劍南節度副大使知節度使事劍南山南西道採訪處置使入爲司農少卿遂作京兆尹以忤楊國忠貶邵陽郡司馬十有二載秋八月除漢陽郡太守冬十有一月終於所任官舍悲夫雄圖未伸志業已空葬於縣北表祔先塋禮也君之薨也冢子光祿寺丞昱匍匐迎喪星言泣血自沔泝峽湍險萬重肩槁足踣扳笮引舳凡經幾年鞞塚在目因心則至豈無僮僕衆昱之季曰尙書都官員外郎昱克篤前烈永言孝思懇（闕二字）志反葬於茲行道之人孰不歧而眞卿猶子曰紘從父兄故偃師丞春卿之子也嘗尉閬中君故舊不遺與之有忘年之契叔明昱亦篤世親之歡眞卿因之又忝憲司之寮亟與濟南蹇昂奉以周旋益著通家之好兄允南以司膳司封二郎中弟允臧以三院御史皆與叔明首末聯事我是用鮑君之故乾元改號上元之歲秋八月哉生魄猥自刑部侍郎以言事忤旨聖恩全宥貶貳於蓬州沿嘉陵而路出新政適會昱以成都兵曹取急歸覲遭我乎貴州之朝留游締歡信宿陘峴感今懷昔遂援翰而志之叔明時刺商州昱又申掾京兆不同躋陟有恨如何帝唐龍集後壬寅仲夏己卯朔十五日甲午刻於門

序之左右

撫州寶應寺翻經臺記大歷四年四月

撫州城東南四里有翻經臺宋康樂侯謝公元嘉年初於此翻譯涅槃經因以爲號公諱靈運陳郡陽夏人也祖元晉車騎將軍父瓊祕書郎公幼穎悟好學博覽羣書文章之美江左莫逮以襲祖爵世人宗之盛稱謝康樂初爲劉毅衛軍從事中郎太子左率出爲永嘉太守郡有名山水公素愛好肆意遨遊稱疾去職於始寧縣修營故墅傍山帶江盡幽居之美因著山居賦並自註之與隱士王宏之等遊放爲娛有終焉之志每一詩至都邑莫不競寫宿昔之間士庶皆徧徵爲祕書監再召不赴太祖使范泰與書敦獎之乃出就職尋遷侍中日夕引見賞遇甚厚多疾不朝賜假東歸免官與從弟惠連東海何長瑜潁川荀道雍泰山羊璠之以文章賞會時人謂之四友尋山登賞常著木屐上則去其前齒下則去其後齒會稽太守孟顓事佛精懇公謂之曰得道應須慧業丈人生天應在靈運前成佛必在靈運後顓深恨此言後遂表公有異志公馳出自陳太祖知見誣除臨川內史公以曇無讖所翻大涅槃經語少朴質不甚流靡品數疎簡初學者難以措懷乃與沙門范惠嚴顧慧觀依舊泥洹經共爲潤色勒成三十六卷義理昭暢質文相宣歷代寶之盛行於天下其餘感神徵應具如高僧傳所說邈乎階局不改棟宇具無真卿叨刺是邦茲用愾息有高行頭陀僧智清緒發洪誓精心住持請以佛跡寺僧什喻仙臺觀道士譚仙巖同力增修指期恢復自見法堂之遺構克崇先達之高蹤不泯百里而遙四山不遏三休而上十地方超經行之業旣崇斗數之功斯懋大歷己酉歲四月丙午都人士庶相與大會設嚴供而落焉以真卿業於斯文見咨紀述後之君子其忘增修乎銘曰

摩訶般若解脫法身是則涅槃衆經中尊曇無瞿允嚴觀是因實賴同德宏茲法輪謝公發揮精義入神理

絕史野文彙郁彬一垂刊削百代咸遵遺跡忽睹高臺嶙峋載悲徂謝曷踐音塵眞卿愀然憫故孰新檀那衣鉢
悉力經綸不日復之周邦仰仁緬懷敦慕予亦何人徒願神交媿非德鄰刻銘金石永永不泯

撫州寶應寺律藏院戒壇記大歷六年三月

如來以身口意三業難調伏也淨尸羅以息其內行住坐臥四威儀攝善心也明布薩以昭其外故曰波羅
提木又是汝之師則憐愍如之善來迦葉波之尚法諸聲聞三歸約衆十四年以八敬度尼羯磨相承其致一也
至漢靈帝建寧元年有北天竺五桑門支法領等始於長安譯出四分戒本兼羯磨與大僧受戒至曹魏有天竺
十尼自遠而來爲尼受具後秦姚萇宏始十一年有梵僧佛陀耶舍譯出四分律本而關內先行僧祇江南盛行
十誦至元魏法聰律師始闡四分之一宗聰傳道覆覆傳惠光光傳雲暉願願傳隱樂洪雲雲傳遵遵傳智智首
傳道宣宣傳洪洪傳法勵勵傳滿意意傳法成成傳大亮道賓亮傳雲一賓傳岸超慧澄澄傳慧欽欽口相授受
臻於臺輿欽俗姓徐洪州建昌人蓋漢孺子之後也二十二尋師於臨川枯山後五歲削髮隸於高安龍岡寺遂
受戒有唐義淨則譯經上足曰洪州靈傑其秉宣羯磨者曰兩京清條使法慧欽智度冲深神用高爽行無權實
身絕開遮聞律藏而日月光明駢辯才而龍象蹴踏江嶺之外凜然風生開元末北遊京師充東京福先大德常
誦大涅槃經而講之兼明俱舍論維摩金剛經每登講座其下日有二三千人由是名動輦轂屬祿山作亂杖錫
南歸居於西山洪井雙嶺之閑慕高僧觀顯之遺蹤於寺北剎置閣若山泉之美頗極幽絕欽雖堅持律儀而志
在宏濟好讀周易左傳下筆成章著律儀輔演十卷嘗撰本州龍興寺戒壇碑頗見稱於作者大歷三年眞卿忝
刺撫州東南四里有宋侍中臨川內史謝靈運翻大涅槃經古臺階局儼然軒構摧圮有高行頭陀僧智清者首
事修葺安居住持明年秋七月眞卿績秩將滿有觀察使尙書御史大夫趙國魏公願以我皇帝降誕之辰奏爲

寶應寺仍請山林高行僧三七人冬十月二十三日聖恩允許於是鼎新輪奐其與也勃焉乃請止觀大師法源法泉襄陽乘覺清源善宏羅浮圓覺佛跡十喻餘杭慧達衆當州海通海岸等同住葺修以資景福僉以爲學徒雖增毗尼未立明年三月乃請欽登壇而董振鐸焉仍俾龍岡道幹天台法裔招提智融白馬法允衡岳正覺同德義盈香城藏選龍興藏志闡元明徹等同秉法事於是遠近駿奔道場側塞聖像放光而龍王不雨者四旬僧尼等三百五十七人而文士正議大夫前衛尉少卿張延皋脫俗歸真其名曰瓊綱爲稱首焉又欽比年以來爲受具者凡一萬餘人江嶺湖海之間幅員千餘里像法於變此皆欽教道之力焉臨川在嶺隅未嘗宏律於是二衆三百餘人請法番敷灌而依止之矣復有上都資聖寺高德曰還本律主偉茲能辦深嗟歎而贊美之請於寺東南置普通無礙禪院內立鎮海觀音道場請善宏居之以開悟心要雲一上足日智蝸精持本事如會尊衆乃命智光等於普通道場東置律藏院卽戒壇以佇欽公之來儀且施肇紀之不朽經營未幾壇殿鬱興庶乎渡海浮囊分毫絕羅刹之請嚴身瓔珞照耀有摩尼之光則入佛位而披伽梨者名香普薰神足無極其可勝紀而蕪絕乎有唐大歷辛亥歲春三月行撫州刺史魯郡開國公顏真卿書而誌之

撫州南城縣麻姑山仙壇記大歷六年四月

麻姑者葛稚川神仙傳云王遠字方平欲東之括蒼山過吳蔡經家教其尸解於蛇蟬也經去十餘年忽還語家人言七月七日王君當來過到期日方平乘羽車駕五龍合異色旌旗導從威儀赫奕如大將也旣至坐須臾引見經父兄因遣人與麻姑相聞亦莫知麻姑是何神也言王方平敬報久不行民間今來在此想麻姑能暫來有頃信還但聞其語不見所使人曰麻姑再拜不見忽已五百餘年尊卑有序修敬無階思念久煩信承在彼登山顛倒而先被記嘗按行蓬萊今便暫往如是便還還卽親觀願不卽去如此兩時間麻姑來來時不先聞人

馬聲既至從官當半於方平也麻姑至蔡經亦舉家見之是好女子年十八九許頂中作髻餘髮垂之至要其衣有文章而非錦綺光彩耀目不可名字皆世所無有也得見方平方平爲起立坐定各進行廚金盤玉杯無限美膳多是諸華而香氣達於內外辯麟脯行之麻姑自言接待以來見東海三爲桑田向間蓬萊水乃淺於往者會時略半也豈將復壞爲陸陵乎方平笑曰聖人皆言海中行復揚塵也麻姑欲見蔡經母及婦經弟婦新產數十日麻姑望見之已知曰噫且止勿前卽求少許米便以擲之墮地卽成丹沙方平笑曰姑故年少吾了不喜復作此曹狡獪變化也麻姑手似鳥爪蔡經心中念言背蚌時得此爪以把背乃佳也方平卽知經心中念言卽使人牽經鞭之曰麻姑者神人汝何忽謂其爪可以把背邪見鞭著經背亦不見有人持鞭者方平告經曰吾鞭不可妄得也大歷三年眞卿刺撫州按圖經南城縣有麻姑山頂有古壇相傳云麻姑於此得道壇東南有池中有紅蓮近忽變碧今又白矣池北下壇傍有杉松皆偃蓋時聞步虛鐘磬之音東南有瀑布淙下三百餘丈東北有石崇觀高石中猶有螺蚌殼或以爲桑田所變西北有麻源謝靈運詩題入華子岡是麻源第三谷恐其處也源日有神祈雨輒應開元中道士鄧紫陽於此習道蒙召入大同殿修功德二十七年忽見虎駕龍車二人執節於庭中顧謂其友竹務猷曰此迎我也可爲吾奏願欲歸葬本山仍請立廟於壇側元宗從之天寶五載投龍於瀑布石池中有黃龍見元宗感焉乃命增修仙宇眞儀侍從雲鶴之類於戲自麻姑發迹於茲嶺南眞遺壇於龜源華姑表異於井山今女道士黎瓊仙年八十而容色益少曾妙行夢瓊仙而冷花絕粒紫陽姪男曰德誠繼修香火弟子譚仙巖法籙尊嚴而史元洞左通元鄒鬱華皆清虛服道非夫地氣殊異江山炳靈則曷由纂懿流光若斯之盛者矣眞卿幸承餘烈敢刻金石而志之時則六年夏四月也

有唐宋州官吏入關齋會報德記大歷七年五月

夫德之所感、淪骨髓而非深、誠之所至、去神明而何遠、有唐大歷壬子歲、宋州八關齋會者、此都人士衆文武將吏朝散大夫使持節宋州諸軍事行宋州刺史兼侍御史本州團練守捉使賜紫金魚袋徐向等奉爲河南節度觀察使開府儀同三司太子太師左右僕射知省事兼御史大夫汴州刺史上柱國信都郡王田公頃疾良已之所建也、公名神功、冀州南宮人、稟元和之粹靈、膺期運以傑出、含宏厚下、正直率先、起孝而德感生人、竭忠而精貫白日、和衆必資於寬簡、安人務在於撫柔、況乎武藝絕倫、英謀沈秘、所向而前、無強敵日新、而學有緝熙、故能殿天子之邦、鬱蒼生之望、有日矣、羯戎搆逆、公以平盧節將佐、今右僕射李公忠、臣收滄德攻相州、拒杏園、守陳留、許叔冀降而陷焉、思明懼、忠臣圖已、令公佐南德信、隨劉從諫、收江淮、至宋州、欲襲李銑、公斬德信、走從諫、遂並其衆而報焉、肅宗大悅、拜公鴻臚卿、再襲敬釭於鄆州、加中丞、討劉展於潤州、斬平之、遷徐州刺史、明年拜淄青節度使、屬侯希逸、自平盧至、公以州讓之、時宋州刺史李岑爲賊所圍、副元帥李光弼請公討平之、拜御史大夫、加開府、充兗鄆州節度、破法子營、又討敬釭、釭歸順、馬史朝義聞之、奔下博、投范陽、自縊、死、廣德元年、授戶部尚書、封信都郡王、上幸陝、公首來扈從、都知六軍、兵馬每食宿、公皆躬自省視、上感焉、方委以政事、公涕泣固辭、而止、二年、拜汴宋節度、遷兵部、大歷二年、加右僕射、封母清河張氏爲趙國夫人、妻信安郡王禕女、爲涼國夫人、太夫人、慈和勤儉、睦於親黨、公性純孝、居常不離左右、閱讀書史、或時疾病、公聊累月、不茹葷、家中禮懺、不絕、仍造崇夏宏聖二寺、以祈福祐、五年、兼判左僕射、知省事、加太子太師、公德厚量深、勞謙重慎、功既高而心益下、位彌大而體益恭、故遠無不肅、今夏四月、忽嬰熱疾、沈頓累旬、積善降祥、勿藥、適喜鷹犬之翫、悉皆棄捨、羣帥感焉、無復弋獵、四履之內、咸懷歡欣、睢陽之人、踴躍尤甚、乃咨於州將曰、昔我公之陷賊也、至敝邑、而首誅德信、李岑之見圍也、破其黨、而克保城、地是、卽我公再有、大造於敝邑、矣、徵我公之救恤、卽皆死於鋒鏑、入於煎熬、矣、尙何能保完家室、嬉戲鄉井者乎、不資齋明、何以報德、徐公悅、而從之、來五月八日、首以俸錢三十萬

設八關大會飯千僧於開元伽藍將佐爭承唯恐居後已而州縣官吏長史苗藏實等設一千五百人爲一會鎮遏團練官健副使孫琳等設五百人會鎮會耆壽百姓張列等設五千人爲一會法筵等供仄塞於郊垌贊頌香花喧填於晝夜其餘鄉村聚落來往舟車聞風而靡督自勤聳而忱先胥懋者又不可勝數矣非夫美政淳深德風汪濊則何以感人若此其至者乎某叨接好仁飽承餘烈覩茲威美益覲求蒙若不垂諸將來則記事者奚述

吳興沈氏述祖德記大歷八年十二月

南齊徵士吳興沈君名麟士郡人也蘊道德晦於邑之餘不溪家貧無資以織簾爲業故時人號爲織簾先生精於禮傳嘗自詒訓宗人吏部郎中淵中書郎約累薦徵爲著作郎高臥不起名重江表臨終遺教依皇甫元晏棺中貯孝經一卷穿墳三尺置棺平土不設机位四時地席元酒而奠子彝奉而行之吳郡陸惠曉張融皆爲之誄徵士嘗製述祖德碑立於金鵝山之先塋年月淹遠風雨蠹蝕朽字殘文駁而莫分乾元中爲盜火所焚碑首毀裂欽然將墮過江二十葉孫御史中丞震移牒郡國請其封葺或屬兵凶曠而莫修忽有什樹生於龜腹盤根抱趾聳幹夾碑疑如工造鬱若神化敬者復正危而再堅夫德無名遇賢而鐘慶神無質假物以申應沈氏積德旣遠徵士植德旣深天將興蕃族乎吾知沈之復大也權檢校宗事十九葉孫前太廟齋郎怡拜泣松檟增修舊塋感先碑之隕覆懼遺文之殘闕乃具他石傳而貳焉崇其本所以尊先也建其新所以嗣德也以真卿江南婚姻之舊中外伯仲之穆謬忝拜刺見託斯文刊諸碑陰以傳無朽因改其樹爲慶樹以旌其美焉沈氏之故事具於家牒今闕而不紀時有唐大歷八年冬十二月

乞御書題額恩敕批答碑陰記大歷九年七月

肅宗皇帝恩許既有斯答御劄垂下而眞卿以疎拙蒙譴粵若來八月旣望貶授蓬州長史泉今上卽位寶應元年夏五月拜利州刺史屬羌賊圍城不得入恩勅追赴上都爲今尙書前相國彭城公劉公晏所讓授尙書戶部侍郎二年春三月改吏部廣德元年秋八月拜江陵尹兼御史大夫充朔方行營汾晉等六州宣慰使以招諭太師中書令僕韓尙書右丞明年春正月檢校刑部尙書兼御史大夫充朔方行營汾晉等六州宣慰使以招諭太師中書令僕固懷恩不行遂知省事永泰二年春二月貶峽州別駕旬餘移貶吉州大歷三年夏五月蒙除撫州刺史六年閏三月代到秋八月至上元爾來十有六年困於疎愚蒙竄謫其所置碑石迄今委諸巖麓之際未遑崇樹七年秋九月歸自東京起家蒙除湖州刺史來年春正月至任州東有蒼雪兩溪溪左有放生池焉卽我寶應元聖文武皇帝所置也州西有白鶴山山多樂石於是採而斲之命吏幹磨家僮鐫刻之建於州之駱駝橋東蓋以抒臣下追遠之誠昭先帝生成之德額旣未立追思莫達客或請先帝所賜敕書批答中諸字以緝而勒之眞卿從焉勒願斯畢瞻慕不足遂志諸碑陰庶乎乾象昭回與宇宙而終始天文煥發將日月而齊暉時則有唐大歷九年青龍甲寅之歲孟秋甲子之日也

湖州石柱記

烏程縣舊緊今望鄉四十里二百東去蘇州二百一十里南去杭州一百八十九里西北去揚州六百四十七里西去宣州三百一十七里北去東都二千八百七十五里北去上都三千七百七十六里

帝顓頊冢 吳大帝陵 吳景帝陵 鈕皇后陵 吳丹陽太守蕪湖侯太史慈墓 吳大將軍朱治墓 吳蕩

寇將軍程普墓 晉侍中羅含墓 晉黃門侍郎潘尼墓 齊宣城太守邱靈鞠墓 梁中書侍郎邱遲墓

梁司空康絢纁墓 陳五兵尙書康宗墓長城縣

大雷山 芳巖 霞澤 若溪 吳王夫概廟 陳景帝陵 陳錢皇后陵 陳昭烈王陵 謝安墓 殷仲文墓 陳武帝故宅 陳文帝故宅 吳均故宅 陳氏五主屏風 陳高祖竹帳 國朝高僧南山 律主道宣

安吉縣

天目山 崑山 橫溪 梅溪 蛟龍池 翔鳳林 裴子野故宅 周宏讓故宅 姚萇雉尾扇 施世瑛金鐘

山川

卞山 法華寺 金井 玉澗 乳竇 石膏 溫泉 項王走馬埒 項王飲馬池 項王繫馬石 衡山 帝顓頊冢 春秋鳩茲城

崑山 顯亭 故別駕李適之石酒罇 五花亭

杼山 妙喜寺 黃浦橋 避它城 何楷釣臺

昇山 吳均入東記 晉吳興太守王羲之烏亭

金蓋山 何氏書堂 張邵邱道祚禪幽寺

太湖 周迴四萬八千頃

霅溪

白蘋洲

湖州石柱在宋初字已漫漶歐陽永叔謂其筆畫奇偉非顏魯公不能書於是宋次道集魯公詩文刊於金石者編成一十五卷則石柱記有焉孫莘老知湖州聚境內碑碣築墨妙亭貯之凡三十二通記其一也所

記山川陵墓廟宅旁及屏風竹帳雉尾扇顧唐設五縣而記遺其二或當日有之次道編集時殘闕未可知爾（朱彝尊石柱記序）

案石柱記本在湖州之杼山魯公修韻海時所刻又名吳興地記唐置五縣記遺其二當係兩柱分刻僅傳其一康熙辛巳秀水朱檢討彝尊爲補記二縣歸安鄭君元慶爲箋釋原記四卷補記一卷今以補自附錄於左

德清縣 市亭山 金鵝山 吳羌山 餘不溪 北流水 苧溪 餘不亭侯廟 梁吏部尙書沈約墓 孝鵝冢

武康縣 防風山 武康山 七里嶠 前溪 阮公溪 郭先生詞堂 沈道虔石山精舍 吳太常卿姚信墓 晉吏部尙書沈嘉墓 晉揚威將軍東陽太守沈勁墓 宋吏部尙書沈演之墓

頃借書齋舫得宋槧石柱記載山川陵墓亡者三之一其存而不可信者亦三之一竹垞先生惜其殘闕爲補記二縣余乃一一箋釋證其所可信復辨其所不可信（鄭元慶箋註石柱記自序）

通議大夫守太子賓客東都副留守雲騎尉贈尙書左僕射博陵崔孝公宅

陋室銘記大歷十一年四月

公諱沔字若沖博陵安平人其先出於齊太公之後自亭伯三世文宗祕書監六（闕一字）派別叔軌出則俱死王事神謙神通並高循續子彰宏度以武幹稱景雋巨倫以文行著繼方面者累代列史傳者十人奕葉相承恆爲鼎族會祖宏峻隋銀青光祿大夫趙王長史祖儼皇朝益州雒縣令父暉年未四十爲庫部員外郎因

擇能吏爲壽安令又充江西道廉察使徒醴泉遂歷四邑盤桓不進以剛正也累至朝散大夫汝州長史封安平縣男贈衛尉少卿公卽安平之次子也全德天至成人玉立蓋聖代之寶臣華宗之孝子文章之哲匠禮樂之祖師旣不可以一名又何能以悉數年二十四舉鄉貢進士考功郎李廻秀器異之曰王佐才也遂擢高第其年舉賢良方正對策萬數公獨居第一而兄渾亦在甲科典試官梁載言陳子昂歎曰雖公孫龜鄒不及也召見前殿拜麟臺校書郎繇是名蓋天下御史張思敬以德行薦久之以資授陸渾主簿平陽王敬暉宏度外之交略上官之禮丁府君憂服除太夫人勉起之以所試超邁擢拜左補闕遷殿中侍御史奉勅按竊金者公得其情許之不死竟得減論諸王或恃貴不遵法度舉而按之其不吐茹也如此尋遷起居舍人當扈從以親老抗疏乞退薦瑯琊王邱太原郭潯渤海封希顏等自代睿宗嘉之特許留司以遂其孝養遷祠部員外郎倅僧有請度人者公拒不奉詔遷給事中大理卿韓思復用法小差權臣致劾公特寬之遷中書省舍人省改紫微其官仍舊又固辭以親老除虞部郎中開元初攝御史中丞或訟吏曹之不平公與崔泰之銜命詳理多所收拔俄而卽眞兼都畿按察使歲或不稔公請發粟賑貸之賴全活者以萬數內謁者霍元忠有罪公執之以聞元宗使以璽書勞之公之澄清中外也以畿縣令長陸景融劉體微盧暉有異政丞尉宋遙皇甫翼陳希烈宋鼎蕭隱之苑冬芬楊慎餘劉日正高昌寓州掾李瓊裴曠等並以清白吏疏而薦之二十二年置十道採訪使公所舉六人在焉執事子有不法者公舉之不回移著作郎尋遷祕書少監修圖書使尋判大理卿禮部侍郎公旣職司典禮乃刪寫疏論數百卷以備闕遺特加朝散大夫遷左庶子丁太夫人憂徵拜中書侍郎出爲魏州刺史乃鑿移元城徙置新市吏人便之乙丑歲元宗東封知頓使奏課第一賜絹二百匹嶽下觀禮獻慶雲頌又賜絹一百匹明年入朝分掌十銓公與王邱爲選人所歌曰汚人澄明澈底清邱山介直連天峻時人避之還州以理有異績御史大夫崔隱甫中丞宇文融朝服表薦璽書寵慰無何徵拜左散騎常侍上以六宮親蠶絲賜近臣公獻御絲賦又侍謙別殿賦端

午詩屢蒙錫以縑帛綵羅兼判國子祭酒俄充東都副留守十七年有事陵廟追贈安平公及太君曰安平夫人
駕還罷留守二十年春奉勅撰龍門公宴詩序賜絹百匹延入集賢院修老子道德經疏行於天下二十一年遷
祕書監修撰如故屬耕藉田爲居守賜絹百匹遷太子賓客出兼懷州刺史二十四年罷州又以本官充東都副
留守累加通議大夫二十七年冬十一月十有七日寢疾薨於位春秋六十有七元宗震悼贈禮部尙書葬日量
借手力慢慢故吏前監察御史博陵崔頌爲公行狀云公德充符契精貫人極孝愛聞於天下制作垂於無窮執
太夫人之喪徒跣吐血以身爲糞土況乎含宏內恕夷坦外名德至矣乎今之達者若以富貴崇德行藏養高則
老萊闕於榮親黔婁褊於謀道又加於古人矣故養則致其樂喪則過乎哀以兄姊之感亞其親甥姪之慈甚其
子於藥砭備物溫清異宜手胝杵臼之間身辱澣濯之伍汲汲然矣每至宗廟心齋嚴恭祀事明發不寐翌日餘
悲故聲氣感人者深儀形化人者遠躬踐五德退讓於恭儉溫良行張四維加信於仁義禮智而老驥伏櫪以鮑
聽不忘白鳩巢檐以家瑞終黔則非殊倫絕輩擬議乎萬一矣太常博士裴總議曰公醇一誕靈文明含粹蹈元
和以爲天性籍間氣以爲人師前後歷官或拜而不至或至而不留瘠形瞽目誓尊孝養可不謂孝乎遂諡曰孝
公凡所著文集二十九卷並嗣子祐甫論次先志一卷爲三十卷吏部員外郎趙郡李華爲集序云公之侍親也
孝達乎神祇居憂也哀貫乎天地喪明有數而茹荼終身親交鄉里飢者待公而炊寒者待公而裘烝嘗之奠待
公而具故緣廩雖厚而未常足也傳祖禰之美合於禮經見公文章知公行事則人倫之序理亂之源備矣祐甫
純行而文直清而和希公門者謂公存焉亡賢數載如此初太夫人患目公傾家求醫或曰療之必愈恐壽不得
延太夫人及公悲恨而罷自是竭力奉養不脫冠帶者僅三十年每至良辰美景勝引佳遊必扶侍左右笑言陳
說親朋往來莫知太夫人之有苦也公年官雖高至於食菓蔬菜與子姪躬自植藝澆灌以申馨潔泉終喪雖見
孩稚者必設位束帶盡哀以禮之公與江夏李邕友善爲校書郎時引邕館於祕閣之下讀書者累年邕由是才

名益感邕與尙書席建侯嘗過公怪乘馬羸羸曰何不於廳前自觀銖飼忽然致殞何以更之公唯而不易他日二公又以爲言公良久則曰每欲發言恐涉有疑於廝養者所以沈吟自媿二公退而謂人曰每想崔公此言使人慚慙如醉延和太極之間公旣留司東都遂鸞所乘馬就故人監察御史張法子深何南府崇政坊買宅以製居建宗廟於西南維先太夫人安平郡夫人堂在宅之中儉而不陋淨而不華六十餘年懷棟如故堂東嫂廬夫入所居堂之東北鄭氏李氏姊歸寧所居堂之北五步之外建瓦堂三間以居之雜用舊椽不崇壇無齋壘累歷清要所得祿秩但奉蒸嘗資嫂姊給孤幼營甥姪婚姻而已朝服衣馬一皆取其下者唯祭器祭服稱禮焉其室竟不修裊夫人大原郡太夫人王氏捐牀帳之後公徙居他室或在賓館而無常所爲常侍時著陋室銘以自廣天寶末子孫灑掃貯書籍劍履而已逆胡再陷洛陽屋遂崩圯唯檐下廢井存焉長子成甫個儻有才名進士校書郎早卒祐甫能荷先業以進士高第累登臺省至吏部郎中充永平軍節度使尙書李公勉行軍司馬兼侍御史中丞永懷先德明發不寐恐茂烈湮淪（一本湮作煙）罔垂後裔乃刻陋室銘於井北遺址之前以抒所志某夙仰名教實欽孝公之威德晚聯臺閣竊慕中丞之象賢又能好我不遺見託論譔採風猷而莫窮萬一涉泉海而豈究津涯操筆強名退增戰慙時則大歷十一年青龍景辰孟夏之月也

梁吳興太守柳惲西亭記大歷十二年四月

湖州烏程縣南水亭卽梁吳興太守柳惲之西亭也繚以遠峯浮於清流包括氣象之妙實資遊宴之美觀夫搆宏材披廣榭豁達其外睽眾其中雲軒水閣當亭無暑信爲仁智之所創制原乎其始則柳吳興惲西亭之舊所焉世增崇之不易其地按吳均入東記云惲爲郡起西亭毗山二亭悉有詩今處士陸羽圖記云西亭城西南二里烏程縣南六十步跨蒼溪爲之昔柳惲文暢再典吳興以天監十六年正月所起以其在吳興郡理西故

名焉文暢嘗與郡主簿吳均同賦西亭五韻之作由是此亭勝事彌著間歲頗爲州僚據而有之日月滋深室宇將壞而文人嘉客不得極情於茲憤憤悱悱者久矣邑宰李清請而修之以攄衆君子之意役不煩費財有羨餘人莫之知而斯美具也清皇家子名公之允忠肅明懿以將其身清簡仁惠以成其政絃歌二歲而流庸復者六百餘室廢田墾者三百頃浮客臻湊治乎二千種桑畜養盈於數萬官路有刻石之堦吏廚有餐錢之資敦本經久率皆如是略舉數者其餘可知矣豈必夜魚春躍而後見稱哉於戲以清之地高且才而勵精於政事何患雲霄之不致乎清之筮仕也兩參雋乂之列再移仙尉之任毗贊於蜀邑子男於吳興多爲廉便感府之所辟薦則知學詩之訓間緝之心施之於政不得不然也縣稱繁舊矣今詔升爲望清當受代而邑人已軫去思之悲白府願留者屢矣眞卿重違耆老之請啓於十連優詔以旌清之美也某不佞忝當分憂共理之寄人安俗阜固有所歸雖無魯臣掣肘之患豈盡言子用刀之術由此論之則水亭之功乃餘力也夫知邑莫若州知宰莫若守知而不言無乃過乎今此記述以備其事懼不宣美豈徒愧詞而已哉大歷一紀之首夏也

案柳惲西亭故址在湖州府治西烏程縣泊南六十步唐顏眞卿作記其同游河東耿湋有詩至宋天聖間縣令方仲弓改建浮玉亭

唐故太尉廣平文貞公宋公神道碑側記大歷十三年三月

初公任監察御史持服於沙河縣屬突厥寇趙定州河兗懼邢州刺史黃文軌投艱於公公以父母之邦金革無避及賊至城下公爲曉陳禍福其徒有素聞公威名者乃相率而去之聞元末安西都護趙含章冒於貨賄多以金帛賂遺朝廷之士九品以上悉皆有名其後節度范陽事方發覺有司具以上聞元宗切責名品將加黜削公一無所受乃進諫焉元宗納之遂御花萼樓一切釋放舉朝皆謝公衣冠儼然獨立不拜翌日入奏元宗謂

公曰古人以清白遺子孫乃卿一人而已公曰含章之賄偶不至臣門非不受也元宗深嘉歎之前碑闕焉故略述於此公第三子渾之爲中丞也方欲陳乞御製碑頌未果而中受譴責旋羯胡入亂事竟不成眞卿時忝監察殿中爲中丞屬吏故公孫儼泣請眞卿論讓之昭義軍節度觀察使尙書左僕射兼御史大夫平陽郡王薛公曰嵩以文武忠義之姿爲圖保障上慕公之德業歎尙無窮次嘉儼之懇誠崇賢莫致迴命屯田郎中權邢州刺史封宿購他山之石曳以百牛鐫刻字之工成乎半歲磨礱旣畢建立斯崇遠近嗟擗古今榮觀雖大賢爲德樹善庸限於存亡而小子何知附驥托跡於階序眞卿刺湖州之日因成文請儼刻其側而志之未及雕鐫而第六子衡因謫居沙州參佐戎幕河隴失守介於吐蕃以功累拜工部郎中兼御史河西節度行軍司馬與節度周鼎保守燉煌僅十餘歲遂有中丞常侍之拜恩命未達而吐蕃圍城兵盡矢窮爲賊所陷吐蕃素聞大尉名德曰唐天子我之舅也衡之父舅賢相也落魄如此豈可留乎遂贈以駝馬送還於朝大歷十二年十一月以二百騎盡室護歸士君子偉之乃古來所無也上欲特加超獎且命待制於側門十三年春三月吏部尙書顏眞卿記

家廟碑後記建中元年十月

建中元年歲次庚申秋七月癸亥朔鐫畢八月己未眞卿蒙恩遷太子少師冬十月壬子男頽封沂水縣男碩新奉縣男姪男頂承縣男頌費縣男頌鄒縣男微軀官階勳爵並至二品子姪八人受封無功無能叨竊至此子孫敬之哉

家廟碑額陰記

高祖記室君國初居此它號州君舍人君侍焉堂今置廟地高祖妣殿夫人居十字街西北壁第一宅祕書

監君禮部侍郎君侍焉號州君居後堂華州君於堂中生焉今充神廚少保君堂今充齋堂廳屋充亞獻終獻齋室

韋公肅爲太常博士太常卿鄭餘慶廟有二祖妣疑於祔祭請有司公肅議故太師顏真卿祖室有殷柳兩氏二夫人並祔故事則然諸儒不能異（新唐書儒學傳）唐范傳正謂惟顏魯公張司業家祭不用紙錢（困學記聞）案以上二條皆言魯公家祭事附錄齋堂記後殷柳二夫人公會祖號州君勤禮之配也

謝公碑陰記

太僕謝公東晉咸和中以吳興山水清遠求典此郡郡西至長城縣通水陸今尙稱謝公塘及遷去郡人用懷恩刻石記功焉歷代至皇唐天寶末羣盜起公之碑誌失於所在眷求蕪沒深者愴然借舊史遺文敬司恩石公之雅量宏度蓋嗟歎之不足

述

項王碑陰述

西楚霸王當秦之末與叔梁避讎於吳蓋今之湖州也雖滅秦而宰制天下魂魄猶思樂茲邦至今廟食不絕其神靈事遊具見竟陵子陸羽所載圖經大歷七年真卿蒙刺是州十二載姦臣伏法恩命追真卿上都尅期首路竟陵是諗予以故碑顛趾嘗因仍草莽已而復之真卿乃命再加崇樹以紀之時則仲夏方生明之日

案西楚霸王遺蹟在湖州者卞山有項王走馬埒飲馬池繫馬石山有廟謂之卞王廟梁簡文帝有卞山楚王

廟碑記江總有卞山楚廟詩又郡城有廟向在臨湖門子城內每郡守至必設幕於廳祀以軛下牛齊李安民
奉佛法不予神牛梁天監末蕭琛遷其廟於州治北楚帝橋下唐狄仁傑奏毀天下淫祀夢項王語之曰吾嘗
以陰兵助國家征遼廟得不毀

贊

左納言史務滋像贊

嗚呼人方羅織我獨平反周來之徒殺人以媚人而卒亦不免孔子曰無求生以害仁有殺生以成仁而何嘗親密乎行感（闕）俊臣慘刻吏柄鑿不相入當年公已矣民到於今稱遣直

案史務滋武后相新書附豆盧欽望傳

李侍御寫真贊并序

前殿中侍御史正議大夫行洛陽縣令隴西李構年三十七

洛陽精堅強項稱賢粉績圖出風規宛然睟容昭寫卓立神全舉板迎揖吾將答焉

案唐書宰相世系表有兩李構一武后相元素之孫趙郡李氏也此則姑藏房元德之孫隴西李氏也

頌

永字八法頌

側躡鳴而墜石勒緩縱以藏機弩灣環而勢曲趨峻快以如錐策依稀而似勒掠仿鬣以宜肥啄騰凌而速進磔抑趨以遲移

辨

蒲塘辨

土俗所呼博淺水浦與敷音轉爾南有博陽山土人呼爲濮陽山濮博聲訛水北有歷下村疑古歷陵也案今江西九江府德安縣在漢爲歷陵縣屬豫章郡唐爲江州潯陽縣地至五代吳順義七年始置德安縣歷代因之禹貢過九江至於敷淺原漢書地理志云豫章郡歷陵縣有傅易山（師古曰傳讀曰敷易卽陽字）傅易川在南古文以爲敷淺源蔡傳云今江州德安縣博陽山也新莽名曰蒲亭魯公所辨之蒲塘卽其地大中十二年鄭薰移魯公詩記云公轉廬陵郡道出宣州溧水縣南經古左伯桃墓作詩自題於蒲塘客舍則誤以桃墓蒲塘皆在溧水攷桃墓在同州郃陽縣（辨見外集薰記）魯公經墓作詩是至德二載出爲同州刺史時事其自書於蒲塘客舍是永泰二年二月移吉州司馬道過潯陽時事傳刻於溧水又不知何時事也蓋作詩一地也（今陝西郃陽縣）自書其詩一地也（今江西德安縣刻石又一地也）（今江蘇溧水縣）

題名

華嶽廟題名

皇唐乾元元年歲次戊戌冬十月戊申眞卿自蒲州刺史蒙恩除饒州刺史十有二日辛亥次於華陰與監察御史王延昌大理評事攝監察御史穆寯評事張澹華陰令劉嵩主簿鄭鎮同謁金天王之神祠顏眞卿題記

東林寺題名

唐永泰丙午歲眞卿以罪佐吉州夏六月壬戌與殷亮韋桓尼賈鎰同次於東林寺時則同愔熙怡二公惠秀正義二律師臬楊鷗在焉仰廬阜之鑪峯想遠公之遺烈升神運殿禮僧伽衣覩生法師塵尾扇謝靈運翻涅槃經貝多梵夾忻慕之不足聊寫刻於張李二公耶舍禪師之碑側魯郡顏眞卿書記

西林寺題名

唐永泰丙午歲眞卿以疎拙貶佐吉州夏六月癸亥與殷亮韋桓尼賈鎰楊鷗憩於西林寺有法眞律師深究清淨毗尼之學卽律祖師志恩之上足余內弟正義之阿闍黎也緬懷遠見二公之遺烈導余躋重閣示以張僧繇畫盧舍那佛像臬梁武帝蹙線繡鉢袋因寓題歐陽公所撰永公碑陰魯郡顏眞卿題

靖居寺題名

唐永泰二年眞卿以罪佐吉州聞青原靖居寺有幽絕之致御史韓公涉刺史梁公乘嘗見招欲同遊而不果大歷二年十月壬寅評事韋甫已使將歸乃與別駕李（闕二字）清河房澄同官主簿陸涓甫男七步眞卿子姪蔡顛泚顛盱等同宿於下坊明日及僧明則智清而登禮焉因覩行思天師經始雙泉之靈跡道契律師纂成（闕）路之祕藏徘徊瞻仰乃援翰而勒於碑陰

碑銘一

周太師蜀國公尉遲公廟碑銘開元二十六年

天臨有周誕赫元輔屏內藩外經文緯武隱若長城闕如虓虎功縣日月聲蓋寰宇甥舅之國君親是私一本誤作輔。統蜀制梁督隴莅茲天命假易奸臣不祇憑陵君德暴蔑京師我圖匡救三方奮糾綠巾始繫黃龍失守精貫天地義伏羣醜節著誠全死而不朽皇唐御歷景命有融賜縑改葬懋烈昭忠鄰有賢守是爲張公馨香明德乃建閼宮乃建閼宮閼宮有恤乃建豐碑豐碑有勦妖孽遂止幽明載色載穀無虧享祀不忒

第一千一百二十九唐尉遲迴廟碑閼伯瓊撰序顏真卿撰銘蔡有鄰八分書開元二十六年正月（金石錄日）案通志金石略云魯真卿周太師尉遲公廟碑在相州蓋誤以魯公撰銘爲撰序并書碑也碑今在安陽縣銘第十句君親是輔輔乃私字之譌私與下茲抵師叶輔韻已見第二句不應重用

天下放生池碑銘乾元二年三月

皇唐七葉我乾元大聖光天文武孝感皇帝陛下以至聖之姿屬艱虞之運無少康一旅之衆當祿山強暴之初乾鞏勞謙勵精爲理推誠而萬方胥悅克已而天下歸仁恩信侔於四時英威達於八表功庸格天地孝感通神明故得回紇奚霫契丹大食盾蠻之屬扶服萬里決命而爭先朔方河東平盧河西隴右安西黔中嶺南河南之師虓鬪五年推鋒而效死摧元惡如拉朽舉兩京若拾遺慶緒遁逃已蒙赤族之戮思明跼伏行就沸鼎之誅拯已墜之皇綱據再安之宗社迎上皇於西蜀申子道於中京一日三朝大明天子之孝問安視膳不改家人之禮蒸蒸然翼翼然眞帝皇之上儀詰誓所不及已歷選內禪生人以來振古及隋未有如我皇帝者也而猶嫗煦萬類勤瘁四生乃以乾元二年太歲己亥春三月己丑端命左驍衛右郎將史元琮中使張庭玉奉明詔布德

昔始於洋州之興道泊山南劍南黔中荆南嶺南江西浙江西諸道訖於昇州之江甯秦淮太平橋臨江帶郭上
下五里各置放生池凡八十一所蓋所以宣皇明而廣慈愛也易不云乎信及豚魚書不云乎豎鳥獸魚鼈咸若
(一本無豎字)古之聰明睿智神武而不殺者非陛下而誰昔殷湯克仁猶存一面之網漢武垂惠纔致銜珠之
答雖流水救涸寶勝稱名蓋事止於當時尙介社於終古豈若我今日動者植者水居陸居舉天下以爲池罄域
中而蒙福乘陲羅尼加持之力竭煩惱海生死之津揆之前古曾何髣髴微臣職忝方面生丁威美受恩寔深無
以上報謹緣臯陶奚斯歌虞頌魯之義述天下放生池碑銘一章雖不足形容明聖萬分之一亦臣之精懇也敢
刻金石著其詞曰

明明皇帝臨下有赫至德光天乾元啓蹟緯武戡亂經文御歷孝感神明義形金石仁覆華夏恩加蠻貊道
冠巍巍威深巍巍茲多難克廣丕績慶緒旣誅思明辟易人道助順天心惡逆撲滅之期匪朝伊夕乘此寶祚
永康宗祐業盛君親功崇列辟交禪之際粲然明白迴映來今孤高往策去殺流惠好生立辟率土之濱臨江是
宅遂其生性庇爾鱗鬣環海爲池周天布澤致茲忠厚罔弗怡懌動植依仁飛沈受獲流水長者徒稱往昔寶勝
如來疇庸允格德力無就慈悲孔碩相時傳聞尙賴宏益矧在遭遇其忘敷錫眞卿勒銘敢告凡百

有唐故中大夫使持節壽州諸軍事壽州刺史上柱國贈太保郭公廟碑銘

并序一廣德二年

昔申伯翰周降神於維嶽仲父匡晉演慶於筮淮而猶見美詩人騰芳史冊豈比夫神明積高之壤百二懸
隔之都三峯發地而削成九派浮天而噴激炳靈毓粹奕葉生賢括宇宙而稟和總河山而蘊秀莫與京者其惟
郭宗乎其先蓋出周之號叔號或爲郭因而氏焉代惟太原著姓漢有光祿大夫廣德生孟儒爲馮翊太守子孫

始自太原家焉後轉徙於華山之下故一族今爲華州鄭縣人夫其築臺見師瘞子致養家承金穴之貴政有露冕之高或哲或謀或肅或又皆海有珠而鳥有鳳也闕閱之感其流益光隋有金州司倉諱履球府君懋其德輝不憎下位（石本憎作屑）克己復禮州邦化焉篤生唐涼州司法諱昶府君能世其業以伸其道遠近宗之不隕厥問生美原縣主簿贈兵部尚書諱通府君清識澈照博綜羣言始登王畿鬱有休稱（石本休作佳）道悠運促靡及貴仕垂於後昆沒而見尊是生我諱敬之府君府君幼而好仁長有全德身長八尺二寸行中絜矩聲如洪鐘河目電照虬鬚蝟磔進退閒雅望之若神以仲由之政事兼翁歸之文武始自涪州錄事參軍轉瓜州司倉雍北府右果毅加遊擊將軍申王府典軍金吾府折衝兼左衛長上原州別駕遷扶州刺史未上除左威衛左郎將兼監牧南使渭吉二州刺史侍中牛僊客諱君清節奏授綏州遷壽州累加中大夫策勳上柱國以天寶三載春正月十日遘疾終於京師常樂坊之私第春秋七十有八乾元元年春二月以公之寶允開府儀同三司司徒兼中書令上柱國汾陽郡王曰子儀有大勳於王室乃下詔曰故中大夫壽州刺史郭敬之累君子之行毓達人之德才光文武政美中和生此大賢爲我良弼頃以孽胡稱亂黔首罹殃朕於是鬱興神武之師克掃機槍之氣（一本氣作勢）而子儀帥彼勁卒赫然先驅取京洛如拾遺翦凶殘猶振槁功存社稷澤潤生人是用寵洽哀榮義申存沒可贈太保於戲君體含宏之素履秉沖逸之高烈言必主於忠信行不違於直方清白爲吏者之師死生敦交友之分端一之操不以夷險概其懷堅明之姿不以雪霜易其令用情不閉於疎遠泛愛莫遺於賤貧拳拳服膺終始靡二故所居則化所去見思人到於今稱之斯不朽矣傳曰德盛必百代祀其有後也宜哉恭惟令公先皇之佐命臣也少而美秀長而瓌偉姿性質直天然孝悌寬仁無比騎射絕倫所莅清白見稱居常以經濟自命弱冠以邦鄉之賦驟膺將帥之舉四擢高第有聲前朝三爲將軍再守大郡累典兵要必聞休績天寶末安祿山反於范陽令公以節度使擁朔方之衆圍高秀巖於雲中破史思明於嘉山先帝之幸朔方赴行在於

靈武擊同羅於河曲走崔乾祐於蒲坂今上之爲元帥也首副旄鉞會回紇於扶風摧凶寇於浚水追餘孽於陝服長驅河洛弼成睿圖再造生靈克清天步又函夏之未乂安天下之未安一年之間區宇大定丕休哉（一本丕作豈不）徒觀其元和降精間氣生德感星辰而作輔應期運以濟時忠於國而孝於家威可畏而儀可象威德繫物寬仁厚下用人由己從善如流沈謀秘於鬼神精義貫於天地推赤誠而許國冒白刃以率先電擊於雲雷之初鷹揚於廟堂之上凡二歷鼎司兩升都座四作元帥九年中書歷事三聖而厥德維懋易相二十而受遇益深蓋尅復上都者再戡定東京者一其餘靡城斬邑得雋摧鋒亦非遽數之所周也信可謂王國虓虎生人蔭床者歟非太保之邁種不孤則何以鍾美若是况乎友于著睦鸞龍虎者十人貽厥有光紆青紫者八士（一本士作九）勳庸舉集今古莫儔昔奮號尊榮紅粟纒窟於萬石憚家全盛朱輪不出十人繇我觀之事不侔矣於戲清廟之興所以仁祖考鴻伐之刻亦以垂子孫爰制於舊居將永圖而觀德中堂有恤丕構克崇感霜露而忱惕以增敘昭穆而敬恭斯在庶乎觀望禹若旣無斃於永懷入室優然必有覲乎其位哀榮旣極情禮用申仁人之所及遠哉孝子之事親終矣豈唯温温孔父遠稱讒鼎之銘穆魯侯獨美龍旂之祝其詞曰

郭之皇祖肇允號土遠於後昆實守左輔徙華陰令（其一）源長流光施於司倉涼州兵部克熾而昌載德深令（其二）篤生太保允懋厥道神之聽之永錫難老式如金令（其三）於穆令公汾陽啓封文經武緯訓徒涉空簡帝心令（其四）含一不二格於天地愷悌君子邦之攸暨貊德音令（其五）芝蘭芳羽儀公堂子子孫孫爲龍爲光鏘璆琳令（其六）乃立新廟肅雍允劭神保是聽孝思孔昭亶居歆令（其七）乃立高碑感美奚茲日月有旣徽猷永垂映來令令（其八）廣德二年歲次甲辰十一月甲午朔二十一日甲寅建

晉紫虛元君領上眞司命南嶽夫人魏夫入仙壇碑銘大歷三年

夫人諱華存字賢安任城人晉司徒劇陽文康公舒之女也師於小有清虛真人王褒哀命中候上仙范邈爲立傳其略云夫人挺瓊蘭之流映體自然之靈璞志逸雲霞明潔鮮蔚天才卓異元標幽拔少讀老莊三傳五經百子無不該覽性樂神仙味眞慕道少服胡麻散茯苓丸吐納氣液攝生夷靜親戚往來一無關見常欲別居閉處父母不許年二十四強適太保掾南陽劉君幼彥生二子璞遐幼彥後爲修武令夫人心期幽靈精誠苦盡逮子息粗立乃離隔室宇齋於別寢清修白日忽有太極真人安度明東華大神方諸青童扶桑碧河湯谷神王景林眞人小有仙清虛真人王褒來降哀謂夫人曰聞子密緯眞氣大帝君敕我授子神眞之道青童曰清虛爾之師也度明曰子苦心求道道今來矣景林曰虛皇鑒爾勤感太極已注子於玉札子其最哉青童又曰子不受聞上道內法晨景玉經者仙道無緣得成也後日當會陽洛山中爾勤密之矣王君乃命侍女（一本王作三）開玉笈出太上寶文八素隱身大洞眞經（一本眞作冥）高仙羽元等書三十一卷手授夫人焉此皆王君昔遇南極夫人西城真人王方平於陽洛山所受之本經也山中有洞臺是清虛之別宮王君至是北向祝誓於夫人曰太上三元九皇高眞虛微八道上清玉晨哀爲太帝所敕於魏華存王君又說太極白簡青錄金刻玉文有得見此三十一卷書者之姓名也凡此寶書起自清虛真人受太師西城王君紫元夫人從是當七人得之以白玉爲簡青玉爲字至夫人爲四矣於是景林又授夫人黃庭內景經令晝夜誦讀萬遍乃得洞觀鬼神此乃不死之道也是於四眞吟唱各命玉女彈琴擊鼓吹簫合節而發歌歌畢王君乃解語夫人向所授書存思指歸寶經節度行事口訣諸要粗訖徐乃別去凡二夕一日共會在曲靜之中自此之後王君及西城真人諸元君夫人互有來往或與隔壁共庭初不駭悟已而幼彥以暴疾殞世直天下荒亂大人撫養內外旁救窮乏超羣先覺乃攜細小徑

來東南及兒息各大並處官位至於守靜之思與日而進也凡在世八十三年以成帝咸和九年歲在甲午王君乃與東華青童來降與夫人靈藥兩劑使頓服之刻期會於陽洛宮夫人服藥稱疾閉目寢息飲而不食七日夜半大乙元仙遣飄車來迎夫人用藏景之法託形神劍化成死骸始終外朗仙化內逸冥變隱適從此而絕子璞時爲庾司空司馬還時爲陶太尉從事中郎安城太守故夫人自此隱化淪景須臾至陽洛山明日青童君太極四真人清虛王君三天法師張道陵等凡四十七真人降教夫人於隱元之臺王君令夫人清齋五百日讀大洞真經并分別登真秘奧道陵授以新出明威章奏入靜存祝吏兵符籙之訣衆真各標至訓三日而去道陵所以備教委曲者以夫人在世爲女官祭酒領職理故也夫人遂修齋讀經誦言萬過積十六年顏如少女於是龜山九靈太真西王母金闕聖君南極元君乃共來迎夫人遂白日昇晨北詣上清宮玉闕之下太微天帝中央王老君三素高元君方上玉晨大道君太素三元君扶桑大帝君金闕後聖君各令使者致命授夫人玉札金文位爲紫虛元君領上真司命南嶽夫人比秩仙公使治天台大霍山洞臺之中主下訓奉道教授當真仙者而男之高仙曰真人女曰元君於是夫人受錫事畢王母及金闕聖君南極元君各去使夫人於王屋小有之中更齋戒三日畢九微元君龜山王母三元夫人馮雙禮珠泉諸衆仙并降夫人於小有清虛上宮絳房之中時夫人與王君爲寶主焉神肴羅陳金觴四奏各命侍女陳曲成之鉤九雲合節八音零粲於是西王母擊節而歌歌畢馮雙禮珠彈雲璈而答歌餘真人各歌須臾司命神仙請隸屬及南嶽神靈迎官並至虎旗龍輦激曜數百里中西王母諸真乃共與夫人東南行俱詣天台霍山臺又便道過句曲金壇茅叔申宴會二日二夕又共適於霍山夫人安駕玉宇然後各別初王君告夫人曰學者當去疾除病因授甘草丸所謂穀仙方也夫人服之而仙夫人能隸書爲王君立傳事甚詳悉又述青精飴鉢註黃庭內景經自後屢降茅山子璞後至侍中蒙使傳法於司徒瑯琊王舍人楊羲護軍長史許穆穆子玉斧並昇仙事具陶宏景真誥所呼南真卽夫人也初夫人旣渡江徧遊名山至

臨川郡臨汝水西立壇置精舍院東百餘步造冢壙又於石井山建立壇場往來遊憩歲深久榛蕪淪駭雖備載圖經而略無遺跡有唐女道士黃令微行高遠八十而有少容蹀屣而行奔馬不及時人見其顏色殊異號曰華姑聞夫人靈跡長壽二年歲在壬辰冬十月乃訊於洪州西山道士胡超超能通神明遙指郭南六里烏龜原有石龜每犯田苗被人擊首析其處是也姑與道流尋訪見龜在壇中央其下得尊像油鬢鋸刀燈盞之類俄夢夫人指九曲池於壇南獲之磚砌猶在景雲中睿宗使道士葉善信將繡像幡花來修法事乃於壇西祠靈觀度女道士七人開元初元宗使醮祭祈禱不絕每有風雨或聞簫管之聲入室禮謁必須嚴潔不爾必有蛇虎驚吼之異時時有雲如烏鳥羣飛垂帶直下壇上倏忽不見西山如向井山前後非一已而華姑矜矜問如有告者曰井山古跡汝須崇建俄聞異香從西南來姑行宿洞口聞鐘磬之音遲明入山果遇壇殿餘址遂建立屋宇屢聞仙梵之響環壇數里有採斫及不精潔者必有怪異之驚有野鹿中箭來投華姑姑爲援之後每齋前則銜藕蓮以獻姑開元九年姑欲上昇告弟子曰勿釘吾棺可以絳紗冪之已而雷霆震擊紗上有孔大如雞卵棺中惟覆木簡屋上穿可容人座前奠瓜數日生蔓結實如桃者二每至忌辰則風雨鬱勃直入室內元宗聞而駭之被覆木簡屋上穿可容人座前奠瓜數日生蔓結實如桃者二每至忌辰則風雨鬱勃直入室內元宗聞而駭之覆視明白使道士蔡偉編入後仙傳二十九年春三月乙酉使道士齋龍壁來醮忽有白鹿自壇東出至冢間而滅五色仙蛾集壇上刺史范陽張景佚以爲聖德感應立碑頌述天寶八載以夫人得道昇仙之所度女道士二人見修香火大歷三年真卿叨刺是州言崇禮謁郊郭蒙邃萑蒲震驚女弱曹逃豺狼窟聚真儀如在壇殿巋然瞻仰徘徊悄焉若失有仙壇觀道士譚仙巖者修真自遠法侶是宗請以男官黃道士二十七人抽隸洞靈共申灑掃高行女道士黎瓊仙士人萃居壇院精力住持已久率勵往來增修觀宇從之不日通暨厥成仙跡之載崇師之力也敢備其本末而爲頌云銘曰

紫虛元君維魏夫人位列五嶽名高七真凝華台允奪志劉嬪大帝昭懇清虛降神羣仙畢會玉笈斯陳服

道日損精心益勤蛻形神劍託馭飄輪適抵陽洛盡登隱元黃庭朗詠白日昇晨西降王母東過叔申傳法侍中許揚爲隣伊昔南渡爰居汝濱壇場處所埋沒荒榛實賴華姑諗於胡尊果獲靈跡烏龜之原次尋井山實叶曩言嫣然解紗冪空存野鹿銜藕靈瓜吐根怪異昭彰不可殫論二聖竦駭屢崇明禋于嗟女弱香火堙淪眞卿刺州謁拜斯頻乃命仙子增修鼎新華姑侍傍異代同塵曷表元德銘功翠珉垂諸來裔垓北無垠

撫州臨川縣井山華姑仙壇碑銘大歷四年

華姑者姓黃氏諱令微撫州臨川人也少乃好道丰神卓異天然絕粒年十二度爲天寶觀女道士年八十髮白面紅如處子狀時人謂之華姑蹀履而行奔馬不及聞魏夫人仙壇在州郭之南草木榛翳結廬求之不得長壽二年歲在壬辰冬十月壬申朔訪於洪州西山胡天師天師名超能使鬼神見其懇切遙指姑所居南二百步曰烏龜原中有石龜每蹂踐田苗百姓患之乃擊斷其首卽其處也明日與姑登山顧望西面有池水焉天師謂姑曰池中有所見乎曰無師遂舉左手令姑自腋下觀之四仙浴焉師曰爾有道分必當得之因留與語數日旣還至州虔誠尋訪遂獲石龜於壇中央掘其下得尊像及刀鋸各一油鬻五口燈盞數十箇天后聞之盡收入內姑嘗於旦夕精思想象之間忽有告曰壇南有九曲池汝可開之姑從而獲焉碑砌盡在他日有異香縹雲從西南而來其夕夢有人謂姑曰井山道場何不修葺姑未及往忽然感疾姑悔之曰得非違尊教所致乎翌日病愈又聞香而宿於谷口聞鐘聲遲明入山果獲壇殿池砌餘址半峯有自然石井深可三尺闊丈餘故名井山天欲雨則雲霧先起姑旣置精舍時聞仙梵之音環壇五七里間莫敢樵採姑遂灑掃修葺極其力焉人或不潔不誠必遭蛇虎怪異之警迷不能出矣至今猶然有野鹿爲獵人所射來姑前姑爲拔箭其後每至齋時卽銜蓮藕以獻姑前開元九年欲上昇之際忽謂弟子曰不須釘吾棺可以絳紗冪之數夕有雷震電繞視紗頂孔如雞

卯屋穿容人棺中惟覆被木簡而已弟子奠瓜數日生蔓長數尺結實二顆其大如桃姑同學弟子黎瓊仙恆服茯苓胡麻絕粒四十餘秋八十齒髮不衰六七歲時親覩其事每至忌辰卽風雲翥鬱直入室內村野路人往往見綵雲白鶴飛入洞口清齋行道時每有一朱鬚白馬在壇側逼之則奔而出外捨之則隨而復來靈異昭彰不可談悉仙臺觀道士譚仙巖史元同左通元等每至三元恆修齋醮大歷三年眞卿獲刺是州明年春三月山下有女道士會妙行夢一女師令上七層華樹層層撥澣及寤猶餽因是不食嘗於觀見黎瓊仙跪而拜曰夢中所見乃尊師也因請依之於今覺韶顏潤澤虔修香火於此山遐邇駭慕焉嗚呼麻姑得道於名山南眞昇仙於龜原華姑鶴竊於茲嶺瓊仙妙行接踵而去非夫天地胎嚮從古以然則何以仙氣氤氳若斯感者眞卿幸因述職親覩厥猷若默而不言則來者奚述乃爲銘曰

綽約華姑眞仙品徒芳蓮比色逸俊爭驅南郭從魏西山訪胡腋窺仙浴原獲龜烏靈跡旣儼曲池猶汚鼎新廟貌煥然規模名曰井山終焉不逾鹿來藕獻馬見鬢朱簡解空存紗穿上徂奠瓜吐實藹室雲趨妙行精持高眞是俞勒銘翠琬永播元都

華蓋山王郭二眞君壇碑銘

粵以江南之地佳麗垂名山嶽之間宛有仙洞余祇膺聖澤廉察臨川一日按地理圖得屬邑崇仁縣華蓋山有王郭二眞君壇存焉欣覩異事未原其始他日公餘因令軍將往山下訪求碑銘果得一石記乃隋開皇五年梵修道士李子眞於壞碑上再錄出其文則知王郭二眞君仙不顯名王則方平之從姪郭乃王之族弟也（郭不應爲王之族弟族字疑誤）始於金華山修道以圖輕舉尋遊洞府自玉筍山將之麻姑洞中道悅一山問故老曰此爲何山對曰巴陵華蓋山也二眞君相與言曰此山福地名亦異焉因求卜止再煉神丹山下父老詣而再

拜曰敢問真人之名字曰晉等修志於虛無不欲述焉後有一道士來謁敢問真人之師曰晉師浮邱先生則上界大仙也頃於金華山遇焉二真君能走石飛符興雲致雨或有人疾苦暴亡往而告之卽飛符以救之歲時大旱卽致霖雨以濟之至晉惠帝元康二年二月一日綵雲連晝仙樂喧風二真君乃驂鸞駕鶴冉冉上昇今上昇之壇及浮邱先生之壇存焉其後立觀焚修境邑將旱若詣壇禱之則雲雨立應矣故事昭然仙踪儼若雖遺史籍安泯聲華鸞鶴對飛共作壺中之客林巒疊秀別含象外之春因與府官議崇觀宇永利焚修差車將以公用錢詣山換殿宇門廊不日而迴云工畢矣予德慚好道任忝分符原始要終罕測沖天之日飛文染翰用貽終古之芳銘曰

元牝之門濟心養神學則彌衆得者幾人冉冉千古堂堂二真丹成岩谷道應穹昊綵雲色煥仙樂聲勻灑日初麗柳花正新鸞鶴拔俗駕鶴超雲言歸紫府笑別芳辰山存華蓋長含異眷恩流豐澤用濟蒸民浮雲世遠好月生頻儼若聖祉永播清芬

碑銘一

東莞臧氏紉宗碑銘

德有三孝弟稱其至常有五仁道原其終故興化所自則曰侯其在矣死喪有恤疇能亦莫吾聞鶴鶴於焉
譬急難棠棣所以勗附尊紉宗綏族所貴因之誰其庶乎吾見之於臧氏矣爰自伯禽國魯公子氏彊魚賂大諫
於僖哀言聖兩垂於文武朗陵會吳而滅蜀東郡感張而絕袁建義而辭器歸高奮筆而陽秋與直賢明之感今
古莫崇積慶所鍾克生隋驃騎將軍府君諱滿滿生皇朝通議大夫靈州都督府長史府君諱龍龍生銀青光祿
大夫銀州刺史贈太子少師諱善德感懷忠良克績徽烈古稱有後今見其然少師生三子曰右武衛將軍贈幽
州大都督（闕三字）懷慶冠軍左羽林大將軍兼營府都督御史中丞充平盧節度採訪兩蕃使懷亮河源軍
使安北都護右領軍將軍上柱國上蔡縣開國侯累贈太常卿魏刺史工部尚書懷恪皆行冠人倫才兼文武
并時迭將爲國虎臣朔漠之間峻風斯在其功庸志業各具三原縣先塋神道碑懷慶五子曰左金吾中郎將范
陽節度經略副使希古右威衛將軍中受降城使希真殿中監朔方經略副使希賓原州長史監牧副使希拙銀
青北平太守仍充軍使希逸懷亮五子曰勝州都督朔方節度副使敬廉金紫文安太守范陽節度副使希莊左
清道率幽州經略副使敬之太常卿特進武州刺史今上元帥都知兵馬使讓之左監門將軍敬此（此字疑誤）
懷恪七子曰右衛中郎將贈（闕）州刺史希崇豐州別駕贈宋州刺史希昶左驍衛中郎將贈太子賓客希忱
忠武將軍贈汝州刺史希愔壯武將軍左威衛中郎將贈祕書監希景雲麾麟寧三州刺史左金吾將軍左街使
贈揚州大都督希晏魯國公希讓並稟訓義方丕從閔閱遭逢明威備展材良能挺撻矚之姿學蘊韜鈴之略粹

蘭玉而輝映階庭畫隼態而光聯旗軾勳庸之感當世無倫源長流深德威祀遠開元天寶間宗族之紆青紫佐
麾幢者已數十百人迨乎今人上當守而諸孫冠軍左羽林將軍贈太子詹事彥英忠武左清道率左清道率
贈少府監彥佺金紫太僕卿涉特進殿中監玠左金吾大將軍彥璟正議湖州長史隨並不幸早世銀青棣州刺
史瑜特進殿中監慈州刺史瑀特進鴻臚卿均特進太常卿彥昭開府太常卿彥嵩正議杭州別駕異銀青鴻臚
少卿溟鴻臚卿蹟朝散明州長史叔獻少府監楚卿朝散台州司馬晉卿朝散洋州司馬叔雅符寶郎齊卿涇陽
縣(闕)雲卿左金吾衛長卿千牛叔卿京兆府參軍叔清(闕文)

晉侍中右光祿大夫本州大中正西平靖侯顏公太宗碑銘大歷六年

公諱含字宏都瑯琊臨沂人其先出於邾顏公子友封於邾是爲小邾子爲魯附庸居於鄒邑因以命氏孔
門達者八人曰路回辛驕祖噲僕何次有丁闔叔子率躅秦有芝貞漢有肆異安樂魏有斐威威字叔臺青徐二
州刺史關內侯始自魯居瑯琊代傳恭孝故號所居爲孝悌里生欽字公若明韓詩禮易尚書多所通說學者宗
之歷大中大夫東莞廣陵太守葛繹貞子生默字靜伯晉汝陰太守護軍將軍生公少有操行以孝聞兄畿咸寧
中死託夢當復生發棺而氣息甚微闔家營視母妻不能無倦公乃絕棄人事躬親侍養足不出戶者十有三年
次嫂樊氏失明須髻蛇膽尋求不得忽有青衣童子持囊授公乃蛇膽也尋出戶化成青鳥飛去東海王越以爲
太傅參軍元帝過江爲丞相祭酒東宮初建公以儒素篤行補太子中庶子遷黃門侍郎本州大中正封西平縣
侯拜侍中除吳郡太守公所歷簡而有思明而能斷然以威風御下王導歎曰顏公在事吳人斂手矣未之官復
爲侍中國子祭酒光祿勳以年老遜位成帝美其素行就加右光祿大夫門施行馬賜牀帳被褥勅大官四時致
膳固辭不受時論者欲爲王導降禮馮懷以問於公公曰吾聞伐國不問仁人向馮祖思問佞於我我邪德乎

或論少正卯盜跖惡孰深公曰隱伏之姦非聖不誅衆咸服焉郭璞嘗欲爲公茲公曰自有性命毋勞著龜桓温求婚以其感滿不許因誡子孫曰自今任官不可過二千石婚姻勿貪世家或問羣士優劣答曰周伯仁之正鄧伯道之清卞望之之節餘則吾不知致仕二十餘年年九十二薨諡曰靖三子髦謙約并有聲譽公喪在殯而鄰家失火髦與二弟抱柩號叫燦焰垂至忽爾頓絕時人以爲孝感事見晉書髦字君道少纂家業惇於學行儀狀嚴整風貌端美桓公見而歎曰顏侍中廊廟之望也尙書郎國大中正給事黃門侍郎以父老不就加給事中晉陵臨川太守侍中本州大中正加秩中二千石光祿勳西平定侯事具約孫延之集生琳字文和騎都尉襲西平侯生靖之字茂宗宣城太守司徒諮議御史中丞生騰之字宏道善草隸書風有格治書御史度支校尉巴陵太守生炳之字叔豹以能書稱奉朝請輔國江夏王參軍生見遠字見遠方正不合於俗梁書云博學有志行齊治書御史俄兼中丞正色立朝有當官之稱高祖受禪不食發憤慟哭而絕武帝恨之曰我自應天從人何預天下人事而顏見遠乃至於此生協字子和湘東王記室梁書有傳生之推字介北齊中書舍人給事黃門侍郎平原太守嘗著觀我生賦云展白下以流漣以靖侯已下七葉墳塋皆在故也生思魯愍楚集序思魯自作事見本傳入隋生游秦思魯字孔歸博學善屬文尤工詁訓隋司經校書長寧王侍讀東宮學士嘗與劉臻講論經義臻屈服焉高祖入關率男師古相時勤禮育德奉迎用長春宮授儀同秦王記室國史温大雅傳云大雅在隋與思魯俱在東宮弟彥博與愍同直內史省彥將與遊秦并典校祕閣二家兄弟各爲一時人物之盛少時學業顏氏爲優其後職位温氏爲盛勤禮字敬幼而朗悟識量宏遠工於篆籀尤精詁訓祕閣司經史籍多所刊定歷校書郎著作郎與兄師古相時俱以文學爲崇賢宏文館學士太宗使蕭鈞讚曰依仁服義懷文守一履道自居下幃終日德彰素里行成蘭室鶴輪馳譽龍樓委質終著作郎生昭甫字周卿少聰穎而善工篆隸草書與內弟殷仲容齊名而勁利過之特爲伯父師古所賞凡所注釋必令參定焉爲天皇曹王侍讀曹王屬有獻古鼎篆書二十餘

字舉朝莫能讀昭甫盡識之贈華州刺史眞卿表謝批荅曰卿之乃祖嘗爲碩儒旣高倚相之能遂有臧孫之後不墜其業在卿之門二子元孫惟貞元孫字聿修聰銳舉進士考功郎劉奇特標榜之歷太子舍人專掌令畫元宗讚之曰孔子亞聖魯國稱賢翰墨之妙莫之與先累至滌沂濠三州刺史贈祕書監五子春卿明經拔萃蜀縣尉舉茂才偃師丞杲卿字昕常山太守祿山反開土門拜爲尉卿兼中丞贈太子太保諡曰忠節曜卿工草隸五言以文學直崇文館淄川司馬旭卿善草書允山令茂會篤行頗好詁訓隸爲司馬惟貞字叔堅有德行詞學尤善草隸屢登甲科太子文學薛王友累贈太子少保事具陸據神道碑七子闕疑孝友仁讓專精詩傳杭州參軍允南孝悌聰銳工爲詩判屢入高等與春卿杲卿曜卿同日爲侍郎席建侯所賞歷左補闕時眞卿爲殿中侍御史正至同拱法座踏舞而衣袂相接者三故允南侍宴詩云誰言百人會兄弟也寤陪累遷司封郎中國子司業金鄉男喬卿仁友精晉史有吏道富平尉眞長清直舉明經幼輿仁和有醞藉精班漢左尉率府兵曹眞卿進士校書郎舉文詞秀逸醴泉尉清白名聞長安尉歷三院御史兵部員外郎以平原太守拒祿山凡五爲侍郎右丞三爲尚書四爲御史大夫七爲刺史二爲節度採訪觀察使魯郡公允臧友悌有吏幹制舉縣令宰延昌拜監察充郭子儀朔方衣資使遷殿中太子中允江陵少尹再兼侍御史充荆南節度行軍司馬公子謙安城太守約零陵太守孫綸廷尉熙散騎常侍顯護軍司馬會孫系之益州刺史延之金紫光祿大夫劭之領軍司馬根晉安太守元孫希之新安太守師伯僕射師仲中書郎浚吏部尚書測臨淮太守奂五兵尚書微之散騎常侍僧度給事中僧超徐州刺史來孫幼明征虜記室昆孫積中書郎翻廣州刺史仍孫誓交州刺史挺山陽太守雲孫之儀周御正中大夫新野公之善隋葉令侍讀十代孫昶寧仁令愍楚侍御史遊秦度支郎中廉州刺史見循吏傳著班漢決疑顛隋汝南侯侍讀十一代孫千里工書殷王主簿師古祕書監宏文崇賢學士相時禮部侍郎天冊學士育德太子通事舍人司經局校定經史利仁祕書郎有意沔州刺史博古博學延陵丞十二代孫中和渝州刺史

楊庭蔣王侍讀光庭博學注後漢書涉令趨庭職方郎中吉州刺史欣期著作郎益期詳正學士敬仲仁孝吏部郎中平昌男康成進士太子舍人崇文館學士希莊進士銀青和州刺史日損應制高第大基尉嘉賓少有俊才十三代孫大智并州錄事參軍隱朝進士拔萃河北尉匡朝工五言珣山令元淑鄰幾景靈并校書郎同寅明經昇庠有詞學富陽令恭敏有德行明漢書武功尉知微制舉伊闕丞十四代孫溫之有志行舉方正司門郎中徵之澹之並明經晁有清節饒陽司士抱范縣尉允濟好屬文榆次尉振高陵丞摺援擬據撰并明經挺有詞理萬年尉式宣靖修進士殿中侍御史茂齊淳謹漢州司法舒俊才制舉長安尉說明經有才器渭南丞順孝悌進士評事勝進士左補闕怡好爲詩渾博涉有文太子通事舍人方僑進士宮門丞十五代孫逸好文武康令鱗長安尉廣成將軍泉明孝義佐父開土門彭州司馬季明子幹詡沛頗及外甥沈盈盧遜祿山反死難並贈五品官翻敦敏通義令觀綿州參軍顓(闕一字)西令慈明都水潁河南府功曹校書郎顓孝明經大理司直顓奉禮部頡江陵頡河中顓鳳翔參軍顓當陽主簿頡千牛頂武功丞頡(頡當是頡之誤)工隸書太子洗馬頡頡並京兆參軍翹峴頡(頡已見前當是頡之誤)顓須頡頡盈枝並未仕通明項城尉韶有才氣工詩策進士濮陽尉明華陽尉啓溫江尉襲華陰尉臣邱守道不仕其餘枝派繁衍不可具載於戲吾祖以志行純粹通神明貽謀子孫奕葉無改其後忠義孝悌文學才業布在青史粲然可知非夫德感流光何能若是真卿小子懼不克荷頃自撫州代到獲展舊山雖碑版沈淪而邱封儼在敢揚不朽之烈庶竭罔極之思銘曰

鑠吾祖渡江浦孝通神明軼古凡七葉葬白下本支分源流溥世忠義疊規矩鸞皇炳龍虎文睢渙學鄒魯赫才明振區宇亘今昔難悉數嗟末孫慙下武揚耿光媿無取豐碑立百世觀

有唐茅山元靖先生廣陵李君碑銘并序大歷八年

先生姓李氏諱含光廣陵江都人本姓宏以孝敬皇帝廟諱改焉二十一代祖宏江夏太守避王莽徙居晉陵遂爲郡人高祖文疑陳桂陽王國侍郎曾祖榮皇朝雷州司馬祖師龜隱居以求其志徙於江都父孝威博學好古雅修彭聃之道與天台司馬鍊師子微爲方外之交尤以篤慎著於州里考行議諡曰正隱先生母瑯琊王氏賢明有德先生孩提則有殊異晬日獨取孝經如捧讀焉羈舛好靜處誦習墳典年十八志求道妙遂師事同邑李先生遊藝數年神龍初以清行度爲道士居龍興觀尤精老莊周易之深趣執喪過哀口不嘗甘旨之味食惟穢麥而已封殖膳羞皆出其手號毀骨立親放莫不傷之開元十七年從司馬鍊師於王屋山傳受大法靈文金記一覽無遺綜核古今該明奧旨元宗知先生得偏子微之道乃詔先生居王屋山陽臺觀以繼之歲餘請居茅山纂修經法類徵皆謝病不出天寶四載冬乃命中官費璽書徵之旣延入禁中每欲諮稟必先齋浴他日請傳道法先生辭以足疾不任科儀者數焉元宗知不可強而止先生嘗以茅山靈蹟翦焉將墜真經祕錄亦多散落請歸修葺乃特詔於楊許舊居紫陽以宅之仍賜絹二百匹法衣兩副香爐一具御製詩及序以錢之又禁於山側採捕魚獵食暈血者不得輒入公私祈禱咸絕牲牢先生以六載秋到山是歲詔書三至渥澤頻繁暉映崖谷初山中有上清真人許長史楊君陶隱居自寫經法歷代傳寶時遭喪亂散逸無遺先生春詔搜求悉備其跡而進上之先時元宗將求大法請先生爲師先生竟執謙沖辭疾而退洎七載春元宗又欲受三洞真經其年春之三月中官費璽書云其月十八日尅受經誥是日於大同殿潔修其事遂遙禮先生爲元帥并賜衣一襲以伸師資禮因以元靖爲先生之嘉號焉仍詔刻石於華陽洞宮以誌之是歲夏五月隱居先生合丹之所有芝草八十一莖散生於松石之間詔俾先生與中官啓告靈仙緘封表進夏又詔以紫陽觀側近二百戶太平崇元兩觀各一百戶並蠲其官徭以供香火秋七月又徵先生旣至請居道觀以養疾九載春辭歸舊山其年夏六月前生靈芝之所又產三百餘莖煌煌秀異人所莫覩先生又圖而奏之是歲冬又徵先生紫陽別院館之十載秋先生

又懇辭告老御製序詩以餞之十有一載先生奉詔與門人章景昭等於紫陽之東鬱岡山別建齋院立心誠肅是夜仙壇林間徧生甘露因以上聞特詔嘉異初隱居先生以三洞眞法傳昇元先生昇元付體元先生體元付正一先生正一付先生自先生距於隱居凡五葉矣皆總襲妙門大正眞法所以茅山爲天下道學之所宗矣於戲是非可齊也我物均焉生死可忘也覺夢同焉如此者何域心於變化之際哉先生以大歷己酉歲冬十一月十有四日遁化於茅山紫陽之別院春秋八十有七其年十二月八日門人赴喪而至者數千人號奉冠鳥遷窆於雷平山之西陲遺命以松棺竹杖木几水瓶香奩香爐置於藏內門弟子等仰奉嘉猷克遵儉德先生器識眞淳業行高古道窮情性之本學冠天人之際所以優游句曲鬱爲王者之師出入明庭特寵肩輿之貴是知順風而問昔稱於黃帝望山而請今見於元宗矣又博覽羣言長於著撰嘗以本草之書精明藥物事關性命難用因循著音義兩卷又以老莊周易爲潔淨之書著學記義略各三篇內學記二篇以續仙家之遺事皆名實無違詞旨該博初先生幼年頗工篆籀而隸書尤妙客或賞之云賢於其父因投筆不書元宗詔山人王皎強請先生楷書上經一十三紙以備楊許之關先生能於陰陽術數之道而不以藝業爲能極於轉鍊服食之事而不以壽養爲極但冥懷素樸妙味元津非夫博大之至人孰能盡於此眞卿乾元二年以昇州刺史充浙江節度欽承至德結慕元微遂專使致書於茅山以抒誠懇先生特令章鍊師景昭復書於眞卿恩眷綢繆足勵超然之志然宗師可仰望紫府而非遙王事不遑寄白雲而悠遠洎大歷六年眞卿罷刺臨川旋舟建業將宅心小嶺長庇高蹤而轉刺吳興事乖夙願徘徊郡邑空懷尊道之心瞻望林巒永負借山之記而景昭洎郭閔等以先生茂烈芳猷願銘金石乃邀道士劉明素來託斯文眞卿與先生門人中林子殷淑遺名章渠牟嘗接采眞之遊緒聞含一之德敢強名於巷黨曷足辨於鴻蒙其詞曰

抱一混茫人之紀綱先生以之氣王神強乃啓元旨元門以彰乃爲帝師帝道惟康甘露呈瑞靈芝效祥上

士云感高風載揚鶴返仙廟雲辭帝鄉退歸而老妙識行藏德本無累道心有常實曰形解孰云坐亡伐石表墓勒銘傳芳谷變陵遷厥跡彌光

湖州烏程縣杼山妙喜寺碑銘大歷九年春

州西南杼山之陽有妙喜寺者梁武帝之所置也大同七年夏五月帝御壽光閣會所司奏請置額帝以東方有妙喜佛國因以名之舊置在州西金斗山唐太宗文皇帝升極之六年春二月移於此山山高三百尺週迴一千二百步蓋昔夏杼南巡之所今山有夏王村山西北有夏駕山皆后杼所幸之地也晉吳興太守張元之吳興疏云烏程有墟名東張地形高爽山阜四周卽此山也其山勝絕遊者忘歸前代亦名稽留山寺前二十步跨出有黃浦橋橋南五十步又有黃浦亭並宋鮑昭送盛侍郎及庾中郎賦詩之所其水自杼山西南五里黃蘗山屈故號黃浦俗亦名黃蘗澗卽梁光祿卿江淹賦詩之所寺東偏有招隱院其前堂西廈謂之溫閣從草堂東南屈曲有懸巖徑行百步至吳興太守何楷釣臺西北五十步至避它城按說文云它蛇也上古患蛇而相問無它乎蓋往古之人築城以避它也有處士竟陵子陸羽杼山記所載如此其臺殿廊廡建立年代並具於記中大歷七年(七當作八)眞卿蒙刺是邦時浙江西觀察判官殿中侍御史袁君高巡部至州會於此土眞卿遂立亭於東南陸處士以癸丑歲冬十月癸卯朔二十一日癸亥建因名之曰三癸亭西北於藜桂之間創桂棚左右數百步有芳林茂樹悉產丹青紫三桂而華葉異各樹桂下有支徑以袁君步焉因呼爲御史徑眞卿自典校時卽考五代祖隋外史府君與法言所定切韻引說文蒼雅諸字書窮其訓解次以經史子集中兩字已上成句者廣而編之故曰韻海以其鏡照原本無所不見故曰鏡源天寶末眞卿出守平原已與郡人渤海封紹高箕族弟今太子通事舍人渾等修之裁成二百卷屬安祿山作亂止具四分之一及刺撫州與州人左輔元姜如璧等增而廣

之成五百卷事物嬰擾未遑刊削大歷壬子歲真卿叨刺於湖公務之隙乃與金陵沙門法海前殿中侍御史李
粵陸羽國子助教州人褚沖評事湯衡清河丞太祝柳察（舊刻魯公文集載杼山寺碑有評事湯衡清河丞太
祝柳察二人留元剛撰公年譜引此條作湯某柳察檢湖州府志進士裴代宗朝育烏程楊衡注云杼山集作湯
衡字仲師大理評事又石刻竹山連句凡十有八人中有湯清河一人也而姓名互異一云湯衡一云湯某一云
楊衡一云湯清河以杼山記文法論柳察既以太祝書其官卽不應又加清河丞於其上則清河二字應是湯君
之名故竹山連句適與之合然則碑內衡丞二字皆衍文也湖志所謂揚衡字仲師者當另是一人湯君之名偶
與清河縣名相同傳寫者誤加丞字於下校公集者以評事下僅存湯姓因移烏程楊衡之名以實之元剛撰譜
知衡字有誤因以某字代其名今編公集仍從舊本而附辨於此）長城丞潘述縣尉裴循常熟主簿蕭存嘉興
尉陸士修後進楊遂初崔宏楊德元胡仲南陽湯涉顏祭（一本作顏察）韋介左興宗顏策以季夏於州學及
放生池日相討論至冬徙於茲山東偏來年春遂終其事前是顏渾正字殷佐明魏縣尉劉茂括州錄事參軍盧
鐸江寧丞韋寧壽州倉曹朱弁後進周愿顏暄沈殷李蕭亦嘗同修未畢各以事去而起居郎裴郁祕書郎蔣志
評事呂渭魏理沈益劉全白沈仲昌攝御史陸向沈祖山周閔司議邱悌臨川令沈咸右衛兵曹張著兄謨弟薦
薦校書郎權器興平丞韋桓尼後進房夔崔密崔萬寶叔蒙裴繼姪男超峴愚子頌顧往來登歷時杼山大德僧
皎然工於文什惠達靈煨味於禪誦相與言曰昔廬山東林謝客有遺民之會襄陽南峴羊公流潤甫之詞况乎
茲山深邃羣士響集若無記述何以示將來乃左顧以求蒙俾記詞而葢事銘曰

夏侯南巡山名是因梁王東揆寺榜攸詢形勝天絕規模鼎新避它城古垂釣臺堙棚以桂結浦由黃申二
庾迢遞三癸嶙峋徑列御史傳紆逸人紛紛著書羣彥惠臻韻海鏡源自秋徂春編同貫魚學比成麟幸托勝引
亟倍僧珍庶斯見傳金石不泯

浪跡先生元真子張志和碑銘大歷九年

士有牢籠太虛機腋元造擺元氣而詞鋒首出軌無間而理窟肌分者其惟元真子乎元真子姓張氏本名龜齡東陽金華人父遊朝清真好道著南華象罔說十卷又著沖虛白馬非馬證八卷代莫知之母留氏夢楓生腹上因而誕焉年十六遊太學以明經擢第獻策肅宗深蒙賞重令翰林待詔授左金吾衛錄事參軍仍改名志和字子同尋復貶南浦尉經量移不願之任得還本貫既而親喪無復宦情遂扁舟垂綸逐三江泛五湖自謂烟波釣徒著十二卷凡三萬言號元真子遂以稱焉客或以其文論道縱橫謂之造化鼓吹京兆韋諷爲作內解元真又述太易十五卷凡二百六十有五卦以有無爲宗觀者以爲碧虛金骨兄浦陽尉鶴齡亦有文學恐元真浪跡不還乃於會稽東郭買地結茅齋以居之閉竹門十年不出吏人嘗呼爲掬河夫執畚就役曾無忤色又欲以大布爲褐裘服徐氏聞之手爲執纊一製十年方暑不解所居草堂椽柱皮節皆存而無斤斧之跡文士效柏梁體作歌者十餘人浙江東觀察使御史大夫陳公少遊聞而謁之坐必終日因表其所居曰元真坊又以門巷湫隘出錢買地以立閉閤旌曰迴軒巷仍命評事劉太真爲敍因賦柏梁之什文士詩以美之者十五人旣門隔流水十年無橋陳公遂爲剏造行者謂之大夫橋遂作告大夫橋文以謝之常以豹皮爲屐驪皮爲屨隱素木几酌斑螺盃鳴榔杖拏隨意取適垂釣去餌不在得魚肅宗嘗賜奴婢各一元真配爲夫婦名夫曰漁僮妻曰樵青人問其故曰漁僮使棒釣收綸蘆中鼓枻樵青使蘇蘭薪桂竹裏煎茶竟陵子陸羽校書郎裴修嘗詣問有何人往來答曰太虛作室而共居夜月爲燈以同照與四海諸公未嘗離別有何往來性好畫山水皆因酒醪乘興擊鼓吹笛或閉目或背面舞筆飛墨應節而成大歷九年秋八月訊真卿於湖州前御史李崱以縑帳請焉俄揮灑橫掃而纖纈霏拂亂搶而攢毫雷馳須臾之間千變萬化蓬壺髣髴而隱見天水微茫而昭合觀者如覩轟然愕眙

在坐六十餘人元真命各言爵里紀年名字第行於其下作兩句題目命酒以蕉葉書之援翰立成潛皆屬對舉席駭歎竟陵子因命畫工圖而次焉真卿以舴艋旣敝請命更之荅曰儻惠漁舟願以爲浮家泛宅沿沂江湖之上往來若響之間野夫之幸矣其談諧辨捷皆此類也然立性孤峻不可得而親疎率誠澹然人莫窺其喜愠視軒裳如草芥屏嗜欲若泥沙希跡乎大丈夫同符乎古作者莫可測也忽焉去我思德茲深曷以寘懷寄諸他山之石銘曰

逸元真超隱淪齊得喪甘賤貧泛湖海同光塵宅漁舟垂釣綸輔明主斯若人豈烟波終此身

元真子姓張名志和魯國公顏真卿與之友善真卿爲湖州刺史與門客會飲乃唱和爲漁父辭其首唱卽志和之詞真卿與陸鴻漸徐士衡李成矩共唱和二十五首遞相誇尙（續仙傳）

張志和字子同婺州金華人顏真卿爲湖州刺史志和來謁真卿以舟敝漏請更之志和曰願爲浮泛家宅往來若響間辨捷類如此（新唐書隱逸傳）

唐故通議大夫行薛王友國贈祕書少監國子祭酒太子少保顏君碑銘建中

元年七月

昔孔悝有彝鼎之銘陸機與祠堂之頌皆可以發揮祖德敷演家聲故君子之觀其銘也旣美其所稱又美其所爲無而稱之是誣也有而不述豈仁乎論而撰之敢不祇懼君諱惟貞字叔堅其先出於顓頊之孫祝融融孫安爲曹姓其裔邾武公名夷甫字顏子友別封郟爲小邾子遂以顏爲氏多仕顏爲卿大夫孔門達者七十二人顏氏有八戰國有率觸秦有芝貞漢有異肆安樂其後喪亂譜牒淪亡魏有裴威威字叔臺青徐二州刺史關內侯始自魯居於瑯琊臨沂孝悌里生廣陵太守給事中葛繹貞子諱欽字公若精韓詩禮易尙書學者宗之生

汝陰太守護軍襲葛繹子諱默字靜伯生晉侍中光祿大夫西平靖侯諱含字宏都隨元帝過江已下七葉葬在上元幕府山西生侍中光祿勳西平定侯諱鬣字君道事具孝行傳生州西曹騎都尉西平侯諱琳字文和生宣城太守御史中丞諱靖之字茂宗生巴陵太守度支校尉諱騰之字宏道善草隸書有風格梁武帝革書評云顏騰之賀道力並便尺牘少行於代生輔國江夏王參軍諱炳之字叔豹以能書稱生齊持書御史兼中丞諱見遠字見遠和帝被弑一慟而絕梁武深恨之事見梁周北齊書生梁鎮西記室參軍諱協字子和感家門事義不求聞達元帝著懷舊詩以傷之撰晉仙傳五篇日月災異圖兩卷文集二十卷見梁書非北齊給事黃門侍郎待詔文林館平原太守隋東宮學士諱之推字介著家訓二十篇冤魂志三卷證俗字音五卷文集三十卷事具本傳黃門兄之儀周御正御史國大夫麟趾學士隋文輔政不署矯詔索璽又拒之出爲集州刺史族野公後朝朔望引之御榻曰見危授命臨大節而不可奪古人所重何以加卿事具周書弟之善隋葉令子孫見於後黃門生皇秦王記室諱思魯愍楚遊秦小記室字孔歸君之曾祖也隋司經校書東宮學士率子弟奉迎義旗於長春宮招瓜州拜儀同博學善屬文自爲父集序國史稱溫大雅在隋與思魯同事東宮彥博與愍楚同直內史省彥博時與遊秦同典校祕閣二家兄弟各爲一時人物之選少時學業顏氏爲優其後職位溫氏爲盛溫氏譜亦載焉生勤禮字敬君之祖也幼而朗悟識量遠工於篆籀尤精詁訓解褐校書郎與兩兄弟師古相時同時爲宏文崇賢學士弟育德又於司經校定經史當代榮之太宗嘗令師古讚崇賢學士以兄弟特命蕭鈞讚之曰依仁服義懷文守一履道自居下帷終日德彰素里行成闈室鶴鑰馳譽龍樓委質著作郎例國史夔府長史贈虢州刺史生昭甫敬仲殆庶無恤少連務滋辟強昭甫字周卿君之父也幼而穎悟尤明詁訓工篆籀草隸書與內弟殷仲容齊名而勁利過之特爲伯父師古所賞重每著述必命參定嘗得古鼎二十餘字舉朝莫識盡能讀之高宗侍讀曹王屬贈華州刺史眞卿表謝肅宗批答卿之乃祖嘗爲碩儒旣高倚相之能遂有戒孫之後不墜其業在卿之

門生我伯父諱元孫臬君伯父聰穎絕倫尤工文翰舉進士考功郎劉奇特標榜之由是名動海內累遷太子舍人元宗監國專掌令畫嘗和遊苑詩批云孔門稱哲宋室聞賢翰墨云捷莫之與先歷滌沂濠三州刺史贈祕書監君仁孝友悌少孤育舅殷仲容氏蒙教筆法家貧無紙筆與兄以黃土掃壁木石畫而習之故特以草隸擅名天授元年糊名考試判入高等以親累授衢州參軍與盈州令楊炯信安尉桓彥範相得甚歡又選授洛州溫縣永昌二尉每選皆判入高科侍郎蘇味道以所試示介衆曰選人中乃有如此書判嗟歎久之遂代兄爲長安尉太子文學以清白五爲察訪使魏奉古等所薦五郎初開感選僚屬拜薛王友柱國伯姊御史大夫張知泰妻魯郡夫人亡將葬數家占君不利臨壙君哭而拒之曰豈有亡手足之痛牽拘忌而忍自絕乎弗從其年七月才生明遺疾而歿教義者隱而傷焉與會稽賀知章陳郡殷踐猷吳郡陸象先上谷寇泚河南源光裕博陵崔瓌友善事具陸據所撰神道碑累贈祕書少監國子祭酒太子少保眞卿表謝肅宗批答云卿之先人德行優著學精百氏藝絕六書頻擢甲科屢升循政曳裾王府名右鄒枚載筆春宮道高徐阮旣而壽乖華髮器紆青雲業載史臣慶傳令子追存盛美褒贈崇班且旌善於義方俾揚名於有後濠州生春卿臬卿曜卿旭卿茂會春卿工詞翰倜儻有吏才蘇頲舉茂才偃師丞臬卿文理清峻所居有聲太常丞攝常山太守祿山反擒其心手開土門拜衛尉卿兼中丞城陷臬卿叱詈之遂被鉤舌支解而終贈太子太保諡曰忠節眞卿表謝肅宗批答云自羯胡猖狂入我河縣所在官吏多受迫脇卿兄以人臣大節獨制橫流或俘其謀主或斬其元惡當以救兵懸絕身陷賊廷旁若無人歷數其罪手足寄於鋒刃忠義形於顏色古所未有朕甚嘉之曜卿工詩書草隸十五以文學直崇文館淄川司馬旭卿善草書允山令茂會好屬文詁訓仁厚絕衆健爲司馬君生闕疑允南喬卿眞長幼與眞卿允臧闕疑仁孝有吏能精詩傳善剖判杭州參軍允南仁孝有清識工詩人多誦其佳句善草隸與春卿臬卿曜同日於銓庭爲侍郎席建侯所賞達奚珣荐爲左補闕眞卿時爲殿中正至三拱法座舞蹈而衣袂相接者三故允南

賦詩云誰言百人會兄弟也霑陪歷殿中膳部司封郎中國子司業金鄉男喬卿仁和有吏幹富平尉眞長清直
早世幼輿方雅有醞藉通班漢左清道率府兵曹眞卿早孤蒙伯父泉允南親自教誨舉進士歷校書制舉醴泉
尉陟清白長安尉三院御史四爲大夫六爲尙書再爲採訪節度充禮儀使光祿大夫魯郡公允臧敦質孝悌有
吏能制舉延昌令監察充朔方衣資使殿中三爲侍御史中允江陵少尹荆南行軍濠州及君孫泉明佐開土門
彭州司馬威明卬州司馬季明子幹沛翊頗誕及外孫博野尉沈盈盧逖並爲逆胡所害各蒙贈五品京官濬好
屬文翹華正頤慈明都水使者頤好五言校書頤仁孝方正明經大理司直嶺南營田判官執喪九日不食頤河
陽尉顥鳳翔參軍頤工小楷洗馬頤恭仁奉禮郎並早喪逝紘方義主簿泉觀並沒蠻襲明微明明德未仕通明
獲嘉尉將明昌明尉克明崇文明經衛密標榜之翽有德行文詞華原主簿準溧水尉顥頗工文襄陽尉觀有文
行宏文進士顥仁友清白常熟令封金鄉男頤清介勤學侍郎蔣冽賞其判京兆兵曹襲金鄉男岫仁純常熟主
簿任城男頥浚儀尉頤清源尉頂幹辨揚府法曹頤長厚清白朝邑尉頤左率倉曹碩祕書正字頤有吏幹歙州
錄事參軍曲阜男頤好爲詩富陽尉禹好友爲文常州參軍並粗有所立君之諸祖父羣從陽庭頤並侍讀強學
益期並學士中和至誠敬仲大智溫之微之摺挺援撰溫泳陵並明經康成強學希莊日損隱朝隣幾知微
舒說順勝式宣韶並進士制舉有意中和趨庭希莊至刺史利仁明天文欣期元淑景靈並校書光庭注後漢書
嘉賓千里昇庠匡朝怡滔渾允濟摺逸靚不器防有文詞博古少連恭敏惇學行敬仲溫之以孝聞潤行風義晃
鱗邈迢以清白稱其餘咸著官族不獲悉數洪惟累祖之耿光丕業有若子泉宏都之德行巴陵記室之書翰特
進黃門之文章祕監華州之學識肇自魯國格於勝代紛綸盛美遂舉集於君君能遵前人不致失墜其志事以
忝筆修宜其克饗尊榮爲清廟不祧之主眞卿幸承遺訓叨愛國恩旣受無疆之祿敢揚不朽之烈銘曰

系我宗邾顏公子封鄆魯附庸亞孔堊浴沂風刺青徐給事中護營柳渡江楓侍兄疾感地童鄰火斷珥貂

重施七葉傳孝恭武騎都尉司從便尺牘繼魚蟲慟君難憤而終咨記室遊湘東嗟御正稟移忠梟黃門擅文雄
三韶長事東宮四穆叔史牢籠褒華州詰訓通小祕監威名鴻維少保文翰工莅畿赤五褒崇登堊苑友桂叢三
超贈保儲宮流光感廟貌融永不祧垂無窮

神道碑銘一

河南府參軍贈祕書丞郭君神道碑銘天寶九載五月

夫駢驥千里之足踣於庭唐之內鴻鵠四海之志儕於墜溲之羽（一本儕作輟）此個儻奇偉之士所爲歎息者也取之於人在於郭君矣君諱揆字良宰太原人也郭本號叔之後春秋臬漢細侯得政事之美有道冠人倫之目素絲作詠青溪招隱信爲多士宜稱威族五代祖昶隋驃騎大將軍開府儀同三司高祖澄皇朝朔方道大總管涇鄜坊慶丹延夏七州刺史贈荊州都督諡曰忠會祖某朝散大夫太子洗馬祖義朝議大夫贈鄭州刺史父虛已銀青光祿大夫守工部尚書兼御史大夫蜀郡大都督府長史持節充劍南節度支度營田副大使本道并山南西道採訪處置使上柱國贈太子太師諡曰獻君生而聰明不爲戲弄之事長而清峻罔雜綺紈之流辯對則江夏之童志意則山東之妙大夫府君以其于氏之出故幼名封奴嘉有應榜之器故長字良宰蓋取待封宰創之義也觀其言必顧行動必由禮讀書不取其糟粕爲仁罕忘於造次亦足以保其嘉名楚之正則漢之臺卿乃其比也年十七崇文生明經及第侍郎韋陟揚言於朝稱其稽古之力許其青冥之價後調集侍郎取彭年嗟君所判足冠後生擢才子於公庭賀大夫於私第美聲洋溢時莫與京授太常寺六祝加敬蒞事陳信正辭每巡陵及郊必有歌詠潘河陽藉田之賦顏光祿明祀之作復見前賢之致矣無何改授河南府參軍天寶五載大夫總渡瀘之師緊君奉循陔之養南中污下遂得氣疾先大夫憐其寢劇命訪秦醫太夫人懼其不起繼自蜀至何神不禱靡藥不嘗依親自強望父增歎以天寶八載二月十八日終於安興之私第時年二十四皇帝聞而悼之贈祕書丞嗚呼斯人不起子丕未識亦可爲長慟者矣君子曰夫孝弟之至絜矩之道文章之絕周旋之

儀可謂成人矣方將培雄風罩白石憐乎得二幾乎第一是以其疾卽御醫坐門其亡卽天使歸贈陳師境上推以雨露之私修文地下贈以蓬萊之職弔客多其文行操誅盡於作者以五月二十一日葬於首陽山大塋之側君志也先大夫懿其天姿親疏行狀敘其參元之美歎其老成之風方崇南峴之碑以慰西門之感伏浴受遇爲人父也若斯祈奚至公其知子也如此斯文未建頽山遂及太夫人東海于氏凌虜墜翼開緘悼心望汝絕歸來之期抱孫有無時之哭遂成刊刻之意以寄零落之哀銘曰

粲粲門子菲菲國香家傳玉樹人詠金相風流小褚才貌潘郎一經自達六義名揚聞於密啓寘此周行爲子道備從親路長旣銘絕壁亦奉垂堂霧露成病膏盲遂亡天向京兆墳歸洛陽江堙初流水毀寒霜茫茫蔓草蕭蕭白楊苦月墳上豐碑道傍披文相質誰不沾裳

祕書省著作郎夔州都督長史上護軍顏公神道碑乾元二年

君諱勤禮字敬琅瑯沂人高祖諱見遠齊御史中丞梁武帝受禪不食數日一慟而絕事見梁齊周書會祖諱協梁湘東王記室參軍文學有傳祖諱之推北齊給事黃門侍郎隋東宮學士齊書有傳始自南人北今爲京兆長安人父諱思魯博學善屬文尤工詁訓任隋司經局校書東宮學士長寧王侍讀與沛國劉臻辯論經義臻屢屈焉學書黃門傳集序君自作後加踰岷將軍太宗爲秦王精選僚屬拜記室參軍加儀同娶御正中大夫殷英童女英童集呼顏郎是也更唱者二十餘首温大雅傳云初君在隋與大雅俱仕東宮弟愍楚與彥博同直內史省愍楚弟遊秦與彥將俱典祕閣二家兄弟各爲一時人物之選少時學業顏氏爲優其後職位温氏爲盛事具國史君幼而朗悟識量宏遠工於篆籀尤精詁訓祕閣司經史籍多所刊定義寧元年十一月後太平京城授朝散大夫勳解褐祕書省校書郎武德中授右領左右府鎧曹參軍九年十一月授輕車都尉兼直祕書省貞

觀三年六月兼行雍州參軍事六年七月授佐郎七年六月授詹事主簿轉太子直監加崇賢館學士官廢出補
 蔣王文學宏文館學士永徽元年三月制曰君學藝優敏宜加獎擢拜陳王屬學士如故遷曹王友無何拜秘書
 省著作郎君與兄秘書監師古禮部侍郎相時齊名祕監與君同時爲崇賢宏文館學士禮部爲天策府學士弟
 太子通事舍人育德又奉令於司經局校定經史太宗嘗圖畫崇賢諸文學士命祕監爲讚以君祕監兄弟不宜
 相褻述乃命中書舍人蕭鈞特讚君曰依仁服義懷文守一履道白居下帷終日德彰素里行成蘭室鶴鑰馳譽
 龍樓委質當代榮之六年以後夫人兄中書令柳奭金累貶夔州都督府長史顯慶六年加上護軍君安時處順
 恬無愠色不幸遇疾傾逝於府之官舍旣而歸窆於京城東南萬年縣寧安鄉之鳳栖原先夫人陳郡殷氏臬柳
 夫人同合祔焉禮也七子昭甫晉王曹王侍讀贈華州刺史事具眞卿所撰神道碑敬仲吏部郎中事具劉子元
 神道碑殆庶無恤辟非少連務滋皆有學行以柳令外甥不得仕進孫元孫舉進士考功員外劉奇特標榜之名
 動海內從調以書判入高等者三累遷太子舍人屬元宗監國專掌令畫滌沂濠三州刺史贈祕書監惟貞頻以
 書判入高等歷畿赤尉丞太子文學薛王友贈國子祭酒太子少保德業具陸樣神道碑會宗襄州參軍考楚州
 司馬澄左衛翊衛潤個儻涪城尉會孫春卿工詞翰有風義明經拔萃犀浦蜀二縣尉故相國蘇頌舉茂才又爲
 張敬宗劍南節度判官偃師丞杲卿忠烈有清議吏幹累遷太常丞攝常山太守殺逆賊安祿山將李欽湊開土
 門擒其心手何千年高邈遷衛尉卿兼御史中丞城守陷賊東京遇害楚毒慘下詔言不絕贈太子太保諡曰忠
 節曜卿工詩書草隸十六以詞學直崇文館淄川司馬旭卿善草允山令茂會訥言敏行頗工篆籀捷爲司馬闕
 疑仁孝善詩春秋杭州參軍允南工詩人皆諷誦之善草隸書判頻入等第歷左補闕殿中侍御史三爲郎官國
 子司業金鄉男喬卿仁厚有吏材富平尉眞長耿介舉明經幼與敦雅蘊藉通班漢書左清道率府兵曹眞卿舉
 進士校書郎舉文詞秀逸醴泉尉黜陟使玉鉉以清白名聞七爲憲言九爲省官涪爲節度採訪觀察使魯郡公

允臧敦實有吏能舉縣令宰廷昌四爲御史充太尉郭子儀判官江陵少尹荆南行軍司馬長卿晉卿邠充國衛多無祿早世名卿僧倜偁並爲武官元孫紘通義尉沒於蠻泉明孝義有吏道又開土門佐其謀彭州司馬威明印州司馬季明子幹沛翊泉明男誕及君外曾孫沈盈盧遜並爲逆賊所害俱蒙贈五品京官濬好屬文翹華正頴並早天頴好至言校書郎 頴見後當是頴之誤家廟碑云頴好五言校書 頴仁孝方正明經大理司直充張萬頃嶺南營田判官顓鳳翔參軍頴通悟頗善隸書太子洗馬鄭王府司馬（鄭王上闕一字）並不幸短命通明好屬文項城尉翹溫江丞觀縣州參軍觀鹽亭尉顓仁和有故理蓬州長史慈明仁順幹蠱都水使者頴介直河南府法曹頴奉禮郎頴江陵參軍頴當陽主簿頴河中參軍項衛尉主簿頴左千牛頴頴並京兆參軍頴須頴並童稚未仕自黃門御正至君父叔兄弟衆子姪揚庭益期昭甫強學十三人四世爲學士侍讀事見柳芳續卓絕殷寅著姓略少監少保以德行詞翰爲天下所推春卿臬卿曜卿允南而下泉君之羣從光庭千里康成希莊日損隱朝匡朝昇座恭敏鄰幾元淑溫之舒說順勝怡渾允濟挺式宣詔等多以名德著述學業文翰交暎儒林故當代謂之學家非夫君之積德累仁貽謀有則何以流光末裔錫美盛時小子眞卿聿修是忝嬰孩集慕不及過庭之訓晚暮論譟莫追長老之口故君之德美多恨闕遺銘曰（銘闕）

攝常山郡太守衛尉卿兼御史中丞贈太子太保諡忠節京兆顏公神道碑銘

乾元二年正月

公諱臬卿字昕京兆長安人也北齊黃門侍郎諱之推之來孫隋太子校書東宮學士皇朝秦王府記室參軍諱思魯之元孫著作郎崇賢宏文館學士贈虢州刺史諱勒禮之曾孫高宗晉邸侍讀曹玉屬贈華州刺史諱昭甫之孫濠州刺史贈祕書監諱元孫之第二子也公方正精敏有清識周旋有則進止閑詳起家江州司法轉

遂州嘗爲刺史所責公守正不爲之屈時人稱之遷鄭州司兵開元與兄春卿弟曜卿從父弟允南俱從調吏部皆以書判起等同日於銓庭爲侍郎席建侯所賞翰林拭目焉擢授魏郡錄事參軍當官正色舉劾無所迴避採訪使張守珪以清白聞遷范陽郡戶曹安祿山雅聞其名奏爲營田判官光祿太常二寺丞又請爲節支判官兼攝常山郡太守天寶十四載冬十一月祿山反范陽至稿城公與長史袁履謙同謁乃矯授公紫履謙緋因令崇州刺史李欽湊以兵七千人守土門公罷歸途中指章服諷履謙曰與公受他此色如何履謙亦感激之士遂與公定謀翻之恐事洩潛使男安平尉泉明往來計議又使西通王承業北結賈循循敗族滅屬祿山使其心手高邈往范陽公使姪壻稿城尉崔安石密伺其歸以圖之冬十二月二十日以私號召欽湊未至會祿山害東京留守李愷中丞盧奕判官蔣清傳首脇並海諸郡前二日眞卿以平原太守斬其使令外甥盧逖以購祿山救送於饒陽常山後二日逖至公悲喜不自勝猶未敢宣示其夕欽湊至公俾參軍孝峻馮虔靈壽尉李栖默泉土人翟進玉縋於城南門密令驪長蔡行儀醉以酒而斬之履謙入告公與相持而泣喜其事之集也遂使峻栖默開土門又斬其副使潘惟慎是夜高邈迴宿浦城公命馮虔翟進玉崔安石馳捕邈繫其肘而縛之虔領赴郡俄頃醴泉驛候驗報何千年發趙郡安石以進玉馳襲而擒之如高邈遂給以榮王琬哥舒翰官軍二十萬入土門告於列郡遂使郭仲邕詳爲先鋒以中官領御騎六十徇以南諸郡於是趙郡殺賊刺史馬道貞鉅鹿殺劉恆廣平殺郭子昂曲州殺清河太守崔審交皆以其首至先是眞卿守平原而僂陽前聞景城樂安博平清河七郡皆相與拒賊至是博陵上谷文安信都鉅鹿廣平魏趙鄴與常山十郡皆卻爲國家守乃使張通幽以兄通儒相賊乞隨泉明以自雪至文原與尹王承業同惡竊爲己功留泉明等不遣承業從弟隨中官入奏皆蒙詔莫拜公衛尉卿兼御史中丞追赴京以履謙爲太守深爲司馬泉明爲左金吾兵曹制書未至春正月賊使平盧兵馬使史思明寇諸郡思明旣來攻六日城平糧井皆竭遂爲賊所陷男季明外甥盧逖皆遇賊遂以公履謙至東京祿山讓公

曰我擢汝爲太守何負於汝而乃反乎公曰吾代受國恩官職皆天子所與汝叨受恩寵乃敢悖逆吾寧負汝豈負本朝乎臊羯胡狗何不速殺我乃繫公於天津橋南柱令割肉以自噉公詢置不已遂鉤以斷舌問更敢爾否公猶感氣含胡以應之還被文解而終觀者痛心焉楊國忠受通幽詭說賈深又不證明竟不蒙恤問乾元元年夏五月二十八日肅宗乃追贈太子太保子姪爲賊所害者八人孫誕姪詡（詡當從家廟勤禮二碑作翊杲卿之孫從言旁名誕其姪不應亦從言旁蓋杲卿姪有名翹翹翹者其名從羽旁也）先質於賊皆被鋸殺至是贈季明詡左右贊善誕義王諮議姪子幹都水使者沛尚食奉御頗洗馬遜鄭王友從父甥博野尉（遜上脫盧字）沈盈大理正封夫人崔氏清河郡太夫人授泉明鄆縣令男威明太僕丞姪男翹漢州司馬孫證左內倉曹訊兵曹諡公忠節從父弟國子司業允南洎真卿表謝蒙批答曰自逆胡猖狂入我河縣所在官吏多所迫脇卿兄以人臣大節獨制橫流或俘其謀主或斬其元惡當以援兵懸絕身陷賊庭旁若無人歷數其罪手足富於鋒刃忠節形於顏色古所未有朕甚嘉之盛烈旣冠於當時寵名宜及於泉壤初公被懸首於右金吾街樹有張湊者哀其髮收謁元宗俄見夢云禦捍處多兵馬少元宗哭而設祭焉後湊以髮至夫人疑之憑牀而哭忽聞聲如鞭牀者發箱跳而前夫人方駭信之明年春正月葬於京城鳳棲原先塋西北禮也昔七代祖中丞府君慟絕於梁武五代伯祖御正府君抗壘於隋文而公精貫白日義形宗社今又繼之爲不隕矣嗚呼公與真卿偕陷賊境懸隔千里稟義莫由天難忱斯小子不死而公死痛矣哉銘曰

太保烈烈抗茲忠節殉國義形見危身殺元宗杖信售詐凶羯寵極災披稱兵向闕河朔鼎沸潼關晝閉天下寒心王旒若贅虵豕十萬萃如霜雪公以眇身毅然奮發逆黨株送土門披挾人知効忠國用不軌恩寵三座榮加九列王命未臨孤城已滅身懸鋒刃口置不絕先聖感忠保儲贈揭刻諸金石表慕綴遠莫致之留斯江澁日月有旣微猷無缺

正議大夫行國子司業上柱國金鄉縣開國男顏府君神道碑銘寶應元年

君諱允南字去惑京兆長安人也高宗侍讀贈華州刺史昭甫府君之孫薛王友贈太子少保惟貞府君之第二子也少以詞藻擅名兼工草隸書尤善五言詩深爲伯父濠州刺史元孫府君之所賞愛開元十五年以挽郎選糊名考判入高第授鶉觚尉後與從父兄春卿杲卿曜卿調集皆爲吏部侍郎席建侯所賞重時論榮之尋授右武衛兵曹二十六年丁內憂以毀聞服闋轉右領軍錄事參軍從祖姑子劉同昇齊名長又相善嘗寓書與之中書舍人孫逖見而驚歎曰古人之作尋爲同昇江南經略判官遷大理評事從調吏部侍郎達奚珣以書判超等薦爲朝廷左補闕元宗嘗撰華嶽碑并書天寶九載令御史大夫王鉷打百本以賜朝臣家獲二本者四族而君以兩省官弟真卿以殿中侍御史居其一焉每正至朝賀宰相以下登殿者不過三十人而君與真卿王鉷法服於含元殿踏舞而衣接焉朝覲宴集必同行列故君賦詩云誰言百人會兄弟皆露陪與諫議大夫鄭審郎中祁賢之每應制及朝廷唱和必警絕佳對人人稱說之俄遷殿中侍御史以忤楊國忠貶襄陽丞移河東司戶京兆士曹十五年長安陷輿駕幸蜀朝官多出駱谷至興道房瑄李煜高適等數十人盡在中丞田良邱爲哥舒翰行軍司馬旣敗猶自振矜因誦表云翰北行師未嘗挫衄蓋緣運數潛迫人神同棄職之人故匪翰之由衆皆默然君獨抗聲叱之曰公何得尙爲賊說徵祥乎暄等因欲毆擊魏仲犀與之同罪遜詞引去不敢枝梧一座皆壯之恩詔召拜尙書屯田員外郎加朝散大夫遷司膳郎中真卿至自河北元宗給君驛至鳳翔令相見從肅宗宗入西京遷司封真卿以尙書兼大夫弟允臧又爲殿中兄弟三人同時臺省當代無比時人欽羨焉尋封金鄉開國男累加正議大夫上柱國遷國子司業寶應元年冬十一月真卿自利州蒙召至上都君遇疾已革（闕）而泣曰吾忍得見汝因哽咽不自勝其十日傾逝於私第享年六十九嗚呼明日庚申葬於萬年縣鳳棲原先塋

之北祔也。二子穎頰皆好爲五言詩。眞卿使頰奏事彭原。上文章蒙擢校書郎。早卒。穎簡直潔已。以左衛兵曹選爲侍郎。崔器所賞。累授河南府士曹。噫君幼而聰明長而美秀。仁恕形於造次。精識冠於當時。善與人交。篤於僚友。故父執侍郎寇公泚相國陸公象先尙書韋陟陸公景融重君才名。相見未嘗不移日也。相國房瑄尙書韋陟張倚皆篤忘年之契。河南陸據彭城劉鍊劉秩隴西李揆河東裴士淹特敦莫逆之歡。河東敬括隴西李華李涵范陽盧允昇靈常僚之好。非夫親仁誠物。泛愛虛己。則何以廣而能周。久而益敬者矣。家常有折脛鶴。初眞卿小年時戲書其背。吾切責曰。此雖不能奮飛。竟不惜其毛羽。奚不仁之甚歟。其惻隱者如此。眞卿終身志之於戲。以君之才之美之德之義。方當翼亮盛時。儀型宗國。道之祝喪頓我。遠圖悲乎痛哉。眞卿孩而不夭。太夫人蘭陵郡太夫人殷氏親自鞠育。實賴其教導。茲有成至。若發慮學文之親立身復禮之道。非仁兄之規誨曷暨所蒙。且有師訓之資。豈惟孔懷之戚。布哀金石未究萬分銘曰。

莊嶽熊渾清沂駿奔英靈孕育生我仲昆維我仲昆邦家之藩孝仁是履愷悌是惇清識冰澈韶儀玉溫詞華藻絢翰墨雲繁通究理體精詳政源爰初發跡屢振瑤琨尉邑何陋評廷不寃衮衣補闕繡服榮敦神州列據會府掌屯司膳王封廻薄飛鸞乃佐教胄載光儒門未登鼎鼐奄謝鴻鸞伊昔不造實賴能存下光花萼上潔晨殮微君教導曷惠拯援今旣絕矣哀摧忍言何以寘懷勒銘弗諼垂諸來裔翼子謀孫

和政公主神道碑廣德二年八月

詩美下降傳書築館貴其中禮載籍稱焉漢魏已還寂寥罕嗣以蕩陵德則維其常皇唐勃興王道丕變平陽起娘子之軍於司竹襄城行匹庶之禮於宋公常樂糾匡復之師於武后皆前古之所有其或生知禮樂周旋法度躬行婦道以懋大倫克順天經光照懿烈名言之所莫究書記之所未聞聚衆美於一身鄰太虛而獨立者

其唯和政公主乎公王姓李氏隴西成紀人皇唐元宗至道大聖大明孝皇帝之孫肅宗文明武德大聖大宣孝皇帝之第三女帝女之崇於斯爲盛今天子之同母妹也母曰章敬皇太后后之在襁褓也后父贈太尉吳君曰令珪嘗遊官蜀中使道士勾規占之驚起曰此女貴不可言是生二子男爲人君女爲公主嫁於柳氏其後竟配肅宗生今上及公主神所命也厥惟舊哉公主三歲而孤卽能孺慕育於儲妃韋氏純孝過人幼而聰慧長而韶敏穠華秀整令德芬馨婉嫵發於天姿肅雍形於鑿寐奉今上以悌道事韋如所生繇是特爲肅宗之所賞愛至若左右圖史開示佛經金石絲竹之音績畫工巧之事耳目之所聞見心靈之所領略莫不一覽懸解終身不忘天寶九載春三月旣望封和政公主降於河東柳潭旣笄之三載矣潭周太保敏之五代孫皇蘄州刺史懷素之曾孫贈祕書監岑之第四子衣冠地胃輝映當朝初以美秀承家中以名聲華國道勝而貴能下善謙尊而休有烈光士林偉之解褐左內率府曹曹轉潁王府戶曹陳留郡司功參軍以人門第一選尙公主拜太子洗馬亦旣好合雅相敬貴雖柳侯秉彝有度能降帝女之心而公主率履由衷每抗古人之節故宗族胥睦不獨親其親先後大同莫敢私其子伯姒宏農楊氏太眞姊務華采公主服無金翠之飾居有冰雪之容每至朔月六參朝天旅進嫋然班斂之內迥出神仙之表亦非希企之所及也息凶羯亂常潼關不守元宗宰蜀妃后駿奔姊曰寧國公主霜發屏居誰或訃告乃棄其三子取其夫之乘以乘之柳侯徒行公主愧焉下而同趨者日且百里每臻坎險必先濟寧國而後從之柳侯辭公主曰我若先涉脫有危急不能俱全則棄我姊矣柳侯感歎躬負薪之役公主怡然親饋餼之事竭力供侍潭兄澄之妻楊貴妃之姊也貴倖前朝勢傾天下公主交無詔黷思未綢繆楊且云亡以孤見託馬嵬之役無噍類焉感其一言悉力營贍男登服冕之泣女獲乘龍之匹出入存恤過於己子雖其密親罔或能恃柳之親昵伯仲姑姊隱覲將迎唯恐不至糾逖疏屬撫循惇慤繇內及外終始如一孤窮滿目榮悴殊倫居薄推厚未嘗懈倦衣服飲食等無有差互或未周嬰孩罔及每至伏臘杓祠蒸嘗必具禮衣花釵之飾

以躬中饋堂室之奠豈無婢使式燕孫謀妾性純儉不以迄成先聖休之寶書清問秋八月元宗至蜀仍舊邑而册公主以潭爲駙馬都尉銀青光祿大夫太僕卿屬狂將興禍稱兵向闕元宗親御闔閭臨視誅討駙馬率領家暨折衝張義童等鬪於門中公主及寧國穀弓迭進駙馬乘勝突刃所向無前斬馘擒生殆逾五十節使時幸具以表聞元宗自繫誥示先帝懇讓莫當策勳遂寢今上之爲元帥也躬擐甲胄率先將卒舉兩京若拾遺摧凶寇如振槁斃旋方及弩藏其空公主賢遷有無億則屢中(闕)羸優而數逾千萬懼不給悉昇縣官論者難之肅宗彌留衆皆迭侍主獨瞻奉不已於旁帝有閒靈而謂之曰汝之純孝乃能至是遂賚莊一區帝愛季女曰寶章公主因奏曰八妹未有請以賜之泣而諫焉哀動左右西陵遷窆上戒主曰凡厥親身之物必誠必信勿之悔焉主罄家有無以邑入千萬潛羨經費上深感歎焉上既宅亮陰未忍臨政人之疾苦事之得失豈嘗私謁動必以聞上敬異之朝廷賴焉廣德元年冬上既東幸主志期扈蹕廻兵充斥咫尺不通因至荆南尉薦諸將方隅載謚職貢以修主有力焉上之在陝憂主匱乏乃命中使屢敕節度及轉運使隨主所須務必肅給主以國用空罄退而歎曰吾方竭家財以資戰士其能饜餐首冒國經唯請名香數斤賦於佛寺爲主祈福而已王公戚屬相攜而至者藍縷賦囊襁負鱗次竭其(闕)斧親自瞻恤聚而泣之悲感行路初次商於頓於傳置羣盜蟬起奄譁驛亭呼而犒之曉以禍福一言革面願比家人之死靡他至今猶在緬惟罔極無所眞哀從母薛氏遺孤數四分宅居之皆俾成立萊莘兄弟盡列通班二女有行克配良士主之慈忠悉皆若是親臨稼穡躬儉節用不憚煩縟雅好組紉駙馬裳衣必親裁紵爰及子女罔衣綺紈綻新皆成主手每加訓誨蠢迪檢押廣德二載春二月歸於上都諸主高會議際夫黨覲其親族多曠周旋咸以爲時經百懼粗略可也主抗詞曰女之移天遂成他族怙貴長傲何以律人上方理定聞必不悅諸主蹙然競崇討習禮之降殺親之薄厚翕然一變職主之由夏六月才生魄屬邊候不謹烽及京師城中震驚圍視無色主既彌月體未甚安曰事亟矣其入言之駙馬請問主曰吾業已行矣

駙馬獨無兄乎因乘檐子直至寢殿乃悉索闕遺備陳利病以奏之上欣然嘉納所言未究傍或員來因爾退歸遲明誕育展轉悵惘不能弭忘時屬炎暍熱疾有加聖情憂軫起坐失次天醫內官相繼旁午彼蒼不惠以其月二十有五日辛卯薨於常樂坊之私第春秋三十有六嗚呼皇上友愛天深痛毒兼至嗟然一叫聲淚俱咽哀動木石豈伊人倫漣漣孔懷如失於臂曰余此妹國之鴻寶方期（闕）云如何瘴祝降時喪天實爲之胡寧忍予乃輟朝三日命京兆尹監護喪事一以官供務從優厚柳侯摺膺永悼氣索神傷心苦而忽然忘生泣盡而繼之以血况乎五男三女或薨或孩呼阿母而哭無常聲籲昊天而仁覆永絕哺以滋旨嗍而莫就其爲酷痛曷愈於斯以是思哀哀可知矣自朝及野知與不知聞之失聲罔不震悼棧有青牛素服轆轤主之薨也踣地哀鳴仰天層淚三日不銖畜猶若是臣僕可知主之將薨馭馬先殞捐館之夕見夢別墅乘之周麾偏勞愁遺俾屏不逮田客儻從數騎久已云亡衆皆驚起髣髴猶見雖所憑則厚而精氣何多主於駙馬大義敦肅不恃倪天之貴每極家人之禮駙馬雅性夷簡恬於名利願究衛生之經庶臻久視之道主志深婉順始慕真宗故於他時並受法籙嘗謂之曰易崇積善詩貴起予不以忠孝數事迭相告勸者則心有懍焉率而行之曷嘗廢墜又以爲死生恆理先後之間若幸啓手足必當襚我以道服瘞我於支提往來行言時見存恤則所懷足矣予若不諱我若沒身未亡灑掃塋隴出入窻窰奉君周旋噫嘻於斯之時以爲謗浪豈悟今者皆符昔言有司奉詔將厚其禮駙馬疏陳皆蒙允許粵以秋八月十九日甲申泉其男試太常少卿賜紫金魚袋晟鴻臚少卿暈試祕書丞賜紫金魚袋杲試殿中丞昱泉子三女等虔窆公主於萬年縣義豐之祠人原從理命也於戲風詠歌衣史稱彤管纖微之善載籍猶稱况乎七葉帝女分形歸妹貴能上下忠以導躬備德言容功之美服女師母儀之訓訂之繇古孰與我京昔馬遷著記謂之實錄有道見述亦云無愧某學於舊史少識前載歷考長代歧彼（疑）之盛未有如公主者焉雖壺則家風每挹如賓之敬而勤崇垂懿敢忘傳信之辭銘曰

穠矣公主元元之緒聖皇之孫肅宗之女今上之妹生人之矩德言容功義仁孝忠溫良恭儉敬讓宏通率履弗越高明有融下嫁於柳猗那自久金石著明琴瑟斯友家道以正人倫斯厚鳳凰于飛梧桐是依唯唯喑喑福祿攸歸和樂旣孺德音莫違麟之趾定振振子姓方紹母師奄摧邦令一人痛毒九有違詠詔葬於河銅人之阿支提鬱起宰樹誰過空餘好合來往滂沱

案公主封號本作和政見唐書公主列傳而何氏語林趙氏因話錄江氏筆錄皆誤作政和

唐故開府儀同三司太尉兼侍中河南副元帥都督河南淮南淮西荆南山南東道五節度行營事東都留守上柱國贈太保臨淮武穆王李公神道

碑銘廣德二年十一月

昔宗周之中興也時則有若方叔召虎總師千肇敏之業南威蠻荆東截淮浦以左右宣王詩人歌之列在風雅我皇唐之反正也時則有若臨淮汾陽秉文武忠義之姿廓清河朔保乂王室翼戴三聖天下之人謂之李郭異代同德今古一時公諱光弼京兆萬年人也曾祖皇左威衛大將軍幽州經略軍副使府君諱令節祖鴻臚卿兼檀州刺史府君諱重英父雲麾將軍左領左羽林二軍大將軍朔方節度副使薊郡開國公幽州都督司空諱楷洛皆以英果沈勇累葉將邊懽威稜於幽碣公卽薊國公之第四子也體渾元之正性秉宏毅之高躡天子純嘏生知禮度謨謀炳燭遠默識沖深傑出經武之才鬱爲興王之佐故能東征北伐厭難康屯挺草昧不世之功元蒼生具瞻之望社稷威寶公之謂歟初天后萬歲中大將軍燕國公武楷固爲國大將威震北陲有女曰韓國夫人人才淑冠族嘗鑒之曰爾後必生公侯之子因擇薊公配焉後果生公公年六歲嘗撫鹿而遊薊公視而誨

之曰兒勿更爾公振手而起遂絕不爲童戲未冠以將門子工於騎射能讀左氏春秋兼該太史公班固之學開元中起家左衛左郎將歷豐下二都督府長史尋遷別駕加朝散大夫丁父憂以毀聞終喪不入妻室太夫人高明整肅有慈有威公下氣怡聲承順而每竭其力雖已官達小不如意猶加譙讓之責故能濟其勳業天寶二年拜寧朔郡太守四載加左清道率安北都護仍充朔方行軍都虞候五載充王忠嗣河西節度兵馬使加遊騎將軍守右領軍賜紫金魚袋仍充赤水軍使八月襲封薊郡開國公八載遷右金吾衛將軍充節度副使以破吐蕃及招討吐谷渾加雲麾將軍左武衛大將軍十一載拜單于副都護十三載爲安思順朔方節度兵馬使思順慕公信義請爲婚姻公辭不獲免遂託疾罷官西平王哥舒翰聞而趨之奏歸京師遂守道屏居杜絕人事十四載冬十一月安祿山反范陽天下繹騷朝廷旰食聿求虓鬪之將爰統膺揚之師明年春正月起公爲銀青光祿大夫鴻臚卿兼雲中郡太守攝御史中丞持節充河中節度支度營田副使知節度事仍充大同軍使二月拜攝御史大夫魏郡太守充河北道採訪使俄除范陽郡大都督府長史充范陽節度使初公以朔方馬步八千人出土門其月旣望收常山郡前是太守顏杲卿臬長史袁履謙殺祿山土門使李欽湊擒其心腹高逸何千年屬太原尹王承業不出救兵杲卿履謙爲史思明所陷戰士死者踰藉於滹沱之上公親以衣袂拂去其口上沙塵因慟哭以祭之分遣恤其家屬城中莫不感激一心史思明正圍饒陽馳來拒戰公屢摧陷之詔拜公兼御史大夫俾命尙書令汾陽王郭公子儀悉朔方之衆與公合勢南收趙郡又敗之於沙河夏六月戰於嘉山大敗之斬獲萬計思明露髮跣足奔於博陵窮蹙無計歸節於祿山祿山大恐逆徒幾潰屬潼關不守肅宗理兵於靈武盡追朔方之師加公太原尹公以麾下及景城河間之卒數千人至秋八月拜戶部尙書同中書門下平章事史思明旣有河北之地與蔡希德悉衆來攻累月不尅而退公自賊逼城於東南角張帳次居止竟不省視妻子每過府門未嘗回顧是後決遣事務信宿方歸至德二載拜司徒冬十二月十五日肅宗旣還京師策勳換司空兼兵部尙

書封鄭國公食實封八百戶公弟光進亦以懋功同制封拜乾元元年八月拜侍中其年冬十月與九節度圍安慶緒於相州明年春三月史思明至滎陽屢絕我糧道衆咸請公簡精銳以擊之交鋒竟日思明奔北於百里之外公反旆而歸烟塵亘天諸將皆以爲賊軍大至遂南渡黃河公至則無見矣乃歸於太原是年夏五月除范陽節度使尋代汾陽王爲朔方節度使秋八月充天下兵馬大元帥以數千騎東巡追兵馬使張用濟會於汜水用濟獨來上謁公數其罪而斬之因追都知兵馬使御史大夫僕固懷恩懷恩中夜馳赴魚貫而前再宿盡至秋毫不敢犯公趣河而東及滑州聞史思明已過河遂迎強旅以至東京移牒留守及官吏等悉皆迴避公獨與麾下趣河陽橋城賊先鋒已下倒懸坂公至石橋命秉燭徐行一夜方達賊望之不敢近思明來至城下請見公公於城上謂之曰我三代無葬地一身必以死國家之患爾爲逆虜我爲王臣義不兩全我若不死於汝手汝必死於我手將士聞之無不激勵相持凡八月思明暴露不敢入東京乾元二年冬十月甲申賊將周贄悉河北之衆萃於河陽城北思明以河南之衆頓於河陽南城之南南北夾攻表裏受敵公設奇分銳襲其虛而大破贄軍臨陣擒其大將徐瑱玉殺獲略盡贄僅以身免收軍資器械不可勝數思明心悸氣索烟火不舉者三日官軍大振初公以爲戰者危事勝負難必每臨陣嘗貯伏突於靴中義不受辱至是登城西向拜舞因敵獻不自勝三軍見之無不淚下三年春正月遷太尉兼中書令其年改元上元冬十一月攻拔懷州擒其僞節度安太清二年春二月統僕固懷恩自河陽趨河清與史思明合戰於邙山屬風雨晦冥王師不利公收合餘軍屯於垣縣遂引過請罪懇讓太尉肅宗不能違之二月拜開府儀同三司中書令兼河北尹節度使夏五月十有一日復拜太尉兼侍中充河南副元帥都知河南淮南淮西山南東荆南五道節度行營事出鎮臨淮時史朝義乘邙山之捷圍逼申安等一十三州自領精騎圍李岑於宋州公之將吏皆兇懼議南保揚州公謂之曰臨淮城池卑陋不堪鎮遏不如徑赴彭城俟其東寇躡而追之賊可擒也遂趨徐州因召田神功宴慰與同寢宿以宋州之難告祖道郊外俾先

飲以寵之分麾下隸於其將喬岫仍令兵馬使郝庭玉與岫犄角而擊之賊遂一戰而走使來告捷公已屈指俟報俄而吉語至焉今上登極寶應元年夏五月進封臨淮郡王廣德元年秋七月加實封三百戶通前後凡二千戶賜鐵券名藏太廟仍圖畫於凌烟閣冬十一月上在陝州以公兼東都留守制書未下久待命於徐州將赴東郡屬疾痢增劇公知不起使使齋表奉辭廣德二年秋七月五日己亥薨於徐州之官舍初將吏等問以後事公曰吾久在軍中不得就養今爲不孝子矣夫復何言因取已封布絹各三千匹錢三千貫鬻麥以分遺將士衆皆感痛不自勝及公云亡遂以其布爲公製服庚申哀問至上都上痛悼之輟朝三日太夫人一慟而絕終夕方蘇使開府魚朝恩就宅敦諭京兆君第五琦監護喪事九月己未追贈太保十二月(闕二字)太常議行諡曰武穆夫人薛國夫人太原王氏泉長子太僕卿義忠並先公而逝次曰太府少卿太僕卿象殿中丞彙等皆保也克荷備聞詩禮無忝燕翼過庭之訓冬十一月二十七日庚申泣而咨於王母虔窆公於富平縣先塋之東禮也於戲公以吉甫文武之姿兼樊仲將明之德王國多難羣胡搆紛藉朔方偏師之旅入井陘不測之地思明鏗銳於恆定祿山絕望於江淮守太原而地道設奇保河陽而雲梯罔冀破周贄於温沈擒太清於覃懷走史朝義叛渙之衆於梁宋救僕固瑒已危之軍於瀛莫皆意外虜墜計中天下有磐石之安國家無贅疣之患此皆公之力也公兄遵直遵行仕至將軍泉弟光炎並不幸早世次曰光顏特進鴻臚卿皆以將略見稱時輩季曰光進開府儀同三司太子太保兼御史大夫渭北節度使涼國公清識表微沈謀絕衆剛亦不吐柔而能立與公並時仗鉞分閫(闕二字)凌霄翼聖既有戴天之功華原統師獨聞禁之德方當會同正至榮曜君親入侍黼帷峨二貂乎奉階之止歸聯綵服頓雙節於高堂之下斯歡未劇遺恨何居昔斛律丞相與弟并州同務烈於北齊賀拔行臺而兄雍州亦宣力於西魏咸稱義烈各懋勳庸而風樹寂寥偏隅隘陬比之我族事則不侔真卿昔守平原困於兇羯繫公益止獲保餘生束帶興居空想北平之禮操觚講撰敢墜中郎之辭銘曰

羯胡猖狂倣擾皇綱降生臨淮佐我興王惟此臨淮萬夫之望爰初發迹罔我弗藏出入忠孝人倫激昂其
心鐵石其行珪璋天寶末造河朔恒攘天子命公經營朔方沙河嘉山我伐用張思明歸節祿山震惶潼關勿帥
醜虜其亡肅宗有命大鹵於襄應變如神兇徒靡亢介珪入覲台座用光俾公東征北國是皇長圍鄴下望入河
陽擒斬渠魁霆擊龍驤淮瀆鎮定徐土翺翔服田蠶屈料場鷹揚不有神算嚆戢暴強弟兄同時秉鉞煌煌方期
凱旋雙映旗常晨趨法座夕慶高堂如何不辰愆此百祥素輻反葬白驥踡箱簫鼓悲鳴羽儀分行萬乘致祭千
官送喪生榮死哀身沒名揚渭水川上壇山路旁唯餘豐碑突兀連岡往來必拜萬古沾裳

神道碑銘一

朝議大夫贈梁州都督上柱國徐府君神道碑銘

自古遭聖明而功不立都卿相而名不稱者蓋有之矣其或荷丕構而繼志不忘在下位而能伸其道克揚前烈以承後昆其唯徐君乎君諱秀（唐書宰相世系表作琇）東海鄰人也其先出於伯益實掌舜虞裔孫偃王躬行仁義遂因國命氏焉厥後樂以文侍金門穉以禮優塵榻僊人寄傲於賢聖偉長首冠於應劉英達相仍有自來矣宋有中書侍郎達之司空羨之兄祕書監欽之欽之子尚書僕射中書令湛之湛生黃門侍郎聿之聿之生齊太尉孝嗣孝嗣生梁侍中緄緄生陳五兵尚書君敕君敕生丹陽尹溫自司空已還四爲上公五降帝女尹生隋民部侍郎唐贈祕書監諱恕監生金紫光祿大夫右散騎常侍兼禮部尚書諱筠尚書生庫部郎中萬年令太子詹事諱昕（宰相世系表云孝嗣生齊侍中緄緄生陳常侍君敷君敷生隋通事舍人榮榮生尚食直長恕恕生春官尚書枝江公筠筠生昕）皆以盛德濟美垂於世家君卽詹事第三子也幼而聰悟篤學能屬文事繼親以孝稱十餘歲時父友鳳閣侍郎姚元崇示君五百字詩一覽便誦姚公奇之因謂納言狄公曰徐子珠華玉潔後但不知命何如耳年十五爲崇文生應舉考功員外郎沈佺期再試東堂畫賦公援翰立成沈公駭異之遂擢高第調補幽都縣尉充相國尚書趙彥昭朔方節度判官以事去職又歷蔡州參軍爲御史宋遙關內覆囚判官公銳精鞠訊多所全活宋公以爲言公正色謂之曰僕從祖父司刑卿天授中詳理冤獄振雪者七十餘家今子孫猶困於襄陵豈忍以束溼之事以自便也因頓首請去宋謝而留之無何或訟冤於執事者召公問狀則他判官之爲也宋欲別白旌公公曰僕雖不材豈可藉人之過以爲己功乎論者休之戶部侍郎徐知仁請爲

招慰南蠻判官奏課居最轉瀛州司法參軍侍御史趙頤貞辟宣慰判官歷湖州德清長城潤州丹陽三縣今天寶二載春二月加朝散大夫敕攝新安郡別駕採訪使齊澣梁昇卿並奏爲判官六載秋七月拜臨淮郡長史加朝請大夫九載夏四月除濟南郡司馬加朝議大夫十二載春三月拜信都郡長史不幸感疾天寶十三載秋七月九日終於郡之官舍春秋七十公先世塋隴宅於京師少陵原詹事府君巡按河南薨於洛內葬於緱氏縣西南大寇原公啓手足也顧命其子今侍御史續曰吾家代儉約不欲華衆歸全之後其以布車一乘虔祔先塋續泣而奉之及其葬也塋小無便地於次東馬鞍山下得紫龍飲乳岡之原龜筮從也夫人南陽縣君樊戶部尚書子蓋之曾孫袁州刺史文器之孫廬江太守季節之女仁孝柔明嫻於禮度左右圖史雅善琴碁中外孤弱躬自收視俾夫遠近咸懷安之春秋六十有八棄堂帳於相州之安陽天寶十五載秋八月十有四日爰遵周公之典而合祔焉禮也廣德二年春三月皇帝有事於南郊追贈君都督梁州諸軍事梁州刺史人南陽郡太君蓋以續簪白筆於赤墀董材賦於是用有永錫之寵紆褒崇之命哀榮之盛不其至矣也凡四爲綱佐六奉使軒所至之邦必聞異績舉天下治政事莫不資折中焉性嗜清貧室無長物孤勞叢萃皆仰於君旣嬰沈痼之疾縣歷三載續請就上國之醫庶其逢吉君曰闔門之資者寸祿也今疾劇命也吾不以一身易百口竟不從而沒識者哀之或謂君曰君奉養孳姊用度萬錢（闕一字）棖諸姑縑纁五兩姑見君（闕而三字）笑不答退謂續曰吾見其撫孤不見其怨德教義之士有以見其用心也君恬淡寡欲雅好攝生在新安或指靈叟於洞君齋心四日采入其阻而後覲之訊其由來陳思王東閣祭酒蔣覲也說魏時事歷歷可聽君稽首而斬之叟曰從我乎必可度世君以王事靡盬退而辭焉比迴顧則爲茅草矣初君上計濟南展羣祖之墓松檟森然微猷莫紀留居論議時日以成先德之不忘繫其舉也嗚呼君體聰穎之上姿恬曠之夷度寬明足以濟衆和義足以長人口絕莠言日無還視立身先張仲之志與朋服子路之言內行可以質神明清規可以勵風俗宜克享胡耇荷天之龍光輔乎

漢之得人高視乎周之列位而道之將喪命不偶時屈輿驥於身前墮峴碑於沒後吁足歎也春秋貴九世卿族漢史稱七葉珥貂陪臣於下士卑僚絕屬於天潢戚里豈比夫登台者四世尙主者五人焜耀於數朝之間蟬聯於百代之下可同年而語矣續懿文懋學峻節清標天寶末陷居賊中爲僞命連辟辭疾不起謀使家人與本朝通計爲部曲所發遂遭禁詰一日之中議刑者數焉俄而官軍大至賊黨奔北由是獲免乾元中奉使巴渝屬段子璋搆逆流輩十人皆被屠害以續高名欲留同惡期之以死承劍不回時諸道徵求人不堪命續至之邦必荷仁信如期而畢則（闕三字）將崇必復之矣寧止當朝之望碑銘功伐敢墜斯文辭曰

益爲帝虞偃不異途世表東海其惟徐乎或文或武或哲或儒休美後昆厥德不孤猗那都督克懋遠圖邦國四佐輜軒六徂樹聲長世與道爲徒爰覲幽光無寧集枯（闕八字）仁義都盡彭殤曷殊所嗟人紀莫展嘉謨馬鞍山北龍乳岡隅於焉崇祔先志靡渝豐碑崔嵬宰樹縈紆（闕六字）沾濡（闕八字）

金紫光祿大夫守太子太傅兼宗正卿贈司空上柱國隴西郡開國公李公

道碑銘

昔周武以二公股肱王室然而允釐西土師保萬民者其惟召公乎漢室以二傅羽翼儲宮然而亮采東朝儀型百辟者其惟蕭傅乎則九德之師六行之傳親賢旣美亦何代無其人哉隴西公才爲國之垣翰位爲天子之喉舌德爲朝之元老行爲帝之信臣蓋所謂宗室之間生士林之傑出者也公諱齊物字道用隴西成紀人自若水導其靈源而聖人作高邱峻其層構而才子生元元爲宋帝之先興聖有勤王之舉威復彌於百祀靈根固於千葉太祖景皇帝功高佐魏慶始封唐家崇八柱之勳地半三分之業亦猶殷人之祖契周室之宗文公卽景

皇帝之五代孫也鄭王亮之元孫淮安王神通之曾孫淮安王皇朝開府儀同三司尚書左僕射贈司空磐石開府介圭錫瑞成周之晉鄭西漢之勃平祖孝銳鹽州刺史父瓌隴州司倉贈宏農太守並清白貽範仁賢繼軌連華公族濟美專城公稟乾剛之正性體坤順之中德爰自岐嶷特鍾美秀儼然王公之量鬱有台鼎之姿固已超等夷而出羣萃矣神龍初起家左右千牛備身歷尙輦直長許州司馬華州司兵時方振拔勢已飛騰此則江漢之濫觴華嵩之覆篲也丁太夫人憂公有至性毀瘠過禮扶杖於家哭不絕聲者累月倚廬於墓衣不解帶者終喪天子特降璽書就廬慰勉非常之澤近古未聞服闋授鴻臚丞除尙輦奉御遷北都軍器監事太原爲一都之雄鎮軍器掌五庫之禁兵故乾沒之賊一徵百萬繕完之利費省巨億少尹嚴挺之連奏課最擢拜長安令陸海殷湊五方浩劇公以威禁暴以恕用刑邑里之人陶然大化遷將作少匠殿中少監太府少卿懷陝二州刺史雖漢之宗室不典三河而周之懿親先分二陝惟良之寄實在於公嘗以黃河經砥柱之艱有覆舟之患遂奏疏九派鑿三門屬役而堅冰大合興功而烈火潛熾不愆於素若有神焉人皆以公至誠之所感也又於石獲古銘曰平陸遂以名縣焉元宗異之賜貂裘一領絹三百匹特加銀青光祿大夫鴻臚卿并公之先隴州府君專城之贈上嘗賜玉尺一詔曰謂之尺度可以裁成卿實多能故爲此賜識者知公必將金玉王度代天之工豈惟從容九列而已拜河南尹仍兼水陸運使屬左相李公適之尙書裴公寬京兆尹韓公朝宗與公爲飛語所中公遂貶竟陵郡太守時陸羽鴻漸隨師郡中說公下車召人吏告之曰官吏有簞簋不修者僧道有戒律不精者百姓有泛駕蹶弛者未至之前一無所問而今而後義不相容數年間一境丕變熙然若羲皇之代矣哀孤重老有隱逸好道者常騎馬於里巷之中親自恤問量移安康卽日上道老幼遮擁不得發者三辰轉漢陽斬春其政如一公虛中自牧接下愈恭與物盡推誠之心正身無氣燄之忌每上春行令大戶閱農輕裏餼糧重煩縣道化流江漢如時雨焉故郡歷數四課事第一去思之感人到於今稱之天寶末徵拜將作監重授鴻臚卿縱壑巨鱗還游舊浦

凌風勁翮俄返故林時國忠包藏於內（下闕）

朝議大夫守華州刺史上柱國贈祕書監顏君神道碑銘元泰七年

君諱元孫字聿修京兆長安人高祖諱之推北齊給事黃門侍郎待詔文林館會祖諱思魯隋太子校書東宮學士皇朝秦王記室祖諱勤禮著作郎崇賢宏文兩館學士父諱昭甫高宗侍讀曹王屬贈華州刺史俱以德業才名相望史冊君卽華州之元子少孤養於舅殷仲容家身長六尺二寸聰銳絕倫工詞賦章奏有史才明吏事年十歲時叔父吏部郎中敬仲任益府法曹長史李孝逸聞君少俊請與相見座中試安石榴賦君默綴少頃郎中聘而從之君授翰立就不加點竄孝逸大驚尤善草隸仲容以能書爲天下所宗人造請者牋盈几輒令代遣得者欣然莫之能辨舉進士素未習尙書六日而兼注必究省試九河銘高松賦故事舉人就試朝官畢集考功郎劉奇乃先標榜君曰銘賦二首旣麗且新時務五條詞高理贍惜其帖經通六所以不（原本闕）屈從常第徒深悚怍由是名動天下解褐鼓城主簿歷登封尉與弟贈太子少保諱惟貞府君調選屢以高等同登甲科相代爲長安尉翰林偉之前是老吏好以婚田之不決者試新上官君悉堦階上研墨汗數（原本闕）操割凡百餘道不終夕而畢縣令隴西李縮學才士也覩（原本闕）駭命小吏分守寫之而通不給朝廷聳歎遷洛陽丞著作佐郎太子舍人時元宗監國獨掌令誥當時以爲綸言之最嘗有命召或以次進（原本闕）今日非也聞公喚長舍人來遂御小殿賜食因出諸家書跡數十卷曰聞公能書可爲寡人定其真僞君分別以進上元宗大悅因賜藤牋筆墨衣服等物嘗和遊苑詩御札八分批答云孔門入室魯國稱賢翰墨之妙莫之與先君一覽無遺兼該故實韋安石以宰相兼庶子特相禮重官務一以諮君事頗填委從駕至（原本闕）以司直用事命坊官同遊石瓮寺駐焉諸君有忌前者曰顏舍人必不行已而君辭以遽曰果爾何爲妄請君默然元宗登極同列皆

選中書舍人君讓范陽盧備俄爲瑀等所擠出爲潤州長史遷滁州刺史按察使王志愔以清白名聞拜沂州志愔娶於顏餘慶以男求婚君拒之遂誣奏請降階奪祿其初君與執事者因(闕一字)官有忤至是憾焉遂黜歸田里君屏私第傲然無悶者十年與陳郡殷踐猷上谷寇泚武功蘇晉吳郡陸象先友善相見未嘗不舉景起爲濠州刺史累加朝議大夫上柱國中書令張嘉貞深相器重方引知制誥(原本闕)右職屬罷相不行代到風疾停家開元二十年春七月才生明薨於絳州翼城縣丞之官舍隨子春卿任也明年葬於東京鷓店東北高村原夫人新城縣君元氏故兆異穴而柩權也文集三十卷著于祿字書一卷並行於世續祖父涉令光庭注後漢書常山之陷也沒焉廣德二年春三月二十有二日制曰故濠州刺史上柱國顏元孫懿道淳茂宏材特達傳經成業聚學爲文清白著於家風問望光於銓選久膺揚歷爰寄藩條政有其方續宣其用未登大任遽迫流年九原不作郡邑存其遺愛二字象賢艱難立其名節忠能徇國孝在榮親贈以儒官揚其感烈可贈祕書監眞卿表謝今上批答云卿之先伯當代詞宗蘊國經行推人表上宏祖德下獎門閥鄭國不亡臧氏有後雖雲雨之澤自葉流根然訓誨之方因父見子永惟感烈式寵代官不朽者名斯爲極矣嗚呼君有五子皆有才名春卿聰銳無比早擅詞賦尤工表檄倜儻有吏能急人之急明經拔萃歷蜀縣尉長史蘇頲舉茂才異等未試充張敬忠節度判官轉翼城丞與弟杲卿曜卿從父弟允南調選同日於銓庭爲侍郎席建侯所賞授偃師縣丞杲卿忠烈方正精敏有識累至魏州錄事參軍清白名聞充安祿山營田及度支判官太常丞攝常山太守祿山反誅其土門使及(原本闕)拜衛尉卿兼御史中丞城陷詢置爲賊所屠害乾元中贈太子太保諡曰忠節曜卿介直以信稱勤學好屬文工草隸書十五以文學直崇文館每選集必爲主司所賞擢歷城丞淄川司馬旭卿美姿儀善草書允山令茂會仁恕和厚口無擇言頗屬文詞留心話訓嘉陵司馬孫紘少好雜書疎財重義方義尉鮮于仲通節度劍南引爲判官同征閣羅鳳沒於蠻泉明穎悟孝義果銳嫻於吏道安平尉父敬保(父敬保字疑是太保之

譌臯卿贈太子太保故云）將開土門使與長史袁履謙往來謀議授左金吾兵曹尋爲賊所執舉家見陷泉明到河北乞求贖先姑女而後己子行路衰之東京收復泣血求父屍獲焉時人以爲孝感所致拜郟令有能名爲崔光遠所擠終彭州司馬威明太僕丞邛州司馬季明惇敏有容止與君外孫盧遜同爲賊所害贈左贊善濬勸學好屬文早卒子幹剛銳強力公劉府果毅弟沛同遇賊害贈都水使者沛尙食奉御翹入道詡（詡當從家廟勸禮二碑作翊臯卿之姪也）與泉明子誕同質於祿山皆被鋸殺贈贊善誕義王諮議翹通義令觀漢州參軍觀鹽亭尉翹未仕曾孫證右內倉曹訊兵曹詔彭王參軍皆承謀翼不敢失墜爲君德盛才茂行周業廣文可以經國道可以致君而坎壤威明不登弼亮其時歟其命歟眞卿越自嬰孩特蒙獎異且兼師父之訓豈獨猶子之恩濡筆告哀不中萬一銘曰

琅琅世父明德是矩孝以仁親忠期輔主周旋禮法精究訓詁行楸珪璋文彪龍虎高標天府震耀區寓前載（原本闕）千官歛覩王畿就列赤縣斯偃杖華交輝灑翰如雨洛陽毗貳著作布武載筆龍樓（闕一字）光龜組元宗褒異（闕一字）發儔伍不入掖垣翻飛江潁淮沂其乂典憲斯侮望閑爰歸優游不吐名公虛左濠上爰撫方俟同昇遽愆多祜一麾屢黜百贖奚補翼子多方教忠則撫吁嗟太保爲國干櫓取義舍生悲今邁古皇恩自葉超贈祕府存沒哀榮幽明赫眡眞卿追痛銜恤靡怙牽綴銘功恨非覩縷

特進行左金吾衛大將軍上柱國清河郡開國公贈開府儀同三司兼夏州

都督康公神道碑銘永泰二年二月

竭誠奉主之謂忠率義忘躬之謂勇忠勇不犯則名登於明堂子仕教忠之謂慈戰陣能勇之謂孝孝慈有

裕則道存乎方冊兼此四者其惟清河公之族乎公諱阿義屈達干姓康氏柳城人其先世爲北蕃十二姓之貴種會祖頡利部落都督祖染可汗駙馬都知兵馬使父頡利發墨噉可汗衛衙官知部落都督皆有功烈稱於北陲公卽衙官之子也正直忠鯁以信行聞爲國所敬長於謀略工騎射其弓十鈞年二十三爲阿史那頡佚施默噉等九可汗宰相秉心顛一立言無二不吐剛以茹柔必蹈道而履義可汗每有過失未嘗不極言切諫蕃落中重焉以比國家之丞相宋璟初默噉弟拔悉密時勳嘗擊藥弒可汗公竊而藏之密特示默噉默噉大怒將誅之公以爲請但令歸於部落默噉知公至忠繇是益加親信同列四人莫與公比其後公以孤直屢見疑譖遂請退歸可汗察公非罪尋復追爲宰相先是毗伽可汗小殺爲其大臣梅錄噉所毒小殺覺之盡滅其黨旣卒國人立其子伊然可汗無何病卒又立其弟登利可汗華言登利猶果報也其母噉欲谷之女與其小臣旣斯達干預國政登利從叔父因左殺右殺東西分掌其兵馬登利與其母誘斬西殺盡并其衆左殺懼及乃攻殺登利自立爲烏蘇米施可汗拔悉密擊敗之脫身遁走國中大亂天寶元年公與四男及西殺妻子默噉之孫勃德支特勒毗伽可汗女大洛公主伊然可汗小妻余塞匐登利可汗女余燭公主及阿布思阿史德等部落五千餘帳并駝馬牛羊二十餘萬款塞歸朔方節度使王忠嗣具以上聞（一本忠嗣作斛斯）秋八月至京師元宗俾先謁太廟仍於殿庭引見御花萼樓以宴之仍賦詩用紀其事拜公左威衛中郎將屬范節度使安祿山潛懷異圖庶爲已用密奏公充部落都督仍爲其先鋒使公旣不得已僂俛從之四載以破契丹功遷右威衛將軍俄拜范陽經略副使五載又破契丹功居多拜左武衛大將軍仍充節度副使元宗嘉之璽書慰勉盈溢篋笥十四載冬十一月九日甲子安祿山反范陽公以天子有命陷身凶逆舉家見質自拔莫由旣至東歸公泣血籲天次於夢寐欲與諸子逃歸國家爲賊邢州刺史康節所告遂被收繫儻被誅者二十餘人公之四子各奔於外賊恐衆情不安賞之而後出至德二載闔門二百餘口被安慶緒脅至安陽屬今上爲天下兵馬元帥統今尙書令汾陽王郭

子儀朔方之師諸節度回紇之衆東收二京公率四子及孫姪等十餘人冒死南奔至汲郡爲從者所告家人殲焉二子沒野波英俊挺身行前二子屈須彌施英正持滿殿後沒野波妻阿史那氏爲公控馬登於西山至高平界遇賊蔡希德以精騎三百遮路邀擊沒野波英俊策馬奔之斬殺四十餘人生擒四人冬十有一月七日投今上行營至焉先帝聞而嘉之欲以開府儀同三司處公仍加實封公固辭乃受因爲金吾衛大將軍加特進增封清河郡開國公食邑三百戶策勳（闕十二字）衛大將軍（闕二字）卿（闕三字）射（闕四字）開府儀同三司太常卿殿前衛前射生兵馬俄加上柱國姑臧縣開國子沒野波雲麾將軍左金吾衛大將軍上柱國射生散騎常侍驃騎大將軍左武威大將軍兼鴻臚卿上柱國殿前射生使清河郡開國公英俊等官秩各有差因留公及屈須彌施英正供奉射生以沒野波英俊勇冠三軍並令東隨故太尉李光弼於太原後鄴郡瓦窰陣官軍與安慶緒相逼王思禮爲其所敗賊勢旣威太尉與思禮相顧氣索沒野波英俊勃然奮怒遂直抵薄河當鋒擊之殺獲二千餘人賊衆方退太尉諸公覩而駭之賞雜綵百匹並以轉分麾下無所納三軍欣羨焉沒野波居常謙謹臨事勇銳戰則先鋒前無強敵捉生遊奕所向必摧九節度之圍安陽也史思明悉衆來救沒野波以十五騎過河逆擊之并馬刺倒者數人生擒數十人後擊懷州思明又自來救晷爽之際侵軼柴籬沒野波領甲騎三十禦之賊軍五千人一時摧敗眞卿之棄平原也沒野波爲賊騎將緩策不追及聞渡河然始奔躡是以得脫於難平原人至今稱之英俊瞪視眈眈姿氣雄果發勁矢持大槍巖然萬衆之中左右馳突無不辟易而退嘗隨太尉討思明於河陽賊驍騎萬餘於中圍城索鬪將莫敢應者英俊挺身奔擊之應槍落者二十餘人英俊被槍刺頰貫喉而出擺首而去之猶殺二人而還太尉壯焉遂以從父兄子妻之故天下之言勇者以沒野波英俊兄弟爲稱首廣德元年上幸陝州公之諸子皆當扈從公以體貌瓌碩難於舉動方與之死訣沒野波妻爲公介馬扶奔華州公慮不免謂左右曰我若爲賊所得無累我兒子乎汝曹何不殺我衆人感懼叫然皆哭遂竭力昇

公至於行在上深嗟賞之方極尊榮以終宴喜上天不惠以二年青龍甲辰冬十有一月二十日甲寅感肺疾薨於上都勝業坊之私第春秋七十有五親事左右莫不勞而截耳以哭初凌霄之難公實援立澹水之屯公親總統上之反正父子從焉帝疇厥功遂有開府儀同三司兼夏州都督之贈夫人清河郡太夫人交河石氏左衛中郎將珍之孫左金吾衛大將軍三奴之女温敏淑惠柔明端雅有女師母儀之德克懋於家不幸遘疾以天寶十五載春三月八日先公而薨永泰二年春二月十日壬申與公合祔於萬年縣之長樂原禮也嗚呼公以沈果之姿抗英威之志降精昂宿炳粹天街忠肅表於生知義勇形於造次屬國家多難淪胥以痛壯一心而來事我君貫四時而不改柯葉義方懇到相攜於契闊之中臣節激昂三見於危亡之際天子感焉旣受腹心之託禁旅資焉俱列爪牙之地勳庸克茂聲問攸歸叢綵衣於玉帳之前羅五戟於一門之內不其感矣昔蕭相國舉宗佐命金日磾七葉珥貂望古儔今可謂同德其孤等窮人孺慕靡所實哀聿求不腆之辭庶播無疆之美銘曰

北方之強歟十有二姓強哉矯部落之雄者康執兵柄緬乎眇特進誕生令實登邦政德不擾嗽女滅國令烏蘇不竟愠羣小三濱九死令舉族致命丹心噉一門萬石令彰厥誠敬皇恩曠生爲忠臣令後有餘慶其不天家有孝子令嚴親翊聖王之爪乃立豐碑令百代遺詠鴻名表忠孝之際令於斯爲感遠圖皆

中散大夫京兆尹漢陽郡太守贈太子少保鮮于公神道碑銘永泰二年

公諱向字仲通以字行漁陽人也其先出於殷太師周武王封於朝鮮子仲食邑於于因而受氏漢有京兆尹褒襄十二世孫康後魏秦州刺史直閣將軍武威郡公忠於本朝爲齊神武所害康元孫匡贊隋冠冠氏長義寧初通議大夫匡贊生士簡士迪並早孤爲叔父隆州刺史匡紹所育因家於新政士簡士迪皆魁岸英偉以財雄巴蜀招徠賓客名動當時郡中憚之呼爲北虜士簡生令徵公之父也僣儻豪傑多奇畫嘗傾萬金之產周濟天

下士大夫與妻兄著作郎廣漢嚴從泉殿中侍御史何千里俱以氣概相高不肯仕宦竟以壽終天寶九載贈遂寧郡太守廣德元年又贈太常卿公少好俠以鷹犬射獵自娛輕財尚氣果於然諾年二十餘尙未知書太常切責之縣南有離堆山斗入嘉陵江形勝峻絕公乃慷慨發憤屏棄人事鑿石構室以居焉勵精爲學至以鍼鉤其臉使不得睡讀書好觀大略頗工文而不好爲之開元二十年年近四十舉鄉貢進士高第二十六年調補益州新都尉視事二十日謝病去二十七年長史張宥奏充劍南採訪使宥方謀拔安戎獨與公計畫幕中事一以咨公司馬章仇兼瓊惡之及代宥節度乃移郡收公月餘仍釋之俄令攝判使事監越葛兵馬復奏充採訪使盡護劍南軍事首尾二載冒暑渡瀘者凡一十八度公秉操堅忮吏人望而畏之改授新繁尉充山南西道採訪支使頃之雲南蠻動瓊請公往以便宜從事公戮其尤害者數人蠻夏懾服山南盜賊舊多火光公察其名居悉傾巢穴人到於今賴焉俄拜左衛兵曹例遷也瓊以兩道採訪節度使務悉以委公無何攝監察御史充劍南山南兩道山澤使遷大理評事充西山督察使天寶五載戶部侍郎兼御史大夫郭公虛已代瓊節制郭以庶務一皆仗公公素懷感激竭誠受委故幕府之事無遺譖焉六載拜監察御史公誅羌豪董哥羅等數十人以靖八州之地郭公將圖弱水西之八國奏公入覲元宗駭異之卽日拜書尙屯田員外郎兼侍御史蜀郡司馬劍南行軍司馬既略三河收其八國長驅至故洪州與哥舒翰隴右官軍相遇於橫嶺鳴鼓而還及郭公云亡慟哭之曰公亡矣吾無爲爲善乎初郭公對敷天休每薦公有文武之材堪方面之寄至是遂拜公爲蜀郡大都督府長史兼御史中丞持節充劍南節度副大使公當大任既竭丹誠射吐蕃摩彌城拔之改洪州爲保寧都護府整弱水爲蕃漢之界收戶數十萬闢土千餘里屬恩敕命召祇赴京師至臨皋驛上令中貴人勞問賜甲第一區又錫名馬兼供御饌俄拜司農卿將不遠而復十一載拜京兆尹公威名素重處理剛嚴公初善執事者後爲所忌十二載遂貶邵陽郡司馬灌園築室以山泉琴酒自娛賦詩百餘篇俄移漢陽郡太守下車閉閣惟讀元經以自適不

幸感疾以十四載閏十有一月十有五日終於官舍春秋六十有二十五載春正月歸葬於新政縣嘉陵江之西岸先塋寶應元年追贈衛尉卿廣德元年又贈太子少保公凡著坤樞十卷文集十卷並爲好事者所傳於戲公負不羈之才懷當世之志方及知命始擢一第從宦十年超登四岳拔身巴江之下自致青雲之上非夫珪璋特達聖賢相遭則何以凌厲沈浮若斯之速旣而吉凶糾纏慶弔相隨天睽排於賊臣雄圖屈於促景有足悲矣有子六人仲曰贈左金吾衛郎將吳隨公陷於西洱河（舊本洱誤作二）力戰而沒季曰前鄉貢明經晃神清才秀先公而卒伯曰璧州刺史昱克篤孝行見稱衣冠公之捐館也萬里迎喪沂湍而輓塚拔筵段子章之稱亂也閤門逃賊安親而晨夕板輿叔曰萬州刺史昃雅有父風頗精吏道肅宗之幸鳳翔也竭誠幕府以佐公家今上之命庶僚也由華原之政驟登省闈作牧萬州政績尤異有詔遷祕書少監尋又改牧巴州幼曰青城尉晏稚曰成都府參軍景皆保家之主亦著令聞公弟晉字叔明敦厚溫敏少以任俠聞事公以悌稱與朋以信著好讀書而不爲章句精吏道尤擅循良再爲法官三秉天憲二登郎署一宰洛陽從其兄之討南蠻也兩軍交戰仗忠信而必使其閒佐寧國之如回紇也絕域奉辭布皇明而皆得要領肅宗褒異擢拜商州刺史無何超遷京兆尹十一年而兄弟相代論者偉之永泰二年秋八月有詔自太子左庶子復拜爲邛州刺史兼御史中丞邛南八州都防禦觀察等使眞卿與公同在御史亡兄國子司業允南弟今江陵少尹允臧又與少尹同時臺省旣接通家之歡載敦世親之好以爲徂謝永久所存者微猷陵谷雖遷不朽者金石銘功篆美敢墜所聞其詞曰

洪範垂休系殷封周鮮于身繇派漁陽令世掌漢歷子孫烏奕代有丕績臬定襄令冠氏促齡二孫夙丁隋官不寧肇定疆令嘉陵森森雲臺矯矯降生京兆爲龍光令有武有文剛嚴不羣克懋鴻勳制惟梁令旣靖巴蜀旣清輦轂日聞啓沃播周行令結友不終孤我深衷如彼飛蟲反予戕令邵陽典午漢陽紆組郭云心苦坦行藏令天不憖遺哲人其萎反葬江潛咥其傷令此令有裕教忠有素天介景祚熾而昌令三世京尹二子專城一門

載榮餘慶彰令豐碑巍巍感業暉暉舉世是希與天長令

朝請大夫行江陵少尹兼侍御史荆南行軍司馬上柱國顏君神道碑銘大

歷四年四月

君諱允臧字季寧京兆長安人曹王晉王侍讀贈華州刺史昭甫府君之孫薛王友贈太子少保惟貞府君之第八子也孝悌惇敏有才幹局力所居以吏道稱解褐太康尉太守張倚採訪使韋陟皆器具親嚴與之均禮天寶十載制舉縣令對策及第授延昌令君悉心致理遠者懷而邇者安採訪判官賈至王倫言於使清白名聞會安祿山反遂止潼關陷太守李揖計未有所出君勸投靈武至寧朔屬同羅招六蕃府絕不得通肅宗聞君誠至德初追赴彭原行在所拜監察御史賜緋魚袋遂承任使推劾不避強禦中官邢延恩等皆得罪焉尋充朔方兵健衣資使郭公子儀請爲判官清渠之岨也賊兵四合矢下如雨君挺劍躍馬奔之得出自武功知縣御史及吏人無敢住足君徐坐示暇於大達然後少有至者因令具頓以候今上上大驚喜引之同食河東人郭俊邢詔翻城歸順郭公俾君先入郡以安恤之郭公旣至軍郡之事一以咨君隨方決遣無不欣愜有郡人嘗爲賊將崔乾祐判官郭公欲加刑君領證左右以入救遂貰之二年秋八月遷殿中侍御史真卿表謝肅宗批答曰卿昆季連擢才聲並振俱守寒松之操允執後彫之心久冒艱危大知難奪委以憲臺之長克申白簡之威厥弟之遷亦爲官擇宜相勸勉各樹能名當代榮之京城收與崔稜銜命宣撫都人大悅出爲櫟陽令錄事有奸犯者君立榜殺之豪強震恐一縣屏息遷侍御史以當爲郎以兄在南省君遂攜挈牢讓轉大理正用法精詳或以賄財執事而妄訴者卿丞莫能止君獨召訊詰責立服衆皆爲君危之寶應中復拜侍御史兼太子中允廣德三年冬十月拜江陵少尹又兼侍御史荆南行軍司馬君清正卓立特爲軍州所敬旣而代到屢詔徵入未得行大歷三年冬

十一月五日乙亥奄忽感暴疾終於私第春秋五十九其兄眞卿聞喪哀摧甚去手足乃命姪男前武功丞頂諒於其妻奉明縣君韋氏其孤前京兆參軍頰泉頰禹等以明年夏四月壬戌歸祔君於上都萬年縣鳳棲原先塋之北禮也嗚呼君姿質瓌博襟靈沈粹心根德義躬服孝仁理以居家果於從政與人深一定之分臨事多獨見之明屢佐戎旃必闡忠益六登憲府皆推直諒信可謂朝之正人儒之君子未申殿邦之用遽齋入冥之恨知與不知孰不嗟悼眞卿覺深祐薄門祚衰陵同生之人零落皆盡唯形與影相視已足豈圖不造永訣於斯長號立銘泣盡繼血其辭曰

嗟嗟予季特稟純粹曰孝與仁因心則至友由悌睦禮用和貴地地美言嶽嶽高義行絕枝葉心無頗詖經德秉彝拔萃出類環衛入侍牽絲作尉泛愛與人檢莊莅事一作象雷六爲天吏豪右宣威憲臺增氣羣公虛左天子思媚守挹讓郎得仁奚媿司刑棘寺理法昭責儲闡載升亞尹斯位七德繁理萬人攸旣黃髮未登青雲方致云如不淑奄忽云諱國失重寶家摧脛臂以此思哀我生奚寄反葬何所先塋之次濱水東流終峯北擊勒銘金石威烈無墜

左衛率府兵曹參軍賜紫金魚袋顏君神道碑銘大歷四年四月

君諱幼輿字令軌京兆長安人高宗侍讀贈華州刺史昭甫府君之孫薛王友贈太子少保惟貞府君之第六子也美容止有器度故小名粲焉孝悌仁和精詳禮法博涉史記漢書盡究其義理起家后土齋郎調補汝南郡新息縣主簿恪謹官次簡聞修潔紀綱吏人罔弗畏慕太守趙國公王琚器君才名待以殊禮縣之庶務悉以見咨家素清貧從母之孀嫠者宗族之悍單者皆仰給焉君悉心奉養情禮彌篤哥舒之攻石堡城請君隨軍拜左衛率府兵曹參軍恩敕賜緋魚袋不幸似天寶九載秋七月旬有三日遇疾而終春秋四十八卽以其月窆於

萬年縣鳳棲原先塋西北禮也夫人陳郡殷氏蘭陵郡太夫人之兄子充曹州司法麗正殿學士踐猷之元女高士永寧尉寅之女弟高士壽安尉亮之家姑也我伯舅聰明純粹博學稽古相國陸象先秘書監賀知章臬我世父濠州刺史元孫府君友善呼爲五總龜龜千年而五總問無不知也太夫人以君四世殷之自出（原本闕）失其新命君娶之旣而遂焉成先志也夫人含風孤映當世以廣德二年（廣德止二年舊本作三年誤）冬十月二十一日棄牀帳於江陵仲子鳳翔參軍顓臬季子頓不幸早夭大歷四年夏四月壬戌季弟真卿命君孟子前武功丞頂叔子左千牛願度遠日而合祔焉嗚呼君以全德之姿丁休明之運宜其振翼層漢濯鱗清流而苾不準才德淪於天吁足慟也謂之何哉銘曰

兵曹樂只於穆不已華州之孫少保之子温温體度疑疑容止非禮勿言唯德是揆人倫領袖宗朝簞簋佩服典常顓精文史汾睢歲事新息入仕忠益上官總持綱紀奉養從母必窮珍旨綏族紕宗羣居咸喜哥舒授律石堡俟命我翊戎寵章斯被鯤溟未運鴻漸伊始不與之年云如何漣安放安仰嗣徽昭美合葬旣遵從周有斐于嗟窘束不獲躬視寫恨立銘告哀千祀

神道碑銘三

唐故右武衛將軍贈工部尚書上柱國上蔡縣開國侯臧公神道碑銘

公諱懷恪字貞節東莞人其先出於魯孝公之子彊字子臧大夫不得祖諸侯其孫以王父字爲氏僖哀二伯旣納忠於魚鼎文武兩仲亦不朽於言哲丈人成功而遁迹子原抗節而舍生義和辭金飾之器粲緒奮陽秋之筆賢達繼軌紛紛至今會祖滿隋驃騎將軍祖寵皇朝通議大夫靈州都督府長史父德（糾宗碑作善德）朝散大夫贈銀州刺史咸務遠圖克開厥後恤允之慶世祀宜哉公卽銀州之第三子也身長六尺一寸眉目雄朗鬚髯灑秀雅善騎射尤工尺牘沈靜少言寬仁得衆奇謀冲逸英勇冠倫友于兄弟謹爾鄉黨每敦詩而執禮不苟柔以吐剛蒞事而剖判泉流臨戎而智略鋒起古所謂文武不墜高明有融者焉少以勳勞亟紆戎級開元初嘗遊平盧屬奚室韋大下公挺身與戰所向摧靡繇是發名元宗聞而嘉之拜勝州都督府長史銳精佐理繫矩兼官朔漠不空邊隅用又俄拜左衛率府左郎將轉右領軍中郎將兼安北都護軍中受降城使朔方五城都知兵馬使戎事齊足十萬維羣我伐用張軍威以肅由是深爲節度使王唆所器奏充都知兵馬使嘗以百五十騎遇突厥斬啜八部落十萬餘衆於狼頭山殺其數百人引身據高環馬禦外虜矢如雨公徒且殲遽而給之曰我爲臧懷恪敕令和汝何得與我拒戰於時僕固懷恩父設支適在其中獨遮護之諸部落持疑不肯公剖羊以盟之杖義以責之衆皆感激由此獲免遂與設支部落二千帳來歸後充河西軍前將盤禾安氏有馬千駟帖富不虔一族三人立皆毆斃軍州悚慄嚙敢不祇俛爲節度相國蕭嵩所賞後充河源軍使兼隴右節度副大使關西兵馬使拜右武衛將軍吐蕃不敢東向者累年俄封上蔡縣開國侯開元十二年歲次甲子春二月二十有六

日薨於鄆城之官舍享年五十六其年八月二十三日詔曰故具官某頃以幹能亟承任使操行愈謹勞効未酬不幸遷殂良增追悼可贈右領軍衛大將軍卽以其年冬十月庚戌遷窆於京兆府三原縣北原禮也嗚呼公兄在羽林軍大將軍平盧副持節懷亮以方虎之材膺爪牙之任孔懷斯切致美則深公七子遊擊將軍崇仁府折衝希崇豐州別駕贈宋州刺史希昶左武衛將軍朔方節度副使贈太子賓客希忱右衛左郎將劍南討擊副使贈汝州刺史希愔右驍衛郎將靜邊軍使贈秘書監希景寧州刺史左金吾衛將軍贈揚州大都督希晏開府儀同三司行太子詹事兼御史大夫邠寧山南觀察使集賢待制工部尚書渭北節度使魯國公希讓等夙漸詩禮恭承教義芬潤挺蘭玉之姿英威鸞虓之質而希讓識度宏遠器謀沈邃仁親以孝殿國以忠綽裕冠於人倫勳勞懋於王室至德中今上爲元帥東伐肇允押牙從收兩京陟降左右入侍帷幄旣崇翼戴之功出擁麾幢戴叶澄清之寄加以篤睦羣從糾綏宗族吉凶瞻恤終始無渝行道之人孰不嗟尚肅宗以公有謀翼之勤乾元三年春三月贈魏州刺史寶應元年冬十月又贈太常卿廣德元年冬十月詔曰孝以立身可揚名於後代忠能事主故追榮而及親開府儀同三司兼御史大夫元帥都虞侯魯國公臧希讓亡父贈太常卿懷恪業茂勳賢地華簪紱佩忠信而行己包禮樂以資身守節安卑幽貞自適養蒙全正聲利不營雖與善無徵促齡悲於逝躋而積善垂祐餘慶光於後昆故得業濟艱難功參締構出有藩條之寄入多爪牙之位以德遷禮宜加等父由子貴贈合超倫宜登八座之榮式慰九原之路又贈工部尚書襄異之典於斯爲盛臧氏自驃驍而下世以材雄朔陲尙書旣還特以功懋當代兄弟子姓勳賢間出自天寶距於開元乘朱輪而拖珪組者數百人迨於今茲繁衍彌熾縮軍州而握兵要者相望國都有後之慶固殊異於他族者矣真卿早歲與公兄子謙爲田蘇之游敦伯仲之契晚從大夫之後每接常寮之歡故公之世家竊備聞見敢述遺烈將無媿辭銘曰

魯史襄者臧孫有之陳魚則諫納鼎以規沒貴言立時稱聖爲仁昭典墳知叶著龜世濟忠肅道光羽儀以

至夫公英明雄毅鶚視騰彩龍驤作氣鋒淬霜稜妙窮金匱謀猷泉寫翰墨風駛儒勇是兼勳庸以位介駝戎馬
猛奮虓虎絕漠援孤連兵戰苦萬虜鳴鏑紛紛如雨一身抗詞諤連柱精貫雲日氣雄鉦鼓狄人義激僕固誠全
眇漫窮裔隨降幾千野靜沙雪風恬塞煙我騎如雲我旗連天牧無南向凱有北旋天子休之命侯開國謂福而
壽康衢騁力奚命之遭幽局是卽十城玉折萬里鵬息陣雲蒼蒼日暮無色令人趨奉天眷孔明九原不作八座
哀榮勇列徽範方時懿名里成冠蓋族茂簪纓萬古千祀瞻言涕零

有唐開府儀同三司行尚書右丞相上柱國贈太尉廣平文貞公宋公神道

碑銘大歷五年十二月

於戲逆鱗廟上匡救之義深守死不回人臣之致極况乎文包風雅道濟生靈建一言而天下倚平含九德
而三光式序超無友而獨立者其惟廣平公乎公諱璟字（闕二字）邢州南和人其先出於殷王元子七代祖
弁魏吏部尚書襲列人子祖欽道北齊黃門侍郎並事跡崇高各見本傳高祖元節定州田曹曾祖宏俊大理丞
祖務本皇櫟陽令父元撫衛州司戶贈戶部尚書自田曹至於尚書皆實浮於名而位不充量事見許公蘇頌所
撰神道碑公七歲能屬文一遍誦鵬鳥賦丁尚書府君憂水漿絕口者五日八九歲時嘗夢大鳥銜書吐公口中
公吞之遂乘而直上倏忽驚寤猶若下在胸閉自後藻思日新襟懷益爽年十六七時或讀易曠時不精公遲而
覽之自亥及寅精義必究明年進士高第補上黨尉轉王屋主簿相國蘇味道爲侍御史出使精擇判官奏公爲
介公作長松篇以自興梅花賦以激時蘇深賞歎之曰眞王佐才也轉合官尉長壽三年從調判入高等有司特
聞天后親問所欲公以代爲唐臣不求榮達詭奏云家本山東願得魏之一吏遂手詔授錄事參軍拜舞趨出后

異而召還又手詔拜監察御史裏行尋丁齊國太夫人憂服闋築室反耕志圖不起俄而卽眞遷殿中侍御史同列有博於臺中者將責名品而黜之博者惶恐自匿翌日公獨正辭引過天后悅而釋之遷天官員外郎鳳閣舍人御史中丞乃謂所親曰吾比欲優遊自免不圖要近驟至於斯敢廢所職乎乃悉心納忠無所迴避時張易之昌宗兄弟席寵脅權天下側目公危冠入奏奮不顧身天后失色蒼黃欲起公叩頭流血誓以死爭拾遺李邕奏曰陛下坐則天下安起則天則危內史令敕公出公曰天顏咫尺親奉德音不勞宰臣擅宣王命詞氣慷慨左右震悚遂俱攝詣臺庭立切責二豎股栗氣索不敢仰視自朝至於日昃敕使馳救之公不得已而罷又令詣公謝罪公拒之後有慘恤二豎來弔公辭曰貴近不宜與執法通問假滿朝士慰公二豎又欲序進公舉板迎揖之不得成禮而去神龍之興復也公實佐其謀及當疇庸讓而不受曰清宮問罪事出五王祀夏中興功歸明主非曰逃賞誰敢貪天俄拜朝散大夫吏部侍郎兼諫議大夫遷黃門侍郎嘗遇梁王武三思於朝三思方欲言事公正色謂之曰當今復子明辟王宜以侯就第何得尙干朝政三思慚懼而退請恙累月俄而兼攝尙書左丞中宗將幸西蜀深虞北鄙乃兼檢校并州大都督府長史又改兼貝州刺史與數人同辭三思獨揖公住公顧謂之曰諸人已出不可獨留遂揖之而去屬年穀不登國租罷入三思食邑公悉蠲之旣屢挫其鋒亦處之自若俄而眞拜轉杭州又復遷相州尋入爲洛州長史唐隆初拜吏部尙書同中書門下三品粵五日兼右庶子薛加銀青光祿大夫元宗之在儲闈鎮國太平長公主潛謀廢立嘗於光範門內坐步檐中諷幸臣以此旨諸相失色莫敢先言公盛氣詰之曰東宮有大功宗廟社稷主也安得異議遂奏婦人干政恐生禍階請不令朝謁俄而男又縱橫公奏之繇是貶楚州刺史主亦竟以凶終無何復拜銀青歷魏克冀三州兼河北按察使尋遷幽州都督兼御史大夫復爲魏州入爲國子祭酒東都留守開元二年尋拜御史大夫兼京兆尹貶睦州刺史轉廣州都督充按察經略討擊使又兼御史大夫特許便宜從事前是首領桀驁多據洞不賓公之下車無敢不葺彼之風俗競趨荀簡

茅茨竹櫨比屋鱗次火災歲起煨燼無餘公教之度材變以陶瓦千葦齊翼萬堵皆興於今賴焉燕國公張說著
爲碑頌無何使中官楊思勳召公公拜恩而就馬便行在路竟不交一言思勳以將軍貴幸泣訴於帝帝嗟嘆久
之拜刑部尚書四年遷吏部兼黃門監監修國史五年復兼侍中明年駕幸東都至三嶠馳道險隘行不得前河
南尹李朝隱知頓使中王怡並坐當降黜公奏曰必若致罪二臣將來必受其弊遂命公舍之曰陛下責之以臣
言免之是還歸於上恩由於下臣請使且待罪然後俾其復職上嘉而從之元宗嘗命公名諸皇子及公主邑號
旣而又令各定一美名公奏稱七子均養鳴鳩之德錫以名號不宜有殊若母寵子愛恐非正家之道王化所宜
元宗說而從之八年拜開府儀同三司進爵廣平郡開國公策勳上柱國狂豎權梁山構逆長安有司深探其獄
敕公按覆如京兆司錄李如璧等百餘家皆以借宅假器悉當連坐公以婚姻假借天下大同至於京城其例尤
衆知情卽是同反無罪不合論辜凶渠之外一切原免天下欣服焉中書令河東張公傑出將明之材獨運廟堂
之上鏡機朗澈見事風生求公規模悉閱堂案每至危言讜議執正守中未嘗不廢卷失聲汗流浹背其爲通賢
所服也如此十三年（新舊書皆作十二年）駕幸東都以公爲西京留守公極言得失無有所隱元宗感悅制曰
所奏之言置之座右出入觀省以誠終身因賜綵物二百匹明年又兼吏部十七年拜尚書右丞相雅善戲謔不
常矜莊與故戶部尚書王峻爲莫逆之友晚而彌篤凡所談諧人輒疏取端五日蒙賜鍾乳命醫歸鍊或以爲上
藥異味不宜委之公曰推誠求信猶懼不應猜以待人信其可得聞者慚退二十一年（新舊書皆作二十年）抗
疏告老至於再三手詔優許遂特給全祿賜絹五百匹還東京公以爲大臣歸休不宜關通人事遂杜絕賓客其
年（新舊書皆作二十二年）駕幸洛陽公迎拜道左元宗親駐龍蹕使榮王琬勞問者數四自後中使往來賞賚
不絕方崇乞言之典以極師臣之敬二十五年仲冬月十九日寢疾薨於東都明教里第享年七十五天下失聲
元宗震悼追贈太尉諡曰文貞公賻物米粟常數有加喪葬官供仍詔河南少尹崔釋之充監護使夫人齊國夫

人博陵崔氏滄州長史藝之女淑慎嚴整高明柔克訓諸子而慈且有威佐丞相而德無違者門內之理一以見
容驩公而沒允終偕老嗚呼公有七子復同州司功先公而卒昇尚書郎太僕少卿尚漢東太守渾職方郎中諫
議大夫御史中丞東京畿採訪使太子左諭德恕都官郎中延原少尹華判入高等登封尉尉氏令衡右散騎常
侍兼御史中丞河南節度行軍司馬或肅或又或哲或謀克爲前烈以休令聞以戊寅歲五月二十九日處奉遺
約歸葬公於沙河縣太尉鄉丞相原之先塋夫人合而祔焉禮也惟公間氣降神應期傑出生知禮度天縱才明
玉立殿天子之拜介然秉大臣之節震電憑怒讜言而不有厥躬鼎鑊沸前臨事而義形於色蠶迪檢押難常情
之所易志深直諫易古人之所難外其身而富貴不離行其道而死生勿替非夫合一之德格於皇天不二之心
形於造次則何以異是乎允所謂振古之元龜皇王之威寶者矣且夫公之德烈充塞寰寓公之謀猷著明日月
大歷五年冬十二月孫儼懼遺感美不遠求蒙以眞卿天祿校文叨太僕之下列憲臺執簡承諭德之深知雖青
史傳信實錄已編於方冊而豐碑勒銘表墓願備於論譏謹憑吏部員外郎盧僊所上行狀略陳萬一多恨闕遺
其辭曰

天命元鳥降而生商湯孫之緒微子分疆詞招正則尉翼文皇吏部黃門紛綸耿光忠賢世出信史相望篤
生丞相祚我有唐文明純嘏毅烈堅剛恆衛間氣星辰降芒嶷然山立鏗爾金鏘忠孝之感人倫紀綱垂髻能文
夢鳥是祥通夕究易沖齡擅場勝冠結綬歷政洋洋乃尉合宮貳軺琅琅賦嗤梅豔篇美松長蘓公嗟稱才必佐
王滿歲從調試言高驥登聞黼屨驟列繡裳遺跡天官如圭如璋司言鳳閣綸綍煌煌乃作中丞威稜莫當志除
凶狡廷劾二張天后愕眙百寮震惶公獨凜然出身激昂義形言色精貫穹蒼皇室中興嘉謨克彰功成牢讓事
軼屠羊貳職選曹諫議是匡載清流品屢奏封章乃侍瑣闥時維夕郎悉心糾正庶績咸康三思睢盱席龍干常
恭之就第慚懼靡亢左曹攝轄大鹵於襄兼刺貝邱朋解鴈行三思揖語公獨循牆處之不忤轉旆於杭旣遷鄴

城遂尹洛陽乃作冢宰訂謨廟堂俄築宮相亟縮銀黃元宗登儲鎮國是遑潛謀廢立諸詠駟叛厥男撓政累奏愆殃幸臨楚邦游察冀方總督幽薊鸞飛國庠臣相烈烈尹京越越旋臨建德歛位南荒俚帥咸蕩茅櫓是攘張公頌德雋咏甘棠所忠來召拜命卽裝略無交言帝用式臧載司刑吏八座抑揚兼監黃樞鈞軸是將匪躬蹇蹇終始泐泐乃拜儀同允釐保障河東閱故汗洽流漿狂豎犯闕凶渠旣戕命公覆獄咸脫死亡乃陟右揆讜論泐泐每謗王君豈常矜壯懸車告老庶保康強方崇饋醕孤映繚緗天不憖遺萎哲壞梁一人震悼九有淒涼市旣罷賈春仍絕糶乃贈太尉節終禮滂返葬沙河羽儀央央闔朝傾祖河尹護喪生榮死哀行路感傷令人孺慕攀泣嗚嗚高墳崔嵬鉅鹿劇旁森梢宰樹繚繞連岡吁嗟廣平宅此不暘孝孫翼翼論譁靡忘豐碑堅礪萬古皆相

遊擊將軍左領軍衛大將軍兼商州刺史武關防禦使上柱國歐陽使君神

道碑銘大歷十年十月

使君諱璠字子璠渤海人其先出自帝顓頊高陽氏漢有歐陽伯和伯和孫高高孫地餘並列儒林晉有堅石著名文苑賢達繼軌其來邈乎六代祖僧寶始自渤海徙居長沙五代祖頽陳山陽郡公高祖紇陳開府儀同三司左屯衛大將軍交廣等十九州諸軍事廣州刺史襲山陽郡公功業並著於前史曾伯祖詢皇朝銀青光祿大夫給事中率更崇賢館學士以詞學德行見重前朝筆法孤標垂名不朽曾祖允年十七以名門子入侍見賞於太宗十八加正議大夫魯王傅奉使和突厥不拜虜廷朝廷嘉之回封南海郡公施光二州刺史祖謀洛州鞏縣令父機漢州什邡令以休懿傳世著聞於家邦使君卽什邡之第四子志尚恬曠顓精於詩易春秋尤明吏術所居則理開元十八年解褐安西大都護府參軍充陽(集本作湯)嘉惠節度推勾官外憂去職服闋補北庭大

都護府戶曹參軍節度使蓋嘉運奏授金滿令仍充營田判官以破賊功當遷請回授幼弟孤姪者三人教義者稱之二十九年河西節度使奏授晉昌郡戶曹參軍攝晉昌令轉張掖郡張掖令攝司馬知郡事按吏贓罪罪人誣訟於使司百姓苗秀康順忠等三十人皆截耳稱冤節度使王捶駭焉奏與上考轉岳州長史時屬荒旱人多萃餒君以祿奉職田并率官吏食餓者千餘人凡月餘遂多全活劍南節度使楊國忠奏知三峽轉運改衡陽郡長史賜緋魚袋天寶末羯胡作亂統江湖之兵先至南陽加賜紫金魚袋充魯旻南陽節度副使攝淮南郡長史充當郡禦防使時南陽爲賊所圍諸將選懦莫敢先救至德元載君以當郡防禦使至新野芙蓉鄉遇賊合戰斬其將犯圍而入旻壯而德之賊圍解加遊擊將軍左金吾衛中郎將兼南陽郡司馬遷右驍衛將軍兼上洛郡太守充武關防禦使肅宗降璽書云卿以特達之姿抱殊常之略武關防守委卿一人屬賊陷商於復圍南陽君屯兵於浙川以保又人吏逆賊悉力來攻六十餘日糧盡救絕遂陷賊庭賊將甘言怵君令至城下以給旻君忠勇感激舍生徇義抗聲謂旻曰鳳翔諸將已收長安唯不能效死君前辱大夫所使願大夫保守忠義克終令圖賊以兵刃毆君君志氣彌厲因被執送洛陽今天子收復兩京僅得脫禍其事具向城令王瀟南陽記旻又奏君充節度兵馬使君遂辭疾不行稅駕於鄭之別墅君所居以清白廉慎聞於朝廷祿俸之餘必調親族之貧者先疇舊業悉畀羣從一簣不私於其身常持誦金剛淨名經向逾三紀不茹暈血者十年至是無僮石之儲而處順安時不改其度蓋澹如也識者高焉粵以上元二年秋九月十四日寢疾而終春秋六十有五夫人高平徐氏安西都護高平縣公欽識之女婦順母儀克明休德以大歷二年夏六月二十五日終於岳州客舍享年五十有六其孤嵩泉中子嵩少子峯等銜恤允窮竭力襄事以大歷十年冬十月二十四日合祔君泉夫人於榮澤縣廣武原遵理命也嵩不遠千里泣而求蒙敢述無愧之詞式揚不朽之烈銘曰

猗那使君世挹清芬顓經飾吏休有令聞天子命我參卿西軍驟遷大縣克懋殊勳讓行親睦耳截冤分縻

祿食餓馳師解紛孤城再色罷卒益振磨守商於移兵浙濱綢繆宸睠焯耀天文力盡寇多師陷身屯詭詞給賊解路是羣脫禍歸朝義高天雲乞骸廷闕稅駕消溱志敦禪誦茹絕羶葷處順齊終聊樂我云刻諸金石永永不泯

銀青光祿大夫海濮饒房睦台六州刺史上柱國汲郡開國公康使君神道

碑銘大歷十一年

君諱希銑字南金其先出於周武王同母少弟衛康叔封之後也史記云成王長用事舉康叔爲周司寇賜衛寶祭器以彰有德封子康伯支庶有食邑於康者遂以爲氏焉代爲衛大夫至漢有東郡太守超始居汲郡超之裔孫魏強弩將軍權權生晉虎賁中郎泰泰生(闕)太守威威生蘭陵令奮節將軍翼隨晉元帝過江爲吳興郡丞因居烏程事見山謙之吳興記翼生豫章太守鎮鎮生征虜司馬建武將軍欽信欽信生宋晉熙王兵曹參軍黯黯生南臺郎高高生齊驃騎大將軍孟眞孟眞生梁散騎侍郎僧朗僧朗生陳給事中五兵尚書宗諤爲山陰令子孫始居會稽遂爲郡人焉會租孝範江夏王府法曹臨海縣令租英隋齊王府騎曹江寧縣令皇朝隨郡王行軍倉曹父國安明經高第以碩學掌國子監領三館進士教之策授右典戎衛錄事參軍直崇文館大學助教遷博士白獸門內供奉崇文館學士贈杭州長史君卽長史府君之叔子也年十四明經登第補右內率府曹曹應詞藻宏麗舉甲科拜祕書省校書郎轉左金吾衛錄事參軍應博通文史舉高第授太府寺主簿轉丞又應明於政理舉拜洛陽河清令加朝散大夫涇州司馬德州長史轉定州屬突厥侵疆君以偏師抗之遷海州刺史上功以敕書賜方岳繡袍一領雜綵二百段下車未幾詔擇政術尤異者察使奏公恩制褒異遷濮州加銀青光

祿大夫累封汲郡開國公策勳上柱國轉饒州入爲國子司業以言事貶房州轉睦州遷台州所至之邦必聞美政開元初入計至京抗表請致仕元宗不許仍留三年請歸鄉敕書褒美賜衣一襲並雜綵等仍給傳驛至本州冬十月二十有二日不幸遘疾薨於會稽覺允里第春秋七十一夫人陳郡殷氏太子中舍人聞禮之會孫右清道率令德之孫洛州錄事參軍子恩之第五女睿宗先天二年封丹陽郡夫人公薨之年沒於東都章善坊私第春秋六十九嗣子朝散大夫婺州司馬襲汲郡公元瑛會稽縣男元瑾宣州司士京兆府奉先尉會稽縣男元瑒朝議郎前策獲嘉丞元瓊等虔以天寶四載七月四日窆於山陰縣籬渚村之先塋卜遠日而合葬焉禮也嗚呼君負不器之姿包周身之智寬仁且惠慤愿而恭金玉其相敬明其道文意麗藻二雅所祇政事優長百僚所則嘗撰自古以來清白吏圖四卷仍自爲序贊以見其志宰相黃門侍郎韋承慶中書舍人馬吉甫等美而同述焉盛行於世赴海州時君兄德言爲右臺侍御史弟爲偃師令俱以詞學擅名時同請歸鄉拜掃朝野榮之與狄仁傑岑羲韋承慶嗣立元懷景姚元崇友善至是咸傾朝同賦詩以餞之近代未有此比君之四代祖至於大父爲諸王接屬者七人歷尚書郎給事中侍御史者二人君之先君崇文學士府君有文集十卷注駁文選異義二十卷漢書(闕一字)十卷自述文集二十卷元昆修書學士顯府君文集十卷撰詞苑麗則二十卷海藏連珠三十卷累璧十卷姪祕書監集賢院侍講學士(闕一字)元撰周易異義二十卷秀州長史元瓊著千祿寶典三十卷姪刑部員外郎璫男美原尉南華撰代耕心鏡十卷(闕六字)百二十卷君之先君至南華四代進士登甲科者七人舉明經者一十三人時君(闕五字)門頗威美矣君之女曰辨惠監厓縣令陝郡長史郃象錢之妻君之孫台州司戶參軍(闕三字)先歲而卒汾州司田參軍真弼德州平昌縣令輔文崇文學生曙懷州武陟尉愴宣州南陵尉渭鄉貢明經緯綸皆修身踐言敦詩說禮紹承餘訓克稟義方及君告老鄒自然陳光璧閻邱景陽陶暹送越州邑子謝務遷僧陸鑿校書郎陳齊卿恆爲文酒之會論者休焉愜求舊之念崇乞言之禮天乎不愆其

恨若何大歷十一年元環（闕九字）乞願言刊勒懼沒徽猷求無愧之詞垂不朽之事願爲末學曷足當仁銘
曰

汲公恂恂德懋而淳濟濟多士東南有筠緝熙代業詞章發身佐軍貔虎典校麒麟三擢昆玉再司（闕二
字）鵬翔海內驥展河澗驟貳嘉州錫命斯頻繡寵方岳榮加摺紳六登（闕一字）洽膠庠（闕六字）華墓
表申（闕二字）見節文昭友仁懸車告老衣錦頤神連璧襲懿梓澤齊彬饋醕未濟春濛遽淪朝廷惋悼遠近
悲辛季子象賢恐懼鬱堦嘉猷鴻伐千秋不泯

京兆尹御史中丞梓遂杭三州刺史劍南東川節度使杜公神道碑銘大歷十

二年十一月

征鎮四出鑿門之寄崇邦畿千里內史之官最非夫任均周召名軼趙張則何以展心膂之謀光錡簡之制
者矣君諱濟字應物京兆杜陵人晉征南大將軍當陽侯元凱十四代孫周禮部侍郎殿內監甘棠公懿之來孫
隋符璽郎乾祐之元孫皇朝度支員外主客郎中續之曾孫朝散大夫明堂丞贈潤州刺史知讓之孫高陵令贈
太子少保惠之第三子也器識通簡履履坦易以文飾吏用晦而明逗機而舉無遺諳蒞事而照有餘地早歲以
寢郎從調書判超等爲李吏部彭年所賞補梁州南鄭主簿州主司馬垂爲山南西道採訪使引在幕下俄丁內
艱終制轉許州長社尉楊光翽都督隴西秦公爲法曹皇甫侁採訪江西秦公爲推官授大理司直攝殿中侍御
史賜緋魚袋尋正除殿中俄宰郿縣相國李峴尹京兆奏公爲渭南尉僕射裴冕爲劍南節度奏公爲成都令遷
緜州刺史賜紫金魚袋屬徐知道作亂使裨將曹懷信招公公執以歸朝除戶部郎中加朝散大夫廣德中檢校
駕部郎中上柱國公善與人交於嚴武情均莫逆再充劍南節度爲武行軍司馬郭英乂之代武也矯宣恩命毀

元宗宮爲節度使宅公驚其異謀使疾不視事今司空冀國公崔寧旣誅英又請知使事公堅臥不起仍俾通泉令前殿中侍御史韋都賓密使家僮潛表事實大歷初杜鴻漸分蜀爲東西川公爲副元帥判官知東川節度拜大中大夫縣劍梓遂渝合龍普等州都防禦使梓州刺史兼御史中丞公以威信馭戎寬明莅俗克念八州之地綏靖兩川之人朝廷嘉之尋拜東川節度使俄而移軍復爲遂州都督徵拜給事中開歲拜京兆少尹明日遷京兆尹出爲杭州刺史不逾周歲風化大行不幸感疾又聞代到請尋醫於晉陵以大歷十二年歲次丁巳秋七月二日辛亥薨於常州之別館春秋五十有八夫人京兆韋氏曰平仲房州刺史景駿之孫禮部尚書琅瑯王邱之外孫太子中舍迪之第三女也精識高明正家柔克移天有幹夫之蠱宜室多綏族之仁六姻稱其壺則四德被於彤管生三子四女而公卽世夫人書哭茹毒星言割哀留子壻祕書省校書郎范陽盧少康泉二子匡陟緝寧家殘獨與子肅匍匐萬里以祗護喪櫬冬十一月至上都二十四日壬申虞空公於萬年縣洪原鄉之少陵原祔先塋也仍自爲祭文以抒意其略曰周旋吳蜀備歷艱危不陷寇難賴君攜持一朝孤立更復何衣魚失水而鱗悴樹無枝而葉萎詞理精婉才情懇到聞者傷愍焉於戲公以傑俊之材當艱虞之際伸其智略宣力感時頡頏鷺鷥之間總統龍犀之節旋登瑣闥驟陟尹畿方當焜燿高衢升凌台序而一麾出守鍛翻江皋竟吉往而凶歸齋此志而沒地吾道慙矣真卿何幸得忝維私未終倚玉之歡遽切據梧之恨吁足痛也銘曰

杜侯峨峨令聞猗那其用於世爲猷匪他理稱易簡政絕煩苛州縣發跡雲霄切摩化存江澹威肅岷峩巴蜀靖謚精誠孔多瑣闥久拜亞尹過過始陟京兆旋移浙河云如不弔遭此凶瘞哲婦哭晝護喪奔波附於先壟映蔚條柯焉用表德勒銘墳阿

案唐書宰相世系表載濟爲高陵令惠之子此碑及墓誌皆云惠之第三子表闕其長次二子表又載濟五子匡陟緝寧揚集載此碑及墓誌皆云三子而以揚爲肅碑云泉二子匡陟緝寧家殘獨與子肅匍匐護櫬蓋緝

寧家殘四字爲句輯和也寧安也用湯誓輯寧爾邦家語謂其妻韋氏留二子匡陟料理家事之殘缺而攜其
季子^多挨欄於常州也世系表據此碑錄人誤以緝寧爲二子之名故云五子全唐文據表改碑云泉四子匡陟
緝寧則下家殘二字不成句矣今仍從集本訂正

神道碣銘

杭州錢塘縣丞殷府君夫人顏君神道碣銘

君號真定琅琊臨沂人北齊黃門侍郎之推府君之元孫皇朝秦王記室思魯府君之曾孫著作郎宏文崇賢學士勸禮府君之孫皇曹王侍讀贈華州刺史昭甫府君之季女錢塘丞殷履直之妻也聰慧明達發乎天性孝仁敬讓迥出人表精究國史博通禮經問無不知德無不傳其在家也九族仰其盡儀其移天也六姻賴其任恤天后當宇旁求女史太夫人殷氏以彤管之才膺大家之選召置左右不遑顧復二弟曰祕書監元孫府君太少保惟貞府君藐焉始孩頃隔怙恃君躬自誨育教之詩書悉擅大名皆君力也叔父吏部郎中敬仲府君爲酷吏所誣君率二妹宜芳令裴安期妻司業岑獻妻割耳訴冤因獲減死及誕男成已而左耳缺焉君有三子長曰武康丞嘉紹尤工小篆爲寸字飛白勁利絕倫紹子壻中柳芳今之良史芳子太樂令冕幼立威名次曰處士齊望有成人之姿幼曰晉州長史成已推善墳書兼綜才藝鳴謙勇退不登清秩每與文士族祖濬武平一呂因李叟陳齊卿族舅斤朝內弟曜卿允南姨弟劉瑾族弟寅同賦詩多擅警絕之句六女長適李氏生安陸令銓孝養於君次適王元淑著漢春秋次適蔡九言生燕學士(闕)爲當代之冠次適顏昭粹粹女適司勳郎(闕)才器爲海內(闕)楊欽生濯季淮幼適我兄闕疑仁親友悌有(闕)度爲尼感殊(闕)慈明及女媁真卿童孺時特蒙君教言辭音剖(闕)延壽王孫賦崔氏飛龍篇江淹造化篇五都賦不幸開元二十五年秋七月有五日以隨牒終於成已尉氏尉之公館享年八十四粵以明年春正月合祔於東京萬安山之王寶原禮也嗚呼君全德內充慈仁外被才明可以升博士法度可以律母師雖偕老不俱無石窳魚軒之貴而長筵律屢多鏘鳳

乘龍之歡於足云也眞卿不敏夙承誨誘追深仁而莫逮謀不朽其庶茲銘曰

於惟我姑德感才僂受深倫育耳割冤蘇惠及疎賤仁涵朽枯孫宴喜龍鳳相趨教我音辭王孫五都期頤未究人世俄殊刻石墳阿聲流八區

表墓碑銘

唐故容州都督兼御史中丞本管經略使元君表墓碑銘 并序大歷七年十一

月

嗚呼可惜哉元君君諱結字次山皇家忠烈義激文武之直清臣也蓋後魏昭成皇帝孫曰常山王遵之二代孫自遵七葉王公相繼著在惇史高祖善禕皇朝尚書都官郎中常山郡公會祖仁基朝散大夫襄信令襲常山公祖利貞霍王府參軍隨鎮改襄州父延祖清淨恬儉歷魏城主簿延唐丞思問輒自引去以魯縣商餘山多靈藥遂家焉及終門人諡曰太先生寶應元年追贈左贊善大夫君聰悟宏達倜儻而不羈十七始知書乃授學於宗兄先生德秀著說楚賦三篇中行子蘇源明駭之曰子居今而作眞淳之語難哉然世自澆浮何傷元子天寶十二載舉進士作文編禮部侍郎陽浚曰一第汙元子耳有司得元子是賴遂登高第及羯胡首亂逃難於猗玗洞因招集鄰里二百餘家奔襄陽元宗異而徵之值君移居灤溪乃寢乾元二年李光弼拒史思明於河陽肅宗欲幸河東聞君有謀略虛懷召問君悉陳兵勢獻時議三篇上大悅曰卿果破賊朕憂遂停乃拜君右金吾兵曹攝監察御史充山南東道節度參謀仍於唐鄧汝蔡等州招緝義軍山棚高晃等率五千餘人一時歸附大壓賊境於是思明挫銳不敢南侵前是泌南戰士積骨者君悉收瘞刻石立表命之曰哀邱將吏感焉無不勇勵

璽書頻降威望日崇時張瑾殺史翽於襄州遣使請罪君爲奏聞特蒙嘉納乃眞拜君監察仍授部將張遠帆田瀛等十數人將軍屬荆南有專殺者呂誣爲節度使誣辭以無兵上曰元結有兵在泌陽乃拜君水部員外郎兼殿中侍御史充譴節度判官君起家十月超拜至此時論榮之屬道士申泰芝誣湖南防禦使龐承鼎謀反並判官吳子宜等皆被決殺推官嚴郢坐流俾君按覆君建明承鼎無辜獲免者百餘家及譴卒淮西節度使王仲昇爲賊所擒裴茂與來瓊交惡遠近危懼莫敢誰何君知節度觀察使事經八月境內晏然今上登極節使留後者例加封邑君遜讓不受遂歸養親特蒙褒獎乃拜著作郎遂家於武昌之樊口著自釋以見意其略曰少習靜於商餘山著元子十卷兵起逃難於猗玕洞著猗玕子三篇將家灑濱石本灑作讓乃自稱浪士著浪七篇及爲郎時人以浪者亦漫爲官乎見呼爲漫郎著漫記七篇及家樊上漁者戲謂之聲叟闕八字又以君漫浪於人間或謂之漫空歲餘上以君居貧起家爲道州刺史闕二字州爲西原賊所陷人十無一戶纔滿千君下車行古人之政二年間歸者萬餘家賊亦懷畏闕二字不敢來犯旣受代百姓詣闕請立生祠仍乞再留觀察使奏課第一轉容府都督兼侍御史本管經略使仍請禮部侍郎張謂作甘棠頌以美之容府自艱虞以來所管皆固拒山谷君單車入洞親自撫諭六旬而收復八州丁陳郡太夫子憂百姓詣使請留大歷四年夏四月拜左金吾衛將軍兼御中丞管使如故君矢死陳乞者再三優詔褒許七年正月朝京師上深禮重方加位秩不幸遇疾中使臨問者相望夏四月庚午薨於永崇坊之旅館春秋五十朝野震悼焉二子以方以明能世其業名雖著而官未立以其年冬十一月壬寅虔葬於魯山青嶺泉陂原禮也嗚呼君其心古其行古其言古躬是三者而見重於今雖擁旄麾幢總戎於五嶺之下彌綸秉憲對越於九重之上不爲不遇然以君之才之德之美竟不得專政方面登翼泰階而感激者不能不爲之太息也君雅好山水聞有勝絕未嘗不枉路登覽而銘贊之感中行見知之邇及亡至今分宅以恤其子其不偷也多此類中書舍人楊炎常袞皆作碑誌以杼君之德業故吏大歷令劉袞

江華令瞿令問故將張滿趙溫張協王進興等感念恩舊皆送喪以終葬塲資鬻石願垂美以迷誠真卿不敏常忝次山風義之末尚存盡往敢廢無媿之辭銘曰

次山斌斌王之盡臣義烈剛勁忠和儉勤炳文華國孔武寧屯率性方直（石本方直作直力）秉心真純見危不撓臨難遺身允矣全德今之古人奈何清賢素志莫申羣士立表垂聲不泯

墓誌銘

京兆尹兼中丞杭州刺史劍南東川節度使杜公墓誌銘大歷十二年十一月

九有無虞行師貴於衽席四方取則鉤鉅資乎浩穰誰其有之則杜公其人矣諱濟字應物京兆杜陵人皇主客郎中續之曾孫明堂令知讓之孫贈太子少保惠之第三子姿度韶舉心靈敏達在家必聞既蘊睦親之志所居則化多稱不器之能解褐南鄭主簿州主司馬垂引在使幕轉長社尉隴西法曹皇甫侁江西採訪奏爲推官授大理司直攝殿中侍御史賜緋魚袋尋正除殿中歷宰鄜渭南成都三縣縣州刺史賜紫金魚袋戶部郎中加朝散大夫廣德中檢校駕部郎中上柱國充嚴武劍南行軍司馬杜鴻漸分蜀爲東西川以公爲副元帥判官知東川節度拜太中大夫緜劍梓遂都防禦使梓州刺史兼中丞時寇盜充斥公示以威信八將之不隕公之力焉尋拜東川節度使俄而移車復爲遂州都督徵拜給事中閏歲拜京兆少尹明日遷京兆尹出爲杭州刺史公務清簡庭落若無吏焉不幸感風疾以大歷十二年歲次丁巳秋七月二日辛亥薨於常州之別館春秋五十有八夫人京兆韋氏太子中舍迪之第三女也沈敏精深高明柔克幹夫之蠱以懋厥家凡生三子四女而公卽世夫人星言晝哭躬護櫬榘與子肅以冬十一月二十有四日王申歸窆公於萬年縣洪原鄉之少陵原祔先塋也

嗚呼以公之志業才力宜其振揮鱗鬪凌厲清淨而命迄成山功虧長世吁足恨也眞卿忝居友壻亟接周行痛音徽之永隔感存歿其何已銘曰

藹藹禹禹時維杜公業光臺省政治軍戎乃尹京乃麾江東帝方俟理命則不融內子護喪哀哀送終

墓碣銘

曹州司法參軍祕書省麗正殿二學士殷君墓碣銘大歷五年五月

善父母之謂孝睦昆友之謂悌孝悌也者其仁之本歟經天緯地之謂文博古知今之謂學文學也者其德之蘊歟誰其兼之卽我伯舅殷君其人矣君諱踐猷字伯起陳郡長平人五代祖不害以孝見梁書高祖英童問御正大夫麟趾學士會祖閩禮唐太子中書舍人宏文館學士祖令言校書郎淄川令父子敬太常博士吳令累葉皆以德行名義儒學翰墨聞於前朝君卽吳縣之元子幼而聰悟絕倫長而典禮不易年十三日誦左傳二十五紀讀稽聖傳一遍亦誦之博覽羣言尤精史記漢書百家氏族之說至於陰陽數術醫方刑法之流無不該洞焉與賀知章陸象先我伯父元孫韋述友善賀呼君爲五總龜以龜千年五聚問無不知也君性方正志業淳深識理清遠人皆望而服之解褐杭州參軍刺史宋璟以相國之重簡貴自居無所推揖每見君必特加禮敬凡政事之譏誣者皆咨決焉開元初舉文儒異等授祕書省學士尋改曹州司法參軍麗正殿學士與韋述袁暉同修王儉今書七志及羣書四錄流別銓次皆折衷於君璟與蘇頲旣入相每引君詢以當代之務友于兄弟羣從宗黨必盡糾綏之恩長妹蘭陵郡太夫人眞卿先妣也中年孀嫠遺孤十人未能自振君悉心訓獎皆究恩意故能長而有立開元九年秋七月九日有叔父臨黃尉子元之喪哀慟嘔血終於京師通化坊之私第夫人蘭陵蕭氏

空瑀之元孫括州司馬宋國公興宗之女賢和齊肅秉修禮度能讀論語周易泛觀史傳率諸婦以和義故閨範修睦焉君之捐館以清白留遺家道率然夫人躬甘菲糲勸勉桑穡晏息晨興以率勵僮僕行之數歲經費羨焉教誨三子攝賓克齊等皆克負荷攝大斌令克齊高平尉爲眞卿河東覆屯軍試判官並不幸早世寅聰達有精識能繼先父之業有大名於天下舉宏詞太子校書永寧尉筆殺謾吏貶移澄城丞久疾將歿顧瞻太夫人欲訣不忍其子監察御史亮年未志學隱而潛盡之及寅卒斬指翦髮寘於棺中誓事太夫人不敢渝常日及有疾不脫衣帶者數年故白燕巢於苦楮乾元元年太夫人季女適於邠州司馬陸超板輿隨牒俄而遽疾三月朔日終於超之官舍春秋八十有一龜茲未從因權殯於三水亮以校書郎遷壽安尉爲眞卿荆南節度推官廣德二年十有二月與弟令榮陽尉永匍匐徒步力護雙櫬合柩君夫人於新安縣之龍澗原三子瑩從理命也嗚呼以君之才之美被服純行加人數等清修素業爲代元龜竟不得贊皇極而叶彝倫登泰階而儀百辟不其惜乎嗟乎仲尼聖者也終於魯司寇而君官與之比公明達者也年纔四十八而君壽與之齊豈聖賢之道有遭遇乎將運命之數有窮通乎茲小子所以獻疑而述報施也大歷五年夏五月眞卿以恩宥刺撫於州採石刻頌用寄碣於墓左銘曰

殷之後昆奕葉儒門威烈存令君能濟美於穆不已明德尊令運促進道長身歿名揚教義敦令合祔先窆述遵理命哀順孫令高墳崔嵬龍澗之隈映鮮原令斯焉窆止以望君子尉營魂令

癸文

祭姪季明文乾元元年九月

維乾元元年歲次戊戌九月庚午朔三日壬申第十三叔銀青光祿大夫使持節蒲州諸軍事蒲州刺史上
輕車都尉丹陽縣開國侯眞卿以清酌庶羞祭於亡姪贈贊善大夫季明之靈惟爾挺生夙標幼德宗廟瑚璉階
庭蘭玉每慰人心方期戡穀何圖逆賊間釁稱兵犯順爾父竭誠常山作郡余時受命亦在平原仁兄愛我俾爾
傳言爾旣歸止爰開土門土門旣開凶威大蹙賊臣不救孤城圍逼父陷子死巢傾卵覆天下悔禍誰爲荼毒念
爾遺殘百身何贖嗚呼哀哉吾承天澤移牧河東泉明比者再陷常山攜爾首櫬及茲同還撫念摧切震悼心顏
方俟遠日及爾幽宅魂而有知無嗟久客嗚呼哀哉尙饗

祭伯父濠州刺史文乾元元年十月

維乾元元年歲次戊戌十月庚子朔二十一日庚申第十三姪男銀青光祿大夫使持節饒州諸軍事饒州
刺史上輕車都尉丹陽縣開國侯眞卿敢昭告於亡伯故朝議大夫濠州刺史府君之靈曰日者羯胡祿山侵擾
河洛生靈塗炭兵甲靡遺二兄杲卿任常山郡太守忠義憤發首開土門擒斬逆豎挫其凶慝先蓋授衛尉卿兼
御史中丞城孤援絕身陷賊庭聖朝哀榮褒贈太子太保甥姪八人季明盧逖等被賊害者並贈五品京官嫂及
兒女皆被拘囚審略昭宣宇宙清廓脫於賊手並得歸京眞卿比在平原遭罹凶逆與杲卿同心協德亦著微忱
二聖憫焉授戶部侍郎河北採訪招討使又遷工部憲部二尙書再兼御史大夫出爲同蒲饒三州刺史聖恩錫
類大父贈華州刺史兄弟兒姪盡蒙國恩允南授膳部郎中允臧授侍御史威明試太僕丞頰授太子洗馬頂授
協律郎頰授祕書省校書郎賜緋魚袋泉明顯頰類等並蒙遷改一門之內生死哀榮眞卿時赴饒州至東京得
申拜掃又方遠辭違伏增感咽謹以清酌庶羞之奠以伯母河南縣君元氏配尙饗

橫山廟碑

神居武陵其地有湖每出則神獸前道形如白馬

案此橫山廟殘碑也橫山未詳所在考湖州府志府城南十六里有衡山古衡橫字通用吳興掌故云諸山中惟此山橫列故名則此碑亦大歷中公在湖州時撰第所云神居武陵云云則碑無上下文可證不知何所謂耳

逸文存目

劾榮陽鄭延祚停母喪三年不葬疏

奏金吾將軍李延素召蕃客內宴引駕仗不報疏

薦安陵處士張鎬疏

奏范陽節度使安祿山反狀疏

奏安祿山反范陽至洛陽疏

招河北太守賀蘭進明討賊書

上靈武蠟丸疏

再上蠟丸疏

論宰相元載奸狀疏

上所著韻海鏡源表

上選舉利害事宜疏

右見殷亮撰行狀

乞致仕第一疏

乞致仕第二疏

乞致仕第三疏

右見舊唐書德宗紀

請修東都太廟祔主疏

右見舊唐書禮志（志云長慶六年吏部郎中鄭亞等請修祔主與建中元年禮儀使顏真卿所奏事

同）

遺表

自祭文

自爲墓誌銘

右見新唐書本傳

梓材賦

右見留元剛撰年譜（公二十六歲試進士時作）

文殊師利菩薩碑

右見公書文殊帖（僧皎然有觀立此碑詩）

江州祖亭記

右見歐陽詹弔九江驛碑材文

臨川自沈碑

右見沈顏碎碑記

湖州射堂記

和州刺史張敬因碑

右見集古錄

工部尚書郭虛己碑

富平尉顏喬卿碑

大斌令殷攝碑

顏默碑

顏允南妻陳夫人碑

慈恩寺常住莊地記

右見金石錄

元宗賢妃盧氏墓誌銘

華州刺史顏顯甫碑

右見寶刻叢編

撫州刺史張景倩清德頌

禪林寺智者禪師畫像讚

廣德軍橫山廟碑

撫州元子哲遺愛碑

右見輿地碑目

題大聖慈寺盧稜伽畫壁

右見益州金石記

元武湖記

旌儒廟碑

東莞臧氏故宅碑

右見古今石刻碑目

魯郡太守張府君碑

右見古今碑錄

與柳冕帖

右見梁溪集

古近體詩

詠陶淵明

張良思報韓龔勝恥事新狙擊不肯就含生悲摺紳嗚呼陶淵明奕葉爲晉臣自以公相後每懷宗國屯題詩庚子歲自謂羲皇人手持山海經頭戴漉酒巾興逐孤雲外心隨還鳥泯

贈裴將軍

大君制六合猛將清九垓戰馬若龍虎騰凌何壯哉將軍臨八荒烜赫耀英材劍舞若游電隨風縈且迴登高望天山白雪正崔嵬入陣破驕虜威名雄震雷一射百馬倒再射萬夫開匈奴不敢敵相呼歸去來功成報天子可以畫麟臺

案裴將軍裴旻也新唐書李白傳云文宗時詔以白歌詩裴旻劍舞張旭草書爲三絕旻嘗與幽州都督孫佺北伐爲奚所圍旻舞刀立馬上矢四集皆迎刃而斷奚驚引去其事在睿宗時見新書突厥傳王右丞維贈旻詩云腰間寶劍七星文臂上瑠弓百戰勳見說雲中擒黠虜始知天上有將軍維與魯公詩皆美其北伐事又岑參有裴將軍宅蘆管歌亦爲旻作也魯公此詩當是上元元年入爲刑部侍郎時作

刻清遠道士詩因而繼作

不到東西寺於今五十春
竭來從舊賞林壑宛相親
吳子多藏日秦王厭勝辰
劍池穿萬仞盤石坐千人金

氣騰爲虎琤臺化若神登壇仰生一捨宅歎珣珉中嶺分雙樹迴巒絕四鄰窺臨江海接崇飾四時新客有神仙者於茲雅麗陳名高清遠峽文聚斗牛津跡異心寧間聲同霄豈均悠然千載後知我揖光塵

(附)清遠道士同沈恭子遊虎邱寺有作

我本長殷周遭罹歷秦漢四瀆與五嶽名山盡幽竄及此寰區中始有近峯翫近峯何鬱鬱平湖渺瀰漫吟眺川之陰步上山之岸山川共澄澈光彩交凌亂白雲翳欲歸青松忽消半客去川鳥靜人來山鳥散谷深中見日崖幽曉非且聞子威游遨風流足詞翰嘉茲好松石一言常累歎勿謂余鬼神忻君共幽贊

(附)追和太師顏魯公刻清遠道士游虎邱詩 (趙郡)李德裕(文饒)

茂苑有靈峯嗟余未遊觀藏山在平陸壤谷在高岸岡繞數仞牆巖潛千丈幹乃知造化意回幹資奇玩鏐騰昔虎踞劍沒嘗龍煥潭黛入海底峯岑聳霄半層巒未升日哀狖寧知且綠篠夏凝陰碧林秋不換冥搜既窈窕回望何蕭散川晴嵐氣收江春雜英亂逸人掇清藻前哲留篇翰共扣哀玉音皆舒文繡段難追彥回賞徒起興公歎一夕如再升含毫星斗爛

(附)追和虎邱清遠道士詩(并序) (襄陽)皮日休(襲美)

虎邱山有清遠道士詩一首其所稱自殷周而歷秦漢迄於近代抑二千年末以鬼神自謂亦神怪之甚者格之以清健飾之以俊麗一句一字若奪若搏彼建安詞人儻在不得居其右矣顏太師愛之不暇遂刻於巖際并有繼作李太尉衛公欽清遠之高致慕魯公之素尚又次而和之顏之敘事也典李之屬思也麗并一時之寡和太元曰大無方易無時然後爲鬼神也噫清遠道士果鬼神乎抑道家者流乎抑隱君子乎詞則已矣人則吾不知也

成道自衰周避世窮炎漢荆杞雖云梗煙霞尙容竄茲岑信靈異吾懷愜流玩石澀古鐵銚嵐重輕埃漫松膏

賦幽徑蘋沫著孤岸諸蘿幄幕暗衆鳥陶匏亂巖罅地中心海光天一半元媛行列歸白雲次第散蟾蜍生夕景沈瀛餘清旦風日采幽什墨客學靈翰嗟予慕斯文一詠復三歎顯晦雖不同茲吟粗堪贊

(附) 追和清遠道士詩韻

(蘇州) 陸龜蒙 (魯望)

一代先後賢聲容劇河漢况茲邁古士復歷蒼厓竄辰經幾十萬邈與靈壽玩海嶽尚推移都鄙固蕪漫羸僮下高閣獨鳥沒遠岸嘯初風雨來吟餘鐘唄亂知何鍊精魄萬祀忽欲半寧爲斷臂憂肯作秋拍散吾聞鄴宮內日月自昏旦左有脩文郎縱橫灑篇翰斯人久冥漠得不垂慨歎庶或有神交相從重興贊

(附) 補沈恭子詩 (并序)

陸龜蒙

案清遠道士詩題中有沈恭子同遊旣爲神怪之傳得非姓氏諡得恭子若趙宣子韓獻子之類邪恭子美諡也而詩中有風流詞翰之稱豈獨唱而不和者歟疑闕其文以爲恭子之恨乃作一章存於編中亦補亡之義也

靈質貫軒昊遐年越商周自然失遠裔安得怨寡儔我亦小國裔易名歎見優雖非放曠懷雅奉逍遙遊攜手桂枝下屬詞山之幽風雨一以過木麓颯然秋落日倚石壁天寒登古邱荒泉已無夕敗葉翳不流亂翠缺月隱衰紅清露愁覽物性未逸反爲情所囚異才偶絕境佳藻窮冥搜虛傾寂寞因敢作雜珮酬案魯公詩及清遠道士原作摹入宋留元剛所刻忠義堂帖後有大歷五年十二月刑部尚書顏真卿書十七字永泰二年魯公以刑部尚書貶爲峽州別駕至大歷十二年始復爲刑部尚書大歷五年公方爲撫州刺史題銜書前刑部尚書撫州刺史可也不應仍署刑部尚書銜其時公在撫州亦無由得至吳郡唐避國諱改虎邱作武邱詩題不應仍稱虎邱魯公書虎字皆缺未挑帖本不缺詩中且字及珉字偏旁之民皆唐代廟諱帖亦直書不避謂此帖爲魯公書則種種可疑然其詩則確爲公作而書與款蓋後人僞託也此詩之作應在大歷六年罷撫州

事移寓江寧時繞道吳郡而作詩云不到東西寺於今五十春公卒於貞元年年七十七歲逆推至大歷六年公年六十三歲又逆推而上五十年爲開元十年公年方十有四歲公撰舅父殷踐猷墓碣云父子敬太常博士吳令公母蘭陵郡太夫人爲子敬長女公幼而孤其至吳郡蓋侍母氏隨外祖子敬之任故知此詩確爲公作清遠道士及沈恭子不知爲何時人魯公詩曰悠然千載後則以爲秦漢仙者以詩體而論蓋亦唐人也不今以李文饒及皮陸和作彙錄於後以見一時追和之盛

題杼山癸亭得暮字原注亭陸鴻漸所建

杼山多幽絕勝事盈跬步前者雖登攀淹留恨晨暮及茲紆勝引曾是美無度歛搆三癸亭實爲陸生故高賢能泐物疏鑿皆有趣不越方丈間居然雲霄遇巍峨倚修岫曠望臨古渡左右苔石攢低昂桂枝蠹山僧狎猿狖巢鳥來枳棋俯視何楷臺傍瞻戴禹路遲迴未能下夕照明村樹

案湖州府志杼山妙喜寺有晉吳興太守何楷釣臺又州東北十八里有戴山譙郡戴萬嘗遊此魯公詩云俯視何楷臺傍瞻戴禹路謂此癸亭卽三癸亭見公所撰杼山妙喜寺碑記以下詩三首皆大歷八年公在湖州時作

謝陸處士杼山折青桂花見寄之作

羣子遊杼山山寒桂花白綠萼含素萼采折自逋客忽得巖中詩芳香潤金石全高南越蠹豈謝東堂策會
愜名山期從君恣幽覲

贈僧皎然

秋意西山多別岑，繁左次繕亭歷三癸趾趾（一作疏趾）鄰什寺元化隱靈蹤始君啓高致（一作誄）誅榛養翹楚，鞭草理芳穗，俯砌披水容，逼天埽峯翠，境新耳目換，物遠風塵（一作烟）異，倚石忘世情，援雲得真意，嘉林幸勿翦，禪侶欣可庇，衛法大臣過，佐遊羣英萃，龍池護清澈（一作澈）虎節到深遠，徒想鱗頂期，於今沒遺記。

案此詩一作皎然詩，題爲奉和顏使君眞卿與陸處士羽登妙喜寺三癸亭異者，惟疏誄烟澈四字，第九聯衛法大臣過作魯公詩，當是指浙西觀察使袁高巡部過寺，佐游羣英萃，則指同修韻海諸生也，作皎然詩則衛法大臣指魯公言，然以作皎然詩爲當，以舊載公集仍之。

登平望橋下作

登橋試長望，望極與天平，際海蒹葭色，終朝鳧雁聲，近山猶（一作全）髣髴，遠水忽微明，更覽諸公作，知高題柱名。

案平望驛今在蘇州府震澤縣，唐時其地屬湖州烏程縣，湖州天寧寺有唐刻斷幢，題曰大唐國浙西道湖州烏程縣澄源鄉宜陽里居平望驛南弟子芮文琛云云，可證此題作平望橋詩，云際海蒹葭色，卽其地也，此詩亦魯公刺湖州時作。

使過瑤臺寺有懷圓寂上人并序

眞卿昔以天寶元年尉醴泉亟過瑤臺寺園寂上人院秩滿遷監察御史巡覆諸陵而上人已去（一作離）此寺大歷十三年春二月以刑部尚書謁拜昭陵慨然有懷

上人居此寺不出三十年萬法元無著（一作靈法盡無染）一心唯趣禪忽紆塵外軫遠訪區中（一作世間）緣及爾不復見支提猶岌（一作巖）然

五雜組擬作

五雜組繡與錦往復還興又寢不得已病伏枕

（附）同擬五人作

五雜組盤上菹往復還頭梳不得已晷裏魚（李嶠）

五雜組郊外蕪往復還櫪上駒不得已谷中愚（殷佐明）

五雜組酒與肉往復還東籬菊不得已醉便宿（袁高）

五雜組闌闌間往復還門上關不得已鬢毛斑（陸士修）

五雜組繡紋線往復還春來燕不得已從征戰（蔣志）

重擬五雜組

五雜組甘鹹醋往復還烏與兔不得已韶光度

（附）同擬三人作

五雜組四豪客往復還阡與陌不得已長沙謫（張薦）

五雜組五辛盤往復還馬上鞍不得已左降官（李嶠）

五雜組五色絲往復還回文詩不得已失喜期（僧清晝）

案五雜組及聯句各詩皆魯公刺湖州時修韻海招集名流而作想見政餘清暇賓從唱酬之樂此作同擬者
七人李嶠字伯高後改名華趙郡廣漢人擢制科官終廬州刺史是時以殿中侍御史辟爲防禦使殷佐明官
正字袁高字公頤東光人時爲浙西觀察使陸士修河南人嘉興縣尉蔣志祕書郎張薦字孝舉深州陸澤人
官至工部侍郎與兄蕃著弟薦皆從魯公游清晝詩僧皎然也時居杼山

登峴山觀李左相石尊聯句

李公登飲處因石爲窪尊（眞卿）人事歲年改峴山今古存（劉全白）榛蕪掩前跡苔蘚餘舊痕（裴
循）叔子向遺德山公此迴軒（張薦）維舟陪高興感昔情彌敦（吳筠）藹藹賢哲事依依離別言（強蒙）
嶇嶇橫道周迢遞連山根（范縉）餘烈爰林野衆芳楫蘭蓀（王純）德暉映巖足勝賞延高原（魏理）遠
水明匹練因晴見吳門（王修甫）陪游追盛美揆德欣討論（顏峴）器有成形用功資造化元（左輔元）
流霞方泔淡別鶴遽翩翾（劉茂）舊規傾逸賞新興麗初暉（顏渾）醉後接轟倒歸時騶騎喧（楊德元）
遲迴向遺接離別益傷魂（韋介）覽事古興屬送人歸思繁（釋清晝）懷賢久阻謝贈遠空攀援（崔宏）
八座欽懿躅高明播乾坤（史仲宣）松深引閑步葛弱供險捫（陸羽）花氣酒中馥雲華衣上屯（權器）森
沈列湖樹牢落望郊園（陸士修）白日半巖岫清風滿邱樊（裴幼清）旌麾間翠幄簫鼓來朱轡（柳淡）
間路躡雲影清心澄水源（釋塵外）萍連浦中嶼竹繞山下村（顏顥）景落全谿暗烟凝半嶺昏（顏須）
去日往如復換年涼他溫（顏頊）登臨繼風雅義激舊府恩（李嶠）

案峴山聯句凡二十九人其可攷者劉全白評事後爲膳部員外郎守池州裴循長城縣尉吳筠字貞節華陰人待詔翰林時爲道士強蒙處士善醫王純字德素萬年人魯公外甥後避憲宗諱改名紹官至寧武節度魏理評事顏峴魯公從兄之子永穆丞穆宗時授贊善大夫左輔元撫州秀才魯公門生劉茂魏縣尉顏渾魯公族弟官太子通事舍人韋介京兆人陸羽字鴻漸竟陵人拜太子文學權器時爲校書郎官至戶部員外郎柳淡字中庸河東人洪府戶曹參軍釋塵外自號北山子顓頊項皆魯公族姪其不可攷者惟范縉楊德元史仲宣裴幼清四人而已四人中惟楊德元見於杼山記寰宇通志云峴山在烏程縣南五里本名顯山以避唐諱改之晏殊類要云唐開元中李適之爲湖州別駕峴山有石觴員可貯酒五斗適之每挈所親登山酣飲望帝鄉時時以醉土民呼爲李相石罇顏真卿及門生弟姪多攜壺臚檝以遊作李相石罇聯句詩敍云因積溜深石嵌爲罇形公貯酒其中結字環飲之處吳興掌故云魯公聯句者二十有九人公之二子亦與焉內劉全白先以評事游湖後貞元爲守吳筠入嵩山爲道士來此李崿先任殿中侍御史公辟爲防禦副使左輔元先因公刺撫州增廣韻海五百卷至是來湖三教俱集且不遺後進公之襟度如是真可謂之雅集矣案李適之以天寶元年代牛仙客爲左丞相故稱左相卽杜少陵飲中八仙之一也據類要此詩尙有序今不傳峴山本顯山改名張薦詩叔子尙遺德山公此迴軒用襄陽峴山相比也峴顓頊項皆魯公從子吳興掌故以爲公之二子與焉非也公之二子妙喜寺碑云愚子頌顧家廟碑云男頤男碩頤頤當卽頌顧改名公之子又有名頤者天寶十五載年十餘歲爲質於平盧將劉正臣僧皎然詩有奉和顏使君二十八郎隔絕自河北遠歸云相失值氛煙纔應掌上年久離驚貌長多難喜身全卽謂頤也其歸正公刺湖州時然此會則三子者皆未與也

水堂送諸文士戲贈潘丞聯句

居人未可散上客須留著莫唱阿鞞迴應云夜半樂（眞卿奉潘丞）詩教刻燭成酒任連盃酌從他白眼
看終戀青山郭（述奉陸三）林栖非姓許寺住那名約會異永和年才同建安作（羽呈權十四）何煩問更
漏但遣催弦索共說長句能皆言早歸惡（器呈然公）郵知殊出處還得同笑謔雅韻雖暫歡禪心肯拋卻（清
書上侍御）一宿同高會幾人歸下若簾開北陸風燭焯南枝鵲（崕奉潘十五）文場苦叨竊釣渚甘漂泊弱
質幸見容菲材誠重諾（述）

案此詩魯公及潘述陸羽權器清畫李崕六人聯句之作潘述時爲長城縣丞湖州府志云水堂在州治南館
驛河上舊名南堂爲一郡勝槩

水亭詠風聯句

清風何處起拂檻復縈洲（裴幼清）回人飄華幕輕來疊晚流（楊憑）桃竹今已展羽翼且從收（
楊凝）經竹吹彌切過松韻更幽（左輔元）直上青蘋末頭隨白浪頭（陸士修）山山催雨過浦浦發行舟
（權器）動樹蟬爭噪開簾客罷愁（陸羽）度弦方解愠臨水已迎秋（眞卿）涼爲開襟至清因作頌留（
清畫）周迴隨遠夢騷屑滿離憂（耿偉）豈獨銷煩暑偏能入迴樓（喬）王風今若此誰不荷明休（陸涓）
案楊憑宏農人字虛受官至京兆尹弟凝字懋功官至兵部郎中耿偉字洪源河東人右拾遺大歷十才子之
一也陸涓吳人陽翟令此詩與下溪館聽蟬詩皆有以喬字署名者疑係魯公第三兄喬卿爲富平尉者

溪館聽蟬聯句

高樹多涼吹疎蟬足斷聲（楊憑）已催居客感更使別人驚（楊凝）晚夏猶知急新秋別有情（權器）

（危湍和不似細管學難成（陸羽）當墩附金重無貪燿火明（眞卿）青松四面落白髮一重生（耿偉）向夕音彌厲迎風翼更輕（喬）單嘶出迴樹餘響思空城（裴幼清）嗟唳松間坐蕭寥竹裏聲（伯成）如何長飲露高潔未能名（清晝）

案詩內名伯成者失其姓

送耿偉拾遺聯句

堯舜逢明主嚴徐得侍臣分行接三事高興柏梁新（眞卿）楚國千山道秦城萬里人鏡中看齒髮河上有煙塵（偉）望闕飛青翰朝天憶紫宸喜來歡宴洽愁去詠歌頻（眞卿）顧盼情非一睽攜去亦頻吳興賢太守臨水最殷勤（偉）

月夜啜茶聯句

泛花邀客坐代飲引情言（陸士修）醒酒宜華席留僧想獨園（張薦）不須攀月桂何假樹庭萱（李嶠）御史秋風勁尚書北斗尊（崔萬）流華淨肌骨疏淪滌心原（眞卿）不似春醪醉何辭綠菽繁（清晝）素瓷傳靜夜芳氣滿閑軒（士修）

案此詩作者六人惟崔萬無考杼山記有後進崔密崔萬卽其人及其兄也

夜宴詠燈聯句

桂酒牽詩興蘭缸照客情（陸士修）詎歎珠乘朗不讓月輪明（張薦）破暗光初白浮雲色轉清（眞

卿)帶花疑在樹比燦欲分庭(清畫)顧以慙微照開簾識近汀(袁高)

三言喜皇甫曾侍御見過南樓玩月聯句

喜嘉客闢前軒天明淨月雲昏(眞卿)雁聲苦蟾響寒聞裏浥滴檀欒(陸羽)歡宴處江湖間(皇甫曾)卷翠幕吟嘉句恨清光留不住(李崕)高駕動清角催惜歸去重徘徊(清畫)露欲晞客將醉猶宛轉照深意(陸士修)

案皇甫曾字孝常官監察御史

七言重聯句

頃持畫簡推高步獨占詩流橫素波不是中情深惠好誰能千里遠經過(眞卿)詩書宛似陪康樂少長還同宴永和夜酌此時看碾玉晨趨幾日重鳴珂(皇甫曾)萬井更深空寂寞千方霧起隱嵯峨熒熒遠火分漁浦歷歷寒枝露鳥窠(李崕)漢朝舊學君公隱魯國今從弟子科只自傾心慙煦濡何會將口恨蹉跎(陸羽)獨賞謝吟山照耀共知殷歎樹婆娑華轂苦嫌雲路隔衲衣長向雪峯何(清畫)

送李侍御聯句

吾友駐行輪遲遲惜上春(眞卿)東西出錢路惆悵獨歸人(清畫)歡會期他日馳驅恨此身(張薦)須知貢公望從此願相因(李崕)

玩初月重遊聯句

春谿與岸平初月出谿明（張薦上十二老丈）璧彩寒仍潔金波夜轉清（李嶠）孤光遠近滿練色往來輕（眞卿）望望隨蘭櫂依依出柳城（清晝）

重送橫飛聯句

春田草木齊春水滿長溪（李嶠上十二兄）出錢風初暖攀光日漸西（眞卿）歸期江上遠別思月中迷（清晝）

案張薦字孝舉橫飛當是薦之別號此詩因送薦出郊而作前送李侍御詩薦句云歡會期他日馳驅恨此身是其留別語也既送嶠又送薦故云重送

竹山連句題潘氏書堂

竹山招隱處潘子讀書堂（眞卿）萬卷皆成裘千竿不作行（陸羽）練容冷沆瀣濯足詠滄浪（李嶠）守道心自樂下帷名益彰（裴修）風來似秋興花發勝河陽（康造）支策曉雲近援琴春日長（湯清河）水田聊學稼野圃試條桑（清晝）巾折定因雨履穿寧爲霜（陸士修）解衣垂蕙帶拂席坐藜牀（房夔）檐宇馴輕翼簪裾染衆芳（顏榮）草生還近砌藤長稍依牆（顏顥）魚樂憐清淺禽閑憇頤行（顏須）行當作頤）空園種桃李遠墅下牛羊（韋介）讀易三時罷圍碁百事忘（李觀）境幽神自王道在器猶藏（房益）晝讞山僧茗宵傳野客觴（柳淡）遙峯對枕席麗藻映縑緗（顏峴）偶得幽棲地無心學鄭鄉（潘

述

案連句卽聯句也裴修前梁縣尉康造會稽人推官湯清河大理評事房夔河南人顏粲魯公族人李觀字元賓趙郡贊皇人洛陽丞遷太子校書郎房益河南人詹事司直湖州志作武康人官監察御史此詩全唐詩未載據石刻本補錄

夜集聯句

寒花護月色墜葉占風音（清晝）茲夕無塵慮高雲共片心（眞卿）

大言聯句

高歌閬風步瀛洲（清晝）燁鵬燐鯤餐未休（眞卿）四方上下無外頭（李崐）一啜頓酒滄溟流（張

薦）

小言聯句

長路迢遙吞吐絲（眞卿）蟪蛄蚊睫察難知（清晝）

樂語聯句

苦河旣濟眞僧喜（李崐）新知滿座笑相視（眞卿）戍客歸來見妻子（清晝）學生放假偷向市（張

薦）

饒語聯句

拈鎚舐指不知休（李嶠）欲炙侍立涎交流（真卿）過屠大嚼肯知羞（清晝）食店門外強淹留（張薦）

滑語聯句

雨裏下山蹋榆皮（真卿）莓苔石橋步難移（清晝）蕪荑醬醋喫煮葵（劉全白）縫靴蠟線油塗錐（李嶠）急逢龍背須且騎（益）案詩內有名益者全唐詩作李益案李君虞貞元末始以詩名於時不應大歷初卽與魯公詩會所謂益者當是河南房益竹山聯句中也

醉語聯句

逢糟遇麪便酩酊（劉全白）覆車墜馬皆不醒（真卿）倒著接鬢髮垂領（清晝）狂心亂語無人竝（陸羽）洪邁容齋三筆云陶淵明作閑情賦寄意女色蕭統以爲白玉微瑕宋廣平作梅花賦皮日休以爲鐵石心腸人而亦風流艷冶如此顏魯公集有七言聯句四絕其目曰大言樂語饒語醉語云云以公之剛介守正而作是詩豈非以文滑稽乎然語意平常無可咀嚼予疑非公詩也

句

人心無路見時事只天知（書奉使帖後）

逸詩存目

庫詩

案留元剛撰年譜云公二十六歲試進士賦此

過皎然郭中山寺 同王員外圓宿皎然寺 同袁侍

御高皎然上人登杼山上峯 同李侍御崕皎然上人游法華寺 修韻海畢會諸文士東堂重校 開元寺

經藏院立文殊師利菩薩碑 同袁侍御高駱駝橋翫月 九日登水樓 修韻海畢州中重宴 同皇甫會

西亭重會韻海諸生 登峴山送張侍御嚴歸臺 峴山送李法曹陽冰西上獻書 清明日同皎然游因送

蕭王簿存 錢宣諭蕭常侍穎士 修韻海畢東溪泛舟錢諸文士 泛舟送皇甫侍郎會 送李侍御崕

觀元真子置酒張樂舞破陣畫洞庭三山歌（元真子張志和也） 落元真子舴艋舟歌 清風樓送吳練

師筠歸林屋洞 晦月何以然集白蘋洲（以上諸詩皆魯公在湖州作僧皎然集皆有和作）

經古烈士左伯桃墓下作（墓在溧水縣見鄭薰記）

和元真子漁父詞（公與陸鴻漸徐士衡李成矩共和張志和漁父詞共二十五首今惟志和詞存見續仙

傳）

送挺贊上人歸翠微寺（見盧綸詩目）

案魯公爲吉州別駕時有廬陵集十卷爲撫州刺史時有臨川集十卷爲湖州刺史時有吳興集十卷見於唐書藝文志及行狀墓誌然公之詩亦甚夥矣歷年旣遠而所存止此蓋不及什之一也今并以見於他人詩目者載於卷後以俟能詩者爲擬作之資亦廣徵補亡之意也

上海图书馆藏書



A541 212 0009 7381B

~~5842~~
F. 35

~~1882~~

